

**Uhusiano
Kati ya Huduma Ya
YESU na Ile Ya
YOHANA MBATIZAJI
Kama Ilivyoandikwa
Katika
Injili Nne**

PAUL C. JONG





Tunapaswa Kumfahamu na Kumwamini Yesu Kikamilifu

Bwana alizichukua dhambi za wanadamu wote mara moja kwa kupitia ubatizo alioupokea toka kwa Yohana Mbatizaji, kisha akaimwaga damu yake Msalabani, akafa kwa haki, na akafufuka toka mauti. Baada ya kuwa ameupokea ule ubatizo uliotolewa na Yohana Mbatizaji, Bwana alifanyika kuwa Mwokozi aliyetuokoa toka katika dhambi za ulimwengu mzima. Hivyo, Wakristo wa leo ni lazima wafikiri na kumwamini Yesu kwa kuhusianisha na huduma ya Yohana Mbatizaji. Kwa maneno mengine, ukizingatia kuwa Yesu anawaokoa wanadamu toka katika dhambi za ulimwengu, wewe na mini ni lazima tufahamu na kuiamini huduma Yohana Mbatizaji ambayo kwa hiyo Yohana Mbatizaji alizipitisha dhambi za ulimwengu kwa Yesu mara moja na kwa wote.

Ili kufanya hivyo, kwanza ni lazima tutambue kuwa Yesu ni mwana huduma aliyeitimiza haki yote ya Mungu kwa kuupokea ubatizo toka kwa Yohana Mbatizaji kama inavyoelezwa katika injili ya maji na Roho. Wakristo wote wanaoishi leo na katika nyakati hizi ni lazima wazifahamu huduma ya Yohana Mbatizaji na huduma ya Yesu Kristo. Ni lazima turejee katika Neno la Mungu, na kisha tufikiri ni kwa nini huduma ya Yohana Mbatizaji ilikuwepo halafu tuiamini. Sasa ni lazima tuingie katika huduma ya Yohana Mbatizaji na huduma ya Yesu, kisha ni lazima tuifanye upya imani yetu zaidi na zaidi. Baada ya kufanya hivyo, wale wote wanaoishi katika dunia hii ni lazima waitarajie siku ambapo wote wataifahamu haki ya Mungu. Imani ya jinsi hiyo ni kutii mapenzi ya Mungu ambaye ni mkamilifu.

**Uhusiano Kati ya Huduma Ya YESU na Ie Ya YOHANA
MBATIZAJI Kama Ilivyoandikwa Katika Injili Nne**



Hephzibah

**Uhusiano
Kati ya Huduma Ya
YESU na Ile Ya
YOHANA BATIZAJI
Kama Ilivyoandikwa
Katika
Injili Nne**

PAUL C. JONG



Hephzibah Publishing House
A Ministry of THE NEW LIFE MISSION
SEOUL, KOREA

Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

***Uhusiano Kati ya Huduma Ya
YESU na Ile Ya YOHANA MBATIZAJI
Kama Ilivyoandikwa Katika Injili Nne***

Hakimiliki © 2012 na Kampuni ya Uchapaji ya Hephzibah

Haki zote zimehifadhiwa. Hairuhusiwi kunakiri kubadili sehemu ya kitabu hiki kwa njia yoyote ile ikiwa ni pamoja na kunakiri, kurekodi, au kukidurufu bila ya ridhaa ya maandishi toka kwa mmiliki wa kitabu hiki.

Nukuu za Maandiko ya Biblia zinatoka katika Tafsiri ya Ushirikiano wa Makanisa – Kenya (Nairobi) na Tanzania (Dodoma).

(Swahili Union version)

ISBN 978-89-282-0687-2

Jalada Limebuniwa na Min-soo Kim

Vielelezo Vimetolewa na Young-ae Kim

Kimechapishwa Nchini Korea

Hephzibah Publishing House

A Ministry of THE NEW LIFE MISSION

Seoul, Korea

♣ Website: <https://www.nlmission.com>

<https://www.bjnewlife.org>

<https://www.nlmbookcafe.com>

♣ E-mail: newlife@bjnewlife.org

Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

YALIYOMO

Dibaji ----- 7

1. Ni Lazima Uifahamu na Kuiamini Huduma ya
Yohana Mbatizaji
(Marko 1:1-2) ----- 19
2. Yohana Mbatizaji Hakushindwa
(Mathayo 11:1-14) ----- 39
3. Yohana Mbatizaji, Aliyekuja Katika Njia ya Haki
(Mathayo 17:1-13) ----- 73
4. Itazame Huduma ya Yohana Mbatizaji!
(Luka 1:17-23) ----- 103
5. Tuufurahie Utukufu wa Mungu Kwa Shukrani
(Yohan 1:1-14) ----- 133

6. Je, Unazifahamu Huduma za Watumishi Wawili wa Mungu? (Yohana 1:30-36) -----	161
7. Kwa Nini Yesu Alipaswa Kuupokea Ubatizo? (Yohana 3:22-36) -----	189
8. Ieneze Injili ya Kweli na Tendo la Haki la Yesu (Mathayo 3:1-17)-----	221
9. Uhusiano Kati ya Kazi ya Yohana Mbatizaji na Injili ya Upatanisho wa Dhambi zetu (Mathayo 21:32) -----	235
10. Yesu Aliyekuja Kuzitoweshea Mbali Dhambi Zako (Mathayo 3:13-17) -----	281
11. “Tazama, Namtuma Mjumbe Wangu” (Marko 1:1-5) -----	319
12. Tumwamini Yesu Tukiwa na Ufahamu wa Yohana Mbatizaji (Luka 1:1-17) -----	377

Dibaji

Agano Jipya linaanza na Injili Nne ambazo ni Mathayo, Marko, Luka, na Yohana. Injili zote Nne zilishughulika na ziliandika kikamilifu kuhusu huduma ya Yohana Mbatizaji. Hii ni kwa sababu huduma yake ni ya muhimu sana. Hatuwezi kudai kuwa tunaifahamu huduma ya Yesu Kristo pasipo uelewa wa huduma ya Yohana Mbatizaji.

Kama ndivyo, basi tunaweza kujiuliza, “Je, huduma ya Yohana Mbatizaji iliandikwa katika Injili Nne kwa umuhimu kiasi hicho?” Hali akimzungumzia Yohana Mbatizaji, Yesu alisema, “*Na ikiwa mnataka kukubali, yeye ndiye Eliya atakayekuja*” (Mathayo 11:14). Hivyo, Yohana Mbatizaji alikuwa ni mtu aliyezaliwa katika dunia hii ili kuitekeleza huduma maalumu. Pia Yesu alisema, “*Tangu siku za Yohana Mbatizaji hata sasa ufalme wa mbinguni hupatikana kwa nguvu, nao wenye nguvu wauteka*” (Mathayo 11:12). Hii ni kweli kwa sababu Yohana Mbatizaji alizaliwa katika dunia hii, na wakati alipombatiza Yesu Kristo, dhambi za ulimwengu zilipitishwa kwenda kwa Yesu. Hivyo, Yesu aliweza kuzibeba dhambi za ulimwengu mara moja. Kwa kuruhusu jambo kuwa hivyo, Bwana amewaruhusu wale wanaoamini katika huduma ya Yohana Mbatizaji na huduma ya Yesu kuingia Mbinguni kwa kupokea utakaso wa dhambi. Hii ndiyo maana iliyomo katika kifungu cha maandiko toka katika Injili ya Mathayo sura ya 11, aya ya 12-14.

Je, unaamini kuwa injili ya maji na Roho ndiyo Ukweli? Ikiwa unaamini hivyo, basi hii ina maanisha kuwa unaifahamu huduma ya Yohana Mbatizaji na huduma ya Yesu kikamilifu. Hata hivyo, Wakristo wengi ambao hawaifahamu huduma ya

Yohana Mbatizaji hawaufahamu ukweli wa injili ya maji na Roho, na kwa sababu hiyo wanaishi maisha yao ya kiimani kwa jinsi ya matamanio ya miili yao. Pamoja na kuwa hawana ufahamu, watu wa jinsi hiyo hawajaribu hata kuifahamu huduma ya Yohana Mbatizaji iliyoandikwa katika Injili Nne. Kwa sababu hiyo, huduma ya Yohana Mbatizaji imekuwa haiheshimiwi kwa muda mrefu hata miongoni mwa Wakristo wanaodai kumwamini Yesu. Pengine kwa sababu hii, ninaona kuna watu wengi siku hizi ambao hawavutiwi na huduma ya Yohana Mbatizaji. Hivyo, watu wanakawaida ya kuwashangaa wale wanaovutiwa na mada hii. Hii ni kwa sababu watu wengi wamekuwa wakiitazama kwa mbali huduma ya Yohana Mbatizaji na huduma ya Yesu kiubishi kwa muda mrefu.

Kulikuwa na viongozi wengi wa Kikristo ambao waliwafanya watu wengi kufikiri kuwa bila shaka ni sahihi. Hivyo, Wakristo leo hii wanaendelea kuishi katika hali ya kutoifahamu huduma ya Yohana Mbatizaji. Hao ndio wale wanaoifuata imani ambayo ni ya kimwili na ya kujitakia haki. Kwa kuwa watu wa ulimwengu huu wamekuwa wakiishi na mawazo ya kidunia na kimwili, hawakuweza kujisaidia zaidi ya kufuata njia ielekeayo katika maangamizi.

Nitaishuhudia huduma ya Yohana Mbatizaji kama ilivyoandikiwa katika Injili Nne. Pia sintaweza kujizuia kuishuhudia huduma ya Yesu Kristo. Sintaweza kujizuia bali nitaendelea na kazi hii hadi Wakristo wote ulimwenguni waifahamu huduma ya Yohana Mbatizaji na huduma ya Yesu. Ili kuweza kuifahamu kikamiliifu huduma ya Yesu, basi ni muhimu mtu kuwa na ufahamu sahihi wa huduma ya Yohana Mbatizaji. Kwa namna yoyote ile, ninawata kwa unyenyekevu wote muukubali ushuhuda wa huduma hizi mbili kwa kulinganisha na Neno la Mungu. Sintajaribu kuzishuhudia kanuni na mafundisho ya Ukristo. Badala yake nitaishuhudia

huduma ya Yohanan Mbatizaji na huduma ya Yesu zilizoandikwa katika Injili Nne kwa mujibu wa Neno la Mungu.

BWANA Anazungumza Nasi Kwa Uzito Kuhusu Umuhimu wa Huduma ya Yohana Mbatizaji

Sasa, wanadamu ni lazima waikubali katika mioyo yao huduma ya Yohana Mbatizaji na huduma ya Yesu, ili kwamba waweze kwenda katika kiti cha enzi cha neema na kuvishwa neema ya Mungu. Ikiwa unadhamiria kurudi kwa Yesu Kristo, basi kwanza unapaswa kuifahamu na kuikubali huduma ya Yohana Mbatizaji. Ikiwa unajaribu kuifahamu huduma ya Yesu pasipo kuwa na ufahamu sahihi wa huduma ya Yohana Mbatizaji, basi ni hakika kuwa utaangukia katika makosa mengi na maumivu makubwa. Hupaswi kuifanya huduma ya Yesu Kristo kuwa si kitu kwa sababu tu ya kushindwa kuiheshimu huduma ya Yohana Mbatizaji.

Je, hivi sasa una ufahamu sahihi wa huduma ya Yohana Mbatizaji na huduma ya Yesu? Ikiwa bado kuna dhambi katika moyo wako ingawa una imani katika huduma ya Yesu Kristo, basi ni dhahiri kuwa hauifahamu huduma ya Yohana Mbatizaji. Bwana alizungumza nasi sote kuhusu hitaji na umuhimu wa huduma ya Yohana Mbatizaji. Biblia inaweka wazi kuwa ikiwa mimi na wewe hatutaiamini huduma ya Yohana Mbatizaji na kuitetea, basi tutakuwa tuingojewa na hukumu kali kwa dhambi hiyo. Mioyo yetu inaongozwa kumwelekwa Yesu Kristo kwa sababu ya uwepo wa upendo wa Mungu na huduma ya Yohana Mbatizaji.

Sasa, Nataka Kuwauliza Wakristo wa Leo Kuwa ni Kwa Kiasi Gani Wanaifahamu Huduma ya Yohana Mbatizaji

Nina mashaka ya kutosha kuhusu imani ya Wakristo wengi wa leo. Ikiwa wanajaribu kuifahamu huduma ya Yesu Kristo pasipo ufahamu wa huduma ya Yohana Mbatizaji, basi ni hakika kuwa wataingia katika utupu wa kutisha, machafuko, na giza. Kwa maneno mengine, watabakia kama wajinga. Hata hivyo, kwa kuwa wanaendelea kudai kuia mini huduma ya Yesu Kristo pasipo ufahamu wa huduma ya Yohana Mbatizaji, basi mimi najisikia kunyamaza kimya.

Binafsi sina la kufanya zaidi kuutangaza Ukweli huu. Ninawaambia Wakristo hao wasio na ufahamu kuwa: “Hamjifahamu kwa kuwa mmejiweka katika hali ya kutoifahamu huduma ya Yohana Mbatizaji. Mnawaza nini kuhusu huduma ya Yohana Mbatizaji? Kuhusu kuupokea wokovu kwa kumwamini Yesu, je, pengine mnafikiri kuwa haijalishi ikiwa mnaifahamu huduma ya Yohana Mbatizaji au la?”

Ni lazima tufikiri kuwa ni kwa nini Mungu aliruhusu iandikwe katika Kitabu cha Malaki sura ya 4 katika Agano la Kale, *“Angalieni, nitawapelekea Eliya Nabii,” (Malaki 4:5)*. Aya hii inasema kuwa Mungu alikuwa radhi kumtuma Eliya katika Wakati Wake. Hapo ndipo tunapofika kujiuliza, “Kwa nini Mungu alimtuma Yohana Mbatizaji hapa duniani?” Ni lazima tufahamu kuwa Mungu Baba alikuwa ameahidi kumtuma Eliya kuja hapa duniani kabla ya kuzaliwa kwa Yesu Kristo. Yesu alishuhudia kuwa Yohana Mbatizaji alikuwa ndiye Eliya atakayekuja kwa mujibu wa ahadi ya Mungu kama ilivyoandikwa:

“Angalieni, nitawapelekea Eliya nabii,

Kabla haijaja siku ile ya BWANA.

Naye ataigeuza

Mioyo ya baba iwaelekee watoto wao,

Na mioyo ya watoto iwaelekee baba zao,

Ili nisije nikaipiga dunia kwa laana” (Malaki 4:5-6).

Litakuwa ni jambo zuri kiasi gani ikiwa Wakristo wa leo watafahamu kuwa kifungu hiki kilikuwa kikizungumzia juu yay Yohana Mbatizaji? Maana ndipo watakapoweza kupokea baraka nyingi mbele za Mungu. Hata hivyo, Wakristo wengi siku hizi wanazipoteza baraka za Mungu kwa sababu wanashindwa kukifahamu kikamilifu kifungu hiki, basi niuhubiri ukweli huu kwa kuurudiarudia.

Kwa nini Bwana alisema katika kifungu hicho hapo juu kuwa Atamtuma nabii Eliya kabla ya kuleta hukumu katika ulimwengu huu? Inaelezwa kuwa nabii wa Mungu, Eliya, atakuja jhapa duniani, atatuongoza moyo wa Mungu kutuelekea sisi, na kisha atatuongoza sisi tulio katika sura ya Mungu kumwelekea Mungu. Tunaweza kuona maneno haya ya unabii yakijionyesha katika huduma ya Yohana Mbatizaji aliyeonekana katika Agano Jipya.

Yale yaliyomo katika kitabu hiki, *Uhusiano Kati ya Huduma ya Yesu na Ile ya Yohana Mbatizaji Kama Ilivyoandikwa Katika Injili Nne*, yatatoa msaada mkubwa kwa Wakristo wenye dhambi wanaofahamu na kuamini katika damu ya Msalaba tu. Pia yatawaangazia juu ya jinsi huduma ya Mungu wa kweli ilivyo. Kwa kuwa wamekuwa wakiidharau huduma ya Yohana mbatizaji na kuiacha kando, basi ndio maana wameendelea kuamini katika damu ya Msalaba tu hadi sasa. Hivyo basi, ndio maana hawajaweza kuzipokea baraka za Mungu za kweli zilizoletwa kwetu kupitia Yesu Kristo. Je, wewe si miongoni mwao? Basi, unapaswa kuwa mwamini wa upendo wa Mungu na haki Yake kwa kuifahamu uhuduma ya

Yohana Mbatizaji na huduma ya Yesu tangu sasa na baadaye. Ni lazima umrudishie Mungu utukufu na uwe na nia ya kupokea baraka za Mungu kwa kuingia katika huduma hizi ambazo kwa pamoja zinafanya uwepo wa haki ya Mungu.

Baadhi ya Watu Siku Hizi Wanajaribu Kuirudisha Nyuma Huduma ya Yohana Mbatizaji Kuwa ni Kitu Kisicho na Maana

Hii ni kwa sababu watu wa jinsi hiyo wanafikiri kuwa Yohana Mbatizaji na huduma yake walikuwa wameshindwa. Hawaifahamu huduma ya Yohana Mbatizaji kikamilifu. Zaidi ya yote, hawajaribu hata kule kuifahamu huduma hii. Wanasema kuwa Yohana Mbatizaji alimwonea mashaka Yesu Kristo badala ya kumtambua kikamilifu na hivyo kuangukia katika majaribu. Wanasema kuwa kifungu cha maandiko katika Mathayo 11:2-3 kimewafanya wao kufikiria hivyo. Katika Mathayo 11:2-3 imeandikwa kuwa, *“Naye Yohana aliposikia huko gerezani matendo yake Kristo, alituma wanafunzi wake, kumwuliza, Wewe ndiwe yule ajaye, au tumtazamie mwingine?”* Hali wakitumua vifungu hivi kama msingi wao, wanadai kuwa Yohana Mbatizaji alikuwa na mashaka kuhusu Yesu Kristo, badala ya kumwamini kuwa ni Mwokozi, lakini hoja yao hii sio sahihi.

Yohana Mbatizaji hakuwa na mashaka kuhusu Yesu kuwa ni Mwokozi. Bali, alitaka kuwatuma wanafunzi wake wote kwa Yesu ili wakawe wanafunzi wa Yesu. Andrea na Yohana ni miongoni mwa waliofanyika kuwa wanafunzi wa Yesu. Nafikiri kulikuwa na baadhi ya wanafunzi wenye mioyo migumu ambao hawakumtii mwalimu wao aliyekuwa amefungwa jela na ambaye aliwaelekeza waende kwa Yesu

Kristo na kumwamini Yeye. Nina hakika kuwa Yohana Mbatizaji alitaka kuwatuma wanafunzi wake waliokuwa na mioyo migumu kwenda kwa Yesu kabla ya kifo chake.

Je, wewe ni miongoni mwa umati unaoitilia mashaka huduma ya Yohana Mbatizaji na imani yake? Imani na huduma ya Yohanan Mbatizaji inaonyesha kuwa alikuwa ni mtu aliyeamini katika uungu wa Yesu na kuwa ni Mwokozi, hasa kwa kuwa yeye ndiye aliyecipitisha dhambi za ulimwengu kwenda kwa Yesu. Yohana Mbatizaji hakuwa mtu asiyeamini. Kinyume chake, yeye alikuwa ni mtu aliyeamini uungu wa Yesu Kristo na kule kuwa Mwanakondoo wa Mungu na ukweli kuwa ni yeye ndiye aliyembatiza Yesu ubatizo uliokuwa umeongozwa na Roho Mtakatifu. Hivyo basi, tunafahamu kuwa yeye aliongea maneno hayo ili kuwaongoza wanafunzi wake kwenda kwa Yesu Kristo. Hii ni kwa sababu Yohana Mbatizaji alifahamu kuwa muda si mrefu atakufa kifo cha haki na kurudi kwa Mungu.

Baadhi ya watu hawaifahamu huduma ya Yohana Mbatizaji na bado wanajaribu kuidharau. Kusema kweli watu wa jinsi hiyo ni wajinga. Ni lazima waache kufanya hivyo. Ikiwa unataka kumwamini Yesu Kristo aliyekuja kwa injili ya maji na Roho kuwa ni Mwokozi, basi kabla ya yote, unapaswa kuifahamu huduma ya Yohana Mbatizaji na kutambua kuwa alikuwa ni mjumbe aliyekuwa ametumwa na Mungu. Ni lazima ukumbuke kuwa Yohana Mbatizaji alikuwa ni mtumishi wa Mungu aliyekuwa amecipitisha dhambi za ulimwengu huu mara moja kwa kumbatiza Yesu Kristo. Kazi hii haikuwa ni jambo lililokuwa limefanywa na yeye mwenyewe tu; bali alimbatiza Yesu Kristo kwa mujibu wa mapenzi ya Mungu Baba. Kwa kuwa Yohana Mbatizaji alikuwa amecipitisha dhambi za ulimwengu huu kwenda kwa Yesu Kristo, ndio maana tunamwona akiendelea kuushuhudia ukweli huu kwetu

siku iliyofuata baada ya ubatizo wa Yesu akisema, *“Tazama! Mwanakondoo wa Mungu aichukuaye dhambi ya ulimwengu!”* (Yohana 1:29) Yeye alikuwa ndiye aliyembatiza Yesu ubatizo wa kuzipitisha dhambi za ulimwengu huu kwenda kwa Yesu mara moja katika Mto Yordani.

Pia, Yohana Mbatizaji alikuwa ameikamilisha huduma ya “Eliya” aliyekuwa amehidiwa kuletwa ulimwenguni katika Kitabu cha Malaki sura ya 3 na ya 4 katika Agano la Kale. Ni lazima ukumbuke maneno ya Yesu ambapo alisema, *“Na ikiwa mnataka kukubali, yeye ndiye Eliya atakayekuja,”* (Mathayo 11:14). Kama ilivyo katika Agano la Kale na kama ilivyo katika Agano Jipya, Yesu anaongelea kuhusu Yohana Mbatizaji kuwa ni Eliya aliyetajwa katika Agano la Kale na umuhimu wa huduma yake. Hivyo basi, ikiwa wewe unayemwamini Yesu Kristo kuwa ni Mwokozi halafu unaidharau huduma ya Yohana Mbatizaji, basi unapaswa kugeuka na kuwa na imani sahihi. Katika Kitabu cha Malaki sura ya 4, aya ya 6 Bwana alisema kuwa ataitoa hukumu yake kwa wale wote ambao hawatamrudia Bwana kwa kuidharau huduma yake kwa ajili ya dhambi zao.

Pia katika Biblia, Yesu anasema kuwa Yohana Mbatizaji alikuwa ni mtu aliyekuwa ameitenda huduma muhimu sana. Kifungu cha maandiko katika Injili ya Mathayo sura ya 11 aya ya 12 kinasema, *“Tangu siku za Yohana Mbatizaji hata sasa ufalme wa mbinguni hupatikana kwa nguvu, nao wenye nguvu wauteka,”* na kifungu hiki kinazungumzia kuhusu Yohana Mbatizaji akiitenda kazi ya kuzipitisha dhambi za ulimwengu kwa kumpatia Yesu Kristo ubatizo na pia kinazungumzia uwezo wa Yesu kwenda Msalabani baada ya kuwa amezichukua dhambi za ulimwengu huu mara moja kwa kuupokea ubatizo. Hivyo, Yohana Mbatizaji aliweza kushuhudia kwa kumtazama Yesu na kusema, *“Tazama!*

Mwanakondoo wa Mungu aichukuaye dhambi ya ulimwengu!”
 Huu ni ukweli ambao Biblia inauongelea kwa wazi katika Agano la Kale na katika Agano Jipya.

Ninawaambieni tena kuwa: “Watu ambao wanaidharau huduma ya Yohana Mbatizaji wataipokea hukumu ya kutisha toka kwa Mungu.” Nataka ufahamu kuwa Bwana anazungumzia juu ya Ukweli wote wa wokovu katika Injili Nne. Ikiwa mtu anaidharau huduma ya Yohana Mbatizaji iliyoandikwa katika Injili Nne, basi mtu wa jinsi hiyo hawezi kuifahamu kiusahihi huduma ya Yesu Kristo.

Sasa sisi sote ni lazima tutambue umuhimu wa huduma ya Yohana Mbatizaji na kuwa na shukrani kwa imani kutokana na haki ya Mungu iliyokamilishwa katika injili ya maji na Roho. Huduma zote za Yohana Mbatizaji na ile ya Yesu ni za thamani sana kwa ajili ya wokovu wetu.


Sisi sote tunapaswa kuwa wale wanaoishi kwa imani yetu hali wikipokea baraka za Mungu kwa kupokea ondoleo la dhambi na kuingia katika mapenzi ya Mungu, kwa kuamini katika injili ya maji na Roho. Ninatawakieni ninyi nyote sasa hivi kuwa wale wenye shukrani kwa imani kwa Yesu Kristo, aliyekuja kwa injili ya maji na Roho, na kwa huduma ya Yohana Mbatizaji ambaye aliitenda huduma ya Mungu kwa uaminifu.

Ninatumaini kuwa baraka za Mungu za kimiujiza zitakuwa nanyi!

Juni 30, 2006 Paul C. Jong, Mwandishi

MAHUBIRI

1



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Ni Lazima Uifahamu na Kuiamini Huduma ya Yohana Mbatizaji

< Marko 1:1-2 >

**“Mwanza wa Injili ya Yesu Kristo, Mwana wa Mungu.
Kama ilivyoandikwa katika nabii Isaya:**

**‘Tazama, namtuma mjumbe wangu mbele ya uso
wako,**

Atakayeitengeneza njia yako.’”

Yohana Mbatizaji Aliiandaa Njia ya Bwana

Marko 1:2 inasema, *“Tazama, namtuma mjumbe wangu mbele ya uso wako.”* Ndugu zangu waamini, unaweza kuipata haki ya Mungu ikiwa tu utatupilia mbali uelewa wa kale na kuifuata Biblia kadri Neno la Mungu linavyokuongoza. Hivyo, wakati unaposoma Neno la Mungu, ni lazima ulisome hali ukiwa umeyaacha mawazo na tamaa zako za mwili. Ni kwa kufanya hivyo tu ndipo unapoweza kutambua na kuamini katika mapenzi ya Mungu ambayo anataka kuyatimiza. Kanuni hiyo inatumika pia katika kifungu cha Maandiko cha leo. Ni pale tu utakapokuwa umeyaachilia mbali mawazo yako ya kimwili na kisha ukalifuata Neno la Mungu linapokuongoza ndipo unapoweza kufahamu kiusahihi huduma ya Yohana Mbatizaji na huduma ya Yesu.

Mjumbe ambaye Mungu alimtuma mbele za Yesu si

mwingine bali ni Yohana Mbatizaji. Kwa nini Mungu alisema katika Mathayo 11:10-11 kuwa alimtuma Yohana Mbatizaji kwako na kwangu? Kwa nini Yohana Mbatizaji alitumwa miezi sita kabla ya kuzaliwa kwa Yesu Kristo hapa duniani? Sababu ya kufanya hivyo ilikuwa ili Yohana aweze kukamilisha majukumu yake kama Kuhani Mkuu wa Agano la Kale katika dunia hii. Sababu nyingine ili kuwa ni kumfanya Yohana kuzipitisha dhambi za mwanadamu kwenda kwa Yesu Kristo, aliye Mwanakondoo wa Mungu. Akiwa ni ukoo wa Kuhani Mkuu Haruni wa Agano la Kale, Yohana Mbatizaji alitumwa kuutimiza ukuhani wa nyumba yake kwa mapenzi ya Mungu. Miezi sita kabla Yesu hajatungwa mimba na Bikira Maria, Yohana Mbatizaji alitungwa mimba na Mungu katika tumbo la Elizabeti, ambaye anatoka ukoo wa Kuhani Mkuu Haruni. Jambo hili lilifanyika kwa ajili ya mapenzi ya Mungu, yaani kuzipitisha dhambi za mwanadamu kwenda kwa Yesu Kristo.

Injili ya Luka inamtambulisha Yohana Mbatizaji kuwa ni mwana wa Zakaria, ambaye ni mmoja wa makuhani toka katika ukoo wa Abiya, mmoja wa wajukuu Kuhani Mkuu Haruni. Hii ina maanisha kuwa baba wa Yohana Mbatizaji, Zakaria, alizaliwa toka katika ukoo wa Abiya, ambaye ni mmoja wa wajukuu wa Kuhani Mkuu Haruni. Ukoo wa Abiya unaotajwa hapa una maanisha ukoo wa Haruni Kuhani Mkuu. Kwa maneno mengine, inaonyesha bayana kuwa ni wa ukoo wa Kuhani Mkuu Haruni.

Wakati wana wa Haruni walipoongezeka kiidadi, Mfalme Daudi alianzisha utaratibu wa kuzunguka kwa ajili ya ukuhani wao, na ukoo wa Haruni ulitoa sadaka kwa mujibu wa utaratibu huu. Hawa wana wa Haruni, ambao wote walikuwa wametoka katika nyumba ya Kuhani Mkuu, waliweza kuhudumu kama makuhani kwa zamu kwa siku 15 kwa mujibu

wa ukoo wao. Ukoo wa Haruni ulitekeleza kwa uaminifu huduma yao kama makuhani kwa watu wa Israeli; wengine walihudumu kama Makuhani Wakuu na wengine kama makuhani wa kawaida. Hii ni kwa sababu Mungu alikuwa amewapatia ukoo wa Haruni fursa na baraka ya kutumika kama makuhani tu.

Ushahidi wa hili unapatikana katika 1 Mambo ya Nyakati 24:1-19; hebu sote tukigeukie kifungu hiki: *“Na zamu za wana wa Haruni ni hizi. Wana wa Haruni; Nadabu, na Abihu, na Eleazari, na Ithamari. Lakini hao Nadabu na Abihu walikufa kabla ya baba yao, wala hawakuwa na watoto; kwa hiyo Eleazari na Ithamari wakafanya ukuhani. Akawagawanya Daudi, na Sadoki wa wana wa Elezari, na Ahimeleki wa wana wa Ithamari, katika utumishi kwa kadiri ya usimamizi wao. Wakaonekana wakuu wengi wa wana wa Eleazari kuliko wa Ithamari; wakagwanyika hivi; wana wa Eleazari kukawa na kumi na sita, waliokuwa wakuu wa mbari za baba zao; na wana wa Ithamari, sawasawa na mbari za baba zao, wanane. Ndivyo walivyogawanyika kwa kura, wao kwa wao; kwani kulikuwa na wakuu wa patakatifu, na wakuu wa Mungu, wa wana wa Eleazari, na wa wana wa Ithamari pia. Naye Shemaya, mwana wa Nethaneli, mwandishi, aliyekuwa wa Walawi, akawaandika mbele ya mfalme, na mbele ya wakuu, na Sadoki Kuhani, na Ahimeleki, mwana wa Abiathari, na wakuu wa mbari za baba za makuhani, na za Walawi; ikatwaliwa ya Eleazari mbari moja ya baba, na moja ikatwaliwa ya Ithamari. Kura ya kwanza ikamtokea Yehoiarimu, na ya pili Yedaya; na tatu Harimu, na ya nne Seorimu; ya tano Malkia, ya sita Miyamini; ya saba Hakosi, ya nane Abiya; ya kenda Yeshua, ya kumi Shekania; ya kumi na moja Eliashibu, ya kumi na mbili Yakimu; ya kumi na tatu Hupa, ya kumi na nne Yeshebeabu; na kumi na tano Bilaga, ya*

kumi na sita Imeri; ya kumi na saba Heziri, ya kumi na nane Hapisesi; ya kumi na kenda Pethahia, ya ishirini Ezekieli; ya ishirini na moja Yakini, ya ishirini na mbili Gamuli; ya ishirini na tatu Delaya, ya ishirini na nne Maazia. Huu ndio usimamizi wao katika huduma yao waingie nyumbani mwa BWANA kwa kadiri ya agizo lao, kwa mkono wa Haruni baba yao, kama BWANA Mungu wa Israeli alivyomwamuru.”

Hebu pia tugeukie juu ya habari za Siku ya Upatanisho ambapo wana wa Israeli walitoa sadaka zako za kuteketezwa mara moja kwa mwaka wa Mungu. Kisa hiki kinaelezwa katika Mambo ya Walawi 16:29-34: “‘Amri hii itakuwa amri ya milele kwenu; katika mwezi wa saba, siku ya kumi ya mwezi, mtajitaabisha roho zenu, msifanye kazi ya namna yoyote, mzalia na mgeni akaaye kati yenu. Kwa maana siku hiyo upatanisho utafanywa kwa ajili yenu, ili kuwatakaswa; nanyi mtatakaswa na dhambi zenu zote mbele za BWANA. Ni Sabato ya raha ya makini kwenu nanyi mtajitaabisha roho zenu; ni amri ya miele. Na kuhani atakayetiwa mafuta na kuwekwa wakfu badala ya baba yake, ataufanya huo upatanisho, naye atayavaa mavazi ya kitani, yaani, yale mavazi matakatifu. Naye atafanya upatanisho kwa ajili ya patakatifu, naye atafanya upatanisho kwa ajili ya hema ya kukutania, na kwa ajili ya madhabahu; naye atanya upatanisho kwa ajili ya makuhani, na kwa ajili ya watu wote wa kusanyiko. Na amri hii itakuwa amri ya milele kwenu, ili kufanya upatanisho kwa ajili ya wana wa Israeli kwa sababu ya dhambi zao zote, mara moja kila mwaka.’ Naye akafanya vile vile kama BWANA alivyomwamuru Musa.”

Ni lazima utambue hapa kuwa Mungu aliwakabidhi ukoo wa haruni ofisi ya Ukuhani Mkuu milele. Hii ni amri ya Mungu ya milele isiyobadilika ili kwamba ukoo wa Haruni utekeleza na kusimamia ofisi ya Kuhani Mkuu. Mungu alimfanya Kuhani

Mkuu kutoa sadaka ya dhambi kila mwaka katika siku ya kumi katika mwezi wa saba kwa ajili ya upatanisho wa dhambi za watu wa Israeli.

Baada ya kupita zama za Agano la Kale, na kuanza zama za Agano Jipya, Yohana Mbatizaji alizaliwa katika nyumba ya Kuhani Mkuu Haruni ili kuitimiza huduma ya kuzipitisha dhambi zote za wanadamu kwenda kwa Yesu Kristo kwa kumbatiza. Kwa lugha nyingine, jukumu la Yohana Mbatizaji lilikuwa ni kuitimiza kazi ya Kuhani Mkuu wa Agano la Kale.

Marko 1:1-2 Inazungumzia Juu ya Huduma ya Yohana Mbatizaji

Katika Luka 1:5 imeandikwa kuwa, *“Zamani za Herode, mfalme wa Uyahudi, palikuwa na kuhani mmoja, jina lake Zakaria, wa zamu ya Abiya, na mkewe alikuwa mmojawapo wa uzao wa Haruni, jina lake Elizabeti.”* Kifungu hiki kinaeleza kuwa Zakaria pamoja na mkewe Elizabeti wanatoka katika ukoo wa Haruni. Tunachopaswa kukitambua na kukiamini hapa ni huduma ya Yohana Mbatizaji na siri ya Injili ya maji na Roho.

Yohana Mbatizaji alizaliwa toka kwa Zakaria na Elizabeti, na hawa wote wanatoka katika nyumba ya Haruni, aliyekuwa Kuhani Mkuu wa kwanza katika Agano la Kale. Mungu alimfanya Yohana Mbatizaji azaliwe kwa Zakaria na mkewe ili kwamba Yohana aweze kwanza kurithi ofisi ya Kuhani Mkuu hapa duniani. Yohana Mbatizaji alipaswa kuyatimiza majukumu ya kuhani wa mwisho katika zama za Agano la Kale, ili kwamba awe mwakilishi wa wanadamu ambaye atambatiza Yesu. Haya yalikuwa ni majaliwa ya ukombozi yanayopatikana katika Yesu Kristo, na ilikuwa pia ni kazi ya agano la haki la

Mungu linalopatikana kwa majaliwa Yake.

Yohana Mbatizaji alikuwa ni mtumishi wa Mungu aliyeinuliwa kwa mujibu wa majaliwa ya ukombozi katika Yesu Kristo. Kwa maneno mengine, ilikuwa ni kwa mujibu wa mapenzi ya Mungu kwamba Yohana Mbatizaji azaliwe katika nyumba ya Haruni ili kulitimiza jukumu la Kuhani Mkuu wa mwisho hapa duniani. Hali akiwa amezaliwa katika nyumba ya Haruni, Yohana Mbatizaji alihudumu kama Kuhani Mkuu wa wanadamu. Hapa tunahitaji kulichunguza jukumu lake kwa kina na kufikia ufahamu mpana. Nia kwa kufanya hivyo tu ndipo tunapoweza kumwamini Yesu Kristo kiusahihi, Yeye ambaye alikuja kutuokoa toka katika dhambi za ulimwengu huu. Ingawa mara nyingi tunafikiri kuhusu Yesu kuwa ni Mwokozi wa wanadamu, lakini inapofikia kuhusu Eliya atakayekuja, ambaye ametajwa katika Malaki sura ya 4 katika Agano la Kale, basi mara nyingi tunapishana sana.

Ili tuweze kuthamini na kufahamu umuhimu wa kila Mrksto katika nyakati hizi za mwisho kuifahamu huduma ya Yohana Mbatizaji, basi tunahitaji tena kulirudia Neno la Mungu. Tunahitaji kuutafakari uhusiano kati ya huduma ya Yohana Mbatizaji na ile ya Yesu. Kama kusingelikuwa na mahusiano kati ya huduma ya Yohana Mbatizaji na huduma ya Yesu, basi tusingelikuwa na sababu tena ya kuvutiwa na huduma ya Yohana Mbatizaji. Hata hivyo, kuna sababu inayotufanya tuvutiwe na huduma ya Yohana Mbatizaji. Hii ni kwa sababu huduma yake inahusiana kwa ukaribu kabisa na huduma ya Yesu.

Jambo hili ni la kweli zaidi katika siku za leo kwa sababu mioyo ya Wakristo wengi bado haijaoshwa kikamilifu toka katika dhambi, na kutokana na hitaji la Wakristo ulimwenguni pote ili waweze kumrudia Yesu Kristo aliyekuja kwa injili ya maji na Roho. Inapofikia kuhusu huduma ya Yohana Mbatizaji

na ile ya Yesu, basi ni jambo muhimu sana kwetu sisi kufahamu na kuamini juu ya sababu zilizomfanya Yesu abatizwe na Yohana Mbatizaji. Ni kwa kufanya hivyo ndipo tunapoweza kufahamu sababu iliyomfanya Yesu kuimwaga damu yake Msalabani kwa ajili yetu mara tu baada ya kubatizwa na Yohana. Yohana Mbatizaji alikuwa ni mtumishi wa Mungu aliyetumwa hapa duniani na Mungu Baba karibu kabisa na wakati ambao Mwanawe Yesu Kristo alitumwa. Kama Kuhani wa Mwisho wa nyakati za Agano la Kale, Yohana aliitimiza huduma yake kwa kumbatiza Yesu.

Hii ndio maana katika Marko 1:2 Mungu alisema, *“Kama ilivyoandikwa katika nabii Isaya, ‘Tazama, namtuma mjumbe wangu mbele ya uso wako, Atakayeitengeneza njia yako.’”* Hapa unapaswa kutambua kuwa waandishi wote wa Injili Nne katika Agano la Jipya wanaelekeza kwanza umakini wao katika huduma ya Yohana Mbatizaji kabla ya kumwongelea Yesu Kristo. Marko, aliyekuwa mwanafunzi wa Yesu, ananza kwanza kwa kuitambulisha huduma ya Yohana Mbatizaji ambayo ilikuwa ni kuzipitisha dhambi za ulimwengu kwenda kwa Yesu. Hii ni kwa sababu Marko alifahamu kuwa Yohana Mbatizaji alipaswa kuzipitisha dhambi zote za ulimwengu huu kwenda kwa Yesu kwa kumbatiza. Pia ni kwa sababu Yohana Mbatizaji ndiye hasa aliyepitisha dhambi za wanadamu kwenda kwa Yesu kwa kupitia ubatizo.

Hivyo, hali akinukuu kifungu toka Agano la Kale, marko anasema kuwa Yohana Mbatizaji alikuwa ni mtumishi wa Mungu aliyekuwa ameaandaliwa kabla kwa mujibu wa majaliwa ya Mungu. Sababu ya kufanya hivyo ni kwamba pale pale tutakapoifahamu kiusahihi huduma ya Yohana Mbatizaji ndipo tunapoweza kuifahamu kiusahihi na kuiamini huduma ya Yesu. Yohana Mbatizaji alikuwa ni mjumbe wa Mungu Baba aliyetumwa hapa duniani miezi sita kabla ya Yesu. Kwa

maneno mengine, yeye alikuwa ni mjumbe wa Mungu aliyetumwa ili kuzipitisha dhambi za ulimwengu kwenda kwa Yesu. Hali akiwa amechaguliwa na Mungu kati ya Makuhani Wakuu wa Agano la Kale, Yohana Mbatizaji alikuwa ni mtumishi wa Mungu wa kuzipitisha dhambi zote za ulimwengu kwenda kwa Yesu kwa kumbatiza na hivyo kuutimiza ukuhani wake.

Hivyo basi, huduma yake ilikuwa imebarikiwa, na yeye alikuwa ni mtumishi wa Mungu ambaye alitenda jukumu muhimu sana katika kuitimiza haki ya Mungu. Yohana Mbatizaji alikuwa amebarikiwa na ambaye pamoja na Yesu, walikuwa ni muhimu sana katika kuitimiza haki ya Mungu (Mathayo 3:15). Kwa maneno mengine, alikuwa ni mtumishi wa Mungu aliyefanya ieleweke wazi kuwa Yesu atafanyika kuwa Mwokozi wa wenye dhambi wote. Basi, tusishindwe kuutambua ukweli kuwa waandishi wote wa zile Injili Nne waliitambulisha kwanza huduma ya Yohana Mbatizaji kabla ya huduma ya Yesu. Sisi sote ni lazima tutambue kwanza umuhimu wa huduma ya Yohana Mbatizaji, kabla ya kuitafakari huduma ya Yesu.

Kiroho na kimwili, Yohana Mbatizaji alikuwa ni balozi wa Mungu aliyetumwa toka Ufalme wa Mbinguni. Ni kwa kupitia huduma ya Yohana Mbatizaji, aliyetoka katika Ufalme wa Mbinguni hali akitii mapenzi ya Mungu, basi ndipo tunapoweza kuifahamu huduma ya Yesu Kristo kiusahihi. Ikiwa tuna ufahamu sahihi wa huduma ya Yohana Mbatizaji, basi hapo tunaweza kuelewa kwa urahisi kuwa Yesu alizibeba dhambi za wanadamu mara moja na kwa wote kwa kubatizwa na Yohana Mbatizaji, alifanya hayo yote ili aweze kuwa Mwokozi wetu. Hivyo, tunaweza kuona kwa hakika kuwa Injili Nne katika Agano Jipya zinaandika kuhusu huduma ya Yohana Mbatizaji, ambaye ni mtumishi wa Mungu.

Kwa nini Mungu alimtuma Yohana Mbatizaji, wa ukoo wa Haruni, kabla ya kumtuma Yesu katika kipindi cha kwanza cha Agano Jipya? Hii inatuonyesha kuwa kama vile Haruni Kuhani Mkuu katika Agano la Kale, alivyozipitisha dhambi zote za mwaka mzima za watu wa Israeli kwenda kwa mbuzi wa kizingizio kwa kuiweka mikono yake katika kichwa cha yule mbuzi, Yohana Mbatizaji ndiye hasa aliyezipitisha dhambi zote za ulimwengu kwenda kwa Yesu mara moja na kwa wote katika kipindi cha Agano Jipya.

Mambo ya Walawi 16:21 inasema, *“Na Haruni ataweka mikono yake miwili juu ya kichwa cha yule mbuzi aliye hai, na kuungama juu yake uovu wote wa wana wa Israeli, na makosa yao, naam, dhambi zao zote; naye ataziweka juu ya kichwa chake yule mbuzi, kisha atampeleka aende jangwani kwa mkono wa mtu aliye tayari.”* Katika Agano Jipya, kinachofananishwa na kifungu hiki ni huduma ya Yohana Mbatizaji. Na huduma ya Yesu inaonyesha umuhimu wa huduma hii ya Yohana.

Hebu nielezee hoja hii kwa kutoa mfano mmoja wa kawaida. Hebu tuseme kuwa kija mmoja ameandikishwa kuingia katika huduma ya jeshi na anapitia mafunzo yote. Pale mwanzo haonyeshi kuwa ni askari mzuri lakini hatimaye anaonyesha kuwa ni askari mzuri. Vivyo hivyo, Yesu hakuzichukua dhambi za wanadamu mara tu alipozaliwa, bali alizibeba alipokuwa na umri wa miaka 30 kwa kubatizwa na Yohana Mbatizaji, na hii ndio sababu aliweza kuwa Mwokozi wa kweli. Yesu alisulubiwa ili kutupatia upatanisho wa dhambi kwa kuwa alikuwa amejitwika dhambi za ulimwengu mabegani mwake. Mnyama wa kuteketezwa katika Agano la Kale alifanyika kuwa sadaka ya upatanisho kwa kuzipokea dhambi za mwaka mzima za Waisraeli mara moja kwa kule kuwekewa mikono na Kuhani Mkuu. Vivyo hivyo, Yohana Mbatizaji

alilitimiza jukumu la kuzipitisha dhambi za ulimwengu huu kwa sadaka ya kuteketezwa aitwaye Yesu Kristo, Mwanakondoo wa Mungu, kwa kumbatiza.

Hali ikiunukuu Ukweli huu, Waebrani 10:1 inasema, *“Basi torati, kwa kuwa ni kivuli cha mema yatakayokuwa, wala si sura yenyewe ya mambo hayo, kwa dhabihu zile zile wanazozitoa kila mwaka daima, haiwezi wakati wo wote kuwakamilisha wakaribiao.”* Pia katika Isaya 40:3, Biblia inasema, *“Sikiliza, ni sauti ya mtu aliaye, ‘Itengenezeni nyikani njia ya BWANA; Nyosheni jangwani njia kuu kwa Mungu wetu.’”* Mungu Baba anasema kuwa alizipitisha dhambi zote za ulimwengu huu kwenda kwa Mwanae Yesu mara moja na kwa wote kwa kupitia Yohana Mbatizaji. Kila dhambi ya ulimwengu huu ilipitishwa kwenda katika kichwa cha Yesu kwa kupitia ubatizo uliotolewa na Yohana Mbatizaji. Kalb ya kusulubiwa, Yesu alikuwa amejitwika dhambi za ulimwengu kwa kupitia ubatizo alioupokea toka kwa Yohana Mbatizaji.

Mwanzo wa Kila Injili Katika Injili Nne, Agano Jipya Linaitambulisha Huduma ya Yohana Mbatizaji Kabla ya Huduma ya Yesu

Kama ilivyoandikwa katika Agano la Kale, Yohana Mbatizaji alikuwa ni mjumbe wa Mungu. Hata hivyo, leo hii, kuna tabia iliyozoeleka kwa wahuburi wa injili kumdharau Yohana Mbatizaji na huduma yake. Hii ni nadharia kuu potofu ya kiroho na tatizo kubwa sana liletalo mauti. Ni sawa na kuidharau hekima ya Mungu na mipango yake ili kuwapatia wanadamu maisha ya milele. Hata hivyo, ni lazima utambue kuwa ni kwa kuitambua na kuiamini kikamilifu huduma ya Yohana Mbatizaji ndipo unapoweza kutambua kwa hakika

kuwa Yesu Kristo Mwokozi wa kweli wa wanadamu. Ikiwa unahudumu pasipo kuwa na ufahamu, hekima, na imani hiyo, basi ni hakika kuwa huwezi kuhudumu kikamilifu. Utageuka na kuwa ni mtendaji wa dini za kidunia zinazohubiri ganda la nje na kuacha kiini cha injili ya maji na Roho. Pasipo kuwafundisha waamini juu ya jukumu la Yohana Mbatizaji, basi hakuna mhubiri anayeweza kuwaongoza kwenda kwa Yesu Kristo aliyekuja kwa injili ya maji na Roho. Kufanya hivyo kutakuwa ni sawa na kuhubiri utupu.

Katika hali hii, Wakristo wengi wa siku hizi wanaodai kumwamini Yesu kwa kweli wanayaelekeza maisha yao ya kiimani pasipo kutambua siri ya injili ya maji na Roho. Na hii ndio sababu pamoja na kuwa wanamwamini Yesu kuwa ni Mwokozi wao, dhambi zao hazijaondoka na bado wapo katika laana milele. Imani ya watu wa jinsi hiyo haina maana, na wanafanya upotoshaji wa kuuharibu Ukristo kwa kuufanya kuwa kama dini za kidunia ilhali ilipaswa imani hiyo iwalettee uzima wa milele. Kama matokeo ya hayo, kuna Wakristo wengi siku hizi ambao wanasema kuwa bado wana dhambi hata pale ambapo wanadai kumwamini Yesu. Kwa watu wa jinsi hii, ni hakika kuwa kila mmoja wao ni mwenye dhambi hata kama anamwamini Yesu au la. Kwa kuwa watu wa kidunia na Wakristo bado wana dhambi katika roho zao, basi hakuna kinachowatofautisha. Ikiwa kuna tofauti yoyote ile, basi ni ule ukweli kuwa baadhi ya wenye dhambi wanazifahamu dhambi zao wakati wengine hawazifahamu; kwa kuwa wote wanaishi kama wenye dhambi, basi wote ni wamoja. Kama hivyo ndivyo, basi kuna haja gani ya kumwamini Yesu?

Ikiwa hauifahamu injili ya maji na Roho na hauiamini, basi hauna tofauti na wengine wote wasioifahamu haki ya Mungu ambayo Yesu Kristo ameitimiza. Je, una imani katika

injili ya maji na Roho sasa? Kwa wale wanaoamini sasa kuwa Yesu Kristo ni Mwokozi wao aliyekuja kwa injili ya maji na Roho, je ni wenye dhambi au ni wenye haki? Wahubiri wa leo wa injili wanasema kuwa kila mtu anaweza kwenda Mbinguni ilimradi tu anamwamini Yesu hata kama ni kiupofu, yaani hata pasipo kuifahamu injili ya maji na Roho. Kama matokeo ya hilo, watu wengi wasio na hesabu wamebakia kuwa wenye dhambi. Hii ni kwa sababu ya viongozi vipofu wa kiroho. Ni kwa sababu hawafanyi toba.

Inawezekanaje kwa Wakristo wa leo kusema kuwa wanamwamini Yesu kuwa ni Mwokozi wao pasipo kuwa na ufahamu wa injili ya maji na Roho? Yesu mwenyewe alimshuhudia Yohana Mbatizaji katika Biblia akisema, “Yohana Mbatizaji alikuja katika njia ya haki.” Sasa, kwa kuzingatia hili, inawezekana kwa mtu yeyote kupata ondoleo la dhambi kwa kule kusema tu kuwa anamwamini Yesu bila masharti? Je, mtumishi yeyote asiyeifahamu huduma ya Yohana Mbatizaji anaweza kusema kwa hakika kuwa anamfahamu na kumwamini Yesu kikamilifu? Hapana, kwa kweli hapana. Hii ndio maana ni lazima tufahamu kiusahihi huduma ya Yohana Mbatizaji pamoja na huduma ya Yesu.

Mathayo 21:32 inasema, *“Kwa sababu Yohana alikuja kwenu kwa njia ya haki, ninyi msimwamini; lakini watoza ushuru na makahaba walimwamini, nanyi hata mlipoona, hamkutubu baadaye, ili kumwamini.”* Ukristo wa leo unajidai kwa kuwa na ile historia ndefu. Kwa kuwa viongozi wa Kikristo wa leo hawaifahamu huduma ya Yohana Mbatizaji kwa kuilinganisha na huduma ya Yesu, basi hata kama watajitahidi kufanya uinjilisti, basi wale wanaofanyiwa uinjilisti huo hawawezi kuzaa tunda la kweli la wokovu. Ni jambo la kuvunjaj moyo kuona kuwa Wakristo wengi hawana ufahamu wa jinsi dhambi zao zilivyotoweshwa mbali, hii ni

sawa na ilivyoandikwa:

Watu wangu wanaangamizwa kwa kukosa maarifa.

Kwa kuwa wewe umeyakataa maarifa,

Mimi nami nitakukataa wewe usiwe kuhani kwangu mimi;

Kwa kuwa umeisahau sheria ya Mungu wako,

Mimi nami nitawasahau watoto wako (Hosea 4:6).

Hebu nikueleza hadithi moja hapa. Zamani za kale, katika kijiji kimoja kilichokuwa mwituni, kulikuwa na ndugu wawili waliokuwa hawajui kusoma. Kaka mkubwa aliondoka kijiji kwao ili kwenda kutafuta kazi, lakini alirudi nyumbani kwa ajili ya sherehe. Siku moja kabla ya siku ya Kutoa Shukrani, aliongozana na mdogo wake kwenda kupanda mlima katika kilima kilichokuwa jirani. Kwa kuwa kilikuwa ni kipindi cha kiangazi, kulikuwa na mabango mengi yalioonya juu ya uwezekano wa kuzuka moto wa msituni. Basi hao ndugu wakalifikia bango moja ambalo lilikuwa limening'inizwa katika nguzo mbili za umeme likiwa na maandishi mekundu yanayosomeka “Jihadhari na Moto”. Huyu ndugu mdogo alikuwa amemwona kaka yake jinsi alivyobadilika baada ya kutokuwepo kwa muda mrefu, akiwa amevaa nguo nzuri za kisasa, basi alidhani kuwa kaka yake atafahamu kilichoandikwa katika bango lile.

Akiwa na matarajio hayo alimuuliza kaka yake, “Hii alama inasema nini?” Kusema kweli yule kaka yake alikuwa hajui kuwa bango lile linasema nini, lakini kwa kuwa mdogo wake alikuwa akimuuliza, basi yeye aliona kuwa anastahili kumpatia jibu ili kulinda hadhi yake. Basi akaangalia sehemu za jirani, kisha akasema “Bango hili linasema Nguzo ya Umeme.” Hali akiwa ameshangaa, yule kijana mdogo aliruka juu kwa furaha na kumsifu kaka yake kwa kusema “Ewaa, una akili sana!”

Baada ya kitambo kidogo, walilifikia bango jingine.

Wakati huu bango lilisomeka hivi “Jihadhari na Moto wa Msituni.” Yule kijana mdogo kwa kweli hakujua chochote kilichoandikwa katika bango lile kwa kuwa alikuwa hajui kusoma kabisa. Basi akamuuliza tena kaka yake, “bango hili linasema nini?” Huyu kaka mkubwa alikuwa amempatia yule mdogo wake jibu ambalo lipo wazi na sasa alikuwa akiuliza tena. Basi akafikiria kwa muda atamwambia nini, kisha akatambua kuwa bango hili lina neno moja la ziada kuliko lile bango la kwanza, basi akamjibu “nguzo nyingine ya umeme.” Kwa mara nyingine yule kijana alivutiwa.

Hali wakiendelea na safari yao, walikuwa wakizungumza yaliyokuwa yakitokea katika kijiji chao wakati walipokuwa wametengana, waliendelea kushirikishana habari za furaha na za huzuni. Baadaye walilifikia bango jingine. Wakati huu bango hilo lilikuwa likisomeka: “Uwe Mwangalifu na Moto wa Msituni.” Basi yule kijana mdogo akamuuliza tena kaka yake kuhusu lile bango akisema, “Bango hili linasema nini?” Basi yule kaka mkubwa alifikiria kwa kitambo kisha akamjibu “Nguzo nyingine tena ya Umeme.”

Wakaendelea kupanda mlima. Walipozidi kuendelea walikutana na bango jingine. Wakati huu lilisomeka hivi, “Uwe Makini Sana na Moto wa Msituni.” Basi yule kijana mdogo akauliza tena kwa mara nyingine, “Bango hili linasema nini?” Basi yule kaka akajichetua kisha akasema “Nguzo Zaidi za Umeme.” Kwa mara nyingine tena, yule kijana mdogo alimfurahia sana kaka yake akamwambia “Una ufahamu wa hali ya juu! Ninataka unichukue twende pamoja utakapokuwa ukiondoka nyumbani!”

Huku wakiendelea na safari yao, walilifikia alama nyingine iliyokuwa na herufi nyingi zaidi. Alama hii ilisomeka hivi, “Hebu Uangalie Tena Moto Maana Umeupitia.” Yule kijana mdogo akauliza tena, “je alama hii ina maanisha nini?”

Majibu yote yaliyokuwa yamepita yalizungumzia kuhusu nguzo za umeme, je, unadhani ni jibu gani ambalo kaka yake alimjibu mdogo wake? Alimjibu hivi, “Hii bado ni nguzo nyingine ya umeme.” Kwa njia hii huyu kaka mkubwa aliweza kumstaajabisha mdogo wake.

Miongoni mwa wale wanaoihubiri injili leo hii, kuna watu wengi sana ambao ni sawa na huyu kaka mkubwa katika hadithi tuliyoipitia. Pamoja na kuwa hawafahamu kiusahihi jinsi yesu alivyozebeba dhambi zao, wao bado wanakazania katika hali ya upofu kwamba, kwa kuwa Mungu anawapenda na kwamba ajitoa kusulubiwa kwa ajili yao, basi wanaokolewa kwa kuuamini Msalaba wa Yesu tu. Lakini huu ni uongo mkubwa. Unaweza kuifahamu alama ikiwa unazifahamu herufi zake na maana yake. Tunaweza kuufikia uelewa sahihi wa injili ya maji na Roho pale tu tutakapokuwa na ufahamu sahihi kuhusu Yohana Mbatizaji. Leo hii, tunaweza kumwamini Yesu kupitia Yohana Mbatizaji, yaani kupitia ushuhuda wa Yohana Mbatizaji kama ilivyoandikwa katika Maandiko. Yohana alimshudia Yesu kuwa ni nani, dhambi gani alizibeba, alizibebaje, jinsi alivyokuwa Mwana wa Mungu na jinsi alivyojitwika dhambi zetu zote. Mtume Yohana na Yohana Mbatizaji sio watu wamoja. Mtume Yohana ni mwanafunzi wa Yesu wakati Yohana Mbatizaji ni mjumbe wa Mungu, mwakilishi wa wanadamu, mwana wa Haruni, kuhani wa mwisho wa kizazi cha mwanadamu na Kuhani Mkuu wa kizazi hicho.

Yohana Mbatizaji ni Mtumishi wa Mungu Aliyetumwa na Baba

Katika Yohana 1:6-7 imeandikwa: *“Palitokea mtu,*

ametumwa kutoka kwa Mungu, jina lake Yohana. Huyu alikuja kwa ushuhuda, ili aishuhudie ile nuru, wote wapate kuamini kwa yeye.” Mtume Yohana anashuhudia hapa kuwa kulikuwa na mtu aliyekuwa ametumwa toka kwa Mungu akiitwa Yohana, na kwamba ni kwa kupitia ushuhuda wake tunaweza kumwamini Yesu Kristo. Pasipo ushuhuda wa Yohana Mbatizaji unaotajwa katika Yohana 1:7, inawezekanaje basi kwa wewe na mimi kumwamini Yesu kiusahihi? Ukizingatia ukweli kuwa hatujawahi kumwona Yesu, na kwamba sisi sote tunatoka katika tamaduni, desturi, utaifa, na dini mbalimbali, tungeliwezaje basi kumwamini Yesu kuwa ni Mwokozi pasipo kuifahamu huduma ambayo Yohana Mbatizaji aliitimiza? Ikiwa hatufahamu kiusahihi kuwa ni wakati gani dhambi zetu zilipitishwa kwenda kwa Yesu, na ikiwa Yohana asingelishuhudia kuwa alizipitisha dhambi za ulimwengu pamoja na dhambi zetu kwenda kwa Yesu, sasa tungeliwezaje kumwamini Yesu kuwa ni Mwokozi? Pasipo Yohana Mbatizaji, ambaye ni mtangulizi wa injili, tungeliweza kumwamini Yesu kuwa ni Mwokozi wetu? Je, si hadi tunapouchunguza msingi wa mpango wa Mungu wa wokovu ndipo tunapoweza kupata ukweli ikiwa Yesu Kristo ni Mwokozi au la? Je, si hadi tutambue lini, kivipi, na kupitia kwa nani ambapo dhambi zetu zilipitishwa kwenda kwa Yesu ndipo tunapoweza kumwamini Yesu? Je, maswali haya hayana msukumo wa kutosha?

Ndugu zangu waamini, Wakristo ambao bado wanamwamini Yesu ni lazima waifahamu huduma ya Yohana Mbatizaji. Mtu anapaswa kuwa msomi ndipo aweze kuwa kiongozi wa kijiji. Kumweka kiongozi ambaye hajasoma au hana ufahamu ni kuongeza matatizo. Sio kwamba kiongozi huyo asiyesoma atakuwa matatani, bali kijiji chote kitapata mateso kama matokeo ya kuwa na kiongozi asiyesoma.

Ndugu zangu waamini, ni pale tu utakapoifahamu huduma


ya Yohana Mbatizaji aliyetumwa na Mungu ndipo unapoweza kuokolewa kwa kweli toka katika dhambi. Ni lazima utambue kuwa unapomwamini Yesu, yaani wakati unapokubali na kuamini kuwa Yesu amefanyika kuwa Mwokozi wako, basi wewe unaweza kuokolewa na wokovu wako hauwezi kuhesabiwa kuwa si kitu. Tunapokuwa na imani ya jinsi hiyo, tunaweza kushuhudia kwa midomo yetu kuwa Yesu ametuokoa kwa hakika toka katika dhambi zote kwa kuwa anatupenda sote. Je, unakubaliana na hilo?

Kama ambavyo ufahamu ni wa muhimu katika kufanya jambo lolote, basi unapaswa kutambua kuwa Yohana Mbatizaji alikuja kwa njia ya haki, na ni lazima utambue kuwa Yesu alizibeba dhambi zetu mara moja na kwa wote kwa kupitia ubatizo ambao aliupokea toka kwa Yohana. Je, si hadi kufikia hapo ndipo tunapoweza kumwamini Yesu kuwa ni Mwokozi wetu? Yohana Mbatizaji ni mtumishi wa Mungu aliyezipitisha dhambi za ulimwengu huu kwenda kwa Yesu, naye ndiye Kuhani Mkuu wa mwisho wa zama za Agano la Kale.

Tunapaswa kuitafakari huduma ya Yohana Mbatizaji kwa kuilinganisha na huduma ya Yesu Kristo, na kisha kufahamu uhusiano wake na kisha kuamua kumwamini Yesu. ☒

MAHUBIRI

2



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Yohana Mbatizaji Hakushindwa

< Mathayo 11:1-14 >

“Ikawa Yesu alipokwisha kuwaagiza wanafunzi wake kumi na wawili, alitoka huko kwenda kufundisha na kuhubiri katika miji yao. Naye Yohana aliposikia huko gerezani matendo yake Kristo, alituma wanafunzi wake, kumwuliza, ‘Wewe ndiwe yule ajaye, au tumtazamie mwingine?’ Yesu akajibu akawaambia, ‘Nendeni mkamweleze Yohana mnayoyasikia na kuyaona; vipofu wanapata kuona, viwete wanakwenda, wenye ukoma wanatakaswa, viziwi wanasikia, wafu wanafufuliwa, na maskini wanahubiriwa habari njema. Naye heri awaye yote asiyechukizwa nami.’ Na hao walipokwenda zao, Yesu alianza kuwaambia makutano habari za Yohana, ‘Mlitoka kwenda nyikani kutazama nini? Unyasi ukitikiswa na upepo? Lakini mlitoka kwenda kuona nini? Mtu aliyevikwa mavazi mororo? Tazama, watu wavaa mavazi mororo wamo katika nyumba za wafalme. Lakini kwa nini mlitoka? Ni kuona nabii? Naam, nawaambia, na aliye mkuu zaidi ya nabii. Huyu ndiye aliyeandikiwa haya,

‘Tazama, mimi namtuma mjumbe wangu Mbele ya uso wako,

Atakayeitengeneza njia yako mbele yako.’

Amin, nawaambieni, hajaondokea mtu katika wazao wa wanawake aliye mkuu kuliko Yohana Mbatizaji; walakini aliye mdogo katika ufalme wa mbinguni ni mkuu kuliko yeye. Tangu siku za Yohana Mbatizaji hata sasa

ufalme wa mbinguni hupatikana kwa nguvu, nao wenye nguvu wauteka. Kwa maana manabii wote na torati walitabiri mpaka wakati wa Yohana. Na ikiwa mnataka kukubali, yeye ndiye Eliya atakayekuja.”

Tunapaswa Kuifahamu Huduma ya Yohana Mbatizaji

Ni huduma gani hasa ambayo Yohana Mbatizaji aliitimiza kabla ya Yesu? Wakristo wengi leo hii hawamfahamu vizuri Yohana Mbatizaji, hivyo wanatakiwa kupata mtazamo mpya kuhusu Yohana Mbatizaji ili waweze kumfahamu na kuikubali huduma yake kikamilifu. Sisi sote tunapaswa kuwa na ufahamu sahihi na kuukubali uhusiano kati ya huduma ya Yesu na ile ya Yohana Mbatizaji. Kwa kuifahamu uhusiano huu kikamilifu, basi unapaswa kwanza kulipokea ondoleo la dhambi kwa imani.

Katika kifungu cha leo cha Maandiko, Yesu aliwaambia wanafunzi wa Yohana Mbatizaji, *“Nendeni mkamweleze Yohana mnayoyasikia na kuyaona; vipofu wanapata kuona, viwete wanakwenda, wenye ukoma wanatakaswa, viziwi wanasikia, wafu wanafufuliwa, na maskini wanahubiriwa habari njema.”*

Kwa kweli vipofu waliokutana na Yesu walifunguliwa macho yao, viwete waliweza kusimama na kutembea, waliokuwa wamepagawa na mapepo waliwekwa huru, na injili ilihubiriwa kwa maskini wa roho.

Tunachopaswa kukitambua hapa ni kwamba huduma ya Yesu ilihusisha kazi ya kuwafungua macho vipofu. Kwa maneno mengine, katika wakati huu, Bwana ametupatia injili ya maji na Roho, ambayo ni injili ya kweli inayowafungua macho wenye dhambi ambao bado wanatembea katika giza.

Kabla ya kukutana na Yesu Kristo, kila mtu alikuwa na dhambi katika moyo wake na alikuwa ni kipfu wa kiroho mbele ya Mungu. Sisi pia, tulikuwa hatuufahamu uhalisia wa injili ya maji na Roho, wala hatukutambua kuwa Yesu ni nani, pia sisi sote tulikuwa hatuzifahamu dhambi zetu na matokeo mabaya ambayo yangejiri kwa sababu ya dhambi hizo. Pia hatukuwa na upendo kwa Neno la kweli la injili ya maji na Roho, ambalo ni Kweli ya wokovu ambayo Yesu ametupatia.

Hata hivyo, watu wengi sasa wameisikia Neno lenye nguvu la injili ya maji na Roho, na kwa kule kuiweka imani yao katika Neno la injili, basi macho yao ya kiroho yamefunguliwa na wameuvumbua Ukweli unaowawezesha kuokolewa toka katika dhambi zao zote. Wale wanaoifahamu na kuiamini injili hii ya kweli sasa wameuvumbua Ukweli wa ondoleo la dhambi ambao walikuwa hawaufahamu hapo kwanza: Macho yao ya kiimani yamefunguliwa, na sasa wanaifanya kazi ya Mungu. Kama ilivyo katika macho yetu ya kimwili ambapo tunaona kila kitu katika ulimwengu huu, sasa tunaweza kuona ulimwengu wa kiroho kwa wazi hasa baada ya macho yetu ya kiroho kufunguliwa kwa kupitia imani yetu katika injili ya maji na Roho. Hivi ndivyo mtu anavyoweza kuufikia ufahamu kwamba huduma ya Yesu inahusu hasa huduma ya injili ya maji na Roho.

Kwa sababu ya dhambi zetu, wewe na mimi tulikuwa ni vipofu na viwete wa kiroho, na kwamba hatukuweza kuiona huduma ya Mungu wala kuifanya kazi yake. Kwa maneno mengine, sisi pia tulikuwa ni wenye dhambi ambao tulikuwa tumefungwa ili kwenda kuzimu. Hata hivyo, Yesu Kristo alikja hapa duniani, alibatizwa na Yohana Mbatizaji, akaimwaga damu yake Msalabani, na kwa sababu hiyo akazitimiza kazi ambazo ziliondolea mbali dhambi zote za ulimwengu. Kwa hiyo, yeyote atakayeamini katika Ukweli huu ataona bayana

kuwa dhambi zake zote zimeoshelewa mbali kikamilifu. Kwa kweli Yesu Kristo amezisafishilia mbali dhambi zetu zote kwa kuja hap aduniani, kwa kubatizwa na Yohana Mbatizaji, na kwa kuimwaga damu yake Msalabani. Hata sasa, kazi hizo za Mungu, zinaendelea kujifunua vizuri katika mioyo ya wale wote wanaoamini katika injili ya maji na Roho. Bwana wetu ameyafunua macho ya waamini wake kiroho, na ametufanya sisi tuliokuwa viwete kiroho, kuinuka na kusimama kwa miguu yetu kwa kupitia nguvu ya injili ya maji na Roho.

Hapa tunahitaji kutambua kuwa ikiwa tutajaribu kuifanya kazi ya Mungu pasipo kuwa na imani katika injili ya maji na Roho, basi ni hakika kuwa hakutakuwa na faida yoyote kwa miili yetu wala kwa roho zetu. Wale ambao bado hawajapokea ondoleo la dhambi zao wanafikiri wakati wote, “Ninapaswa kuishi maisha mema. Ninapaswa kuwa mwema kwa kila mtu.” Lakini hakuna hata mmoja ambaye anaweza kulifanya hili, yaani kutenda mema na kuishi maisha mema.

Kabla hatujaifahamu injili ya maji na Roho, tulikuwa na dhambi katika mioyo yetu na kwa sababu hiyo sisi sote tulikuwa na dhambi katika mioyo yetu na kwa sababu hiyo tulikuwa ni wenye dhambi, na hivyo hatukuweza kuifahamu kazi ya Mungu ya haki ilivyo na wala hatukuweza kuitenda. Hata hivyo, kwa kuwa Bwana wetu alizipokea dhambi zetu zote mara moja na kwa wote kwa kupitia ubatizo wake, na kwa sababu alizisafishilia mbali kwa damu yake aliyoimwaga Msalabani hali akiwa amejitwika dhambi za ulimwengu, basi hapo tuliweza kuokolewa toka katika dhambi zetu zote. Sasa tunaweza kuishi kwa mujibu wa mapenzi ya Mungu kwa sababu Yesu Kristo ametuokoa toka katika dhambi kwa nguvu ya injili ya maji na Roho. Sasa tunaweza kumwezesha yeyote yule kuionja radha ya nguvu ya injili hii ya kweli na kisha kuokolewa.

Yesu Kristo ametuwezesha kuokolewa toka katika dhambi na laana zetu zote kwa kuleta maisha mapya kwako wewe na mimi ambao tulikuwa ni viwete kwa kupitia Ukweli wa wokovu. Alichosema Yesu hapa ni kuwa, “wenye ukoma wanatakaswa na viziwi wanasikia; wafu wanafufuliwa,” kimetimizwa katika mioyo yetu yote inayoamini katika injili ya maji na Roho. Tulipokuwa tungali wenye dhambi, pia tulikuwa ni wakoma wa kiroho. Wakati huo mioyo yetu ilikuwa na dhambi, na hatukuweza kusafishwa toka katika dhambi zetu zote hadi pale tulipoiweka imani yetu katika injili ya kweli ya maji na Roho.

Pia Bwana wetu alisema kuwa viziwi watasikia. Tulipokuwa wenye dhambi, hatukuweza kulifahamu Neno la Mungu hata pale tuliposikia. Lakini sasa, kwa kuwa tumefunikwa na nguvu ya injili ya maji na Roho kwa kuiweka imani yetu juu yake, tunaweza kulifahamu Neno la Mungu, na kufahamu maana yake ya kweli, na kisha kuliadini hilo Neno kwa mioyo yetu yote.

Kila mtu ulimwenguni pote anaishi katika njaa na kiu ya kiroho. Watu wanateseka kutokana na upofu wa ulemavu wa kiroho. Lakini Bwana bado anawapatia nafasi ya kuponywa mara moja kwa kuturuhusu kuwahubiria injili ya maji na Roho. Ni lazima tuwaonee huruma. Tunahitaji kukumbuka kuwa wakati tulipokuwa hatuifahamu injili hii ya wokovu, ambayo ni injili ya maji na Roho, hatukuwa na ukamilifu, na kwamba hatukuweza kufanya lolote zaidi ya kuishi hali tukiwa na dhambi zetu zote katika mioyo yetu. Hatupaswi kuisahau neema yake yenye huruma ambayo imewageuza wenye dhambi kuwa wenye haki.

Kwa hiyo, kile ambacho Bwana wetu alikizungumza kwa wanafunzi wa Yohana Mbatizaji kuhusu maajabu ambayo alikuwa anayatenda alikuwa na lengo kuwafanya wafahamu

kuwa Yesu ni Mwana wa Mungu, Mwokozi wa kweli na Masihi atakayekuja.

Baadhi wanaweza kusema kuwa wakati Yohana Mbatizaji alipofungwa, alijaribiwa hadi akawa na mashaka ikiwa Yesu alikuwa ni Masihi atakayekuja, na kwamba hii ndio sababu aliwatuma wanafunzi wake kwenda kwa Yesu. Lakini hii si kweli. Yohana Mbatizaji alikuwa ni nani? Alikuwa ni mkuu kati ya wote waliozaliwa na wanawake. Alikuwa ni mkuu kuliko mtumishi mwingine yeyote wa Mungu. Kwa maneno mengine, sio kwamba Yohana alikuwa hamwamini Yesu kiasi kuwa akatuma wanafunzi wake kwenda kumuuliza, “Wewe ndiye yule ajaye?” Bali alichokuwa anakifanya ni kuwaelimisha wanafunzi wake ili waweze kufahamu hasa kuwa Yesu ni nani.

Yohana Mbatizaji alikwishaamini na kufahamu kuwa Yesu ni Mwokozi na Mwana wa Mungu; zaidi ya ote, alikuwa amekwishasikia ushuhuda wa Mungu Baba wakati alipombatiza Yesu Kristo katika Mto Yordani (Mathayo 3:17), na pia yeye mwenyewe alikuwa ni shahidi aliyekuwa akimshuhudia Yesu. Yohana Mbatizaji aliwatuma wanafunzi wake kwa Yesu kwa kuwa wanafunzi wake walikuwa hawamfahamu Yesu kikamilifu, na alitaka kuwafundisha kuwa Yesu Kristo ndiye Mwokozi atakayekuja. Kwa kweli baada ya Yohana Mbatizaji kufahamu kuwa Yesu Kristo alikuwa ni Masihi atakayekuja, alijaribu kuiondoa huduma yake na kuwapeleka wanafunzi wake kwa Bwana. Ili kumfunua Yesu kwa taifa la Isareli, Yoahan Mbatizaji alisema kuwa, *“Yeye[Yesu] hana budi kuzidi, bali mimi kupungua”* (Yohana 3:30). Kwa mfano, Andrea, ndugu wa Simoni Petro, alikuwa ni mwanafunzi wa Yohana, lakini alimfuta Bwana mara baada ya kumsikia Yohana akimshuhudia Yesu (Yohana 1:40).

Hata hivyo, ubishi unaotolewa juu ya Yohana Mbatizaji

unaeleza mambo mengi yasiyo na maana hata pale ambapo hawamfahamu Yohana Mbatizaji vizuri, huku wakidai, “Yohana Mbatizaji alikuwa ameshindwa. Aliangukia katika majaribu na akashindwa kumwamini Yesu. Imani yake ilivurugika baada ya kufungwa.”

Lakini ndugu zangu waamini, hampaswi kuiwekea mashaka imani ya Yohana Mbatizaji. Yohana Mbatizaji na Yesu walikuwa na majukumu yao ambayo walipaswa kuyatimiza pamoja kwa majaliwa ya Mungu Baba. Na majukumu haya yalikuwa ni kubatiza na kubatizwa, huduma ambazo zilikuwa na lengo la kuitimiza haki ya Mungu. Hii ndio sababu Yesu na Yohana Mbatizaji kila mmoja aliishuhudia huduma ya mwenzake.

Mathayo 11:7-9 inasema, *“Na hao walipokwenda zao, Yesu alianza kuwaambia makutano habari za Yohana, Mlitoka kwenda nyikani kutazama nini? Unyasi ukitikiswa na upepo? Lakini mlitoka kwenda kuona nini? Mtu aliyevikwa mavazi mororo? Tazama, watu wavaao mavazi mororo wamo katika nyumba za wafalme. Lakini kwa nini mlitoka? Ni kuona nabii? Naam, nawaambia, na aliye mkuu zaidi ya nabii.”*

Hapa Yesu alisema, “Kwa nini mlikwenda nyikani? Kumwona nabii? Ikiwa ni hivyo, mpo sahihi. Ninawaambia kuwa Yohana Mbatizaji ni mkuu zaidi ya nabii.” Kisha Yesu alimwelezea Yohana Mbatizaji kwa kunukuu Malaki 3:1 katika Maandiko.

Mathayo 11:10 ni kifungu kinachonukuu Malaki 3:1. Katika kifungu hiki, Yesu alisema, *“Huyo ndiye aliyeandikiwa haya, Tazama, mimi natuma mjumbe wangu mbele ya uso wako, atakayeingenezanjanja yako mbele yako.”* Kwa maneno mengine, kwa kunukuu kifungu kilichoandikwa katika Malaki 3:1, Yesu alishuhudia kuwa Yohana Mbatizaji alikuwa ni mtumishi halisi wa Mungu ambaye ndiye aliyetumwa

kumtangulia Yesu Mwenyewe.

Mtumishi wa Mungu aliyeandikwa katika Malaki 3:1 ni nani? Si mwingine bali ni Yohana Mbatizaji. Malaki 4:5-6 pia inaonyesha kuwa mtumishi anayetajwa katika Malaki 3:1—*“Namtuma mjumbe wangu”*—ina maanisha ni Yohana Mbatizaji.

Katika Mathayo 11:11, Yesu alisema, *“Amin, nawaambieni, hajaondokea mtu katika wazao wa wanawake aliye mkuu kuliko Yohana Mbatizaji; walakini aliye mdogo katika ufalme wa mbinguni ni mkuu kuliko yeye.”*

Kwa nini Bwana alituambia hili? Kwa nini alisema kuwa Yohana Mbatizaji alikuwa ni mkuu kuliko wote waliozaliwa na wanawake? Hapa Yesu anatueleza kuwa Yohana Mbatizaji alikuwa ni mtumishi halisi wa Mungu aliyekuwa ametabiriwa katika Agano la Kale, na kwamba yeye ni mwakilishi wa wanadamu.

Kifungu hiki kinaendelea kwa kueleza sentensi ngumu: “Walakini aliye mdogo katika ufalme wa mbinguni ni mkuu kuliko yeye.” Waalimu wengi wa uongo wanamhukumu Yohana Mbatizaji kuwa mtu aliyeshindwa kwa kuangalia kifungu hiki. Wanadai “Kwa sababu Yohana alikuwa na mashaka kuhusu Yesu’ kuwa ni Masihi, na kwa sababu hiyo alitathminiwa na Bwana kuwa ni mtu wa mwisho.” Madai haya ni upuuzi mtupu.

Ila, kile anachokisema hapa Yesu ni kwamba ingawa Yohana Mbatizaji alikuwa ni mwakilishi wa wanadamu, kwa upande wa kiroho, alikuwa ni mtu wa chini ambaye hakuweza kufananishwa na wale waliokuwa wamefanyika watoto wa Mungu. Kwa maneno mengine, pamoja na kuwa Yohana Mbatizaji alikuwa ni mwakilishi wa wanadamu wote katika mwili, basi yeye hakuweza kufananishwa na walel waliozaliwa tena upya.

Kwa kweli Yohana alikuwa ni mkuu katika mtazamo wa kibinadamu. Yeye alilelewa kama Mnadhiri, na aliishi maisha ya kitawa akiwa nyikani akila nzige na asali ya mwitu. Kutokana na mtazamo wa haki wa kibinadamu, ni kweli kuwa Yohana alikuwa ni mkuu. Lakini hii haki ya kibinadamu haina maana yoyote hasa pale inapolinganishwa na haki ya Mungu ambayo inaweza kutolewa kwa yeyote anayeweza kuingia Ufalme wa Mungu kwa imani. Kwa sababu ya wale waliofanyika kuwa watu wa Ufalme wa Mbinguni kwa kuamini katika injili ya maji na Roho wameipokea haki ya Mungu, basi hao ni wakuu kuliko mtu yeyote anayeitegemea haki yake binafsi. Mtu anaweza kuwa mwakilishi wa wanadamu katika ulimwengu huu katika mwili, lakini yeye ni mdogo kuliko wale waliofanyika watu wa Mungu kwa kuamini katika injili ya maji na Roho.

Hivyo basi, wakati Yesu aliposema, *“Tangu siku za Yohana Mbatizaji hata sasa ufalme wa mbinguni wapatikana kwa nguvu, na wenye nguvu wauteka,”* alisema hiyo kwa sababu Yohana Mbatizaji alikuwa amembatiza mara moja na hivyo kuzipitisha dhambi za ulimwengu kwenda kwa Yesu. Kwa hiyo, Yohanan Mbatizaji alikuwa ni Kuhani Mkuu wa wisho na nabii wa mwisho wa Agano la kale, na huduma yake iliisha pale alipombatiza Yesu na akamshuhudia. Kwa maneno mengine, Yesu anatueleza kuwa kila kitu cha Agano la Kale kiliisha kwa kuonekana kwake na kwa kuonekana kwa Yohana Mbatizaji, na kwa huduma ya Yohana Mbatizaji ya kumbatiza Yesu.

Kwa lugha nyingine, tangu wakati ambapo Yohana Mbatizaji na Yesu walikuja hapa ulimwenguni, hapo ndipo haki yote ya Mungu ilitimizwa. Kipindi cha Agano Jipya kilifunguliwa wakati Yesu alipokuja hapa duniani na kubatizwa na Yohana Mbatizaji. Kipindi hiki cha Agano Jipya

ni kipindi cha nguvu ya injili, ni wakati ambapo yeyote anayeamini katika injili ya maji na Roho anaweza kupokea ondoleo la dhambi na kufanyika mwana wa Mungu. Kadri Agano la Kale lilivyodumu hadi siku za Yohana Mbatizaji, wakati Yesu alipokuja hapa duniani, wakati alipozichukua dhambi za mwanadamu kwa ubatizo wake, akaimwaga damu yake, na kuzitoweshea mbali dhambi zetu zote, basi tangu hapo malango ya Mbinguni yamefunguliwa kwa wote wanaoamini katika Ukweli huu.

Wakati Yesu alipozichukua dhambi zote za kila mmoja katika ulimwengu huu kwa kubatizwa, basi hapo ndipo kipindi cha Agano la Kale kilipoanza. Neno lote la unabii la Agano la Kale lilitimizwa kwa kupitia Yohana Mbatizaji na kwa kupitia Yesu Kristo. Yesu Kristo alizipokea dhambi zote za wanadamu mara moja na kwa wote kwa kubatizwa na Yohana Mbatizaji, kisha akaimwaga damu yake Msalabani, na kwa sababu hiyo amezitoweshea mbali dhambi zote za ulimwengu. Hii ndio sababu Bwana wetu alisema tangu siku za Yohana Mbatizaji hata sasa Ufalme wa Mbinguni wapatikana kwa nguvu.

Yeyote anayeamini katika Ukweli huu anaweza kuingia Mbinguni kwa imani kwa kuwa Yesu alizipokea dhambi za ulimwengu kwa kuupokea ubatizo toka kwa Yohana Mbatizaji. Kwa lugha tofauti, Yesu aliweza kuzichukua dhambi zote za wanadamu mara moja na kwa wote kwa kuuwa Yohana Mbatizaji alikuwa amezipitisha dhambi zote za mwanadamu kwenda kwa Yesu. Yohana Mbatizaji aliweza kulitimiza jukumu la kuzipitisha dhambi za ulimwengu kwenda kwa Yesu akiwa kama Kuhani Mkuu wa mwisho wa Agano la Kale na hii ni kwa sababu Yohana Mbatizaji alikuwa amezaliwa toka katika ukoo wa Haruni Kuhani Mkuu.

Kule kusema kila mtu anayeamini katika Ukweli huu anaweza kuingia Mbinguni kwa imani ni kutokana na ukweli

kuwa Yohana Mbatizaji alikuwa amezipitisha dhambi zote za ulimwengu kwenda kwa Yesu kwa kumbatiza, na pia ni kwa sababu Yesu alizichukua dhambi za ulimwengu na ndio maana kipindi cha wokovu kwa mwanadamu kimetufikia. Kwa tukio hili la kihistoria, kipindi cha Agano la Kale kiliisha, na kipindi cha Agano Jipya kilianza. Yesu aliitimiza huduma yake kama Mwokozi wetu mkamilifu kwa kuzichukua dhambi zetu zote za mwanadamu kwa ubatizo wake, na kwa kuimwaga damu yake, na kwa kufufuka tena toka kwa wafu. Hivyo basi, wakati mpya umefika kwa wale wote wanaoamini katika ubatizo ambao Yohana Mbatizaji aliutoa kwa Yesu, ambapo Ufalme wa Mbinguni unapatikana kwa nguvu.

Ukweli ni kuwa Ufalme wa Mbinguni hauwezi kuchukuliwa kwa nguvu ya kimwili. Sasa, maana ya kiroho ya kifungu hiki ni ipi? Maana yake ni hii: Yesu anatueleza juu ya fumbo la Mbinguni, kwamba mtu yeyote anaweza kuingia Mbinguni kwa kuamini katika injili hii kwa sababu Yesu alizipokea dhambi zote za ulimwengu wakati Yohana Mbatizaji alipombatiza Yeye, na kwa sababu ya kusulubiwa na kuimwaga damu yake na kufufuka tena toka kwa wafu.

Bwana wetu alisema, *“Manabii wote na torati walitabiri hadi wakati wa Yohana.”* Kwa maneno mengine, unabii wa Agano la Kale ulidumu hadi wakati wa Yohana Mbatizaji. Na kwa kweli ni sahihi kusema kipindi cha Agano la Kale kilidumu hadi kuzaliwa wa kuzaliwa kwa Yesu. Lakini unabii wa Agano la Kale ulitimizwa kiroho wakati Yohana Mbatizaji alipombatiza Yesu.

Eliya Atakayekuja Si Mwingine Bali ni Huyu Mtu, Yohana Mbatizaji

Katika Mathayo 11:14 Yesu alisema, *“Na ikiwa mnataka kukubali, yeye ndiye Eliya atakayekuja.”* Kifungu hiki kinatueleza kuwa yule mjumbe aliyeandikwa katika Malaki 3:1 na Malaki 4:5-6 si mwingine bali ni Yohana Mbatizaji. Kwa kuwa Yohana Mbatizaji alikuwa ni mwakilishi wa wanadamu, na mkuu kuliko wote waliozaliwa na wanawake, basi hii ina maanisha kuwa yeye alikuwa ni mkuu kuliko manabii wote wa Agano la Kale. Yohana Mbatizaji alikuwa ni mtumishi wa Mungu ambaye alikuwa ni mkuu kuliko watumishi wote wa Mungu kama vile Musa, Eliya, Yeremia, Ezeieli, na Danieli.

Wakati alipokuja hapa duniani, Yohana Mbatizaji alilitimiza jukumu lake kama nabii, na kama mwakilishi wa wanadamu, pia alilitimiza jukumu lake kama Kuhani Mkuu wa mwisho wa Agano la Kale. Dhambi zote za mwanadamu zilipelekwa kwa Yesu mara moja na kwa wote kwa kuwa Yohana Mbatizaji alikuwa amembatiza Yesu katika Mto Yordani. Unabii wote wa Agano la Kale, ulitimizwa mara moja na kwa wote kwa kupitia huduma ya Yohana Mbatizaji na huduma ya Yesu.

Kwa hiyo, sisi sote ni lazima tutambue kuwa jukumu la Yohana Mbatizaji lilikuwa ni la muhimu sana kwa kazi ya wokovu wa mwanadamu. Ilikuwa ni huduma ya Yohana Mbatizaji ambayo ilifanya kazi ya kusaidia wakati Yesu Kristo alipoitimiza injili ya maji na Roho. Sisi sote ni lazima tutambue kuwa Yesu aliutimiza unabii wa Agano la Kale kwa kuupokea ubatizo wake toka kwa Yohana Mbatizaji.

Sisi sote ni lazima tufahamu na kuamini pasipo shaka juu ya Ukweli huu, hasa pale inapokuja kuhusu majaliwa ya Mungu kwa wokovu wa mwanadamu. Ninachokueleza hapa ni

uhusiano kati ya huduma ya Yesu na ile ya Yohana Mbatizaji. Kwa hakika, huduma hizi mbili yaani ya Yesu na ile ya Yohana Mbatizaji zilikuwa kwa ajili ya kuyatimiza mapenzi ya Mungu Baba katika umoja wao. Ni hakika kuwa ikiwa Yohana Mbatizaji asingelishuhudia kuwa Yesu ni Mwokozi, na kama asingelizipitisha dhambi zote za ulimwengu kwenda kwa Yesu kwa kumbatiza, basi ni hakika kuwa Yesu asingeliweza kuitimiza huduma yake ambayo ilizitoweshea mbali dhambi za ulimwengu.

Tuliweza kuokolewa toka katika dhambi zetu zote kwa sababu Yesu alishuhudiwa na Yohana Mbatizaji kuwa ni “Mwanakondoo wa Mungu azichukuaye dhambi za ulimwengu”. Hivyo leo hii mimi na wewe tunaweza kusafishwa dhambi zetu zote kwa kuiweka imani yetu katika injili ya maji na Roho.

Tunaweza kuamini katika injili ya kweli kikamilifu hasa pale tunapoamini kikamilifu katika kifungu cha Maandiko kinachoelezea kuwa Yohana Mbatizaji ni nani. Ili kufanya hivyo, tunapaswa kufungua Biblia katika kitabu cha Malaki 3:1, ili tukithibitishe kifungu hiki kwa macho yetu, na kisha tumwamini huyu mjumbe wa Mungu hakuwa mwingine zaidi ya Yohana Mbatizaji. Ni hapo tu ndipo tunapoweza kwa ujasiri kulihubiri na kulielezea jukumu la Yohana Mbatizaji na lile la Yesu hasa pale tunapoishuhudia injili ya maji na Roho kwa kila mtu.

Malaki 3:1 inaeleza, *“Angalieni, namtuma mjumbe wangu; naye ataitengeneza njia mbele yangu; naye Bwana mnayemtafuta atalijilia hekalu lake ghafla; naam yule mjumbe wa agano mnayemfurahia, angalieni, anakuja, asema BWANA wa majeshi.”*

Mjumbe anayetajwa katika kifungu hiki ni nani? Bwana wa majeshi anaeleza hapa kuwa atamtuma mtumishi wake kuja

hapa ulimwenguni, na katika Mathayo 11:10 katika Agano la Kale, Yesu Mwenyewe alikishuhudia kifungu hiki cha Agano la Kale. Tunapolinganisha vifungu hivi viwili, tunaweza kuona kwa wazi kuwa mjumbe wa Mungu si mwingine bali ni Yohana Mbatizaji ambaye Yesu mwenyewe alimshuhudia. Je, tunafikiri Yohana Mbatizaji alikuwa ni nani? Yule mjumbe halisi ambaye Mungu aliahidi kumtuma katika Agano la Kale ni Yohana Mbatizaji.

Huduma Ambayo Ilikuwa ya Muhimu Sana Katika Kuzitoweshea Mbali Dhambi za Ulimwengu

Hebu tena tusome sehemu ya mwisho ya Malaki 3:1: *“Naye Bwana mnayemtafuta atalijilia hekalu lake ghafla; naam yule mjumbe wa agano mnayemfurahia, angalieni, anakuja, asema BWANA wa majeshi.”* Mjumbe wa agano anayetabiriwa hapa ni Yesu Kristo. Hivyo, unabii wa Agano la Kale ulitimilizwa na Yohana Mbatizaji na Yesu Kristo kwa kuwa walitumwa hapa duniani kwa mujibu wa mapenzi ya Mungu Baba. Kifungu hiki kinahusishwa na unabii mwingine unaosema, *“Tazama, bikira atachukua mimba, atazaa mtoto mwanamume, naye atamwita jina lake Imanueli”* (Isaya 7:14). Pia katika Isaya 53:5, imeandikwa, *“Bali alijeruhiwa kwa makosa yetu, Alichubuliwa kwa maovu yetu; Adhabu ya amani yetu ilikuwa juu yake, Na kwa kupigwa kwake sisi tumepona.”* Hii inatueleza kuwa Yesu Kristo, Mwana wa Mungu aliyeahidiwa katika Agano la Kale, atakuja hapa duniani na kuzisafishilia mbali dhambi zote za wanadamu na kuzifanya kuwa nyeupe kama theluji.

Katika Malaki 3:2-3, Mungu aliendelea kusema, *“Lakini*

ni nani atakayestahimili siku ya kuja kwake? Au ni nani atakayesimama atakapoonekana yeye? Kwa maana yeye ni mfano wa moto wa mtu asafishaye fedha, ni mfano wa sabuni ya mtu afuaye nguo; naye ataketi kama asafishaye fedha na kuitakasa naye atawatakasa wana wa Lawi, atawasafisha kama dhahabu na fedha nao watamtolea BWANA dhabihu katika haki.”

Kama vile Mungu alivyotuahidi katika kifungu hiki, “Mungu atawatakasa wana wa Lawi, na atawasafisha kama dhahabu na fedha, ili kwamba waweze kumtolea BWANA dhabihu katika haki,” kwa kweli hili Neno la ahadi imetimizwa sasa.

Katika Agano Jipya, wakati Yesu Kristo alipozichukua dhambi zote za ulimwengu kwa kubatizwa na Yohana Mbatizaji na kwa kuimwaga damu yake, basi Yesu aliutimiza wokovu wetu toka katika dhambi zetu zote. Kifungu hiki kinazungumzia juu ya nguvu ya ondoleo la dhambi zote za mwanadamu ambazo Yesu Kristo amezitimiza kwa kubatizwa na Yohana Mbatizaji na kuimwaga damu yake.

Katika Malaki 3:2, Mungu alisema, “*Lakini ni nani atakayestahimili siku ya kuja kwake? Au ni nani atakayesimama atakapoonekana yeye?*” Ni nani aliyeweza kusimama kinyume na Yesu Kristo wakati alipokuja hapa duniani? Ni nani aliyeweza kumzuia ili asiitimize huduma yake ambayo iliziondolea mbali dhambi zote za wanadamu kwa kuja hapa duniani, kwa kubatizwa na Yohana Mbatizaji, na kwa kuimwaga damu yake?

Wakati watu walipojaribu kumkamata Yesu na kumtupa katika ukingo mrefu, Yesu alikwenda zake hali akipita katikati yao (Luka 4:28-30). Tunapaswa kumfahamu Yeye kuwa ni Mungu Mkuu mwenye nguvu.

Bwana alizichukua dhambi zetu zote mara moja na kwa

wote kwa kupitia injili ya maji na Roho, akazitoweshea mbali dhambi zote kwa nguvu ya injili hii kwa kupitia kusulubiwa kwake, naye atakuja kuwachukua wote wanaoamini hivi. Ni nani basi miongoni mwa waamini atakayeweza kusimama mbele ya Mungu katika Siku hii ya Hukumu? Imeandikwa hivi, *“Ni nani atakayestahimili siku ya kuja wake?”* Ukweli ni kuwa ni wale tu waliopokea ondoleo la dhambi kwa kuamini katika injili ya maji na Roho ndio watakaoweza kustahimili na kusimama mbele yake. Hakuna mtu mwingine yeyote atakayeweza kusimama mbele ya Mungu. Ikiwa tutasimama mbele ya Yesu Kristo katika siku hiyo ya hukumu hali tukiwa na dhambi, basi ni hakika kuwa tutateketezwa.

Malakii 3:2 inasema, *“Kwa maana yeye ni mfano wa moto wa mtu asafishaye fedha, ni mfano wa sabuni ya mtu afuaye nguo.”* Ni nani basi anayetajwa hapa? Ni Yesu Kristo ambaye ni Mwokozi pekee ambaye amezitoweshea mbali dhambi za mwanadamu kwa mfano wa mtu asafishaye fedha na mfano wa sabuni ya mtu afuaye nguo. Kwa maneno mengine, kifungu hiki kinatabiri kuwa Yesu Kristo atazisafishilia mbali dhambi za kila mmoja kwa kubatizwa, na kwamba atausafisha moyo wa kila mtu kwa kuimwaga damu yake.

Ndugu zangu waamini, wakati Bwana wetu alipokuja hapa duniani, alizichukua dhambi zote za mwanadamu mara moja na kwa wote kwa kuupokea ubatizo wake toka kwa Yohana Mbatizaji. Kisha alizichukua dhambi hizi za ulimwengu kwenda Msalabani, alisulubiwa, akafa Msalabani, akafufuka toka mauti, na kwa sababu hiyo ametuokoa toka katika dhambi za ulimwengu na adhabu yake. Hivi ndivyo Yesu Kristo alivyozitoweshea mbali dhambi za kila mtu. Yesu ni Mwokozi ambaye alizisafishilia mbali dhambi za kila mtu anayemwamini Mungu mara moja, kama vile mtu anayefua kwa kutumia sabuni. Kama vile nguo zetu zinavyotakata

wakati tunapoziosha kwa sabuni, basi kila mtu anayeamini katika injili ya maji na Roho anaweza kuziosha dhambi zake zote, na anaweza kukombolewa toka katika adhabu ya dhambi hizo. Kila mtu anayeamini katika injili ya maji na Roho ataondolewa dhambi zake zote na kufikia ukamilifu.

Pamoja na hili, kuna Wakristo wengi sana ambao bado wana dhambi katika mioyo yao pamoja na kuwa wanakiri kumwamini Yesu Kristo kuwa ni Mwokozi wao, hii ni kwa sababu hawaifahamu injili ya maji na Roho.

Vibonge vyote vya dhahabu katika dunia hii si vya dhahabu safi. Ili kuvifanya viwe dhahabu safi kwa 100%, ni lazima vibonge hivyo visafishwe. Ili kuvisafisha, vibonge hivyo vya dhahabu huwekwa katika tanuri na kisha kuchomwa kwa moto unaowaka. Baada ya vibonge hivyo vya dhahabu kuyeyushwa, basi uchafu wote huelea juu. Ni hadi uchafu huo utakapokuwa umeondolewa kwa kutumia vifaa maalumi basi hapo ndipo kile kibonge cha dhahabu kinakuwa dhahabu safi; na kama uchafu ule hautaondolewa, basi kibonge hicho hubakia dhahabu isiyo safi. Kama vile vibonge hivyo vya dhahabu vinavyopitia mchakato huo wa usafishaji ili kuondoa uchafu, basi vivyo hivyo, dhambi zetu zote zilitoweshewa mbali kwa sababu Yesu alizichukua dhambi zote za ulimwengu kwa kubatizwa na Yohana na kwa kuimwaga damu yake. Dhambi zetu zote zinaweza kutoweshewa mbali kwa kuamini katika injili ya maji na Roho.

Malaki 3:3 inaendelea kusema, *“Naye ataketi kama asafishaye fedha na kuitakasa naye atawatakasa wana wa Lawi, atawasafisha kama dhahabu na fedha nao watamtolea BWANA dhabihu katika haki.”* Hii inatueleza kuwa Bwana amewasafisha wana wana wa Lawi toka katika dhambi zetu. Tukiongea kwa mtazamo wa kiroho, wana wa Lawi ina maanisha ni watakatifu wanaoamini katika injili ya maji na

Roho.

Watu wa Israeli walikuwa wameundwa kwa makabila 12: Yakobo alikuwa na wana kumi na wawili, na wazao wa ukoo huu waliunda hayo makabila kumi na mbili ya Israeli. Kati ya makabila haya, wazao wa Lawi walichaguliwa na Mungu ili kumtumikia Mungu kama makuhani kwa ajili kutekeleza majukumu katika Hema Takatifu la Kukutania. Kwa hiyo, wazao hawa wa Lawi waliweza kuwa makuhani mbele ya Mungu. Kisha Mungu alizisafisha dhambi zao kwa kupitia utaratibu wa sadaka ya kuteketezwa wa Hema Takatifu la Kukutania.

Vivyo hivyo, katika wakati wa sasa, Mungu amewawezesha waamini wake kumtumikia Yeye kwa nza kwa kuzioshelea mbali dhambi zao zote katika mioyo yao kwa injili ya maji na Roho, kama vile dhahabu inavyosafishwa na kama vile nguo zinavyosafishwa kwa sabuni ili kuzitakatisha.

Katika Malaki 3:3, Mungu alisema, *“Nao watamtolea BWANA dhabihu katika haki.”* Bwana wetu alikuja hapa duniani na kwa msaada wa Yohana Mbatizaji, alizipokea dhambi zetu zote kwa kubatizwa, akaimwaga damu yake, na kwa sababu hiyo amezitoweshea mbali dhambi hizo zote. Yohana Mbatizaji alizipitisha dhambi zote za mwanadamu kwenda kwa Yesu mara moja kwa kumbatiza, kisha Yesu Kristo akazipokea dhambi hizi mara moja na kwa wote toka kwa Yohana Mbatizaji, akafa Msalabani, kisha akafufuka tena toka kwa wafu, na kwa sababu hiyo amezisafisha kikamilifu dhambi zote za mwanadamu. Kila mtu katika ulimwengu huu anayemwamini Mungu na katika injili ya maji na Roho anaweza kuondolewa dhambi zake zote kwa nguvu ya ubatizo na damu aliyoimwaga Bwana wetu bila kujali mapungufu aliyonayo.

Kwa kuwa Yesu alibatizwa na akaimwaga damu yake kwa

ajili yetu, basi ndio maana aliweza kuzioshelea mbali dhambi zetu kikamilifu. Yesu amezioshelea mbali dhambi za mwanadamu kwa kubatizwa na Yohana Mbatizaji na kwa kuimwaga damu yake. Bwana wetu amezioshelea mbali dhambi zetu zote na kuzifanya kuwa nyeupe kama theluji, yaani kama vile nguo inavyooshwa kwa sabuni. Kwa maneno mengine, Bwana wetu amezisafishilia mbali dhamib zetu zote mara moja na kwa wote kwa kupitia injili ya maji na Roho.

Bwana wetu alikuja hapa duniani kisha akazichukua dhambi zetu kwa kubatizwa na Yohana Mbatizaji. Kuamini hivyo hakumaanishi kuwa Yohana Mbatizaji ni Mwokozi mwingine kwetu. Yohana Mbatizaji alikuwa ni nabii wa mwisho wa Agano la Kale na mwakilishi wa wanadamu, pia alikuwa ni Kuhani Mkuu wa mwisho hapa duniani ambaye alikuwa ametumwa kuja hapa ulimwenguni ili kulitimiza Neno lote la unabii la Agano la Kale, na hasa unabii kuhusu Eliya atakayekuja.

Dhambi zote za ulimwengu huu zilipitishwa kwenda kwa Yesu pale Yohana Mbatizaji, ambaye alikuja hapa duniani miezi sita kabla ya kuja kwa Yesu Kristo alipombatiza Yesu. Hivyo, unabii wote wa Agano la kale kuhusu Yesu ulitimizwa kikamilifu kwa kuja kwa Yohana Mbatizaji na ubatizo wake aliompata Yesu, na kwa kusulubiwa, kufa, na kwa kufufuka kwa Yesu Kristo. Wakati Yesu alipokuja hapa duniani, alizitoweshea mbali kikamilifu dhambi zote za mwanadamu kwa kuzipokea kupitia ubatizo wake. Yesu amefanyika kuwa Mwokozi wetu mkamilifu kwa sababu amezichukua dhambi zote za ulimwengu, na kufa Msalabani, na kwa kufufuka tena toka kwa wafu. Sasa, yeyote anayeamini katika Ukweli huu anaweza kuokolewa toka katika dhambi zake zote. Yesu aliyatimiza mapenzi ya Mungu Baba kikamilifu kwa yeye kufanyika Mwokozi wetu.

Sisi sote ni lazima tuufahamu ukweli kuwa Yesu alizichukua dhambi za ulimwengu kwa kupitia jukumu la usaidizi la Yohana Mbatizaji. Sisi sote ni lazima tutambue juu ya umuhimu wa huduma ya Yohana Mbatizaji na ile Yesu kwa ondoleo la dhambi zetu, na ni lazima tuamini hivyo. Zaidi ya yote, pia tunapaswa kutambua na kuamini kwamba Yesu alibatizwa na Yohana Mbatizaji ili kuzitoweshea mbali dhambi zote za ulimwengu. Pia ni lazima tuamini kuwa Yesu aliweza kuimwaga damu yake Msalabani na hivyo kuzioshelea mbali dhambi zetu zote kwa kuwa alikuwa amebatizwa na Yohana Mbatizaji. Ndani ya injili ya maji na Roho kuna utimilifu wa unabii wa Agano la Kale, na kuna majaliwa ya wokovu ambayo yametimiza mapenzi ya Mungu Baba.

Injili ya maji na Roho inajumuisha lile jukumu muhimu la Yohana Mbatizaji, na injili hii imebeba Ukweli kuwa kwa kupitia jukumu hili la Yohana Mbatizaji, Yesu aliweza kulitimiza Neno lote la Agano la Kale, na kwa sababu hiyo amefanyika kuwa Mwokozi mkamilifu kwa wote wanaoamini katika ukweli huu. Kwa maneno mengine, pamoja na jukumu la Yohana Mbatizaji, Yesu Kristo alizitimiza ahadi zote za Agano la Kale. Ni lazima tuamini kuwa Yesu amezioshelea mbali dhambi zetu zote za ulimwengu na amezisafisha dhambi za kila mtu na kuzifanya kuwa nyeupe kama theluji kwa kupitia ubatizo wake.

Ndugu zangu waamini, je, mnaamini hivyo? Je, mnaamini kuwa Yesu Kristo amezisafishilia mbali dhambi zetu zote za ulimwengu kwa kubatizwa na kwa kuimwaga damu yake? Kwa kweli Yesu alizipokea dhambi zote za mwanadamu na akazioshelea mbali kwa kuupokea ubatizo wake toka kwa Yohana Mbatizaji. Yesu alizipokea dhambi za kila mmoja katika ulimwengu huu kwa kupitia ubatizo wake, wala hakuacha dhambi yoyote ile, na alizioshelea mbali dhambi hizo

zote, kisha aliadhibiwa kwa sababu ya dhambi hizo.

Wakati Yesu alipokuja hapa duniani, hakufanya kazi peke yake, lakini ili aweze kuzichukua dhambi za ulimwengu na kulitimiza Neno la Agano la Kale ilimbidi kubatizwa na Yohana Mbatizaji, ambaye ni Kuhani Mkuu wa hapa duniani. Yesu aliutimiza unabii wote wa upatanisho katika Agano la Kale kwa kuupokea ubatizo kwa mwili wake. Yesu amezioshelea mbali milele dhambi zetu zote mara moja na kwa wote kwa kubatizwa ili kuzipokea dhambi za wanadamu, kwa kuimwaga damu yake, na kwa kufufuka toka kwa wafu. Hii ndiyo injili halisi ya maji na Roho.

Yesu amezitoweshea mbali dhambi zote za kila mwamini wa kweli kwa injili hii ya maji na Roho. Yesu alizipokea dhambi zote za ulimwengu pasipo kuiacha dhambi yoyote kwa kupitia ubatizo wake, alizibeba dhambi hizo hadi Msalabani, na akaimwaga damu yake akiadhibiwa kwa sababu ya dhambi hizo, akafufuka tena toka kwa wafu, na kwa sababu hiyo amezioshelea mbali dhambi zetu zote na kuzifanya kuwa nyeupe kama theluji. Je, unaamini hivi?

Katika Mathayo 11, wakati Yohana alipokuwa amewatuma wanafunzi wake kwenda kwa Yesu, Yesu aliwajibu maswali yao na akawarudisha kwenda kwa Yohana, kisha akasema maneno haya kwa makutano: **“Je mlitoka** kwenda nyikani kutafuta nini? Unyasi? Mtu aliyevikwa mavazi ya singa? Au nabii? Sawa, mtamwona nabii ambaye nalimuma. Si mwingine bali ni Yohana Mbatizaji. Yeye ni mkuu kuliko wote waliozaliwa na wanawake. Yeye ni mwakilishi wa wanadamu. Lakini yeye aliye mdogo katika Ufalme wa Mbinguni ni mkuu kuliko yeye. Yohana Mbatizaji ni mwakilishi wa wanadamu, lakini ikiwa atakwenda mbele za Mungu akiwa anaitegemea haki yake mwenyewe, basi anakuwa ni mdogo kuliko mtu yeyote aliyezaliwa tena upya.”

Kisha Yesu akasema, *“Tangu siku za Yohana Mbatizaji hata sasa ufalme wa mbinguni wapatikana na nguvu, na wenye nguvu wauteka.”*

Tangu siku za Yohana Mbatizaji hata sasa, Ufalme wa Mbinguni wapatikana kwa nguvu, kisha Bwana wetu akaendelea kusema, *“Wenye nguvu wauteka.”* Kifungu hiki hakimaanishi kuwa wenye nguvu watawapiga walinzi wa Mbinguni, kisha wakafungua malango yake, halafu wakalazimisha kuingia.

Sasa ni wakati ambapo injili ya maji na Roho inapaswa kuonyesha nguvu zake kamili. Hakuna mtu anayeweza kuingia katika Ufalme wa Mbinguni ila tu kwa waliozaliwa tena upya ambao wamezisafisha dhambi zao kwa kuamini katika injili ya maji na Roho (Yohana 3:5). Kwa lugha nyingine, tunaweza kuingia katika Ufalme wa Mungu pale tu tutakapoamini katika huduma ya injili hii ya maji na Roho.

Hii ndio sababu Yesu alisema kuwa wakati wa kuingia Mbinguni ulianza tangu siku za Yohana Mbatizaji. Ni kweli kuwa Yesu alizipokea dhambi zote za wanadamu kwa sababu Yohana Mbatizaji alikuwa amezipitisha dhambi zote kwenda kwa Yesu kwa kumbatiza, na kwa sababu hiyo Bwana wetu alizipokea dhambi zetu zote, akazioshelea mbali, na akabeba adhabu yote ya dhambi Msalabani. Yeyote anayeamini katika Ukweli huu atapokea ondoleo la dhambi zake kikamilifu kwa kuwa anaamini hivyo, na mtu huyo ataingia Mbinguni kwa imani hii.

Alichokisema Yesu hapa si kwamba Mbinguni ni mahali ambapo wenye nguvu za mwili ndio watakaolingia. Bali alichomaanisha ni kuwa watu wa imani wanaoamini katika injili ya maji na Roho ndio wanaoweza kuingia Mbinguni.

Watu wasioijua nguvu ya injili ya maji na Roho wana mashaka na kifungu toka Mathayo 11:12 ambacho kinasema,

“Tangu siku za Yohana Mbatizaji hata sasa ufalme wa mbinguni wapatikana kwa nguvu, na wenye nguvu wauteka.” Wanashangazwa na kifungu hiki wakifikiri kuwa “wenye nguvu si ndio wanyanganyi?”

Maandiko yanapotueleza hapa kuwa Ufalme wa Mbinguni wapatikana kwa nguvu, basi ni wazi kuwa hii ina maanisha ni imani yetu yenye nguvu katika haki ya Mungu inayotuwezesha kuichukua Mbingu kuwa yetu. Kwa maneno mengine, andiko hili linaeleza kuwa wale walio na imani katika nguvu ya injili ya maji na Roho wanaweza kuifanya Mbingu kuwa yao. Tunaweza kuifanya Mbingu kuwa yetu ikiwa tu tutakuwa na imani na kuiamini injili ya maji na Roho mbele za Mungu. Hatuwezi kuingia Mbinguni kwa kuitegemea haki yetu wenyewe. Ikiwa tutasimama mbele ya Mungu kwa kuitegemea haki yetu wenyewe, basi ni hakika kuwa hakuna hata mmoja kati yetu anayeweza kusimama mbele zake. Hata hivyo, tunapojivika haki yake sahihi kwa kuamini katika injili ya maji na Roho, basi hapo tunaweza kuwa na ujasiri wa kuingia Mbinguni na kusimama mbele za Mungu (Wagalatia 3:27). Yeyote anayeamini katika Neno la injili ya maji na Roho anaweza kuifanya Mbingu kuwa yake.

Vipi kuhusu wewe? Je, haupendi kuufanya Ufalme wa Mbinguni kuwa wako, yaani kwa kuiweka imani yako katika injili ya maji na Roho? Je, umeamini katika injili ya maji na Roho hata sasa? Je, umeaiamini huduma ya Yesu na huduma ya Yohana Mbatizaji ili kuifanya Mbingu kuwa yako?

Yeyote aliyeshindwa kuifanya Mbingu kuwa yake amekwamba kufanya hivyo kwa kuwa hajaiweka imani yake katika nguvu ya injili ya maji na Roho. Ni lazima uuamini Ukweli huu. Ukweli unaokuwezesha kuingia Mbinguni si mwingine zaidi ya injili ya maji na Roho. Imani katika injili hii ya maji na Roho ndio msingi wa imani ya Kikristo, kwa sababu

tunahesabiwa haki kwa imani, imani pekee.

Hii inatueleza kwamba, kwa kuwa Yohana Mbatizaji alizipitisha dhambi zote za mwanadamu kwenda kwa Yesu kwa kumbatiza, na kwa kuwa Yesu alizipokea dhambi hizi zote kwa kuupokea ubatizo toka kwa Yohana Mbatizaji, basi Yesu amezitoweshea mbali dhambi zote za wale wanaomwamini, kama vile nguo zinavyotakaswa kwa sabuni na kufuliwa. Bwana wetu amezifutia mbali dhambi zetu zote kikamilifu kwa kubatizwa na Yohana na kwa kuimwaga damu yake. Hii ndio sababu yeyote anayeamini katika jukumu la Yohana Mbatizaji na ubatizo na damu ya Yesu kuwa ni Ukweli wa ondoleo la dhambi basi mtu huyo anasafishwa dhambi zake zote kwa imani na anaweza kuingia katika Ufalme wa Mbinguni. Ufalme wa Mbinguni ni wa wale walio na nguvu za kiimani, yaani wanaoimiliki imani yenye nguvu.

Ondoleo la dhambi linapokelewa kwa kupitia imani katika injili ya maji na Roho. Na tunaweza kuingia Mbinguni kwa kuamini kuwa Yesu ni Mungu Mwenyewe, na kwamba Yeye ni Mungu halisi aliyetuumba, na kwamba Yeye ni Mwokozi wetu, na kwamba amezitoweshea mbali dhambi zetu kikamilifu kwa kubatizwa. Tunafanyika kuwa watoto wa Mungu na tusio na dhambi kwa kuamini katika injili ya maji na Roho. Yesu na Yohana Mbatizaji ndio waliofanya iwezekane kwetu sisi kuingia katika Ufalme wa Mbinguni kwa imani. Je, unaamini?

Kwa wale walio na dhambi katika mioyo yao kwa sasa, basi ni kwa sababu hawana imani katika injili ya maji na Roho na ndio maana wanabaki wenye dhambi. Ni dhahiri kuwa sio tu kwamba wanaikataa injili ya maji na Roho, bali pia wanaukana umuhimu wa Yohana Mbatizaji.

Hapa tunapaswa kutambua kuwa kushindwa kumfahamu Yohana Mbatizaji ambaye alifanya kazi pamoja na Yesu katika kuzipitisha dhambi zetu kwenda kwa Yesu, au kumchukulia

kama aliyeshindwa, ni sawa na kumkataa Yesu na kuukana wokovu. Watu wa jinsi hivyo bado wanazikumbatia dhambi zao pamoja na kwamba wanakiri na kumwamini Yesu, kwa kweli wanamwamini Yesu katika hali ya upofu. Hawa wenye dhambi ambao mioyo yao inabakia kuwa na dhambi wanaamini kwa mujibu wa fikra zao binafsi, na hii ndio sababu mioyo yao haijasafishwa, na ndio maana wanaendelea kuhangaika na dhambi.

Muda kidogo uliopita, nilitembelewa na kikundi kimoja cha Kikristo ambacho kilimtangaza Yohana kuwa aliyeshindwa, wote katika kikundi hicho walisimamia katika kifungu cha Biblia cha leo. Hoja zao zilikuwa hivi, kwa kuwa Yohana Mbatizaji alituma wanafunzi wake kwenda kwa Yesu kumuuliza, “Je, wewe ndiye yule atakayekuja, au tumtazamie mwingine?” hii inaonyesha wazi kuwa Yohana Mbatizaji alikuwa na shaka kuhusu Yesu kuwa ni Mwokozi. Ukweli ni kuwa walikuwa wameshindwa kuyaelewa maneno ya Yohana kwa sababu walimchukulia kuwa ni mtu aliyeshindwa, na ndio maana walitoa madai ya jinsi hiyo.

Ikiwa mtu halifahamu jukumu la Yohana Mbatizaji na jinsi huduma yake ilivyo ya msingi, basi ni hakika kuwa mtu wa jinsi hiyo ataishia katika hali ya kutokuelewa. Kama watu hawa wangelikuwa na ufahamu kuhusu Agano la Kale, na kama wangelifahamu huduma ya Yohana Mbatizaji ilivyotabiriwa kwa kina katika Kitabu cha Malaki, basi ni hakika kuwa wasingeliweza kueleza ufahamu duni kama walioueleza. Hilo linaweza pia kutupata na sisi. Ikiwa tungelikuwa hatulifahamu vizuri jukumu la Yohana Mbatizaji na huduma Yesu, basi ni wazi kuwa na sisi pia tusingeliweza kuifahamu injili ya maji na Roho. Ikiwa hali ikiwa ndio kama hiyo, je, matokeo yake yangelikuwa vipi?

Baadhi ya wanafunzi wa Yohana walikuwa bado

hawamwamini Yesu kuwa ni Masihi atakayekuja. Hii ndio sababu Yohana Mbatizaji aliwapeleka wanafunzi wake kwenda kwa Yesu ili kwamba wao wenyewe waweze kumwona Yesu, waweze kulisikia Neno lake kwa masikio yao, na kisha waweze kumwamini na kumfuata. Ikiwa mtu haitambui huduma ya Yohana Mbatizaji, basi mtu huyo hawezi kuifahamu injili ya kweli, na kama haifahamu injili hii vizuri, basi hawezi kumfahamu Yesu vizuri, na matokeo yake, mtu wa jinsi hiyo atajitenga na Ukweli na kuishia kutoamini kweli nyingine yoyote ile.

Hii ndio sababu kifungu hiki katika Malaki ni cha muhimu sana. Kwa kweli, kila kifungu katika Agano la Kale lote ni cha muhimu, lakini Kitabu cha Malaki ni cha muhimu sana, kwa kuwa kinatabiri juu ya kuja kwa Yesu na ujio wa Yohana Mbatizaji, mtumishi wa Mungu ambaye atambatiza Yesu. Unabii wote wa Agano la Kale unaishia katika Kitabu hiki cha Malaki.

Baada ya Nabii Malaki, hakuna mtumishi wa Mungu aliyejitokeza kwa zaidi ya miaka 400. Yohana Mbatizaji alijitokeza baada ya kipindi hiki cha ukimya. Je, alionekana wapi? Alionekana akiwa nyikani. Baada ya kujionyesha, Yohana Mbatizaji aliwahubiria Waisraeli wa wakati wake, “Tubuni, enyi wazao wa nyoka!” Alikuwa ni mtumishi wa Mungu aliyekuwa amevaa singa za ngamia na alikula nzige na asali ya mwitu. Yohana Mbatizaji alikuwa ni mjumbe wa kweli wa Mungu.

Ninyi nyote ni lazima muwe na ufahamu thabiti wa ukweli kuwa Yohana Mbatizaji alilitimiza jukumu lake ambalo lilikuwa ni kumbatiza Yesu. Unabii kuhusu Yohana uliandikwa katika Kitabu cha Malaki na Kitabu cha Isaya. Hali likinukuu Isaya 40:3, andiko katika Mathayo 3:3 linaeleza, *“Sauti ya mtu aliaye nyikani, itengenezeni njia ya BWANA, Yanyoosheni*

mapito yake.''' Kama tulivyoona katika unabii huu, imeandikwa kuwa Yohana Mbatizaji atakuja hapa duniani, na kwamba yeye pamoja na Yesu Kristo watazitoweshea mbali dhambi zote za ulimwengu.

Katika kitabu cha Malaki Bwana wetu alisema atawatakasa nyumba ya Lawi. Hii ina maanisha kuwa atazitoweshea mbali kabisa na kikamilifu dhambi zote za wale wanaoamini katika huduma ya injili ya maji na Roho. Kwa maneno mengine, Bwana wetu alikuwa akitabiri jinsi atakavyotufanya sisi kutoa sadaka za haki kwa Mungu, na kwamba atatufanya sisi tuichukue imani hii na kuitoa kama sadaka, yaani imani inayoamini katika Ukweli kuwa Mungu amezitoweshea mbali dhambi zetu, akiwa kama sadaka yetu kwa Mungu.

Katika Mathayo 11:13, Yesu Mwenyewe alisema, *“Kwa maana manabii wote na torati walitabiri mpaka wakati wa Yohana”* Unabii wa Agano la Kale ulidumu hadi wakati jukumu la Yohana Mbatizaji lilipokamilika. Agano la Kale lilitabiri kuhusu jinsi Yesu atakavyokuja hapa duniani na jinsi atakavyozichukua dhambi zetu, na Agano hili la Kale lilidumu hadi nyakati za Yohana. Wakati huyu Yohana alipombatiza Yesu, na wakati Yesu alipoupokea ubatizo, alizibeba dhambi zote za mwanadamu na kwa sababu hiyo ametuokoa toka katika dhambi zetu. Agano Jipya lilianza wakati Yesu alipozichukulia mbali dhambi zetu zote ili kuutimiza unabii wa Agano la Kale. Hivyo, tunaokolewa pale tunapoliamini Neno la Agano la Kale na Agano Jipya.

Katika aya ya 14 Yesu aliendelea kusema, *“Na ikiwa mnataka kukubali, yeye ndiye Eliye atakayekuja.”* Nabii Eliya ambaye kuja kwake kumetabiriwa katika Kitabu cha Malaki si mwingine bali ni Yohana Mbatizaji. Hivyo hakuna shaka kwamba, tunapaswa kulishukuru Neno la unabii huu ambalo ni

Neno la utimilifu wa unabii huu katika mioyo yetu.

Baadhi ya watu wanaweza kuuliza, “Huyu Eliya aliyetajwa katika unabii wa Agano la Kale yuko wapi?” Hebu tugeukie Malaki 4:5-6 ili kupata hilo jibu. *“Angalieni, nitawapelekea Eliya nabii, kabla haijaja siku ile ya BWANA, iliyo kuu na kuogofya. Naye ataigeuza mioyo ya baba iwaelekee watoto, na mioyo ya watoto iwaelekee baba zao, ili nisije nikaipiga dunia kwa laana”* (Malaki 4:5-6).

Kifungu hiki kinaposema, “Kabla haijaja siku ile ya BWANA iliyo kuu na ya kuogofya,” ina maanisha ni ‘kabla ya kuja siku ya hukumu.’ Hivyo Mungu alisema hapa kuwa atamtuma huyu Eliya kabla ya kuja kwa Siku ya Hukumu, na kwa upande mwingine katika Mathayo 11:14 Yesu alisema, “Na ikiwa mnataka kukubali, yeye ndiye Eliya atakaye kuja.” Vifungu vyote viwili vinazungumzia juu ya Eliya atakayekuja. Ni nani huyo ambaye Yesu anamzungumzia hapa? Kwa hakika ni Yohana Mbatizaji.

Agano la Kale limejaa zaidi Neno la unabii na ahadi, na Agano Jipya linahusu utimilifu wa Neno la unabii na ahadi hizo.

Kama vile Mungu alivyoahidi kumtuma Eliya, Yohana Mbatizaji alizaliwa hapa duniani miezi sita kabla ya kuzaliwa kwa Yesu. Alizaliwa kwa kazi ya kushangaza ya majaliwa ya Mungu. Yohana hakuzaliwa katika familia ya kawaida, bali alizaliwa katika famili ya Kuhani Mkuu. Baba yake Zakaria anatoka ukoo wa Haruni (Luka 1:5). Hii ina maanisha kuwa Yohana Mbatizaji pia anatoka katika nyumba ya Haruni Kuhani Mkuu. Bwana wetu ni Mungu ambaye anatimiza kila kitu kwa mujibu wa ahadi zake, na ni mwaminifu, Yeye aliianza kazi ya wokovu kwa kuzaliwa kwa Yohana Mbatizaji, kama alivyoahidi katika Agano la Kale.

Katika Kitabu cha Mambo ya Walawi katika Agano la

Kale, Mungu aliwaahidi watu wa Israeli kuwa atazisamehe dhambi zao baada ya Kuhani Mkuu kuzipitisha dhambi zao kwenda katika mnyama wa sadaka ya kuteketezwa kwa kuiweka mimo yake juu ya kichwa cha mnyama huyo, na kwa kulikata koo yake na kuikinga damu yake, na kwa kuiweka kwenye pembe za madhabahu ya sadaka ya kuteketezwa na kwa kuimwaga ardhini, na kwa kuichukua damu na kuipeleka Patakatifu pa Patakatifu katika madhabahu ya Mungu, na kwa kuinyunyuzia mashariki mwa Sanduku la Agano (Mambo ya Walawi 16). Mungu alikuwa ameahidi kuwa hivi ndivyo itakavyofanyika ili aweze kuzisamehe dhambi za wanadamu.

Ni kweli kuwa Yesu Kristo alikuja hapa duniani sawasawa na kabisa na unabii huu, alizipokea dhambi zetu kwa kubatizwa na Yohana Mbatizaji, aliadhibiwa kwa sababu ya dhambi zetu kwa kufa Msalabani, na kwa sababu hiyo amezitoweshea mbali dhambi zetu zote. Na kwa kufanya haya yote, Yesu amefanyika kuwa Mwokozi wetu.

“Je, mlikwenda nyikani kuona nini? Kuona unyasi? Mtu aliyevikwa mavazi mororo? Au kumwona nabii? Basi mpo sahihi ikiwa mlikwenda kumwona mtumishi wa Mungu. Kule nyikani alikuwepo mwakilishi wa wanadamu, na katika hii nyika ungeliweza kumwona Yohana Mbatizaji, ambaye ni mkuu kuliko wanadamu wote. Yeye si mwingine zaidi ya Eliya. Niliahidi kuwaletea mtumishi wangu Eliya, na huyu Eliya ni Yohana Mbatizaji. Ni Yohana Mbatizaji ndiye anayelitimiza jukumu la Eliya. Yohana ni mtumishi wa Mungu anayewawezesha wote kuingia katika Ufalme wa Mungu kwa kuwakusanya na kuwashuhudia kwamba, ‘Yesu Kristo ni Mwana wa Mungu, Mwokozi ambaye amezipokea dhambi zote za mwanadamu, amekufa Msalabani, amefufuka tena toka kwa wafu, na kwa sababu hiyo amewaokoa wanadamu toka katika dhambi zao. Yeye Yesu ni Masihi.’”

Wakati Yohana Mbatizaji alipokuja hapa duniani, alizitimiza huduma mbili muhimu: Alizipitisha dhambi zetu kwenda kwa Yesu Kristo, na alimshuhudia Mwokozi wetu. Huduma hizi ni njema kiasi gani? Kwa kupitia msaada wa Yohana Mbatizaji, Yesu aliweza kulitimiza Neno la ahadi. Sasa tunaweza kutambua kuwa Yesu aliweza kulitimiza Neno la Agano la Kale kwa kupitia Yohana Mbatizaji, na kwamba ushuhuda wa Yohana ulithibitisha jinsi Yesu atakavyolitimiza Neno lote la Agano la Kale, na kwamba Mungu ameitimiza wokovu wetu kwa kupitia huduma za Yesu na Yohana Mbatizaji. Kwa kupitia Yohana Mbatizaji tunaweza kuelewa kwamba yeye na Yesu waliitimiza ahadi ya mungu. Je, unaamini hivi?

Hii ndio sababu tunapoihubiri injili ya maji na Roho, hatuwezi kuliacha jukumu la Yohana Mbatizaji. Ikiwa mtu yeyote anasema kuwa Yohana Mbatizaji alikuwa ameshindwa na kuudharau umuhimu wake, basi mtu huyo si mtumishi wa Mungu, na wala si mmoja kati ya watu wa Mungu.

Ndugu zangu waamini, Yesu amezitoweshea mbali dhambi zetu zote na kutufanya safi kwa kubatizwa na kwa kuimwaga damu yake. Pengine ninyi nyote mnafahamu maana ya kufua hasa kama ni wanawake. Unapofua, ni kitu gani kitatokea ikiwa utatumia sabuni katika kuzifua nguo zako? Zitakuwa safi na kung'aa. Basi kitendo cha kutumia sabuni katika kung'arisha nguo huitwa kufua.

Katika kipindi cha Korea ya kizamani, watu walikuwa wakitumia hisopo katika kuosha nguo zenye madoa. Wakati huo, Wakorea walivaa mavazi meupe tu, kiasi kuwa Korea iliitwa ni 'taifa la nguo nyeupe.' Kwa baadhi ya nyakati mavazi haya yalichafuka na kuwa na rangi ya njano. Hivyo waliyaweka mavazi hayo katika chungu kikubwa pamoja na hisopo na kisha kuyachemsha. Baada ya kuchemka,

waliyachukua mavazi hayo na kisha kuyaosha kwa sabuni huku wakiyafikicha. Na hapo ndipo mavazi hayo yalipogeuka na kuwa meupe sana.

Vivyo hivyo, Yesu alizitoweshea mbali dhambi zetu zote kikamilifu, tunaushukuru ukweli kuwa alizichukua dhambi zetu katika mwili wake kwa kubatizwa na Yohana Mbatizaji, na kisha akafa Msalabani kwa ajili yetu. Yesu amezifutilia mbali dhambi zote, kiasi kuwa hakuna chochote cha kukiondoa. Yesu amezitoweshea mbali dhambi zetu zote kikamilifu na milele.

Hivi ndivyo Yesu alivyofanyika kuwa Mwokozi wetu. Na hii ndio maana kifungu cha maandiko toka Mathayo 11:1-14 ni cha muhimu na kinachoelezea hilo. Tunapoishuhudia injili kwa nafsi nyingine, mara nyingi tunakisoma kifungu hiki juu juu kama yalivyo mazoea, lakini ninaamini kuwa mnapaswa kuwa na ufahamu wa kina wa kifungu hiki ili imani yenu iweze kuimarishwa zaidi katika mioyo yenu.

Kwa kweli imani hii ambayo wewe na mimi tunayo ni ya thamani sana. Si watu wachache katika baadhi ya nchi waliozaliwa tena upya kwa kupitia Neno hili. Kuna nafsi nyingi katika ulimwengu mzima ambao wamepokea ondoleo la dhambi zao kwa kuamini katika injili ya maji na Roho. Watu hao wote pamoja na sisi tumepokea ondoleo la dhambi kwa kuamini katika huduma ya Yohana Mbatizaji na ile ya Yesu. Hampaswi kuionea aibu imani hii. Badala yake, imani hii ni ya heshima sana kiasi kuwa tunaweza kuihubiri pasipo kuwa na shaka yoyote ile.

Ninaweza kuutangaza Ukweli huu kwa kila mtu katika ulimwengu mzima nikiwa na ujasiri wa hali ya juu. Ninaweza kuitangaza kwa sauti kubwa kwa kila mchungaji na kwa kila mtheolojia katika ulimwengu mzima: “Kila mtu, haijalishi yeye ni nani, ni lazima aifahamu nguvu ya injili ya maji na Roho na

kisha aiadini.”

Sisi tuliozaliwa tena upya si wakamilifu katika miili yetu, bali kiroho sisi ni wenye haki zaidi katika ulimwengu huu wote. Mimi ninaamini hivi. Ninaamini kuwa imani yetu ni imani kuu katika ulimwengu huu na haina mapungufu yoyote yale. Mimi ninaamini kuwa sisi ni Walawi wa kiroho, na kwamba kama vile Walawi walivyolisafisha taifa lote la Israeli kwa imani, vivyo hivyo sisi wenye haki tumefanyika kuwa Makuhani Wakuu na tunatoa sadaka ya haki kwa Mungu ili kuwasafisha watu wote wa ulimwengu kwa injili ya maji na Roho.

Ndugu zangu waamini, je, unaamini kweli katika nguvu ya injili ya maji na Roho? Kuitoa imani hii ya kweli kwa Mungu ni kumpatia Mungu sadaka safi na ya kweli. Imani hii katika nguvu ya injili ya maji na Roho ni imani halisi inayotuwezesha kuimiliki Mbingu na kuwa yetu; ni imani hii ndiyo inayoweza kutubadilisha sisi kuwa vyombo vya haki; na ni imani hii inayotuwezesha sisi kuwa wafanyakazi wa Mungu. Aina hii ya imani ni sadaka sahihi kwa Mungu.

Ninamshukuru sana Mungu kwa kutupatia imani ya jinsi hii katika injili ya maji na Roho. ☒

MAHUBIRI

3



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Yohana Mbatizaji, Aliyekuja Katika Njia ya Haki

< Mathayo 17:1-13 >

“Na baada ya siku sita Yesu akawatwaa Petro, na Yakobo, na Yohana nduguye, akawaleta juu ya mlima mrefu faraghani; akageuka sura yake mbele yao; uso wake ukang’aa kama jua, mavazi yake yakawa meupe kama nuru. Na tazama, wakatokewa na Musa na Eliya, wakizungumza naye. Petro akajibu akamwambia Yesu, Bwana, ni vizuri sisi kuwapo hapa; ukitaka, nitafanya hapa vibanda vitatu, kimoja chako wewe, na kimoja cha Musa, na kimoja cha Eliya. Alipokuwa katika kusema, tazama, wingu jeupe likawatia uvuli; na tazama, sauti ikatoka katika lile wingu, ikasema, Huyu ni Mwanangu, mpendwa wangu, ninayependezwa naye; msikieni yeye. Na wale wanafunzi waliposikia, walianguka kifulifuli, wakaogopa sana. Yesu akaja, akawagusa akasema, ‘Inukeni, wala msiogope.’ Wakainua macho yao, wasione mtu ila Yesu peke yake. Na walipokuwa wakishuka mlimani, Yesu aliwaagiza, akasema, msimwambie mtu yeyote habari ya maono hayo, ‘hata Mwana wa Adamu atakapofufuka katika wafu.’ Wanafunzi wake wakamwuliza, wakisema, ‘Basi kwa nini waandishi hunena ya kwamba imempasa Eliya kuja kwanza?’ Naye akajibu, akawaambia, ‘Kweli Eliya yuaja kwanza, naye atatengeneza yote, ila nawaambia, ya kwamba Eliya amekwisha kuja, wasimtambue, lakini

wakamtenda yote waliyotaka. Vivyo hivyo Mwana wa Adamu naye yuaenda kuteswa kwao.’ Ndipo wale wanafunzi walifahamu ya kuwa amenena nao habari za Yohana Mbatizaji.”

Kifungu cha Maandiko cha leo kinatoka katika injili ya Mathayo 17:1-13. Kifungu hiki kinaeleza kuwa Yesu aliwachukua wanafunzi watatu, Petro, Yakobo, na Yohana na akawaongoza kwenda katika mlima mrefu sana. Jambo la kushangaza lilitokea kule mlimani. Musa na Eliya walishuka toka Mbinguni. Na mavazi ya Yesu yalibadilika yakang’aa na kuwa meupe na sura yake ikabadilika pia. Yesu alizungumza na Musa na Eliya. Petro alipoona hivyo, akazungumza katika hali kindoto, “Na tufanye vibanda vitabu: kimoja chako, kimoja cha Musa, na kimoja cha Eliya. Tunapenda kujenga vibanda vitatu na kuishi pamoja nawe.” Kisha wingu likawafunika na sauti ikasema, *“Huyu ni Mwanangu, mpendwa wangu, ninayependezwa naye; msikieni yeye!”*

Petro, Yakobo, na kaka yake Yohana walipanda mlima mlimani pamoja na Yesu, na walipofika kileleni Yesu alibadilika na mara hiyo Eliya na Musa walikuja kuzungumza naye. Kisha anga lilifunikwa na mawingu na sauti ikasema, *“Huyu ni Mwanangu, mpendwa wangu, ninayependezwa naye. Msikieni Yeye!”* Bila shaka unaweza kufikiria jinsi tukio hilo lilivyokuwa la kushangaza. Ni kwa nini Yesu aliwaonyesha wanafunzi wake tukio kama hilo? Yesu aliwaruhusu wanafunzi wake waone akizungumza na Eliya na Musa, je, umuhimu wa tukio hili ni upi?

Aya ya 2 inasema hivi, *“akageuka sura yake mbele yao; uso wake ukang’aa kama jua, mavazi yake yakawa meupe kama nuru.”* Pia katika kitabu cha Danieli imeandikwa hivi,

“Na hao waongozao wengi kutenda haki watang’aa kama nyota milele na milele.” (Danieli 12:3). Biblia inaandika hapa kuwa mavazi ya Yesu yalibadilika na kuwa meupe kamanuru. Mungu ametuahidi kuwa katika siku ya mwisho atatubadilisha na kuwa kama vile Yesu alivyobadilika. Hivyo, pale tutakapobadilishwa katika siku ile, basi ni hakika kuwa tutafanana na jinsi Yesu alivyokuwa amebadilika. Siku ile tutang’aa kama jua. Wakati Bwana atakaporudi, tutafufuliwa na kunyakuliwa na nina hakika kuwa miili na sura zetu zitabadilishwa wakati huo. Hii ndio sababu Yesu aliwachukua wanafunzi wake kwenda mlimani na akawaonyesha mambo hayo.

Baada ya kuwa amewaonyesha wanafunzi wake mambo hayo, basi Yesu akazungumza nao walipokuwa wakitelemka mlimani. Katika aya ya 9 imeandikwa hivi, *“Na walipokuwa wakishuka mlimani, Yesu aliwaagiza, akasema, ‘msimwambie mtu yeyote habari ya maono hayo, hata Mwana wa Adamu atakapofufuka katika wafu.’”* Kisha wanafunzi wakamuuliza Yesu, *“Wanafunzi wake wakamwuliza, wakisema, Basi kwa nini waandishi hunena ya kwamba imempasa Eliya kuja kwanza?”* Kisha Biblia inaendelea kusema, *“Naye akajibu, akawaambia, ‘Kweli Eliya yuaja kwanza, naye atatengeneza yote, ila nawaambia, ya kwamba Eliya amekwisha kuja, wasimtambue, lakini wakamtenda yote waliyotaka. Vivyo hivyo Mwana wa Adamu naye yuaenda kuteswa kwao.’ Ndipo wale wanafunzi walifahamu ya kuwa amenena nao habari za Yohana Mbatizaji.”*

Wanafunzi walikuwa wakishangaa katika mawazo yao, *“Bwana, kila kitu katika Maandiko kitakamilishwa kwa ubatizo wako, kusulubiwa, na ufufuo, lakini ni kwa nini waandishi wanasema kuwa imempasa Eliya kuja kwanza?”* Maandiko yalikuwa yameandikwa muda mrefu uliopita, na waandishi

walidai kuwa, “Ili Bwana wetu aweze kuutimiza unabii wa Agano la Kale, Eliya ni lazima aje.” Walikuwa wakidai kuwa ni mpaka Eliya atakapokuwa amerudi ndipo wokovu wa mwanadamu utakapotimizwa na kila kitu ambacho Mungu amekiahidi kitahuishwa. “Kuhuishwa kwa vitu vyote” kuna maanisha kuwa Mungu atawaokomboa wana wa Adamu waliokuwa wamefukuzwa toka Bustani ya Edeni kwa ajili ya dhambi zao kwa kumtuma Mwokozi, na kwa sababu hiyo atawafanya kuwa wana wake tena.

Kwa maneno mengine, wanafunzi walikuwa wakimwambia Yesu, “Waandishi wanasema kuwa Eliya ni lazima aje kwanza ili wokovu huu uweze kutimilizwa, ili kila kitu ambacho umekisema kiweze kuhuishwa kikamilifu, yaani kwa ajili ya kuhuishwa kwa bustani ya Edeni, na ili sisi tuweze kuokolewa toka katika dhambi zetu na kurudishwa kuwa watu wa Mungu. Sasa Eliya ni nani?” Yesu aliwajibu kwa kusema, *“Kweli Eliya yuaja kwanza, naye atatengeneza yote, ila nawaambia, ya kwamba Eliya amekwisha kuja, wasimtambue, lakini wakamtenda yote waliyotaka.”* Kwa maneno mengine, Mungu alikuwa amekwishamtuma Eliya, lakini watu hawakumwamini kwa sababu zao binafsi. Kisha Yesu akasema, *“Vivyo hivyo Mwana wa Adamu naye yuaenda kuteswa kwao,”* akionyesha kuwa kama vile Yohana Mbatizaji alivyoteseka katika ulimwengu huu, basi vivyo hivyo na Yesu pia atateseka. Wanafunzi wake waliposikia hivi hatimaye walitambua kuwa, “Ooh, kumbe Yohana Mbatizaji ni Eliya!” Aya ya 13 inasema, “Ndipo wale wanafunzi walifahamu ya kuwa amenena nao habari za Yohana Mbatizaji.” Yohana Mbatizaji ni Eliya ambaye Mungu alikuwa ameahidi kumtuma katika Kitabu cha Malaki katika Agano la Kale.

Hebu sasa tugeukie kitabu cha Malaki. Katika sura ya mwisho ya Agano la Kale, yaani kabla ya injili ya Mathayo,

Malaki 4:1-3 imeandikwa hivi: “*Kwa maana, angalieni, siku ile inakuja, inawaka kama tanuru; na watu wote wenye kiburi, nao wote watendao uovu, watakuwa makapi; na siku ile inayokuja itawateketeza,*’ asema BWANA wa majeshi; hata haitawaachia shina wala tawi. Lakini kwenu ninyi mnaolicha jina langu, jua la haki litawazukia, lenye kuponya katika mbawa zake; nayi mtatoka nje, na kucheza kama ndama wa mazizini. Nanyi mtawakanyaga waovu; maana watakuwa majivu chini ya nyayo za miguu yenu; katika siku ile niifanyayo, asema BWANA wa majeshi.” Kisha katika Malaki 4:4-6 anaendelea kusema: “*Ikumbukeni torati ya Musa, mtumishi wangu, niliyomwamuru huko Horebu kwa ajili ya Israeli wote, naam, amri na hukumu. Angalieni, nitawapelekea Eliya nabii, kabla haijaja siku ile ya BWANA, iliyo kuu na kuogofya. Naye ataigeuza mioyo ya baba iwaelekee watoto wao, na mioyo ya watoto iwaelekee baba zao ili nisije nikaipiga dunia kwa laana.*”

Mungu aliahidi kuwa atamtuma mtumishi wake Nabii Eliya kabla Yeye mwenyewe hajaja hapa duniani. Anasema Eliya ataigeuza mioyo ya baba iwaelekee watoto, na mioyo ya watoto iwaelekee baba zao. Na hivi ndivyo Kuhani Mkuu anavyopaswa kufanya. Kazi ya Kuhani Mkuu ni kuubadilisha moyo wa Mungu kwa kumtolea sadaka. Kwa kawaida hasira ya Mungu inawashwa pale watu wanapokuwa wametenda dhambi mbele zake, hivyo ni jukumu la Kuhani Mkuu kuubadilisha huu moyo wa Mungu wenye hasira kuwa moyo wenye huruma. Kwa maneno mengine, ni Kuhani Mkuu ndiye anayelitimiza jukumu hili la upatanishi la kuubadilisha moyo wa Mungu kuwa na huruma kwa watu wake. Pia ni jukumu lake kuibadilisha mioyo ya watu waliokuwa wamwacha Mungu na kisha kumrudia Mungu. Haya ndio majukumu halisi ya Kuhani Mkuu anayetoa sadaka kwa Mungu kwa niaba ya watu. Mungu

alisema kuwa atamtuma Nabii Eliya, na kazi ya Eliya itakuwa ni kuyatimiza majukumu haya kwa kuja hapa duniani. Ni lini basi ambapo Eliya atakuja? Mungu alisema kuwa atamtuma wakati ambapo hukumu itakuwa imekaribia kama ilivyoandikwa, *“Nisije nikaipiga dunia kwa laana.”* Eliya atakuja na kulitimiza jukumu lake kama mpatanishi ili kuiongoza mioyo ya watu kumwelekea Mungu na moyo wa Mungu kuwaelekea watu. Lakini Biblia pia inasema ikiwa watu hawatayasikia maneno ya Eliya atakayekuja, wakashindwa kuigeuza mioyo yao kumwelekea Mungu, na kutomwamini Mungu, basi Mungu atakuja na kuipiga dunia. Atawafutilia mbali na kuwatupa katika tanuri iwakayo.

Katika kifungu cha Maandiko tulichokisoma leo Yesu amekutana ana kwa ana na Musa na Eliya. Amekutana nayo katika mlima mrefu sana na akazungumza nao. Habari hizi ni za muhimu sana kwa wokovu wetu. Musa ni mwakilishi wa Torati. Baada ya kuipokea Torati toka kwa Mungu, alikuwa amepokea pia utaratibu wa sadaka ya kuteketezwa wa Hema Takatifu la Kukutania, ambao uliwawezesha watu wake kupata ondoleo la dhambi toka kwa Mungu. Mungu alikuwa amezungumza na Musa. Hivyo, vitabu vitano vya Musa, yaani Pentatuki, ni vitabu vyenye mamlaka. Katika Vitabu hivi vitano vya Mwanzo, Kutoka, Mambo ya Walawi, Hesabu, na Kumbukumbu la Torati, Mungu alikuwa amezungumza kupitia Musa juu ya baraka zake kwa watu wa Israeli na kwa wanadamu wote, pia Musa alitoa unabii kuwa Yesu Kristo atakuja hapa duniani ili kuwaokoa wanadamu. Yote yameandikwa katika Pentatuki kwamba kila mtu katika Agano la Kale atapaswa kupokea ondoleo la dhambi kwa kupitia utaratibu wa sadaka ya kuteketezwa wa Hema Takatifu la Kukutania. Yesu Kristo atakuja hapa duniani na kuzitoweshea mbali dhambi zote za mwanadamu mara moja na kwa wote

ambayo ni sawa na mahitaji ya utaratibu wa sadaka ya kuteketezwa wa Hema Takatifu la Kukutania. Mungu alikuwa amezungumza kila kitu kupitia Musa.

Vitabu vya Agano la Kale vilivyosalia kuanzia Yoshua hadi Malaki vinatueleza nini? Vinatueleza hivi, “Itunze na kuitii Torati ya Mungu. Ikiwa unaabudu miungu na haitii Torati, basi Mungu atakuhukumu.” Kuanzia kitabu cha Yoshua na kuendelea, Agano la Kale linazungumzia juu ya mzunguko wa dhambi na toba ambao wana wa Israeli waliupitia, vinaelezea jinsi ambavyo wana wa Israeli walivyopata mapigo kwa kushindwa kuitii Torati, jinsi walivyotubu, na jinsi walivyoanguka tena katika dhambi. Vivyo hivyo, Pentatuki imeundwa ikiwa na msingi maalum wa wokovu. Bila shaka sasa unaweza kuelewa ni kwa nini Yesu alikwenda mlimani kisha akawaamuru Musa na Eliya kuja kuzungumza naye.

Eliya alikuwa ni mtumishi wa Mungu aliyekuwa amewaongoza waabudu miungu wa Israeli kumrudia Mungu, aliwashuhudia kuwa, “Mungu ni Mungu halisi. Mungu Yehova ndiye Mungu wa kweli.” Hata hivyo, Eliya anayetabiriwa katika Kitabu cha Malaki, yaani yeye atakayekuja kabla ya Bwana ili kuiandaa njia yake si mwingine zadi ya Yohana Mbatizaji, ambaye Yesu alimshuhudia kuwa ni mkuu kuliko wote waliozaliwa na wanawake (Mathayo 11:11). Katika Mathayo 11:14 Yesu alisema, “*Na ikiwa mnataka kukubali, yeye ndiye Eliya atakayekuja,*” Pia katika Mathayo 11:11-12 Yesu alisema, “*Amin, nawaambieni, Hajaondokea mtu katika wazao wa wanawake aliye mkuu kuliko Yohana Mbatizaji; walakini aliye mdogo katika ufalme wa mbinguni ni mkuu kuliko yeye Tangu siku za Yohana Mbatizaji hata sasa ufalme wa mbinguni hupatikana kwa nguvu, nao wenye nguvu wauteka.*”

Ni kwa nini tangu siku za Yohana Ufalme wa Mbinguni

hupatikana kwa nguvu? Hii ni kwa sababu dhambi zote za mwanadamu zilipitishwa kwenda kwa Yesu kwa kupitia ubatizo ambao Yohana Mbatizaji alimpatia Yesu. Hii ndio sababu wale wote wanaoamini kuwa dhambi zao zote zilipitishwa kwenda kwa Yesu kwa kupitia Yohana Mbatizaji wanaiteka Mbingu kwa nguvu. Kwa maneno mengine, wanaingia Mbinguni kwa imani. Aya ya 14 inasema, “*Na ikiwa mnataka kukubali, yeye ndiye Eliya atakayekuja.*” Ni nani ambaye Yesu alimtaja kuwa ni Eliya? Ni Yohana Mbatizaji.

Kwa maneno mengine, huyu Eliya ni mtu muhimu sana kwa wokovu wetu, na huyo si mwingine bali ni Yohana Mbatizaji. Ni kwa kuja kwa huyu Eliya tu ndipo dhambi za kila mmoja zingaliweza kupitishwa kwenda kwa Yesu, na kwa sababu hiyo kumfanya kila mtu kuwa asiye na dhambi. Kwa maneno mengine, Yohana Mbatizaji, ambaye alikuwa ni Eliya, alimwongoza kila mtu kuuelekea uwepo wa Mungu kwa kumbatiza Yesu na hivyo kuzipitisha dhambi zote kwenda kwa Yesu. Wakati Yohana Mbatizaji alipokuwa akizipitisha dhambi za watu kwenda kwa Yesu na hivyo kutoa sadaka ya kuteketezwa kwa niaba yao, basi alikuwa akilitimiza jukumu lake kama Eliya. Hali ikimzungumzia Yohana Mbatizaji Luka 1:17 inasema, “*Naye atatangulia mbele zake katika roho ya Eliya, na nguvu zake, ili kuigeuza mioyo ya baba iwaelekee watoto, na kuwatilia waasi akili za wenye haki, na kumwekea Bwana tayari watu waliotengenezwa.*” Hivi ndivyo Zakaria, baba wa Yohana Mbatizaji alivyotabiri kabla ya kuzaliwa kwa Yohana.

Kukamilishwa kwa wokovu wetu ni utimilifu wa Torati yote na kanuni za utaratibu wa sadaka ya kuteketezwa ambao Mungu alikuwa ameuzungumza kupitia Musa. Kwa kumtuma Yesu Kristo Mwanawe kuja hapa duniani, Mungu Baba

ametuokoa sisi sote ambao tulikuwa tumepangwa kwenda kuzimu kwa kushindwa kuitii Torati. Wakati Yesu alipokuja hapa duniani, alizipokea dhambi zote za mwanadamu kwa kubatizwa na Yohana Mbatizaji, na baada ya kuwa amejitwika dhambi zote za ulimwengu, Yesu alikwenda Msalabani na akasulubiwa hadi kifo, na kwa sababu hiyo akatuokoa sisi sote. Hivi ndivyo tulivyoweza kupokea wokovu wetu. Na hii ndio sababu Yesu, Musa, na Eliya ni wa muhimu sana katika wokovu wako na wangu. Ni nafsi muhimu sana katika ukamilifu wa wokovu, yaani katika kurudisha mahusiano maalum na Mungu. Na hii ndio sababu Yesu aliwaita Eliya na Musa na akaongea nao.

Wanafunzi walimuuliza Yesu wakisema, “Waandishi wanasema kuwa ili kila kitu kiweze kurejzwa upya ni lazima Eliya aje kwanza. Unasemaje kuhusu hilo?” Kisha Yesu akawaambia, “Eliya amekwisha kuja, wasimtambue, lakini wakamtenda yote waliyotaka. Si mwingine bali ni Yohana Mbatizaji ambaye amenibatiza Mimi.” Watu walishindwa kumtambua Yohana Mbatizaji na hawakuamini kile ambacho amekifanya kwa ajili yao.

Mathayo 21:23-27 inaendela kusema yafuatayo kuhusu Yohana Mbatizaji: *“Hata alipokwisha kuingia hekaluni, wakuu wa makuhani na wazee wa watu wakamwendea alipokuwa akifundisha, wakasema, ‘Ni kwa amri gani unatenda mambo haya? Naye ni nani aliyekupa amri hii?’ Yesu akajibu akawaambia, Na mimi nitawauliza neno moja; ambalo mkinijibu, nami nitawaambia ni kwa amri gani ninatenda haya. Ubatizo wa Yohana ulitoka wapi? Ulitoka mbinguni, au kwa wanadamu? Wakahojiana wao kwa wao, wakisema, Tukisema, Ulitoka mbinguni, atatuambia, Mbona basi hamkumwamini? Na tukisema, Ulitoka kwa wanadamu, twaogopa mkutano; maana watu wote wamwona Yohana kuwa ni nabii. Wakamjibu*

Yesu wakasema, 'Hatujui'. Naye akawaambia, 'Wala mimi siwaambii ninyi ni kwa amri gani ninatenda haya.'"

Wakati huo, Yesu alikuwa amekuja Hekaluni na alikuwa akiwafundisha watu pale. Makuhani wakuu, waandishi, na wazee wa wakati ule wakaja ili kumwonya Yesu, na wakayakataa mafundisho yake. Walimkemea vibaya wakisema, "Ni kwa mamlaka gani unawafundisha watu ndani ya Hekalu la Mungu? Ni nani aliyekuja mamlaka hiyo?" Katika Israeli hakuna aliyeruhusiwa kufundisha ndani ya hekalu isipokuwa tu kama yeye alikuwa ni Rabi. Na hii ndio sababu walikuwa wakimpa changamoto Yesu kwa kumuuliza, "Umepata mamlaka haya toka kwa nani? Je, umepata toka kwa kuhani mkuu? Au toka kwa wazee? Kama sivyo, je unafundisha kwa mamlaka yako binafsi? Ni nani aliyekupa mamlaka hiyo?"

Hata hivyo, badala ya kuwajibu moja kwa moja, Yesu alisema, "Nina swali kwenu pia; ikiwa mtalijibu swali langu basi mimi nami nitajibu swali lenu." Kisha Yesu akawaauliza makuhani wakuu na wazee, "Ubatizo wa Yohana ulitoka kwa nani? Ulitoka mbinguni au kwa wanadamu? Yohana alitoa ubatizo wake na pia alinibatiza Mimi. Je, ubatizo huu ulitoka pia katika mamlaka yenu mliyonayo? Je, mlimpatia Yohana mamlaka hayo? Ni nani aliyeruhusu hilo? Je, ulitoka Mbinguni, au ni ninyi ndio mliidhinisha?"

Waandishi walifahamu kuwa ikiwa wakijibu "Ulitoka Mbinguni," basi Yesu atawaauliza, "Kwa nini basi hamkuziamini kazi za Yohana Mbatizaji?" na kwa upande mwingine, ikiwa wangesema, "Ulitoka kwa wanadamu," basi hiyo itakuwa ni sawa na kukana kuwa Yohana Mbatizaji hakuwa mtumishi wa Mungu, na kwa sababu hiyo makutano wangeliveza kuwapiga mawe hadi kifo. Hivyo hali wakilogopa walimjibu kuwa "Hatufahamu." Walijibu hivi kwa sababu walifahamu kuwa watu wote wa Israeli wa wakati huo

walifahamu kuwa Yohana alikuwa ni mtumishi wa Mungu. Kisha Yesu akawaambia wale waandishi, “Basi na mimi siwaambii ninyi ninafanya haya kwa mamlaka gani.”

Kisha Yesu akatumia mfano mwingine akasema, “*‘Lakini mwaonaje? Mtu mmoja alikuwa na wana wawili; akamwendea yule wa kwanza, akasema, Mwanangu, leo nenda kafanye kazi katika shamba la mizabibu. Akajibu akasema, Naenda, Bwana; asiende. Akamwendea yule wa pili, akasema vile vile. Naye akasema, Sitaki; baadaye akatubu, akaenda. Je! Katika wawili ni yupi aliyefanya mapenzi ya babaye Wakamwambia ni Yule wa pili.’*” (Mathayo 21:28-31). Kisha Yesu akawakemea, akisema, “*Amin nawaambia, watoza ushuru na makahaba wanatangulia mbele yenu kuingia katika ufalme wa Mungu. Kwa sababu Yohana alikuja kwenu kwa njia ya haki, ninyi msimwamini; lakini watoza ushuru na makahaba walimwamini, nanyi hata mlipona, hamkutubu baadaye, ili kumwamini*” (Mathayo 21:31-32). Vivyo hivyo, Yesu alimshuhudia Yohana, akawaambia waandishi na makuhani wakuu kuwa watoza ushuru na makahaba wataingia katika Ufalme wa Mbinguni kabla yenu, kwa kuwa watu hawa walimwamini Yohana wakati makuhani wakuu na wazee hawakumwamini pamoja na kuwa Yohana alikuwa amekuja katika njia za haki.

Hapa Yesu alisema kitu gani? Alisema kuwa, “Yohana Mbatizaji alikuja kwenu katika njia za haki.” Hii ina maanisha kuwa Yohana Mbatizaji alikuja kwa ajili ya kazi ya haki ambayo ingelimfanya mwanadamu ahesabiwe haki. Yohana alitumwa hapa duniani kufanya kazi ambayo ingelimwezesha mwanadamu kupokea ondoleo la dhambi na aliitimiza kazi hii kwa kuwabatiza watu pamoja na Yesu. Pamoja na hilo, viongozi wa Kiyahudi wa wakati ule hawakuamini kuwa Mungu Baba alituma Yohana Mbatizaji kuitimiza kazi hii ya kuzitoweshea mbali dhambi za kila mtu na wala hawakuamini

ubatizo wake. Hii ndio sababu Yesu alikuwa akiwakemea. Pia Yesu aliwaambia, “Watoza ushuru na makahaba wanatangulia mbele yenu kuingia katika ufalme wa Mungu.” Watoza ushuru na makahaba walikumwa wamemwamini Yohana. Waliamini kuwa Yohana Mbatizaji alikuwa ni mtumishi wa Mungu na kwamba alikuwa amezipitisha dhambi zote za watu kwenda kwa Yesu kwa kumbatiza Yesu.

Umuhimu wa ubatizo wa Yohana ni upi? Neno batiza lina maanisha ni kuoshwa. Kama vile tendo la kuwekea mikono katika Agano la Kale, ubatizo unajumuisha kumwekea mikono mtu mwingine na kumzamisha katika maji. Wakati mikono inapowekwa juu yake, basi dhambi zinapitishwa. Utaratibu huu umeanzishwa na Mungu na kwa sababu hiyo ni wa muhimu sana kwa mtu yeyote yule. Ikiwa utaruhusu mtu aliyepagawa na mapepo kuiweka mikono yake juu ya kichwa chako, basi mapepo yake yatahamia kwako. Wakati mtu anapojaribu kunena kwa lugha, basi mtu mwingine anayenena kwa lugha hali akiwa amepagawa na mapepo ataiweka mikono yake juu ya kichwa cha mtu mwingine na kuomba. Kisha mapepo yatahamia kwa mtu yule aliyewekewa mikono na atanza kunena kwa lugha hali akiwa amepagawa na mapepo. Ikiwa mtu atasikiliza mahubiri toka kwa mtu aliyepagawa na pepo, basi inawezekana pia kwa mtu anayesikiliza kuanza kunena kwa lugha pia. Watu wa jinsi hiyo wajitumbukiza wenyewe katika hali ya kushangaza, watanena kwa lugha kiuongo, watagalagala sakafuni, na watafanya vitu vingi vya ajabu. Hayo yote yatafanyika kwa sababu wamepawaga na mapepo. Hapo ndipo roho chafu zilizomsumbua mtu fulani zinaweza pia kuwavamia. Vivyo hivyo, kule kuweka mikono maana yake ni kuhamishia kitu au nguvu fulani.

Ndugu zangu waamini, neno ubatizo kwanza kabisa lina maanisha kuwa ni kuoshwa kwa dhambi zetu. Hali akimwita

kila mtu aje kubatizwa Yohana Mbatizaji alisema, “Ziosheleeni mbali dhambi zenu. Mnapaswa kuoshelewa mbali dhambi zenu.” Yohana Mbatizaji alitoa ubatizo wa toba kwa watu wa Israeli ubatizo uliowawezesha kupokea ondoleo la dhambi zao (Marko 1:4), lakini pia Yohana alimbatiza Yesu, na ubatizo huu wa Yesu ni ule uliohusisha kuzipitisha dhambi zote za mwanadamu kwenda kwa Yesu. Ubatizo ambao Yesu aliupokea toka kwa Yohana Mbatizaji ulikuwa ni ubatizo ambao uliziosha dhambi za kila mtu. Na hii ndio maana ubatizo una maanisha “kuoshwa,” “kuzikwa,” na “kupitishiwa.”

Ndugu zangu waamini, kitu gani kilipaswa kufanyika ili dhambi zetu zioshelewe mbali? Ili dhambi zetu ziweze kuoshelewa mbali ilikuwa ni muhimu sana kwa Yohana Mbatizaji kuiweka mikono yake juu ya Yesu na kuzipitisha dhambi za wanadamu wote kwenda kwa Yesu. Ni nini basi ambacho kilipaswa kutokea baada ya dhambi zetu kupelekewa kwa Yesu? Kwa kuwa Yesu alikuwa amezipokea dhambi zetu zote, alipaswa kufa na kuzikwa kabrunini. Na hii ndio sababu baada ya kujitwika dhambi zote za mwanadamu kwa kubatizwa, Yesu alielekea Msalabani akiwa kama Mwanakondoo wa Mungu na akafa kwa niaba yetu. Na hii ndio sababu ni kwa nini Yesu alizikwa.

Yesu alikuwa ameuliza, “Ubatizo wa Yohana ni kitu gani?” lakini viongozi wa kidini wa Israeli hawakuuzingatia ubatizo wa Yohana Mbatizaji. Hivyo Yesu akawaambia, “Yohana alikuja hapa duniani katika njia ya haki, na wakati huo huo watoza ushuru na makahaba walimwamini, ninyi hamkutubu na kumwamini pamoja na kuwa mlimwona. Mtaenda moja kwa moja kuzimu. Kama ilivyoandikwa katika Malaki, siku ile ya mwisho mtatupwa katika tanuri iwakayo moto, mtawekwa kati ya hasira kuu.”

Mungu angelimtuma Nabii Eliya naye angeliigeuza mioyo ya Baba iwaelekee watoto—hii ina maanisha ni moyo wa Mungu kuwaelekea watoto wake. Kivipi? Ni kwa kumtuma Yohana Mbatizaji, ambaye ni mwakilishi wa wanadamu na mkuu kuliko wote waliozaliwa na mwanamke. Yohana Mbatizaji alizipitisha dhambi zetu zote kwenda kwa Yesu kwa kumbatiza Yesu, Mwana wa Mungu na Mwokozi. Kwa kufanya hivi, Yohana aliielekeza hasira ya Mungu iliyokuwa imehifadhiwa kwa ajili yetu kwenda kwa Yesu Kristo Mwana wake, na hivyo akafanya iwezekane kwetu sisi ambao tulikuwa hatuwezi kumkaribia Mungu kwa sababu ya dhambi zetu, kwenda mbele za Mungu kwa ujasiri kwa kuamini katika Ukweli huu. Kwa kuamini katika injili ya maji na Roho, kwamba Yohana Mbatizaji alizipitisha dhambi zote za ulimwengu kwenda kwa Yesu kwa kumbatiza, na kwamba Yesu alijitwika dhambi hizi zote na akaadhibiwa kwa ajili ya dhambi hizo pale Msalabani, basi mwanadamu sasa anaweza kusimama mbele za Mungu. Mungu alimfanya Yohana Mbatizaji kulitimiza jukumu lake kama mtu aliyewajibika kwa ubatizo wa Yesu, ili kwamba Mungu aweze kuwa na huruma kwa wale wote wanaomwamini Yesu Kristo na wanaoiamini huduma ya Yohana Mbatizaji na kuwachukulia kuwa ni watoto wake. Kwa maneno mengine, Yohana Mbatizaji alifanya jukumu la upatanishi. Imeandikwa hivi, “*Naye ataigeuza mioyo ya baba iwaelekee watoto wao,*” Yohana Mbatizaji, akiwa kama kuhani wa mwisho wa Agano la Kale, alilitimiza jukumu hili la upatanishi kikamilifu.

Mungu alikuwa ameanzisha utaratibu wa sadaka ya kuteketezwa na akaufanya ufahamike kwa watu wa Israeli kwa kupitia Musa. Hivyo, Waisraeli wote walitoa sadaka zao za kuteketezwa kwa Mungu kwa kuzingatia kanuni ya uwakilishi, na hapa alikuwepo Yohana Mbatizaji ambaye alilitimiza

jukumu hili kama Kuhani Mkuu wao wa mwisho. Yohana Mbatizaji ni mwakilishi wa wanadamu, mkuu wa wanadamu wote waliozaliwa na mwanamke. Yesu alisema kuwa tangu siku za Yohana Mbatizaji ufalme wa Mbinguni hupatikana kwa nguvu. Hii ina maanisha kuwa Yohana Mbatizaji ni Kuhani Mkuu wa mwisho wa Agano la Kale aliyelitimiza jukumu muhimu la kuzipitisha dhambi zote za ulimwengu kwenda kwa Mwanakondoo wa Mungu ili kufungua mlango wa Mbinguni.

Mungu alikuwa ameahidi kumtuma Eliya, na huyu Eliya si mwingine bali ni Yohana Mbatizaji. Mungu alisema kuwa Eliya ataigeuza mioyo ya baba iwaelekee watoto, na mioyo ya watoto iwaelekee baba zao. Yohana Mbatizaji alitoa sadaka ya kuteketezwa ya milele kwa niaba yetu.

Katika Agano la Kale, watu wa Israeli walikuwa wakileta wanyama wao wa sadaka ya kuteketezwa na Kuhani Mkuu aliwatoa sadaka kwa niaba yao, lakini sasa sadaka ya namna hii ilibadilishwa. Mwana wa Mungu mwenyewe alifanyika kuwa dhamana yetu. Na Yohana Mbatizaji, Mkuhani Mkuu wa Mwisho wa Agano la Kale akazipitisha dhambi zote za mwanadamu kwenda kwa Mwana wa Mungu. Kwa kupitia ubatizo huu ambao ulitolewa na Yohana Mbatizaji, Yesu alizipokea dhambi zote za wanadamu. Wakati Yohana Mbatizaji alipokuwa akilitimiza jukumulake ili kuvunja ukuta wa dhambi ambao ulikuwa umemtenga mwanadamu na Mungu Baba, basi aliubadilisha moyo wa Baba kuwaelekea watoto, na mioyo ya watoto kumwelekea Baba. Kwa hiyo, kila mtu anaweza kupokea ondoleo la dhambi ikiwa anaamini katika ubatizo wa Yesu na damu yake Msalabani. Mungu amewafanya wasio na dhambi wale wote wanaoamini katika wokovu ambao Bwana ameuleta, yaani wale wote wanaoamini katika injili ya maji na Roho, huku wakitangaza kuwa Yesu alizipokea dhambi zao zote kwa kupitia ubatizo alioupokea

toka kwa Yohana Mbatizaji, na kwamba amezitoweshea mbali dhambi zao zote. Kama ilivyoandikwa, “Yohana alikuja kwenu katika njia ya haki,” Yohana Mbatizaji alilitimiz ajukumu lake la kuzipitisha dhambi za mwanadamu kwenda kwa Yesu kwa kumbatiza Yesu.

Hata hivyo, pamoja na kuwa tunapiga kelele sana kuwa dhambi zetu zilipitishwa kwenda kwa Yesu kwa kupitia Yohana Mbatizaji, kuna watu wengi sana ambao hawaamini hivi. Hili ni jambo baya sana! Ni kwa kiasi gani Yohana Mbatizaji ameshuhudiwa kwa wazi katika Biblia? Kwa wazi kuwa Yohana Mbatizaji ndiye aliyeshuhudiwa zaidi na ambaye Yesu amemthibitisha zaidi. Yesu alimthibitisha kikamilifu Yohana Mbatizaji. Yesu aliweza kujitwika dhambi zote za wanadamu kwa kupitia Yohana Mbatizaji. Yesu hakusema, “Nitazibeba dhambi zenu mimi Mwenyewe.” Kama vile dhambi za Waisraeli katika Agano la Kale zilivyopitishwa kwenda kwa mnyama wa sadaka ya kuteketezwa kwa kupitia Kuhani Mkuu, basi vivyo hivyo Yesu alikuja hapa duniani kama Mwanakondoo wa Mungu kama sadaka yetu ya kuteketezwa, alizipokea dhambi zote za ulimwengu kwa kupitia ubatizo uliotolewa na Yohana Mbatizaji. Hii ni dhahiri kabisa. Pamoja na hayo, kuna watu wengi ambao bado hawaamini hivi.

Wakati Yesu alipokuwa hapa duniani, viongozi wa dini wa wakati ule, waandishi wa Torati, na wazee wa Israeli sio tu kwamba walikataa kumwamini Yesu, bali hawakuamini pia juu ya kile ambacho Yohana Mbatizaji alikuwa amekifanya kwa ajili yao. Walisimama kinyume na huduma ya Yohana Mbatizaji. Hii ndio sababu Yesu aliwaambia, “Mtatupwa kuzimu, kwa kuwa mmejawa na haki yenu binafsi na hamuamini ushuhuda wa Yohana. Lakini makahaba na watoza ushuru waliamini.” Kwa maneno mengine, makahaba

na watoza ushuru walihudumiwa kwanza na Mungu kwa sababu waliamini katika injili ya maji na Roho. Hata leo hii, kuna Wakristo wengi sana ambao hawaiamini injili hii.

Wakati Yesu alipokuwa hapa duniani, Mafarisayo na waandishi walikuja kumwona toka Yerusalemu na wakamuuliza, “Ni kwa nini wanafunzi wako huyahalifu mapokeo ya baba zetu? Kwa nini wanakula pasipo hata kuiosha mikono yao?” Waliwatuhumu wanafunzi kwa kuwa walikuka pasipo kunawa mikono yao. Walimdhihakiki Yesu kwa kusema, “Kwa kuwaangalia wanafunzi wako tu, tunaweza kuona kuwa na wewe ni mtu wa ovyo. Wewe pia ni mtu ambaye huitii Torati. Upo chini ya viwango vyetu kabisa.” Kisha Yesu akawakemea akasema, “Kimwingiacho mwanadamu hakimtii unajisi. Ni ule uovu utokao ndani ya moyo wake ndio unaomtia unajisi. Maana toka katika moyo wa mwanadamu kunatoka dhambi kumi na mbili zikiwemo mawazo maovu, na hayo ndiyo hutoka kinywani na kumfanya mtu anajisike. Kitendo cha mtu kula pasipo kuiosha mikono yake hakumaanishi kuwa mtu huyo amenajisika.” Kisha waandishi na Mafarisayo, waliokuwa wameyatunza mapokeo ya wazee walimdhihakiki Yesu wakisema, “Wewe na wanafunzi wako mna mapungufu makubwa. Ni wachafu kiasi kuwa hatuwezi kufanya lolote nanyi. Inawezekanaje basi mtu akala chakula pasipo kuiosha mikono yake? Mapokeo na desturi toka kwa wazazi wetu zinaeleza kuwa kila mtu ni lazima aoshe mikono yake na miguu yake mara anaporudi nyumbani toka nje, na tumeamuriwa kuyatii mapokeo haya, lakini wewe unakataa kuyatii.” Walimkataa Yesu kwa misingi ya vitu vya kibinadamu na kidesturi.

Kisha Yesu akawakemea, akisema, “Mnadai kuishika na kuitii Torati? Torati inawaamuru ninyi kuwatii wazazi wenu na kuwatunza, je, ninyi mnafanya hivyo? Je, hamjaivunja Torati,

hali mkidhani ya kuwa hampaswi kuwapatia chochote wazazi wenu huku mkisema, ‘Faida yoyote ambayo unaweza kuwa umeipokea toka kwangu ni *‘Kobani,’* (maana yake ni zawadi toka kwa Mungu)?’ je, huku ndio kuitii Torati? Je, hamjabadilisha amri za Mungu kuwa amri za wanadamu, na hivi sasa si mnaziamini hizo amri za wanadamu? Mnamwogopa Mungu bure, kwa kuwa hata pale mnapodai kuwa mnamwamini Mungu, mnaifanya hivyo kwa kufuata misingi ya amri za wanadamu.” Kisha Yesu akasema, “Kipofu anapomwongoza kipofu mwenzie, wote wataangukia katika shimo.”

Mapokeo haya ya wazee yana maanisha ni mafundisho ya kiimani ya wanadamu waliyojiundia. Hata leo hii kuna Wakristo wengi wanaosema, “Hakikisha unahudhuria katika kanisa kubwa. Hakikisha kuwa kanisa ambalo unahudhuria limesajiriwa na Wizara ya Utamaduni na Utalii. Na hakikisha kuwa unadhuhuria kanisa ambalo mafundisho yake ya kiimani yameidhinishwa. Kwa kifupi, ni lazima uhudhurie kanisa ambalo lina uhusiano na dhehebu kubwa na linalofahamika na watu wa kidunia pia. Yakupasa ufundishwe katika kanisa kama hilo na uliamini Neno kwa namna wanavyofundisha.” Kwa kweli ni jambo la bure kumwamini Mungu na kumwogopa kwa misingi ya amri za wanadamu.

Haijalishi ni nani na ana fundisha nini, je, kinchoongelwa kinahusiana walau na aya moja ambayo Mungu aliizungumza? Mafundisho ya wanadamu ni bure kabisa. Hata hivyo viongozi wa Kikristo wa leo wanapitia orodha ndefu ya litania ili kuona nani aliongea nini, huku wakisema kwa kusanyiko Kanisani, “Kalvin alisema hivi, Luther alisema vile, Livingstone alisema hivi, Ibrahimu Kuyper alisame vile; Hegel na Kant walisema hivi, wakati Konfusiasi, Mensius, na Sokreti walisema vile. Hivi ndivyo John Stott kutoka Uingereza alivyosema, na hivi

ndivyo Ibrahimu Lincoln toka Marekani alivyosema, na ndivo alivyoamini na kuyaongoza maisha yake ya kiimani.” Kwa kweli kufundisha kwa mtindo kama huu ni bure kabisa, kule kusema jifunze hivi, kisha enenda hivi ni bure.

Kitu ambacho ni cha muhimu ni kile ambacho Biblia inasema. Kile ambacho Neno la Mungu linasema katika maagano yote ndicho cha muhimu hasa. Yesu alisema kuwa Yohana Mbatizaji alikuwa ndiye Eliya atakayekuja, na kwamba alikuwa ni mkuu kuliko wote waliozaliwa na mwanamke. Wakati Mungu Mwenyewe anaposema kuwa Yohana Mbatizaji alizipitisha dhambi zetu zote kwenda kwa Yesu kwa kule kumbatiza, na kwamba hii na sawa na ule utaratibu wa sadaka ya kuteketekezwa, basi hapo tunapaswa kuamini hivyo na kufundisha hivyo. Hii ndio maana ya kusikia na kuamini katika amri za Mungu na Neno lake, na tunaweza kuokolewa kwa kuamini katika hili Neno la Mungu. Ni muhimu sana kwetu kumsikiliza Mungu kwa ukaribu kwa mujibu wa Neno lake. Hiyo ndiyo namna ya kumwogopa na kumtii Mungu.

Hakuna kitu cha kijinga kama kufafanua mafundisho ya kiimani ya kimadhehebu pasipo kulifahamu Neno la Mungu kwa usahihi. Je, John Calvin toka Ufaransa aliifahamu injili ya maji na Roho? Huyu mtheolojia mkuu alizaliwa Ufaransa, lakini injili ya maji na Roho ndio kwanza inaingia Ufaransa wakati huu. Watu wa Ufaransa hawaifahamu Korea vizuri, lakini tutachukua fursa hii kuwafanya waifahamu vizuri. Watatambua kuwa Korea si “Taifa Pweke” bali ni nchi ya watangulizi wa imani ya kweli.

Pamoja na kuwa Yohana alikuja katika njia ya haki, Wakristo wengi bado hawaamini hili. Hawaamini kuwa Yohana Mbatizaji alikuwa ni Eliya ambaye Mungu alikuwa ameahidi kumtuma katika nyakati za mwisho. Watu

wanamzungumzia Yohana Mbatizaji kama aliyeshindwa, wakisema, “Yohana alishindwa. Kwa nini? Kwa sababu kichwa chake kilikatwa na Mfalme Herode.” Lakini ukweli ni kuwa Yohana Mbatizaji hakushindwa. Ikiwa Yohana Mbatizaji alishindwa, basi hata Yesu atakuwa alishindwa, na kwa hiyo hata Mungu Baba atakuwa ameshindwa. Ili kutuokoa wanadamu toka katika dhambi, Mungu Baba alimtuma Yohana Mbatizaji kuja hapa duniani miezi sita kabla ya Yesu. Kisha Baba akamtuma Yesu kuja hapa duniani miezi sita baada ya kuzaliwa kwa Yohana Mbatizaji. Na wakati watumishi hao wawili walipofikia umri wa miaka 30, Yohana alimbatiza Yesu, na Yesu akaupokea ubatizo huu. Hivi ndivyo Mungu Baba alivyoziweka dhambi za ulimwengu kwa Yesu. Kwa kuzingatia hili, kama Yohana Mbatizaji angelikuwa ameshindwa, basi vivyo hivyo huduma ya Yesu ya wokovu ingelikuwa imeshindwa pia, na vivyo hivyo Mungu Baba aliyewatuma wote angelikuwa ameshindwa pia.

Kwa kupitia Musa katika Agano la Kale, Mungu alizungumza kuhusu Torati kwa wanadamu ambao walikuwa wameanguka katika dhambi, alizungumza juu ya utaratibu wa sadaka ya kuteketezwa ambao ulizitoweshea mbali dhambi, na akazungumza juu ya amri 613 ambazo wanadamu walipaswa kuzitii. Kila kitu kilikuwa kimeandikwa katika Torati, toka katika utaratibu wa sadaka ya kuteketezwa hadi kwenda katika sheria ya wokovu na sheria ya hukumu. Mungu alikuwa ameahidi kumtuma Eliya. Kama alivyokuwa ameahidi, Mungu alimtuma Eliya. Miezi sita baada ya kumtuma Eliya, Mungu alimtuma Yesu kuja hapa duniani. Na kwa kupitia Eliya, Mungu alizipitisha dhambi zote za wanadamu kwenda kwa Yesu. Yesu alizipokea dhambi zote za wanadamu kwa kupitia Eliya. Eliya alizipitisha dhambi zote za wanadamu kwenda kwa Yesu. Yesu akasema, “Ndivyo itupasavyo kuitimiza haki

yote. Ndivyo itupasavyo kumafanya kila mtu awe hana dhambi na kuwaokoa watu wote wa ulimwengu huu toka katika dhambi zao.” Kwa kuwa Yesu alizipokea dhambi za ulimwengu kwa kupitia Yohana Mbatizaji kwa kubatizwa, na kwa kuwa Yohana Mbatizaji alizipitisha dhambi hizi za ulimwengu kwenda kwa Yesu, basi Mungu aliweza kuzitoweshea mbali dhambi zote za wanadamu kwa kupitia Yohana Mbatizaji, ambaye alikuwa ndiye Eliya atakayekuja, na kwa Yesu, aliyefanyika kuwa Mwanakondoo wa sadaka ya kuteketezwa. Pamoja na hili, watu wengi hawauamini ukweli huu. Hata katika kipindi cha Agano Jipya, kulikuwa na wengi ambao hawakumtambua Yohana Mbatizaji na kwa sababu hiyo haikuwezekana kuokolewa.

Je, umesikia juu ya barua-pepe ambayo tumeipata toka kwa mmisionari mmoja huko Afrika? Kwanza kabisa, wakati mmisionari huyu aliposoma moja ya kitabu chetu alikasirika na kusema vibaya. Akatuambia, “Kitabu hiki kinasema kuwa Yohana Mbatizaji alizipitisha dhambi zangu kwenda kwa Yesu, lakini dai hili ni potofu kiasi kuwa siwezi kukubaliana nalo. Sikubaliana kabisa na hoja zilizomo katika kitabu hiki.” Bila shaka anaonekana alikuwa ni mtu asiye na subira, kwa sababu alituma barua yake wakati hata hajamaliza kukisoma kitabu chote. Kisha baada ya siku chache baadaye, alituandikia kwa kusema, “Nina habari takatifu za kuwashirikisha.” Ukweli alikuwa hajamaliza kukisoma kitabu alipokuwa akituandika barua yake ya kwanza. Baada ya kuendelea kukisoma kitabu chetu na kabla ya kukimaliza alituambia “Sikubaliani na maelezo haya,” lakini baada ya kukisoma kitabu zaidi, alifikia hatua ya kuelewa kuwa kitabu hiki kinazungumzia nini. Baada ya kukisoma kitabu zaidi na zaidi akatuandikia tena akisema “Ninataka kuwashirikisha habari takatifu, mimi pia, ninakubalina na msimamo wako juu ya ubatizo wa Yesu,

kwamba Mungu alizipitisha dhambi zetu kwenda kwa Yesu kwa kupitia Yohana Mbatizaji. Na kwa sababu hiyo dhambi zangu pia zilipitishwa kwenda kwa Yesu. Sasa sina dhambi.”

Siku hizi kuna watu wengi katika nchi za ng'ambo ambao wanakubaliana na sisi juu ya hili. Wanakiri kuwa pamoja na kumwamini Yesu kwa muda mrefu, ni mara yao ya kwanza kuisikia injili ya namna hiyo. Niliandika hivi katika kitabu moja ya kitabu changu, “Ukiachilia mbali maandiko ya wanafunzi wa Yesu, hiki ni kitabu cha kwanza katika ulimwengu mzima ambacho kina injili ya maji na Roho.” Watu hawa hawaipingi hoja hii. Wanakubaliana kwa kukaa kimya. Hata sasa kuna watu wengi ambao wanakiri baada ya kuvisoma vitabu vyetu, “Sijawahi kukisoma kitabu kama hiki katika Ukristo.” Wanakiri kuwa Yohana Mbatizaji alizipitisha dhambi za ulimwengu kwenda kwa Yesu. Wanakubali katika mioyo yao kuwa Yesu alizipokea dhambi za ulimwengu kwa kupitia Yohana Mbatizaji. Wanakubaliana na ukweli huu baada ya kusoma kitabu kimoja tu. Mara ya kwanza, kwa kuwa Neno la injili hii ni geni kwao wanaweza kudhani kuwa huu ni upotofu, lakini kadiri injili inavyoelezwa katika Biblia ni nini kinatokea? Wanafikia hatua ya kuikubali.

Hata sasa kuna wageni wengi wanazaliwa tena upya. Hata wakati huu, kuna waamini wapya wanaozaliwa tena upya. Watu wengi wanasoma vitabu vyetu wakiwa sebuleni na wakiwa bafuni, watu wengi sana wanasoma vitabu vyetu kwa jicho la imani na wanaamini katika injili hii huku wakijisemea, “Sasa sina dhambi. Ni sawa kabisa na jinsi Biblia inavyosema.” Kisha wanatuandikia, “Ninataka kuwashirikisha habari njema. Ninakubaliana kuwa Yesu alijitwika dhambi zetu zote kwa kubatizwa.”

Wanadamu wote wanakubaliana kuwa Yesu alizibeba dhambi zetu Msalabani na akasulubiwa. Hata Ibilishi

anakubaliana na hili. Lakini bado kuna baadhi ya watu ambao bado wananishambulia wakisema, “Inawezekanaje basi ikawa ni Mchungaji Jong tu ndio afahamu hili? Inawezekanaje yeye ndiye aweze kuona jambo kama hili katika Biblia? Je, ni kweli kuwa ni yeye tu ndiye aliyeona mambo haya?” Mimi sihitaji kutafuta habari hizo ninachokifanya ni kuisoma Biblia tu. Wakati Biblia nzima inazungumzia juu ya huu wokovu, ni jambo linaweza kukwepeka kuuona wokovu, hata kama ningelikuwa sichunguzi maandiko? Ninapoanza kuisoma Biblia, ninasoma sana. Ninasoma hadi ninapoona kuwa nimejawa nayo. Ninachosema ni kuwa ninaifahamu Biblia kama wale wanaojiita kuwa ni madaktari wa Biblia.

Kila mtu katika ulimwengu anayemwamini Mungu atafikia hatua ya kuamini katika ubatizo wa haki ambao Yohana alimpatia Yesu, yaani njia ya haki, kwa kuwa njia hii ipo wazi kabisa. Hivi ndivyo Biblia inavyosema na ilitabiriwa katika Agano la Kale. Imeandikwa hivi, *“Nitawapelekea Eliya nabii, kabla haijaja siku ile ya BWANA, iliyo kuu na kuogofya. Naye ataigeuza mioyo ya baba iwaelekee watoto wao, na mioyo ya watoto iwaelekee baba zao.”* Hivi sasa watu wanamgeukia Mungu kwa kuamini katika injili ya maji na Roho. Wakati Yohana Mbatizaji alipokuwa akizipitisha dhambi zote za wandamu kwenda kwa Yesu kumbatiza, wakati alipokuwa akizihamishia dhambi zote za ulimwengu huu kwenda kwa Yesu, basi wenye dhambi wote wanachopaswa kufanya sasa ni kumgeukia Mungu kwa kuuamini ukweli huu. Je, sisi pia tulimgeukia Mungu? Je, si tulisema kuwa tumeamini? Ni kweli tulisema. Kama Yohana Mbatizaji asingelifanya kazi hii basi hata kifo cha Yesu kingelikuwa ni bure. Wokovu usingeliweza kupatikana, hata kama tungelikuwa tunaamini kwa nguvu kiasi gani, hata kama tungelilia kiasi gani, hata kama tungelijitolea kuwa wafia dini,

hata kama tungelitoa fedha zetu zote, au hata kama tungeliwasaidia wengine. Mwishowe tungelijuta kam Yuda kwa kusema, “Kwa nini niliamini? Ingelikuwa bora kama nisingeliamini! Ninatamani hata kama nisingelizaliwa!” Hata hivo, Yohana Mbatizaji alizipitisha dhambi zetu zote kwenda kwa Yesu kwa kumbatiza, na hii ndio sababu tunaweza kuamini kwa ujasiri mbele za Mungu.

Ndugu zangu waamini, Yohana alikuja kwa njia ya haki na akatufanya tuwe katika namna za haki. Yesu alizipokea dhambi zao zote kwa kubatizwa ili kwamba watu waweze kupokea ondoleo la dhambi zao. Yesu alizitoweshea mbali dhambi za ulimwengu kwa kuupokea ubatizo toka kwa Yohana. Yesu alizichukua dhambi za ulimwengu, alisulubiwa hadi kifo, na akatuokoa. Ikiwa Neno linasema hivi ndivyo, basi sisi sote tunapaswa kuamini hivyo.

Yesu aliwaita Musa na Eliya. Na akazungumza nao. Pamoja na kuwa haijaandikwa katika Biblia kile ambacho walikizungumza hasa, ni wazi kuwa watatu hao walizungumza pamoja. Hapa Musa anaiwakilisha Torati. Je, Eliya anawakilisha nini? Anamwakilisha Kuhani Mkuu. Yeye ni kuhani mkubwa kuliko wote waliozaliwa na wanawake—maana yake yeye ni mwakilishi.

Mara nyingi Biblia inataja habari za dunia. Dunia ina maanisha kuwa ni mioyo ya watu. Ina maanisha kuwa ni roho zao. Ile aya ya mwisho katika kitabu cha Malaki inasema nini? Inasema, *“Ili nisije nikaipiga dunia kwa laana.”* Hii ina maanisha kuwa Mungu ataimimina hasira yake kwa wale wote wasioamini katika Ukweli wa wokovu. Unaweza kushangaa kwa nini ninasema hivi tena wakati ninyi nyote mnaamini tayari. Lakini ninasema hivi kwa kuwa kuna wengi sana ambao hawaamini. Si kwamba kila kinakuwa kimekwisha mara baada ya kupokea ondoleo la dhambi zako, bali kuna nafsi nyingi

sana ambazo tunapaswa kuzifikia kama sehemu ya jukumu letu. Wanadamu wote ni lazima waamini katika hili. Kuna watu wengi ambao wameanza kuamini hivyo hivi karibuni.

Nitaendelea kuchapisha gazeti letu la injili bila kujalisha bei ya karatasi itakavyopanda. Nina hakika kuwa wale ambao wanaweza kulipata gazeti letu kwa bahati wanaweza kulisoma gazeti letu na kisha kuja kanisani kwetu wakisema, “Tafadhali naomba mtu aniongoze hapa. Ninataka kuja hapa kulisikia Neno. Sikuwa nafahamu kuwa kulikuwa na Neno kama hilo katika Biblia.” Hapo zamani kidogo, watakatifu wetu walioko katika Kanisa la Daejeoni walimtembelea mwanamke aliyekuwa akimiliki saluni ya kike na wakampatia gazeti letu. Baada ya huyu mmiliki kumaliza kulisoma gazeti letu, akaliacha juu ya meza ya kahawa katika saluni. Mmoja wa wateja wake akawana analisisoma gazeti wakati akingojea zamu yake, kisha akawambia yule mmiliki wa saluni, “Je, unafahamu mahali ambapo kanisan hili lipo? Je unaweza kunipeleka mahali hapa ambapo Neno la ajabu kama hili linahubiriwa? Nimekuwa Mkristo kwa muda mrefu lakini bado dhambi nyingi hazijatoweka. Tafadhari unaweza kuniongoza kwenda katika kanisa hili?” Hatimaye aliweza kuwasiliana nasi kwa njia ya simu, na mchungaji wa Kanisa la Daejeoni alimhubiria injili, na baada ya kuisikia injilihiyo alipokea ondoleo la dhambi zake.

Ndugu zangu waamini, Neno la Mungu halitatoweka kwamwe. Litabaki kama lilivyo milele yote. Habari ya thamani zaidi katika ulimwengu huu ni Neno hili linalotangaza kuwa Yohana Mbatizaji alizipitisha dhambi zetu zote kwenda kwa Yesu kwa kumbatiza, na kwamba Yesu alijitwika dhambi zote za ulimwengu na akazibeba hadi Msalabani, akafa msalabani na akafufuka tena toka kwa wafu, na kwamba kwa sababu hiyo ametuokoa sisi sote. Hii ndio habari nzuri zaidi na yenye

furaha zaidi; ina nguvu ya ajabu kama vile dainamoo; na ni muziki ambao ni mzuri kuliko muziki wowote ule. Ndugu zangu waamini, jem mnaamini hivyo? Au kwa namna yoyote ile unachukizwa kwa sababu ninarudia maneno yale tena na tena? Mahubiri yangu yalikuwa ni marefu kuliko haya. Yalikuwa ni marefu sana kiasi kuwa yalidumu wakati mwingine kwa masaa matatu. Lakini siku hizi ninazingatia sana muda. Ikiwa kama ningelithuburi kila kitu kinachonijia katika fikra zangu, basi ningelipaswa kuhubiri kwa masaa matatu hadi manne. Hivyo ukilinganisha na pale zamani utaona kuwa mahubiri yangu siku hizini ya wastani.

Ndugu zangu waamini, unaweza kuuhubiri Ukweli huu wa maji na Roho ikiwa tu wewe mwenyewe unaufahamu. Je, umewahi kuhubiri injili hapo kabla? Unapojaribu kuihubiri injili, huoni kuwa kuna wakati maneno yanakuishia? Ni pale tu unapolisikia Neno la Mungu katika undani wake wote, na ukalithibitisha na kulifahamu katika upana wake, ndipo unapoweza kuhubiri injili kikamilifu hata kama mtu atakupa changamoto katika Neno unaweza kumfanya ashindwe na kisha ukaikoa nafsi yake. Upo radhi uokolewe wewe binafsi na kisha ukauficha Ukweli kibinafsi? Kama ningelifanya hivyo, basi ni hakika kuwa ningelikuwa nimeacha kuitumikia injili muda mrefu mara baada ya kupokea ondoleo la dhambi zangu. Kama ningeliacha kuitumikia injili mara baada ya kupokea ondoleo la dhambi pengine ningelikuwa ni mkurugenzi katika kituo kikubwa cha maombi ambacho mama yangu wa kambo alikuwa akikiongoza. Bila shaka baadhi yenu mngelikuwa mnakuja katika kituo changu cha maombi kuomba. “Karibu. Nini kimekuleta hapa” “Nimekuja kuomba.” “Nenda katika chumba kile kuomba, kisha unaweza kutumia chumba kile kingine.” Kisha ungelilia sana katika chumba kile hali ukijiweka katika hali nzito ya kuteseka ukijaribu kufunga. Mara nyingi watu

wanaenda katika vituo vya maombi wanataka mkurugenzi aweke mikono juu yao. Wale wanaomiliki vituo hivi mara nyingi wanadai kiasi kikubwa cha sadaka kwa kuwawekea mikono mara moja. Wanajipatia fedha nyingi sana. Kama ningaliufunga mdomo wangu badala ya kuihubiri injili hii, ninyi nyote si mngelikuwa mnaelekea kuzimu sasa? Kama ningelikuwa sijaifanya kazi hii, basi ni hakika kuwa Mungu angelimwandaa mtu mwingine kuifanya, kwa kuwa Mungu ana nguvu hata ya kubadilisha jiwe hili kuwa uzao wa Ibrahimu.

Hata hivyo, siwezi kuyazuia mapenzi ya Mungu na hii ndio sababu ninaihubiri injili ya maji na Roho. Na hii ndio sababu ninaendelea kuihubiri injili ya maji na Roho kwenu muda baada ya muda. Ninawasihi nanyi muihubiri injili hii kwa watu wengine katika undani wake kamili na sio tu kukaa nayo ninyi wenyewe. Jaribu kuandika yale ambayo umeyasikia toka katika kifungu cha leo cha Maandiko kwa ukamilifu wake, thibitisha tena na tena, kisha muhubirie mtu mwingine kama ilivyo. Halafu ujionee wewe mwenyewe ikiwa mtu huyo atapokea ondoleo la dhambi au la. Ni hakika kuwa mtu huyo atapokea ondoleo hilo la dhambi. Ikiwa mtu huyo ataondolewa dhambi zake zote kwa kupitia wewe, basi Ufalme wa Mungu utashuka katika moyo wake pia.

Pengine baadhi yenu sasa mmechoka sana katika muda huu wa kuabudu, kwa kuwa mlikuwa mkicheza kandanda kwa juhudi mchana wa leo. Nimesikia kuwa dada zetu ni wazuri sana katika kandanda. Ninaweza kuwa mchezaji mzuri mshambuliaji ninapocheza kandanda, lakini siku hizi sina nguvu ya kuweza kucheza kandanda pamoja nanyi. Ninatumia muda mwingi kujaribu kuufanya mwili wangu uwe na afya bora, na ndio maana siku hizi ninaweza kuhubiri mara moja baada ya kipindi fulani. Afya yangu si nzuri sana ya kuniwezesha kutembea sehemu mbalimbali. Nikizingatia jinsi afya yangu ilivyokuwa

dhaifu siku hizi za karibuni, kwa kweli ninamshukuru sana Mungu kwa kuweza kusimama mbele yenu na kulihubiri Neno. Ni hakika kuwa Mungu amefanya yasiyowezekana kuwezekana.


Ndugu zangu waamini, kila mtu katika ulimwengu huu anapaswa kuamini kile ambacho Yohana Mbatizaji alishuhudia? Kwa ni watu hawaamini ushuhuda huo, hata pale ambapo Biblia inashuhudia kuwa Yohana Mbatizaji alikuja katika njia ya haki? Kila mtu anapaswa kuamini katika ushuhuda wa Yohana na huduma yake. Injili ya maji na Roho ambayo Yohana Mbatizaji aliitimiza pamoja na Yesu ni njia ya wokovu ambayo kila mtu hapa duniani anapaswa kuamini. Yohana Mbatizaji alikuja katika njia ya haki akazipitisha dhambi zote za ulimwengu kwenda kwa Yesu kwa kumbatiza Yesu. Hivyo, Yesu ametuokoa sisi sote toka katika dhambi kwa kuzipokea dhambi za ulimwengu na kwa kufa Msalabani. Kila mtu ni lazima aamini katika wokovu huu na katika njia hii kuelekea katika Ufalme wa Mbinguni.

Wewe na mimi pia, yaani sisi sote tunapaswa kuufikia wokovu kwa imani. Kila mtu anayemwamini Yesu ni lazima aamini pasipo shaka. Wokovu hauwezi kufikiwa kwa kuamini katika Msalaba tu. Ni muhimu na lazima kuamini katika injili ya maji na Roho. Hayo ndiyo ninataka kuwashirikisha ninyi nyote. Ni vipi kuhusu ninyi? Mnaamini katika injili hii?

Bila shaka unaweza kuwa umelisikia Neno hili mara elfu kadhaa, ukweli ni kuwa kama haukubali injili hii basi utapatwa na aibu mbele za Mungu. Wakati Yesu Mwenyewe anapoithibitisha injili hii ya maji na Roho, inawezekanaje basi kwa sisi tusiikubali? Ndugu zangu waamini, ninawaomba ninyin nyote muikubali injili hii. Ni lazima uitii na uitunze injili hii kwa uaminifu. Na ni lazima uiamini injili hii kwa moyo wako wote. ☒

MAHUBIRI

4



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Itazame Huduma ya Yohana Mbatizaji!

< Luka 1:17-23 >

“Naye atatangulia mbele zake katika roho ya Eliya, ‘na nguvu zake, ili kuigeuza mioyo ya baba iwaelekee watoto, na kuwatilia waasi akili za wenye haki, na kumwekea Bwana tayari watu waliotengenezwa.’ Zakaria akamwambia malaika, ‘Nitajuaje neno hilo? Maana mimi ni mzee, na mke wangu mkongwe wa siku nyingi.’ Malaika akamjibu akamwambia, ‘Mimi ni Gabrieli, nisimamaye mbele za Mungu; nami nimetumwa nisema nawe, na kukupassha habari hizi njema. Na tazama! Utakuwa bubu, usiweze kusema, mpaka siku ile yatakapotukia hayo, kwa sababu hukuyasadiki maneno yangu; nayo yatatimizwa kwa wakati wake.’ Na wale watu walikuwa wakimngojea Zakaria, wakastaajabia kukawia kwake mle hekaluni. Alipotoka hali hawezi kusema nao, walitambua ya kuwa ameona maono ndani ya hekalu, naye aliendelea kuwaashiria akakaa bubu. Ikawa siku za huduma yake zilipokuwa zimetimia akaenda nyumbani kwake.”

< Luka 1:67-80 >

“Na Zakaria, baba yake, akajazwa Roho Mtakatifu akatabiri akisema, Atukuzwe Bwana, Mungu wa Israeli, kwa kuwa amewajia watu wake, na kuwakomboa. Ametusimamishia pembe ya wokovu katika mlango wa Daudi mtumishi wake. Kama alivyosema tangu mwanzo kwa kinywa cha manabii wake watakatifu; Tuokolewe na

adui zetu na mikononi mwao wote wanaotuchukia; ili kuwatendea rehema baba zetu na kulikumbuka agano lake takatifu; Uapo aliomwambia Ibrahimu, baba yetu, ya kwamba atatujalia sisi, Tuokoke mikononi mwa adui zetu, na kumwabudu pasipo hofu, Kwa utakatifu na kwa haki mbele zake siku zetu zote. Nawe, mtoto utaitwa nabii wake aliye juu, kwa maana utatungulia mbele za uso wa Bwana umtengenezee njia zake; uwajulishe watu wake wokovu katika kusemehewa dhambi zao. Kwa njia ya rehema za Mungu wetu, ambazo kwa hizo mwangaza utokao juu umetufikia, kuwaangaza wakaa katika giza na uvuli wa mauti, na kuiongoza miguu yetu kwenye njia ya amani. Yule mtoto akakua akaongezeka nguvu rohani, akakaa majangwani hata siku ya kutokea kwake kwa Israeli.”

Ni Kazi Gani Ambayo Yohana Mbatizaji Aliifanya?

Injili ya Luka katika sura ya 1 aya ile ya 17 inaeleza kuwa Yohana Mbatizaji alikuwa ni mtu aliyekuja katika roho na nguvu ya Eliya na akaifanya kazi ya kuwarudisha watu kwa Mungu mbele ya uwepo wa Bwana. Yohana Mbatizaji alikuwa ni tofauti na watu wengine tangu alipozaliwa. Sisi watu wa kawaida tunaoana na kisha kuzaa watoto kwa kudhamiria au kutodhamiria kadri muda unavyozidi kwenda. Lakini Yohana Mbatizaji ni mtu ambaye kuzaliwa kwake kulikwisha tabiriwa na kuandaliwa katika Agano la Kale. Inasemwa kuwa Yohana Mbatizaji atakuja kwetu katika roho na nguvu ya Eliya.

Injili ya Luka katika sura ya 1 inaeleza kwa kina kuhusu kuzaliwa kwa Yohana Mbatizaji. Imeandikwa hivi, *“Na Zakaria, baba yake, akajazwa Roho Mtakatifu akatabiri*

akisema, 'Atukuzwe Bwana, Mungu wa Israeli, kwa kuwa amewajia watu wake, na kuwakomboa. Ametusimamishia pembe ya wokovu katika mlango wa Daudi mtumishi wake. Kama alivyosema tangu mwanzo kwa kinywa cha manabii wake watakatifu; Tuokolewe na adui zetu na mikononi mwao wote wanaotuchukia; ili kuwatendea rehema baba zetu na kulikumbuka agano lake takatifu; Upo aliomwambia Ibrahimu, baba yetu, ya kwamba atatujalia sisi, Tuoko mikononi mwa adui zetu, na kumwabudu pasipo hofu, Kwa utakatifu na kwa haki mbele zake siku zetu zote.'" (Luka 1:67-75).

Neno lililoandikwa hapa ulikuwa ni unabii wa Zakaria. Hali akiwa amejazwa na Roho Mtakatifu, alitabiri kuhusu Yesu ambaye atakuja kama Mwokozi na kuhusu Yohana Mbatizaji, mshirika wa Yesu katika mwili, ambaye atakuja kama mwakilishi wa wanadamu. Hii ina maanisha kuwa Yohana Mbatizaji alikuja hapa dunani na akamsaidia Yesu ili kutuokoa toka katika mikono ya adui zetu, mikono ya Ibilisi, kwa kupitia ushuhuda wa huduma yake na akatufanya sisi kuishi kwa utakatifu na haki milele pasipo hofu. Bwana aliazichukua dhambi zetu zote katika mwili wake kwa kupitia ubatizo na akatufanya sisi kumtumikia Mungu kwa kutufanya sisi kuwa watakatifu. Bwana alitufunika kwa haki ya Mungu na akatufanya tumtumikie Mungu milele pasipo dhambi. Yesu alikuja hapa duniani na akaupokea ubatizo toka kwa Yohana Mbatizaji na akafa Msalabani na akafufuka toka kwa wafu, na akatupatia neema ya wokovu inayomfanya kila mtu anayeamini katika Ukweli huu kuwa hana dhambi. Injili ya Luka katika sura ya ile ya 1 inaandika kuhusu kazi ya Yohana Mbatizaji ambaye alifanya jukumu muhimu sana katika neema na wokovu wa Bwana.

Ni lazima tufahamu maana katika Neno lililoandikwa

katika Injili ya Luka sura ya 1 aya ya 76-79. Aya hizo zinasema hivi, *“Nawe, mtoto utaitwa nabii wake aliye juu, kwa maana utatangulia mbele za uso wa Bwana umtengenezee njia zake; uwajulishe watu wake wokovu katika kusemehewa dhambi zao. Kwa njia ya rehema za Mungu wetu, ambazo kwa hizo mwangaza utokao juu umetufikia, kuwaangaza wakaao katika giza na uvuli wa mauti, na kuiongoza miguu yetu kwenye njia ya amani.”*

Ni nani ambaye ataifanya kazi hiyo? Ni Yohana Mbatizaji. Aya hizi zinaeleza kuwa Yohana Mbatizaji ataitwa nabii wa Aliyejuu mbele za Mungu na kwamba atakwenda mbele ya uwepo wa Bwana na kuwafanya watu waelewe wokovu unaopatikana kupitia ondoleo la dhambi. Aya zinatueleza kuwa Yohana Mbatizaji ataionyesha njia ya wokovu ambayo italeta ondoleo la dhambi kwa watu wa Mungu. Kwa hiyo ndio maana imeandikwa hivi, *“Ambazo kwa hizo mwangaza utoakao juu umetufikia, kuwaangaza wakaao katika giza na uvuli wa mauti,”* Mwanga wa Ukweli unaotuwezesha kumtumikia Mungu utatushukia katika mioyo yetu kwa kupitia ubatizo ambao Yesu aliupokea toka kwa Yohana Mbatizaji ambao ulizihamisha dhambi zote za ulimwengu kwenda kwa Yesu. Yesu anautoa mwanga wa Mungu wa wokovu kwa watu wote wanaoishi katika ulimwengu wa giza na anawaongoza kwenda kwenye nuru. Watu wanaongozwa kwenda katika nuru ya uzima kwa kupitia nani? Watu wanaongozwa na huduma na ushuhuda wa Yohana Mbatizaji. Sasa, Yohana Mbatizaji anamshuhudia nani? Anaishuhudia kazi ya Yesu Kristo. Aya ya 76 inasema, *“Nawe, mtoto, utaitwa nabii wake aliye juu.”* Hii ina maanisha Yohana Mbatizaji atakubaliwa kuwa ni nabii mkuu na watu wote. Maandiko yanaeleza kuzaliwa kwa Yesu na Yohana Mbatizaji kama unabii na tunaweza kuona unabii ukitimizwa.

Yesu ni Mungu Mwenyewe. Lakini Yeye ni Mwokozi aliyejaa upendo aliyekuja kutuokoa toka katika dhambi za ulimwengu akiwa amejivika mwili wa kibinadamu ambao ni sehemu ya uumbaji wake ingawa Yeye ni Mungu. Na Yohana Mbatizaji alikuwa ni mtu aliyeifanya huduma kama ya Eliya ambayo imeandikwa katika Kitabu cha Malaki katika Agano la Kale. Walikuwa ni watumishi walioandaliwa mbele ya uwepo wa Mungu. Walikuwa ni watumishi wa haki wa Mungu Baba waliokuwa wametabariwa katika Maandiko. Hapa sizungumzii neno “mtumishi” kwa maana hasi, bali nina maanisha kuwa Yesu aliifanya kazi ya haki mbele ya macho ya Mungu akiwa kama Mwana wa Mungu Baba.

Kumekuwapo na manabii wengi kama vile Musa na Isaya, lakini hawa walitabiriwa katika Maandiko kuwa watakuja kama alivyotabiriwa Yohana Mbatizaji? Hapana, hawakutabiriwa hivyo. Watu hao, yaani hao manabii wengine walizaliwa katika mwili na wazazi wao kama wanavyozaliwa watu wengine, lakini Mungu alijidhihirisha kwao na akawasimamia na kuwatumia kwa mujibu wa mahitaji ya Bwana ya wakati huo. Lakini Yohana Mbatizaji anayetajwa katika Agano Jipya, ambaye alimbatiza Yesu, ni nabii wa Mungu ambaye alitabiriwa katika Agano la Kale.

Pia tunaweza kuona kupitia Neno la Mungu lililoandikwa katika Maandiko kuwa Yohana Mbatizaji ni kama Eliya wa Agano la Kale. Hebu tuangalie Neno toka kitabu cha Malaki katika Agano la Kale. Kinasema,

“Kwa maana, angalieni, siku ile inakuja,

Inawaka kama tanuru;

Na watu wote wenye kiburi, nao wote watendao uovu,
watakuwa makapi;

Na siku ile inayokuja itawateketeza,

Asema Bwana wa majeshi;

*Hata haitawaachia shina wala tawi.
Lakini kwenu ninyi mnaolicha jina langu,
Jua la haki litawazukia,
Lenye kuponya katika mbawa zake;
Nanyi mtatoka nje,
Na kucheza-cheza kama ndama wa mazizini.
Nanyi mtawakanyaga waovu;
Maana watakuwa majivu chini ya nyayo za miguu yenu;
Katika siku ile niifanyayo,
Asema Bwana wa majeshi.
Ikumbukeni torati ya Musa, mtumishi wangu,
Niliyomwamuru huko Horebu kwa ajili ya Israeli wote,
Naam, amri na hukumu.
Angalieni, nitawapelekea Eliya nabii,
Kabla haijaja siku ile ya Bwana, iliyo kuu na kuogofya.
Naye ataigeuza
Mioyo ya baba iwaelekee watoto wao,
Na mioyo ya watoto iwaelekee baba zao,
*Ili nisije nikaipiga dunia kwa laana.” (Malaki 4:1-6).**

Yohana Mbatizaji ni Eliya Ambaye Mungu Aliahidi Kumtuma Send

Biblia inasema, “*Angalieni, nitawapelekea Eliya nabii*” (Malaki 4:5), na Eliya anayezugumziwa hapa ni Yohana Mbatizaji ambaye anamshuhudia Yesu. Hebu tuangalie maneno yaliyosemwa na Yesu katika Mathayo 11:14. Anasema, “*Na ikiwa manataka kukubali, yeye ndiye Eliya atakayekuja.*” Katika aya hii tunaweza kuona kuwa Yesu Mwenyewe alimshuhudia Yohana Mbatizaji pia. Yesu alishuhudia kuwa yule Eliya ambaye Mungu aliahidi kumtuma katika Kitabu cha

Malaki katika Agano la Kale ni Yohana Mbatizaji ambaye alikuja katika kipindi cha Agano Jipya. Kwa maneno mengine, Yohana Mbatizaji ambaye alikuwa ni Eliya atakayekuja anatufanya sisi sote tumrudie Mungu katika kipindi cha Agano Jipya, hii ni kwa mujibu wa Neno linalosema kuwa ataufanya moyo wa Baba uwarudie watoto na mioyo ya watoto kumrudia Baba.

Injili ya Mathayo 11:14 inasema, *“Na ikiwa mnataka kukubali, yeye ndiye Eliya atakayekuja.”* Huyu Eliya ni yupi? Katika Kitabu cha Malaki Mungu Yehova alisema atamtuma Nabii Eliya kabla mwisho wa ulimwengu haujafika na kwamba kila mtu anayelitii neno lake ataupokea wokovu na wale watakaolikataa neno lake wataharibiwa. Maandiko yanaeleza kuwa Mungu alimtuma Yohana Mbatizaji ambaye ni Nabii Eliya kuja kwa ajili ya wenye dhambi wote kwa sababu hatimaye kutakuwa na siku ya kutisha ya mwisho wa dunia na kutakuwa na hukumu.

Lakini watu wengi hawakufahamu kuwa Nabii Eliya wa Agano la Kale alikuwa amekwisha kuja katika nafsi ya Yohana Mbatizaji. Hii ndio sababu waandishi na Mafarisayo na watu wa Israeli walimuuliza Yesu, “Maandiko yanasema kuwa Eliya atakuja kabla ya Yesu. Sasa huyu Eliya ni yupi?” Watu wa Israeli walimngojea sana Eliya ambaye Bwana Mungu alikuwa ameahidi kumtuma. Hivyo, Bwana akasema, *“Na ikiwa mnataka kukubali, yeye ndiye Eliya atakayekuja.”* (Mathayo 11:14). Sasa huyu Eliya ni nani? Ni Yohana Mbatizaji ambaye alimbatiza Yesu. Injili ya Mathayo sura ya 11 aya ile ya 10 inasema, *“Huyu ndiye aliyeandikiwa haya, ‘Tazama, mimi namtuma mjumbe wangu mbele za uso wako, atakayeitengeneza njia yako mbele yako.’”* Neno hili lilinukuliwa toka katika Malaki 3:1 katika Agano la Kale. Ni Neno la unabii lililokuwa limetamkwa katika katika Agano la

Kale. Yesu alilinukuu Neno ambalo lilikuwa limeshatabiriwa katika Agano la Kale na akasema kuwa lilikuwa ni Neno kumhusu Yohana Mbatizaji.

Yohana Mbatizaji ni Mwakilishi wa Wanadamu

Bwana alishuhudia, *“Amin, nawaambieni, hajaondokea mtu katika wazao wa wanawake aliye mkuu kuliko Yohana Mbatizaji” (Mathayo 11:11)*. Vivyo hivyo, Maandiko yanaandika kuwa ile nafsi inayoitwa Yohana Mbatizaji inawakilisha wanadamu wote. Yohana Mbatizaji ni Eliya ambaye Agano la Kale lilisema kuwatakuja na huyu Yohana Mbatizaji ndiye Mwakilishi wa wanadamu.

Baadhi wanaweza kuniuliza, “Ni wapi katika Maandiko panaposema kuwa ‘Yohana Mbatizaji ni mwakilishi wa wanadamu?’” Yesu alisema, *“Amin, nawaambieni, hajaondokea mtu katika wazao wa wanawake aliye mkuu kuliko Yohana Mbatizaji; walakini aliye mdogo katika ufalme wa mbinguni ni mkuu kuliko yeye” (Mathayo 11:11)*. Hii ndio sababu tunasema kuwa Yohana Mbatizaji ni mwakilishi wa wanadamu. Kwa kumbatiza Yesu Kristo, huyu mwakilishi wa wanadamu alizihamishia dhambi za wanadamu wote kwenda kwa Yesu Kristo na akaitimiza haki ya Mungu.

Maandiko yanaendelea kusema, *“Walakini aliye mdogo katika ufalme wa mbinguni ni mkuu kuliko yeye. Tangu siku za Yohana Mbatizaji hata sasa ufalme wa mbinguni hupatikana kwa nguvu, nao wenye nguvu wauteka. Kwa maana manabii wote na torati walitabiri mpaka wakati wa Yohana. Na ikiwa mnataka kukubali, yeye ndiye Eliya atakayekuja.”* Neno hili linasema kuwa mamlaka ambayo wenye haki watayafurahia Mbinguni ni makubwa mno kiasi kuwa hata yule mwakilishi

wa wanadamu si kitu huko Mbinguni.

Yohana Mbatizaji alikuwa amekwishatabiriwa muda mrefu uliopita. Hebu nirudie hili. Unabii katika Malaki 3:1 unasema, *“Angalieni, namtuma mjumbe wangu.”* Huyu mjumbe anayetajwa hapa ni Yohana Mbatizaji ambaye angelikuja hapa baadaye. Kama tunavyoweza kuona katika Neno la Mungu linalosema, *“Angalieni, namtuma mjumbe wangu, naye ataitengeneza njia mbele yangu” (Malaki 3:1),* Mungu alikuwa amekwisha ahidi kuwa atamtuma Eliya mtumishi wa Mungu ili kuitengeneza njia yake kabla ya Yesu Kristo hajaja, na hapa alikuwa akizungumzia juu ya jukumu la Yohana Mbatizaji la kuzihamishia dhambi zote za ulimwengu kwenda kwa Yesu kwa kumbatiza. Mungu alikuwa amekwisha zungumza kupitia nabii katika Kitabu cha Malaki kuwa atamtuma Yesu Mwokozi na Yohana Mbatizaji ambaye atazihamishia dhambi zote za wanadamu kwenda kwa Yesu.

Huyu mtu aliyetajwa kuwa atatumwa na Mungu ni nani? Ni Eliya wa kiroho, yaani Yohana Mbatizaji ambaye alikuwa na roho ya Eliya. Na hii ndiyo sababu imeandikwa hivi katika Injili ya Luka sura ya 1 aya ya 76-77, *“Nawe, mtoto utaitwa nabii wake aliye juu, kwa maana utatangulia mbele za uso wa Bwana umtengenezee njia zake; uwajulishe watu wake wokovu katika kusemehewa dhambi zao.”* Hali akizungumzia juu ya huduma na ushuhuda wa Yohana Mbatizaji, Mungu alisema, *“uwajulishe watu wake wokovu katika kusemehewa dhambi zao.”* Maneno haya, *“Wewe, mtoto”* yanamwelezea Yohana Mbatizaji ambaye ni mwakilishi wa wanadamu katika ulimwengu wote. Inasemwa kuwa Yohana Mbatizaji ni Kuhani Mkuu wa kiroho anayewawakilisha wanadamu wote. Hii ina maanisha kuwa huyu mtoto, atatufanya sisi watu wa Mungu kuelewa wokovu kupitia ondoleo la dhambi.

Sio tu dhambi zote za Waisraeli bali pia dhambi zote za

ulimwengu zilitoweshewa mbali wakati Yohana Mbatizaji alipozihamishia kwenda kwa Yesu Kristo aliyekuwa amekuja hapa ulimwenguni ili kuzipatanisha kwa kumbatiza. Na Yohana akaushuhudia ukweli huu. Akasema, *“Tazama Mwanakondoo wa Mungu!”* (Yohana 1:36) Yohana Mbatizaji aliwafanya watu waliotamani kuamini katika haki ya Mungu kumwamini Mungu kwa kuwafanya waelewe kuwa Yesu alikuwa amekwishazichukua dhambi zote za wanadamu mara moja kwa kupitia ubatizo ambao aliutoa. Hii inatueleza jinsi ambavyo Bwana alitufanya hatimaye tuweze kupokea wokovu toka katika dhambi zetu zote kwa kuweka bayana jinsi tunavyopaswa kumfahamu na kumwamini Yesu hasa pale tunapotamani kumwamini Yesu kuwa ni Mwokozi. Sisi tunaomwamini Yesu kuwa ni Mwokozi tunapokea ondoleo la dhambi kwa kuamini katika ubatizo na damu ya Yesu kwa sababu Yohana Mbatizaji alizihamishia dhambi zetu zote kwenda kwa Yesu mara moja kwa kuufanya ubatizo katika kichwa cha Yesu.

Imani ya jinsi hiyo ni imani inayoamini katika injili ya maji na Roho ambayo Maandiko yanaizungumzia. Inaelezwa kuwa Yohana Mbatizaji atakuja *“kuwajulisha watu wake wokovu.”* Sisi wanadamu tuliweza kujifunza juu ya njia ya kweli ya wokovu, ambayo ni Yesu Kristo, kwa kupitia ushuhuda wa Yohana Mbatizaji, kwa kupitia kazi ya Yohana ya kuzihamishia dhambi zote za wanadamu kwenda kwa Yesu, na kuwa pitia jukumu lake la kulitimiza jukumu la Kuhani Mkuu katika ulimwengu huu. Tumefikia hatua ya kuwamini Yesu kuwa ni Mwokozi kwa kupitia huduma ya Yohana Mbatizaji. Tuliweza kuamini kuwa Yesu ni Mwakondoo wa Mungu aliyezichukua dhambi zote za ulimwengu. Yohana Mbatizaji alishuhudia kuwa Yesu alizichukua dhambi za wanadamu wote katika mwili wake kwa kupitia ubatizo

alioupokea toka kwa Yohana Mbatizaji. Haya yote yalitokea sawasawa kwa mujibu wa Agano la Kale kama Mungu alivyokuwa ameahidi. Mungu aliahidi kumtuma Yohana Mbatizaji hapa ulimwenguni na kitabu ch Malaki sura ya 4 kinaeleza hivyo,

“Naye ataigeuza,

Mioyo ya baba iwaelekee watoto,

Na mioyo ya watoto imwelekee baba yao.”

Kila mtu anaweza kuzifanya dhambi zake zihamishiwe kwenda kwa Yesu Kristo mara moja ikiwa atafahamu na kuamini juu ya jukumu la Yohana Mbatizaji. Kitu ambacho mtu anapaswa kufanya ni kuifahamu na kuiamini sadaka ya kuteketezwa ya kushangaza na ukamilifu wa wokovu wa Yesu Kristo unaojidhihirisha katika injili ya maji na Roho. Baada ya kuamini hivyo, mtu anaweza kukutana na Ukweli unaompatia ondoleo la dhambi. Mungu aliahidi kumtuma Yohana Mbatizaji ambaye ni Eliya wa kiroho ili kuutimiza wokovu wote.

Yohana Mbatizaji alizaliwa toka katika familia ya Zakaria, ambaye ni mmoja wa ukoo wa Haruni Kuhani Mkuu, alizaliwa miezi 6 kabla Yesu hajaja hapa ulimwenguni. Elizabeti, mke wa Zakaria, alikuwa ni mzee sana katika umri ambao ni vigumu kwake kuweza kupata mimba. Sasa, unadhani Zakaria mme wa Elizabeti alijisikia vipi? Alitekewa na kupatwa na bumbuwazi kiasi kuwa hakuweza kuliadini Neno la Bwana. Zakaria hakuonekana kuwa ni mwaminifu mbele za macho ya Mungu. Na hii ndio maana Zakaria alifanywa bubu na akaweza kuongea baadaye baada ya unabii wa Mungu kukamilishwa. Mungu alimfanya Zakaria kuwa bubu kwa muda hadi pale kazi itakapotimizwa.

Na miezi 6 baadaye, Mungu alimtuma malaika Gabriel kwenda kwa Bikira Maria na akampatia Neno litakalokuwa

tumaini kwa wanadamu wote. Lilikuwa ni Neno kwamba atamzaa Yesu Kristo. Yohana Mbatizaji alizaliwa katika familia ya Haruni na kimwili Yesu alizaliwa katika familia ya Daudi.

Mungu alitaka kuzitimiza ahadi zote zilizokuwa zimezungumzwa katika Agano la Kale. Kwa hiyo, malaika alikuja kwa Zakaria, wa ukoo wa Haruni, wakati alipokuwa katika zamu ya ukuhani kwa mujibu wa utaratibu. Malaika alimwambia, *“Mkeo Elizabeti atakuzalia mtoto mwanamume, na jina lake utamwita Yohana.”*

Kisha malaika mkuu Gabriel akamtokea Mariamu, bikira toka katika ukoo wa kifalme wa Daudi akasema, *“Tazama, utachukua mimba na kuzaa mtoto mwanamume; na jila lake utamwita YESU. Huyu atakuwa mkuu, ataitwa Mwana wa Aliye juu, na Bwana Mungu atampa kiti cha enzi cha Daudi, baba yake. Ataimiliki nyumba ya Yakobo hata milele, na ufalme wake utakuwa hauna mwisho.”* (Luka 1:31-33). Kisha Mariamu akamwambia Malaika, *“Litakuwaje neno hili, maana sijui mume?”* Kisha malaika akamjibu akamwambia, *“Roho Mtakatifu atakujilia juu yako, na nguvu zake Aliye juu zitakufunika kama kivuli; kwa sababu hiyo hicho kitakachozaliwa kitaitwa kitakatifu, Mwana wa Mungu”* (Luka 1:34-35). Kisha malaika akaendelea kusema, *“Tena, tazama, jamaa yako Elizabeti naye amechukua mimba ya mtoto mwanamume katika uzee wake; na mwezi huu ni wa sita kwake yeye aliyelitwa tasa; kwa kuwa hakuna neno lisilowezezana kwa Mungu.”* Kisha Mariamu akasema, *“Tazama, mimi ni mjakazi wa Bwana; na iwe kwangu kama ulivyosema.”* Kisha malaika akaondoka kwake (Luka 1:36-38).

Kisha Mariamu akakiri, *“Tazama, mimi ni mtumishi wa Bwana; na iwe kwangu kama ulivyosema.”* Huu ni msembo ambapo Neno lilitambuliwa vizuri wakati Mariamu

alipolipokea Neno la Mungu. Yesu Kristo alitungwa mimba katika tumbo la Mariam kwa kupitia imani sawasawa na Neno la malaika Gabrieli alilokuwa amelitamka na sawasawa na Neno la unabii katika Agano la Kale. Kwa hiyo, ni lazima tufahamu kuwa Yesu na Yohana Mbatizaji walikuwa wakiandaliwa kwa mujibu wa majaliwa ya Mungu ili kuwaokoa wanadamu wote toka katika dhambi hata kabla hawajazaliwa.

Yohana Mbatizaji alifundisha kuwa yeye binafsi alizihamishia dhambi za ulimwengu kwenda kwa Yesu kwa ajili yetu sisi sote ambao tutamwamini Yesu kuwa ni Mwokozi katika siku za baadaye. Injili ya Mathayo 3:15 inasema, *“Yesu akajibu akamwambia, ‘Kubali hivi sasa; kwa kuwa ndivyo itupasavyo kuitimiza haki yote. Basi akamkubali.’”* Hii ina maanisha kuwa Yesu aliupokea ubatizo kupitia Yohana Mbatizaji. Kitendo cha Yesu kuupokea ubatizo toka kwa Yohana Mbatizaji kilikuwa ni kwa ajili ya kuitimiza kazi ya haki ya Mungu ambayo itazitoweshea mbali dhambi zetu zote. Sisi ni watu ambao tulipokea ondoleo la dhambi toka kwa Mungu, na ni Yohana Mbatizaji ndiye aliyeifanya kazi ya kuzihamishia dhambi za ulimwengu kikamilifu kwenda kwa Yesu Kristo.

Ni nani aliezihamishia dhambi za wenye dhambi kwenda kwa Yesu? Yohana Mbatizaji alizihamishia dhambi kwenda kwa Yesu. Yesu ambaye ndiye mwenye kuitimiza haki yote aliitimiza haki yote kwa kuupokea ubatizo toka kwa Yohana Mbatizaji. Yohana Mbatizaji alifanya kazi ya kuzihamishia dhambi za ulimwengu mzima mara moja kwa kumbatiza Yesu. Yohana Mbatizaji alizihamishia dhambi zetu zote kwenda kwa Yesu kwa kupitia ubatizo. Yesu alizipokea dhambi za wandamu mara moja kwa kupitia ubatizo alioupokea toka kwa Yohana Mbatizaji. Huu ni Ukweli wa injili ya maji na Roho

inayotupatia ondoleo la dhambi.

Yesu amezitoweshea mbali dhambi zote za wanadamu. Sasa, ameitimizaje kazi hii? Yesu alikuwa ni Mwanakondoo wa Mungu wa kuteketezwa aliyekwenda Msalabani akiwa amezichukua dhambi zote za wanadamu mara moja kwa kupitia ubatizo wake aliokuwa ameupokea toka kwa Yohana Mbatizaji akiwa kama Mwanakondoo wa Mungu na kisha akafufuka toka mauti. Hivyo, wale wanaoamini katika haki ya Yesu wanaikiri imani ya jinsi hiyo mbele za Mungu. Watu wa jinsi hiyo wanasema kuwa wameokolewa toka katika dhambi zote za ulimwengu kwa kuamini katika mioyo yao juu ya Ukweli wa ondoleo la dhambi ambao Yohana Mbatizaji na Yesu wameutimiza. Jua la haki limejidhirisha kwetu toka juu kwa kupitia kazi hii, nasi tumeweza kukaa katika nuru, ambayo ni haki ya Mungu. Tumepokea ondoleo toka katika dhambi kwa kuamini na kuufahamu upendo wa Mungu ambao umeziondolea mbali dhambi za ulimwengu kwa kupitia ubatizo ambao Yohana Mbatizaji alimpatia Yesu. Kwa hiyo, wewe na mimi tunaoamini katika ukweli huu tumefanyika kuwa watu tusio na dhambi kwa namna yoyote ile.

Usimdharau Yohana Mbatizaji na Huduma Yake

Hata miongoni mwa wengi wanaodai kumwamini Yesu kuwa ni Mwokozi, kuna wachache sana walio na ufahamu sahihi wa Yohana Mbatizaji na huduma yake. Watu wanamfahamu Yohana Mbatizaji kuwa ni mtu ambaye si wa muhimu sana. Lakini Injili ya Luka inasema kuwa Yohana Mbatizaji ataitwa nabii mkuu. Yohana Mbatizaji ni mtu mkuu kuliko Musa au Ibrahimu. Bwana mwenyewe alisema, “*Amin, nawaambieni, hajaondokea mtu katika wazao wa wanawake*

aliye mkuu kuliko Yohana Mbatizaji,” (Mathayo 11:11), pia alisema, “Na ikiwa mnataka kukubali, yeye ndiye Eliya atakayekuja” (Mathayo 11:14).

Moja ya huduma za Yohana Mbatizaji mbele ya uwepo wa Mungu ilikuwa ni kuwafanya Waisraeli wageuke toka katika kuitumikia miungu ya Wamataifa na kisha kumrudia Mungu. Katika hili, aliufanya ubatizo wa toba kwa watu. Kisha akaufanya ubatizo ambao ulizihamishia dhambi za ulimwengu kwenda kwa Yesu. Hivyo, ni lazima tuufahamu ukweli huu. Yohana Mbatizaji alikuja kuufanya ubatizo ambao uliitimiza haki ya Mungu wakati alipokuwa akiwabatiza watu katika Mto Yordani.

Hebu tuliangalie Neno toka katika Injili ya Mathayo sura ya 3. Neno linsema, *“Wakati huo Yesu akaja kutoka Galilaya mpaka Yordani kwa Yohana ili abatizwe. Lakini Yohana alitaka kumzuia, akisema, Mimi nahitaji kubatizwa na wewe, nawe waja kwangu? Yesu akajibu akamwambia, Kubali hivi sasa; kwa kuwa ndivyo itupasavyo kuitimiza haki yote. Basi akamkubali. Naye Yesu alipokwisha kubatizwa mara akapanda kutoka majini; na tazama, mbingu zikamfunukia, akamwona Roho wa Mungu akishuka kama hua, akija juu yake; na tazama, sauti kutoka mbinguni ikisema, Huyu ni Mwanangu, mpendwa wangu, ninayependezwa naye.” (Mathayo 3:13-17).*

Hili ni tukio ambapo Yohana Mbatizaji alipokuwa akimbatiza Yesu Kristo. Lakini kabla ya tukio hili, Yohana Mbatizaji alikuwa akihubiri katika nyika ili watu watubu. Aliwahubiria watu wote akiwaambia “Tubuni! Enyi wazao wa nyoka!” Yeye hakujali hali zao kijamii. Yeye alihubiria watu watubu bila kujali hali zao za kijamii kwa sababu alikuwa ni mtumishi wa Mungu. Na hii ndiyo sababu aliweza kuwahubiria akisema, “Tubuni! Enyi wazao wa nyoka! Kama msipogeuka na kutubu mtaangukia katika moto wa kuzimu.”

Watu walimsikia Yohana Mbatizaji akihubiri na kuwakemea kwa ajili ya dhambi zao, na wakazitambua dhambi katika mioyo yao na wakaaza kuigeuza mioyo yao na kumrudia Mungu. Kisha wakamrudia Mungu hali wakitubu na kusema, “Mungu nimefanya dhambi hizi na zile.” Walijuta kuitumikia miungu ya Wamataifa, na wakamwomba Mungu msamaha na kisha wakapokea ubatizo toka kwa Yohana Mbatizaji. Yohana Mbatizaji alihubiri, “Ni lazima mpokee usafisho wa dhambi na kumrudia Mungu,” kisha akawafanyia ubatizo wa toba. Yohana aliufanya ubatizo wa toba ambao uliwafanya watu wamrudie Mungu.

Ni nani aliyemwendea Yohana katika Mto wa Yordani wakati ule? Yesu Mwanakondoo wa Mungu alimjia Yohana. Yesu Kristo ambaye ni Mungu wa kweli alimjia Yohana Mbatizaji akiwa kama Mwanakondoo wa Mungu atazichukua dhambi zote za ulimwengu katika mwili wake. Hatimaye, Yesu alitaka kuupokea ubatizo toka kwa Yohana Mbatizaji.

Maandiko yanasema, “*Wakati huo Yesu akaja kutoka Galilaya mpaka Yordani kwa Yohana ili abatizwe.*” (Mathayo 3:13), lakini Yohana alitaka kumzuia. Maandiko yanasema, “*Lakini Yohana alitaka kumzuia, akisema, ‘Mimi nahitaji kubatizwa na wewe, nawe waja kwangu?’*” (Mathayo 3:14). Kisha Yesu akamwamuru akisema, “*Kubali hivi sasa, kwa kuwa ndivyo itupasavyo kuitimiza haki yote.*” Kisha akambatiza Yesu (Mathayo 3:15). Hatimaye Yesu akaupokea ubatizo toka kwa Yohana Mbatizaji.

Yesu alimwambia Yohana Mbatizaji ili ambatize kisha akaupokea ubatizo. Hii ina maanisha nini? Ilikuwa ni kuzihamisha dhambi zetu zote. Yohana alikuwa akizihamisha dhambi za mwanadamu na Yesu alikuwa akizipokea dhambi hizo. Ilikuwa ni kazi ya kuitimiza haki ya Mungu.

Sasa, Yesu aliwezaje kuitimiza kazi ya kuzitoweshea

mbali dhambi zetu zote mara moja? Yohana Mbatizaji alimbatiza Yesu na Yesu akaupokea ubatizo toka kwa Yohana Mbatizaji ili kuzipokea dhambi zote za ulimwengu mara moja. Yohana Mbatizaji na Yesu walitaka kuzisafisha dhambi za ulimwengu kwa kuzipitisha kwenda kwa Yesu. Yohana Mbatizaji alizipeleka dhambi zote kwa Yesu ikiwa ni kazi ya kuzipeleka kwa Yesu kisha Yesu akaupokea ubatizo toka kwa Yohana Mbatizaji. Bwana alimwamuru Yohana Mbatizaji kukubali ili kuitimiza kazi hii.

Yesu alisema, *“Kubali hivi sasa, kwa kuwa ndivyo itupasavyo kuitimiza haki yote”* (Mathayo 3:15). Maandiko yanasema kuwa Yesu alikwenda kwa Yohana Mbatizaji na akataka kuupokea ubatizo. *“Ndivyo itupasavyo”* ina manaisha kuwa ilikuwa ni sahihi kuitimiza haki yote ya Mungu kwa Yesu kuupokea ubatizo toka kwa Yohana. Yesu alisema kuwa Yeye aliyekuja kama Mwanakondoo wa sadaka ya kuteketezwa ataitimiza haki yote ya Mungu kikamilifu kwa kuzichukua dhambi za wanadamu wote mara moja kwa kuupokea ubatizo toka kwa Yohana Mbatizaji, ambaye ni mwakilishi wa wanadamu. Hivyo sisi sote inatupasa kuufahamu ukweli huu.

Ikiwa tunataka kupokea ondoleo la dhambi kwa kumwamini Yesu kuwa n Mwokozi, basi ni lazima kwanza tuufahamu na kuuamini ukweli kuwa Yohana Mbatizaji alizihamishia dhambi zetu zote kwenda kwa Yesu na kwamba Yesu alizichukua dhambi zetu katika mwili wake mara moja na kwa wote. Imeandikwa, *“Kwa kuwa ndivyo itupasavyo kuitimiza haki yote.”* Yesu amezichukua dhambi zote za wanadamu kwa kupitia Yohana Mbatizaji. Yesu alikuwa akisema kuwa kazi ya kuzichukua dhambi zetu zote mara moja kwa kupitia kazi hii ilikuwa ni sahihi. Yohana Mbatizaji alimbatiza Yesu ili kuzihamishia dhambi za ulimwengu

kwenda kwa Yesu kisha Yesu akazibeba dhambi zetu zote. Kwa hiyo, sisi tunaouamini Ukweli huu tunapokea ondoleo la dhambi kwa imani. Maana ya maneno “ndivyo itupasavyo kuitimiza haki yote” (Mathayo 3:15) imetimizwa. Haki yote ya Mungu kwa wanadamu inayozungumzwa hapa ni kazi ya Yesu ya kuzitoweshea mbali dhambi zetu zote amra moja kwa kuupokea ubatizo toka kwa Yohana Mbatizaji na kwa kuimwaga damu yake. Kitendo cha Yesu cha kuupokea ubatizo ni kazi ya kuitimiza haki ya Mungu.

Kwa asili wewe na mimi tusingeliweza kufanya lolote zaidi ya kwenda kuzimu ikiwa ni mshahara wa dhambi zetu. Kwa asili tusingeliweza kujisaidia zaidi ya kuharibiwa kwa sababu ya dhambi zetu. Lakini Yesu na Yohana Mbatizaji walifanya kazi kwa pamoja yaani kuutoa na kuupokea ubatizo ili kuitimiza kazi ya haki ya Mungu. Yesu alizichukua dhambi zetu zote katika mwili wake mara moja kwa kupitia ubatizo. Yesu alisema, “*Kwa kuwa ndivyo itupasavyo kuitimiza haki yote.*” “Ndivyo itupasavyo” maana yake ni kuwa wenye dhambi wote waliweza kuupokea wokovu toka katika dhambi kwa imani kwa kupitia mbinguni kama ile ya Yohana Mbatizaji ya kumbatiza Yesu na Yesu kuupokea ubatizo. Kifungu kinachosema, “kwa kuwa ndivyo itupasavyo kuitimiza haki yote” kina maanisha kuwa ubatizo wa Yesu aliupokea toka kwa Yohana Mbatizaji ni wa muhimu sana kwa wokovu wetu. Kitendo cha Yesu cha kuupokea ubatizo toka kwa Yohana Mbatizaji kinatueleza kuwa haki ya Mungu haiwezi kufanya pasipo njia hii. Yesu alikuwa akisema kuwa Yeye na Yohana Mbatizaji walipaswa kuifanya kazi ya kuziondolea mbali dhambi za watu wote, kwa yeye Yesu kuzipokea dhambi kwa kubatizwa, na kwa Yohana Mbatizaji kuufanya ubatizo wa kuzihamishia dhambi za ulimwengu kwenda kwa Yesu. Bwana alikuwa akisema kuwa atazichukua dhambi zote za wanadamu

kupitia Yohana Mbatizaji na kisha atafanyika kuwa sadaka ya kuteketezwa kwa ajili ya dhambi hizo.

Mwanakondoo wa Mungu na Yohana Mbatizaji waliifanya kazi ya kuzihamishia na kuzichukua dhambi zetu ili kuitimiza haki ya Mungu. Na hii ndio maana ya Neno lisemalo, “*Kwa kuwa ndivyo itupasavyo kuitimiza haki yote.*” Yesu alikuja hapa ulimwenguni na akaupokea ubatizo toka kwa Yohana Mbatizaji ili kufanyika kuwa Mwanakondoo ambaye alizichukua dhambi zetu zote. Yesu aliitimiza haki yote ya Mungu ambayo ilizitoweshea mbali dhambi zote za wanadamu mara moja kwa kuja hapa duniani kama sadaka ya kuteketezwa ya milele ya ukombozi na kwa kuupokea ubatizo toka kwa Yohana Mbatizaji. Ilikuwa ni kama vile dhambi inavyohamishiwa kwenda kwa mwanasadaka wa kuteketezwa wakati mikono inapowekwa juu ya mwanasadaka wa kuteketezwa katika Agano la Kale, kama vile Kuhani Mkuu alivyokuwa akizihamishia dhambi zote za mwaka mzima za Waisraeli kwenda kwa mwanakondoo wa sadaka ya kuteketezwa kwa kupitia utaratibu wa kuwekewa mikono. Bwana alizitoweshea mbali dhambi zetu zote mara moja katika ule mwaka wa 33 katika maisha yake. Yesu alizitoweshea mbali dhambi za watu wote ulimwenguni wanaoamini katika haki ya Mungu. Je, unaamini hivi?

Maandiko yanasema, “*Yesu akajibu akamwambia, Kubali hivi sasa; kwa kuwa ndivyo itupasavyo kuitimiza haki yote. Basi akamkubali. Naye Yesu alipokwisha kubatizwa mara akapanda kutoka majini; na tazama, mbingu zikamfunukia, akamwona Roho wa Mungu akishuka kama hua, akija juu yake; na tazama, sauti kutoka mbinguni ikisema, Huyu ni Mwanangu, mpendwa wangu, ninayependezwa naye.*” (Mathayo 3:15-17). Yesu aliupokea ubatizo toka kwa Yohana Mbatizaji. Hii ni kwa ajili ya usafisho wa dhambi zetu. Kitendo

cha Yesu kuupokea ubatizo toka kwa Yohana ni usafisho wa dhambi za wanadamu.

Biblia Inasema kuwa Yohana Mbatizaji Ataitwa Nabii wa Aliye Juu

Kifungu cha leo cha Maandiko kinasema, *“Nawe, mtoto, utaitwa nabii wake aliye juu” (Luka 1:76)*. Na baada ya Yohana Mbatizaji kuzihamishia dhambi za wanadamu kwenda kwa Yesu kwa kupitia ubatizo, Yohana alisema, *“Tazama! Mwanakondoo wa Mungu aichukuaye dhambi ya ulimwengu!” (Yohana 1:29)*.

Yohana Mbatizaji alikuwa ni nabii mkuu katika ulimwengu. Na alikuwa ni mwakilishi wa wanadamu. Alikuwa ni mkuu kati ya wale waliozaliwa na wanawake. Alikuwa ni mtu aliyelitimiza jukumu la Kuhani Mkuu aliyezihamishia dhambi zote za Waisraeli kwenda kwa Yesu. Yohana Mbatizaji aliifanya kazi hii kwa ajili yetu na kwa ajili ya haki ya Mungu. Na Yesu alifanya kazi ya kuupokea ubatizo toka kwa Yohana na kuzichukua dhambi za ulimwengu ili kukuokoa wewe na mimi toka katika dhambi za ulimwengu.

Andiko linasema kuwa Yesu aliupokea ubatizo toka kwa Yohana. Kule kusema kuwa Yesu aliupokea ubatizo toka kwa Yohana kuna maanisha kuwa alizichukua dhambi zetu zote mara moja. Inaelezwa kuwa Bwana amekwishazitoweshea mbali dhambi zetu zote. Neno linasema kuwa Bwana alizisafishilia mbali dhambi zetu, na kwa sababu hiyo alizitoweshea mbali dhambi zetu zote. Ikiwa tunauamini ukweli huu, je wewe na mimi tuna dhambi? Hapana, hatuna dhambi. Kule kusema kuwa Yesu aliupokea ubatizo toka kwa Yohana ina maanisha kuwa alizibeba dhambi zetu zote mara

moja. Na kule kusema kuwa Yesu alikufa Msalabani akiwa na dhambi za ulimwengu ni kumaanisha kuwa Yesu aliupokea ubatizo toka kwa Yohana na akipokea adhabu ya dhambi kama sadaka ya kuteketezwa kwa wanadamu wote ili kukuokoa wewe na mimi toka katika dhambi za ulimwengu.

Bwana aliupokea ubatizo na akafufuka toka kwa wafu kisha akatujilia tena. Ufufuo wa Yesu una maanisha kuwa ametuokoa kikamilifu wewe na mimi toka katika dhambi na kwamba amewahusha upya wale waliokuwa wamekufa. Kule kusema kuwa Yesu aliupokea ubatizo kuna maanisha kuwa Yesu alizichukua dhambi zetu zote katika mwili wake. Hii ina maanisha kuwa dhambi zetu zote zimehamishiwa kwenda kwa Yesu kwa kupitia ubatizo wa Yohana Mbatizaji.

Wakati Yesu alipotoka katika maji baada ya kuupokea ubatizo toka kwa Yohana Mbatizaji, ghafla sauti ikatoka mbinguni ikisema, *“Huyu ndiye Mwanangu, Mpendwa wangu, ninayependezwa naye.”* Mungu Baba mwenyewe alishuhudia kuwa Yesu, ambaye aliupokea ubatizo toka kwa Yohana Mbatizaji alikuwa ni Mwana wake. Hivyo akasema, *“Huyu ndiye Mwanangu, Mpendwa wangu, ninayependezwa naye.”*

Sasa unafahamu ni kwa nini Yesu aliupokea ubatizo toka kwa Yohana Mbatizaji, au sivyo? Yohana Mbatizaji aliufanya ubatizo kwa Yesu na akazihamishia dhambi zote za ulimwengu kwenda kwa Yesu na Yesu akaupokea ubatizo toka kwa Yohana Mbatizaji na kuzipokea dhambi zote za wanadamu ili kuzitoweshea mbali dhambi zetu zote. Ni kwa nini Yohana Mbatizaji alimbatiza Yesu? Yesu aliupokea ubatizo toka kwa Yohana Mbatizaji ili kutufanya sisi tusio na dhambi kwa kuwa tulikuwa hatuwezi lolote zaidi ya kufa na kwenda kuzimu kwa sababu ya dhambi zetu. Yesu Mwanakondoo wa Mungu aliupokea ubatizo toka kwa Yohana Mbatizaji. Mungu Baba alishuhudia, *“Huyu ndiye Mwanangu, mpendwa wangu,*

ninayependezwa naye.” Mungu alikuwa akisema kuwa Yesu, aliyezichukua dhambi zote za wanadamu kwa kuupokea ubatizo, alikuwa ni Mwanawe, yaani Mwana wa Mungu Baba.

Mungu ni Mungu Baba Mtakatifu, Yesu ni Mwana wa Baba, na wa Roho Mtakatifu. Nafsi hizi tatu ni Mungu mmoja kwetu sisi. Kila Nafsi ina majukumu tofauti, bali zote ni Mungu mmoja.

Yesu alitungwa mimba katika mwili wa Mariamu kwa kupitia Roho Mtakatifu. Hivyo, Yesu ni Mwana wa Mungu. Nafsi iliyomtuma Mwana ni Mungu Baba. Baba, Mwana, na Roho Mtakatifu wote ni wamoja na ni Mungu Mtakatifu kwetu. Kila Nafsi ya Mungu Utatu ina majukumu tofauti, basi nafsi zote tatu ni Mungu mmoja kwetu. Kama vile mtoto anayezaliwa kwa mwanadamu alivyo mwanadamu, vivyo hivyo Mwana wa Mungu Baba kimsingi ni Mungu pia. Mungu ni Roho Mtakatifu. Hatupaswi kumfikiria Mungu kwa namna ya mwili kwa kuwa Yeye ni Roho. Yeye alimzaa Yesu kwa kupitia Neno kama vile alivyouumba ulimwengu mzima kwa kupitia Neno. Yesu aliyeupokea ubatizo toka kwa Yohana Mbatizaji ni Mwana wa Mungu Baba, na Yesu ni Mungu kwetu. Hii ina maanisha kuwa Yesu ni Mwokozi wetu. Yesu alifanyika kuwa Mwokozi wetu kwa namna hii.

Luka 1:78-79 inasema,

*“Kwa njia ya rehema za Mungu wetu,
Ambazo kwa hizo mwangaza utokao juu umetufikia;
Kuwaangaza wakaa katika giza na uvuli wa mauti,
Na kuiongoza miguu yetu kwenye njia ya amani.”*

Yohana Mbatizaji alikuja kwetu na akashuhudia kuwa haki yote ilitimizwa kwa kumbatiza Yesu. Yohana Mbatizaji alishuhudia Yesu aliyekuwa ameupokea ubatizo kwa utaratibu wa kuwekewa mikono. Injili ya Yohana sura ya 1 aya ya 29 inasema, *“Tazama! Mwanakondoo wa Mungu aichukuaye*

dhambi ya ulimwengu!” Yohana anasema kuwa Yesu ni Mwokozi wetu. Aliutimiza unabii, “Ambazo kwa hizo mwangaza utokao juu umetufikia, kuwaangaza wakaao katika giza na uvuli wa mauti,” kwa kushuhudia hivyo, Yesu anakuwa ni yule ambaye amezichukua dhambi zetu zote na kwamba ni Mwokozi anayezichukua dhambi zetu zote na kuteseka akiwa sadaka ya kuteketezwa kwa niaba yetu.

Kwa hiyo, watu wamefanyika kuwa watoto wa Mungu kwa imani kupitia ushuhuda wa Yohana. Tukiwa kama wana wa Adamu, kwa kweli tulipaswa kuangamia. Tulikuwa ni watu wa kuhurumiwa ambao hatukuweza kufanya lolote zaidi ya kufa tukiwa tumeketi katika giza la uvuli wa mauti. Wewe na mimi na wanadamu wote, tulikuwa ni binadamu tuliokuwa tukiishi katika giza na aibu na ambao tulikuwa tukielekea kifo kwa sababu ya dhambi katika mioyo yetu. Lakini Mungu alituhurumia na akatuongoza kwenda katika mwanga wa Ukweli kwa kumtuma Yohana Mbatizaji kuja hapa ulimwenguni ili kumbatiza Yesu, ubatizo ambao ulizihamishia dhambi zote za wanadamu kwenda kwa Yesu. Kwa namna hii, Yesu alitufanya sisi waamini kukaa katika mwanga kwa kuokolewa toka katika dhambi zetu zote kwa yeye kuzichukua dhambi zote za wanadamu. Yesu alizichukua dhambi za wanadamu wote kwa kupitia ubatizo wake na akafanyika kuwa Mwokozi kwa sababu ya kazi ya Yohana Mbatizaji. Mwangaza utokao juu umetuzukia kwa sababu Yohana Mbatizaji aliifanya kazi ya ondoleo la dhambi kwa kuzihamishia dhambi zetu zote kwenda kwa Yesu. Hii ina maanisha kuwa tumeweza kukaa katika haki ya Mungu kwa kuiamini haki ya Mungu. Tumeweza kuupokea wokovu toka katika dhambi kwa kuamini katika haki ya Mungu.

Ni vigumu kufahamu kuwa Yesu alizichukua dhambi zetu zote juu yake mara moja pasipo kulifahamu jukumu la Yohana

Mbatizaji na ubatizo ambao Yesu aliupokea. Hatuwezi kusema lolote kuhusu Yesu aliyekuja kwa injili ya maji na Roho ikiwa hatulifahamu jukumu la Yohana Mbatizaji hata kama tunasema kuwa tunaliamini Neno la Vitabu 66 vya Biblia. Ni lazima tuufahamu na kuuamini ukweli huu kuwa Mungu aliwatuma watumishi wawili wa haki kuja hapa ulimwenguni na kwamba tumepokea ondoleo la dhambi kwa kuwa kazi ya kuzitoweshea mbali dhambi zetu zote ilifanywa na watumishi hawa wawili. Ni lazima tuufahamu ukweli huu kwa wazi na kuuamini kwa sababu Yohana Mbatizaji alizihamishia dhambi zetu zote kwenda kwa Yesu na Yesu alifanya kazi ya kuzioshelea mbali dhambi hizo zote kwa kuupokea ubatizo.

Kwa kweli ni lazima tuwe na mioyo yenye furaha kama wakati tunapoimba ule wimbo wa Krismasi inapokaribia, “Furaha ulimwenguni, Bwana amekuja! Na dunia impokee Mfalme wake.” Bwana alitufanya wewe na mimi kuwa wasio na dhambi kwa kumwandaa Yohana Mbatizaji na kwa yeye kuupokea ubatizo toka kwa Yohana Mbatizaji. Yeye alizichukua dhambi zote za wanadamu na akaipokea adhabu ya dhambi hizo kwa niaba yetu kwa kupigiliwa misumari Msalabani, alifufuka siku ya tatu baada ya kifo chake, na sasa ameketi mkono wa kuume katika kiti cha enzi cha Mungu Baba. Hii ndio sababu tunatoa shukrani nyingi kumpa Bwana utukufu, yeye aliyekuja hap ulimwenguni takribani **miaka 200 iliyopita** kisha akatuokoa sisi tunaoamini katika injili ya maji na Roho toka katika dhambi za ulimwengu.

Kwa kweli napenda sana mpokee ondoleo la dhambi kwa kuamini katika injili ya maji na Roho. Ondoleo la dhambi zetu lipo katika Neno la Mungu, na si katika hisia zetu. Kitendo cha moyo wako kuwa na mchemko si uthibitisho wa wokovu wako. Katika Biblia imeandikwa kuwa hapo mwanzo Mungu aliumba mbingu na nchi, nayo nchi ilikuwa ukiwa na utupu, giza

lilikuwa juu ya uso wa vilindi vya maji, na Roho wa Mungu alitulia juu ya uso wa maji. Ni wapi na kivipi ambapo Roho wa Mungu anafanya kazi? Anafanya kazi katika maji. Anafanya kazi pale tunapoliamini Neno. Mungu hafanyi kazi kamwe ndani ya mtu ambaye halihubiri Neno la Mungu kama lilivyo na kama haliamini Neno la Mungu kama lilivyo. Mtu wa jinsi hiyo hana Roho Mtakatifu ndani yake bila kujalisha ni jinsi gani anadai kuwa amepokea wokovu.

Ninaona Wakristo wengi katika ulimwengu huu ambao hawana Roho Mtakatifu pamoja na kuwa wanadai kuwa wamepokea ondoleo la dhambi kwa namna zao. Ninapowaangalia watu, ninaweza kuwatambua watu walio na Roho Mtakatifu na wale wasio na Roho Mtakatifu. Haijalishi wanaizungumzia imani yao kwa ufahamu kiasi gani, kwa kweli ninafahamu mengi kuwahusu wao, ninaongea nao na kuwasikiliza mara moja. Watu walio na Roho Mtakatifu katika mioy yao wanaweza kusema lolote kwa kutumia Maandiko, lakini wale wasio na Roho Mtakatifu hawawezi kusema lolote hasa pale unapowanyan'ganya daftari. Kwa nini? Ni kwa sababu hawana Roho Mtakatifu ndani ya mioyo yao. Tunaweza kuusema ukweli pale tu tunapokuwa na Mungu ndani yetu. Utapokea wokovu ikiwa tu unaamini katika Neno kwa moyo wako wote. Kisha Roho Mtakatifu anaweka muhuri ndani ya moyo wako. “Sawa! Imani yako ni sawa. Upo sahihi. Wewe ni mwenye haki.” Basi hivyo ndivyo Roho Mtakatifu anavyofanya kazi.

Wapendwa watakatifu, ni lazima ulifahamu vizuri jukumu la Yohana Mbatizaji. Ni lazima ufahamu ni kwa nini Yohana Mbatizaji alizaliwa miezi 6 kabla ya Yesu; pia ni kwa nini Yohana Mbatizaji alimbatiza Yesu; na kwamba ni kwa nini Yohana Mbatizaji alisema kuwa Yesu ni Mwanakondoo wa Mungu anayezichukua dhambi za ulimwengu; na vilevile ni

muhimu ufahamu kwa nini Yesu alisema, *“Kubali hivi sasa, kwa kuwa ndivyo itupasavyo kuitimiza haki yote”*; pia ni muhimu ufahamu ni kwa nini Yesu aliupokea ubatizo. Baada ya hapo unapaswa kuyaamini majibu yote kwa uaminifu.

Roho Mtakatifu anathibitisha ndani ya moyo wako na anasema, *“Sawa! Imani yako ni sahihi”* pale unapoamini kwa majibu wa Neno bila kujalisha hisia zako. Mtu yeyote bila kujalisha kuwa ni Mkorea au mgeni anaweza kupokea ondoleo la dhambi ikiwa anaamini katika injili hii ya Kweli kwa uhakika. Haijalishi ikiwa mtu huyo ana ufahamu mwingi kuhusu Mungu au la. Roho Mtakatifu anakaa ndani ya moyo wake ikiwa tu analihubiri na kuliadini Neno kikamilifu kama lilivyo. Nimeona mambo ya jinsi hiyo mara nyingi.

Inaelezwa kuwa Roho Mtakatifu alishuka toka juu wakati Petro alipokuwa akilihubiri Neno na huu ndio ukweli kwa sababu Neno hili ni Neno la Ukweli. Jinsi unavyoamini ni muhimu sana. Je, unaamini juu jukumu la Yohana Mbatizaji? Je, unamwamini Yesu? Je, unaamini kuwa alitatusa tatizo la dhambi mara moja kwa kuzichukua dhambi zetu zote kwa kuupokea ubatizo? Je, unaamini kuwa Mungu alitufanya tusio na dhambi kwa kupitia Yohana Mbatizaji ambaye alizihamishia dhambi zetu zote kwenda kwa Yesu? Ondoleo la dhambi zetu lilikamilishwa kupitia jukumu la Yohana Mbatizaji na lile la Yesu. Sisi tunaamini na kufahamu hivi.

Kujaribu kupokea ondoleo la dhambi kwa kumwamini Yesu aliyetuokoa toka katika dhambi hali ukiliondoa jukumu la Yohana Mbatizaji ni kuiadini nusu ya injili ya maji na Roho. Imani yetu haipaswi kuwa hivyo. Ni lazima tuwe na imani inayoiadini injili kamilifu ya maji na Roho.

Kwa kuwa unaamini katika injili ya maji na Roho, je, una dhambi? Kwa kweli hauna dhambi. Je, hauna dhambi kwa sababu umefanya jambo jema? Unafanyika kuwa asiye na

dhambi kwa kupitia kazi ya Yohana Mbatizaji na ile ya Yesu na kwa kuziamini kazi hizo. Je, hatufanyi dhambi kila siku? Tuna mapungufu kiasi gani? Je, unafahamu kuwa sisi wenyewe ni wadhaifu?

Bwana alituokoa wakati tulipokuwa hatuwezi kufanya lolote zaidi ya kuwa na dhambi na wakati tulipokuwa hatuwezi kufanya lolote zaidi ya kwenda kuzimu kwa sababu ya dhambi zetu. Hili si jambo la kushukuru? Huu ni wokovu. Kwa kweli ninamshukuru Mungu tena. Tunaweza kukutana pamoja hapa na kufanya ibada ya kuabudu, kulisikia Neno, kuitumikia injili, Kumtumikia Bwana, na kumfuata Bwana mbele za uwepo wa Mungu kwa sababu Bwana alituokoa, kwa sababu alitupatia ondoleo la dhambi zetu zote kwa kuzichukua dhambi zetu zote kwa kupitia Yohana Mbatizaji. Hakuna sababu yoyote ya kumfuata na kuwamini Bwana zaidi ya hii ya wokovu. Hatupati mamlaka makuu katika ulimwengu huu kwa kumwamini na kumfuata Bwana pasipo kuamini katika ubatizo wake. Na imani yetu itakuwa ni bure ikiwa bado tuna dhambi ndani yetu.

Uchumi na mazingira ya asili katika ulimwengu huu yataanguka kwa kiwango kikubwa. Lakini Kanisa la Mungu litaihubiri injili ya maji na Roho kwa uthabiti hata kama ulimwengu huu utapasuka. Ninaamini watu wengi zaidi wataokolewa toka katika dhambi kwa kuamini katika injili ya maji na Roho. Ninatoa shukrani kwa Mungu.

Kifungu cha leo cha Maandiko kinasema, *“Nawe, mtoto utaitwa nabii wake aliye juu, kwa maana utatangulia mbele za uso wa Bwana umtengenezee njia zake; uwajulishe watu wake wokovu katika kusemehewa dhambi zao.”* Mungu alimtuma mtumishi wake Yohana Mbatizaji na akambatiza Yesu na akatufundisha Ukweli wa wokovu utokao katika rehema zake. Bwana aliupokea ubatizo toka kwa Yohana Mbatizaji na

akatundikwa Msalabani na akatupatia ondoleo la dhambi kwa kupitia damu yake ya thamani.

Tunamshukuru Mungu na kumwamini Yeye kwa sababu tunauamini ukweli huu. ✉

MAHUBIRI

5



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Tuufurahie Utukufu wa Mungu Kwa Shukrani

< Yohana 1:1-14 >

“Hapo mwanzo kulikuwako Neno, naye Neno alikuwako kwa Mungu, naye Neno alikuwa Mungu. Huyu mwanzo alikuwako kwa Mungu. Vyote vilifanyika kwa huyo; wala pasipo yeye hakikufanyika cho chote kilichofanyika. Ndani yake ndimo ulimokuwa uzima, nao ule uzima ulikuwa nuru ya watu. Nayo nuru yang’aa gizani, wala giza halikuiweza. Palitokea mtu, ametumwa kutoka kwa Mungu, jina lake Yohana. Huyu alikuja kwa ushuhuda, ili aishuhudie ile nuru, wote wapate kuamini kwa yeye. Huyu hakuwa ile nuru, bali alikuja ili aishuhudie ile nuru. Kulikuwako Nuru halisi, amtiaye nuru kila mtu, akija katika ulimwengu. Alikuwako ulimwenguni, hata kwa yeye ulimwengu ulipata kuwako, wala ulimwengu haukumtambua. Alikuja kwake, wala walio wake hawakumpokea. Bali wote waliompokea aliwapa uwezo wa kufanyika watoto wa Mungu, ndio wale waliaminio jina lake; waliozaliwa , si kwa damu, wala si kwa mapenzi ya mwili, wala si kwa mapenzi ya mtu, bali kwa Mungu. Naye Neno alifanyika mwili, akakaa kwetu; nasi tukauona utukufu wake, utukufu kama wa Mwana pekee atokaye kwa Baba; amejaa neema na kweli.”

Injili ya Yohana, Vitabu vitatu vya 1, 2, na 3 Yohana, na Kitabu cha Ufunuo ni Maandiko yaliyoandikwa na Mtume

Yohana. Kwa kupitia Maandiko haya, basi tunaweza kuona jinsi imani ya Mtume Yohana ilivyokuwa, na pia jinsi imani ya wanafunzi wa Yesu ilivyokuwa. Mtume Yohana aliamini kuwa Yesu alikuwa ni Mungu halisi aliyeumba ulimwengu wote na sisi wanadamu, na kwamba Mungu alikuwa ni Mwokozi wake na Mwokozi wa wanadamu wote. Sisi sote tunapaswa kuwa na aina hii ya imani.

Baadhi ya watu wanaamini kuwa Biblia iliandikwa na watu, na hivyo wanaukana uhalisia na ukweli wake. Lakini watu walioandika Biblia si waandishi wamiliki bali ni waandikaji tu, na kwa sababu hiyo, wao waliliandika Neno la Mungu tu. Ukijumlisha Agano la Kale na Agano Jipya pamoja, utaona kuwa kuna sehemu zipatazo 3,800 zinazosema “Mungu akasema” zilizotumiwa katika Biblia. Katika Biblia nzima inashuhudiwa kuwa waandikishi wa Maandiko hawakuandika uzoefu wao au mawazo yao, bali waliyaandika yale ambayo Mungu alisema na wakaandika yale ambayo Mungu aliwaambia wayaandike. Biblia iliandikwa kwa muda mrefu wa takribani miaka 1,600, yaani kuanzia mwaka 1500 KK, ambayo ni karibu sawa na miaka 3,500 iliyopita, hadi mwaka 100 BK. Takribani waandishi 40 wa Maandiko waliandika Biblia wakiwa sehemu tofauti zikiwemo sehemu za Mlima Sinai, Israeli, Babeli, maeneo mbalimbali ya Asia Ndogo, Roma, visiwa vidogo katika bahari ya Mediterania, nakadhalika. Pia kiwango cha elimu kwa hao waandishi wa Maandiko kinatofautiana pia, yaani kuanzia wanazuoni, manabii, majenerali, wafalme, wakulima, wavuvi, mfizikia, mkusanya kodi, na wengineo. Lakini katika ulimwengu huu, kuna toleo moja tu lililoandikwa na watu wote hawa toka katika uzoefu tofauti kwa kipindi kirefu, na toleo hilo ni Biblia.

Kinachoshangaza zaidi ni kuwa pamoja na kwamba Biblia iliandikwa na watu wengi tofauti na kwa kipindi kirefu hivyo,

ujumbe wake unakubaliana vizuri kumhusu Yesu. Hii inathibitisha kuwa Biblia ni Neno la Mungu ambalo Mungu ametupatia, na kwamba ni Ukweli ulioandikwa na watumishi wake katika Agano la Kale na katika Agano Jipya. Kwa maneno mengine, Biblia si maneno ya watu kwa mujibu wa matakwa yao, bali ni Neno la Mungu lililetwa kwetu kwa mikono ya watu waliovuviwa na Roho Mtakatifu. Hivyo ni muhimu sana kwetu kufahamu vizuri jinsi Biblia ilivyoandikwa, na kisha tuamini kuwa hili Neno la Maandiko ni Neno lililotamkwa na Mungu lilifikishwa kwetu. Imani ya kweli katika Mungu inaanza pale tunapoamini kuwa Maneno yote yaliyoandikwa katika Biblia ni Neno la Mungu.

Yesu Aliumba Mbingu na Nchi

Katika kifungu cha leo cha Maandiko, Mtume Yohana anaongea kwa imani, hali akinukuu Neno la Mungu toka kitabu cha Mwanzo sura ya kwanza. Anaongea juu ya ukweli wa msingi kuhusu Yesu Kristo. *“Huyo mwanzo alikuwako kwa Mungu. Vyote vilifanyika kwa huyo; wala pasipo yeye hakikufanyika cho chote kilichofanyika.”* (Yohana 1:2-3). Tangu mwanzo, yaani wakati ule Mungu Baba alipoamua kuumba ulimwengu, Yesu Kristo Mwanawe alikuwepo tayari kama muumbaji. Kifungu hiki cha maandiko kilichoandikwa na Yohana kinaonyesha bayana kuwa Yesu alikuwa ni Mungu tangu mwanzo. Na hii ndio maana Yohana akasema hakuna chochote kilichoweza kufanyika pasipo Yesu. Kwa maneno mengine, wakati Yesu Kristo akiwa ni Mwokozi wetu, na kwa kuwa Yeye ni Mungu mwenyewe, basi tufahamu kuwa Yeye ni Muumbaji pia aliyeuumba ulimwengu na kila kitu kilichomo ndani yake. Wakati ulimwengu ulipoumbwa, basi kila

kilichojitokea kilitokea sawasawa na jinsi Muumba, ambaye ni Yesu Kristo alivyokuwa amesema.

Hebu tegeukie Mwanzo 1:1-5. *“Hapo mwanzo Mungu aliziumba mbingu na nchi. Nayo nchi ilikuwa ukiwa, tena utupu, na giza lilikuwa juu ya uso wa vilindi vya maji; Roho ya Mungu ikatulia juu ya uso wa maji. Mungu akasema, Iwe nuru; ikawa nuru. Mungu akaiona nuru, ya kuwa ni njema; Mungu akatenga nuru na giza. Mungu akaiita nuru Mchana, na giza akaliita Usiku. Ikawa jioni ikawa asubuhi, siku moja”* (Mwanzo 1:1-5). Hivi ndivyo Yesu alivyoziumba mbingu na nchi. Ulimwengu haukujitokeza kiasilia kama inavyofikiriwa ikiungwa mkono na nadharia ya mabadiliko, bali ulimwengu uliumbwa kwa Neno lenye nguvu la Yesu Kristo.

Nadharia ya mabadiliko ni dhana ya kufikirika inayoeleza kuwa siku moja seli moja ilijitokeza kiasilia na kisha ikaendelea kuishi na kukua na kubadilika kwa muda mrefu. Lakini inawezekanaje uhai ukajitokeza tu kiasilia kusikofahamika? Ukweli ni kuwa ni Mungu tu ndiye anayeweza kuumba uhai.

Hebu turejee Mwanzo 1:2. Kabla Mungu hajaziumba mbingu na nchi, ulimwengu ulikuwa ni ukiwa na utupu, na kwamba giza lilikuwa juu ya uso wa vilindi vya maji. Na Roho wa Mungu alikuwa akitulia juu ya uso wa maji. “Roho wa Mungu” anayetajwa hapa si mwingine bali ni Roho Mtakatifu. Hii ina maanisha kuwa kwa kuwa kila moyo wa mwenye dhambi ni ukiwa na utupu, basi kwa sababu hiyo hakuna kilichokuwemo ndani yake zaidi ya machafuko, na hivyo Roho Mtakatifu hakuweza kushuka katika moyo wa jinsi hiyo.

Mungu Anaangazia Nuru ya Uhai kwa Ulimwengu Huu Wenye Machafuko

Imeandikwa, “*Mungu akasema, Iwe nuru; ikawa nuru. Mungu akaiona nuru, ya kuwa ni njema*” (Mwanzo 1:3-4). Pamoja na kuwa kifungu hiki kinazungumzia juu ya kufanyika kwa ulimwengu na matokeo yake, kifungu hiki pia kina maanisha kuwa Yesu Kristo atakuja hapa duniani ili kutuokoa wewe na mimi toka katika dhambi za ulimwengu. Hapo mwanzo, Yesu Kristo alitoa nuru ya baraka kwa dunia hii ambayo ilikuwa imegubikwa na ukiwa. Nuru ilitokea mara tu Yesu alipotamka akiamuru nuru iwepo katika ulimwengu huu wenye machafuko.

Nchi yenye ukiwa na utupu vina maanisha kuwa ni ulimwengu huu ambao mimi na wewe tunaishi. Tukiongea kwa mtazamo wa kiroho, maelezo hayo pia yana maanisha ni moyo wako na wangu. Ina maanisha kuwa tangu tulipozaliwa hapa ulimwenguni, mioyo yetu ilikuwa ni utupu, ukiwa, na yenye giza nene. Kwa maneno mengine, sisi sote tulizaliwa tukiwa tu wenye dhambi. Pamoja na kuwa Bwana wetu aliuumba ulimwengu huu mzuri, ukweli ni kuwa moyo wa mwanadamu ulichanganyikiwa na kuwa mtupu kwa sababu ya Shetani. Ulimwengu haukuwa na nyota, na hakukuwa na chochote kile katika sayari hii ya dunia—hakukuwa na mimea, hakukuwa na miti, hakukuwa na matunda, hakuna kilichokuwepo. Ni giza na machafuko tu ndivyo vilivyokuwepo. Hili giza lina maanisha moyo wa kila mmoja ambaye anazaliwa kama mwana wa Adamu mwenye dhambi. Moyo wa mwanadamu na ulimwengu huu vilikuwa vimetawaliwa na machafuko na giza, lakini wakati Mungu aliposema, “*Iwe nuru,*” nuru ya wokovu iliweza kuingia katika moyo wa mwanadamu, na Mungu akaona ya kuwa nuru hii ni njema.

Mungu aliitenganisha nuru na giza, akaiita nuru mchana na giza usiku, kisha ikawa mchana na ikawa usiku siku ya kwanza. Mungu Baba alichukua jumla ya siku sita kuumba ulimwengu huu, na katika kipindi hiki chote, na katika kazi yake yote, Mungu alitenda akiwa na Mwanawe Yesu Kristo. Huyu Yesu Kristo ndiye yule aliyekuja hapa duniani katika umbo la mwanadamu ili kutuokoa wewe na mimi toka katika dhambi za ulimwengu: Yeye alizipokea dhambi zetu katika mwili wake kwa kubatizwa na Yohana Mbatizaji, alibeba adhabu ya dhambi zetu mahala petu, akafufuka tena toka kwa wafu, na kwa sababu hiyo ameiangazia mioyo yetu kwa mwanga wa kweli wa wokovu. Kwa kupitia injili ya maji na Roho, Yesu Kristo ametufanya sisi tunaomwamini kuwa ni watu wa Mungu. Yeye aliumba mbingu na nchi na ametuokoa pia. Yeye ni Mfalme wa Wafalme na Mwokozi wetu. Ulimwengu huu umeweza kuokolewa toka katika dhambi kwa kupitia Yesu Kristo.

Unapaswa Kuwa na Imani Sahihi, Ukitambua Kuwa Yesu Mwenyewe ni Mungu

Wewe na mimi hatupaswi kumwazia Yesu Kristo kuwa ni kiumbe kama tulivyo sisi. Tena hatupaswi kabisa kumlinganisha na wanadamu wenye hekima kama vile Budha, Konfusiasi, Mensiasi, au Sokreti ambao wote waliishi katika ulimwengu huu kwa muda mfupi. Ni muhimu sana kwako kutambua na kuamini kuwa Yesu Kristo ni Mungu halisi aliyeumba ulimwengu na vitu vyote vilivyomo ndani yake. Yaani Yeye ndiye aliyetuumba wewe na mimi, ndiye aliyetufanya tuzaliwe toka katika matumbo ya mama zetu na kukua, yeye anayeyatawala uhai wetu na kifo, yeye ambaye ni

Alfa na Omega, aliyetupatia baraka ya ondoleo la dhambi, na ambaye ameturuhusu kufurahia furaha ya milele Mbinguni—kwa hakika huyo si mwingine bali ni Yesu, ambaye ni Mungu mwenyewe. Imani yetu ni lazima ijengwe katika msingi wa kutambua kuwa Bwana ni Mungu Mwenyewe ambaye anatawala juu ya baraka na laana kwa mwanadamu.

Imani ya Mtume Yohana ilikuwa hivyo kiasi kuwa alitambua na kumwamini Yesu Kristo kikamilifu. Aliamini kuwa Yesu Kristo alikuwa pamoja na Mungu Baba tangu mwanzo, na kwamba ulimwengu huu na vitu vingine vyote viliumbwa kupitia Yesu, na kwamba wenye dhambi wote wanaweza kupokea ondoleo la dhambi kwa kumwamini Yesu aliyekuja kwa maji na Roho. Imani hii ya Mtume Yohana ni ya muhimu sana kwao wewe na kwangu leo hii. Yesu Kristo ni Mungu halisi aliyeumba ulimwengu na vitu vyote, naye ndiye mkuu kwako wewe na kwangu. Unapaswa kuelewa haba kikamilifu ni Yesu Kristo ndiye aliyefanya kila mtu aweze kuzaliwa hapa duniani. Pia ni lazima uamini kuwa, Yesu alizibeba dhambi zako kwa kubatizwa na Yohana Mbatizaji, akafa Msalabani, akafufuka tena toka kwa wafu, na kwa sababu hiyo ameziondolea mbali dhambi zako. Imani ya kweli ni kufahamu kuwa Yesu Kristo ni Muumbaji na ni Mwokozi wa wanadamu. Hivyo ndivyo tunavyopaswa kufahamu kuwa Yesu ni nani, na hivyo ndivyo tunavyopaswa kumwamini Yeye kwa mioyo yetu yote.

Wameshakuwapo watu wengi wenye hekima katika dunia hii. Baadhi yao walikuwa na maono makubwa, na hata baadhi yao walikubali kufa ili kuyatimiza mawazo yao. Lakini watu hawa hawakuwa na uungu, na wala hawakuwa ni waokozi. Haijalishi jinsi ambavyo mafanikio yao yaliweza kuwa, tunachoweza kuona hapo ni kuwa mwishoni walionekana kuwa viumbe wa kawaida mbele za macho ya Mungu, na wala

hawakuleta faida yoyote ya msingi kwa nafsi zetu. Inawezakan kuwa pengine walileta maridhio fulani kwa watu ulimwenguni, lakini ukweli unabaki kuwa hawakuweza kulete baraka ya kudumu ya wokovu. Wala hawakuweza kutupatia utajiri wenye utukufu wa Ufalme wa Mbinguni. Mtume Yohana anaonyesha kwa wazi kuwa Yesu Kristo ni Mwokozi pekee wa wanadamu. Yesu Kristo aliumba ulimwengu, na hakuna kilichoumbwa au kufanyika pasipo Yeye. Biblia imetuonyesha tena kuwa imani inayotupasa zaidi ni kule kufahamu na kuamini kuwa Yesu Kristo ni Mwokozi.

Ni Nani Aliyeumba Ulimwengu Huu na Vitu Vyote?

Ni nani aliyekuumba wewe na mimi, yaani aliyetufanya tutungwe mimba kwa mama zetu na kutufanya tuzaliwe katika ulimwengu huu, na anayetukuza na kutawala maisha yetu yajayo? Ni nani aliyetupatia baraka ya wokovu na anayetupangia maisha yetu ya baadaye? Kwa hakika huyo ni Yesu. Ni Yesu Kristo ambaye ni Mwokozi wa kweli wa wanadamu. Jina Yesu Kristo lina maanisha ni Mwokozi na Mfalme wa wafalme. Yesu Kristo ndiye Bwana na Mfalme wa ulimwengu wote na vyote vilivyomo ndani yake. Yeye ndiye Mungu pekee aliyezetoweshea mbali dhambi zetu zote na makosa yote na ametupatia uzima wa mwili na uzima wa milele wa nafsi zetu. Ni lazima tumtambue Yesu Kristo kuwa ni Mungu wa uumbaji na Mwokozi wa wanadamu, na ni lazima tuamini hivyo.

Mtume Yohana alifahamu na kuamini kwa Yesu Kristo alikuwa ni Mungu mwenyewe, na Mwokozi na Mwana wa Mungu. Je, sisi nasi tunaamini hivyo? Ikiwa ulikuwa hufahamu

kuwa Yesu Kristo ni Muumbaji pekee na Mwokozi, basi tangu sasa na kuendelea unapaswa kuelewa na kuamini hivyo. Sio wewe peke yake, bali kila mtu hapa ulimwenguni ni lazima atambue hivyo. Katika Yohana 1:4 Mtume Yohana alisema, *“Ndani yake ndimo ulimokuwa uzima, nao ule uzima ulikuwa nuru ya watu.”* Wakati Mungu aliposema kuwe na nuru katika ulimwengu wenye giza, hiyo ilijitokeza na hapo ndipo kazi yenye fumbo la uzima ilipoanza katika sayari hii. Ikiwa Jua lingalitoweka na kusiwepo tena mwanga, basi ni hakika kuwa kila kiumbe hai kingekufa baada ya kuishi katika giza kwa muda mfupi. Unaweza kujiuliza, “Je, viumbe walio chini ya bahari hawawezi kuishi bila mwanga?” Hapana, hali si hivyo. Viumbe hao wa baharini hawawezi kuishi ikiwa ule mzunguko mpana wa chakula ujulikanao kama ikosistm ambao kwa sehemu kubwa unategemea nguvu ya jua. Viumbe hivi vyote visingeliweza kutokea ikiwa Yesu Kristo asingalilitamka Neno lake. Pale mahali ambapo giza linakimbia kwa amri ya Neno la Yesu Kristo, basi mahali hapo maisha mapya yanazaliwa, lakini pale ambapo nuru ya Yesu Kristo inaondoka na kisha likabaki giza tu, basi ni hakika kuwa mahali hapo hakuna kitu zaidi ya kifo.

Hivyo, wakati Yesu Kristo, ambaye ni Mungu mwenyewe alipoumba ulimwengu na vitu vyote viishivyo ndani yake, Aliamuru iwepo nuru, na nuru ikatokea mahali penye giza na maisha mapya yakazaliwa kwa baraka hii. Kama ambavyo Yesu Kristo alitoa maisha mapya mahali ambapo kulikuwa na giza kwa kufanya mwanga, basi vivyo hivyo ametupatia injili ya maji na Roho na kwa jinsi hiyo ametuwezesha kupokea wokovu wetu wa kweli. Ni kama hivi, ule mwanga ambao Mungu aliuumba katika kitabu cha Mwanzo una maanisha ni mwanga kwa kwanza alipokuwa akiuweka msingi wa ulimwengu, vivyo hivyo, mwanga huo una maanisha kuwa ni

mwanga wa wokovu ambao tumeupokea kwa kuamini katika injili ya maji na Roho.

Je, Unalifahamu Dhumuni Halisi la Kuandikwa kwa Biblia?

Ingawa Biblia inajumuisha habari za kweli za kihistoria na kweli kadhaa za kisayani, ukweli ni kuwa mambo haya sio ndio wazo kuu la Biblia. Dhumuni halisi la kuandikwa kwa Biblia ni kuzionyesha dhambi za nafsi yako, kuelezea juu ya Neno la injili ya maji na Roho, na kwa sababu hiyo kuleta wokovu wa kweli kwa wale wanaoamini katika Kweli na kisha kuwafanya kuwa watu wa Mungu. Imeandikwa hivi, *“Nayo nuru yang’aa gizani, wala giza halikuiweza.” (Yohana 1:5)*. Yesu alisema Ukweli jana, anasema Ukweli huo leo hii, na ataendelea kuuongelea ukweli huo hapo baadaye. Pamoja na hayo, watu wengi bado hawamfahamu Mungu kikamilifu. Wanaendelea kung’gang’ania lakini na ikiwa, hali wakisema, “Ndiyo, ni wazi kuwa kuna Mungu, lakini...” Wanafahamu kuwa yupo Muumba, lakini hawamwamini, wala hawaukubali Ukweli ambao amewapatia. Wanafanya hivi pamoja na kuwa Yesu Kristo yupo hai, akiuangaza mwanga wa injili ya wokovu na akitawala vitu vyote vya asili. Ni kwa sababu Mungu anaendelea kugawa mahitaji katika hali ya asili na anaamuru vitu vyote ulimwenguni viwepo. Hata hivyo, watu wengi sana hawamfahamu huyu Mungu na wala hawafahamu kikamilifu juu ya uhusiano wao na Mungu ulivyo. Sio tu kwamba hawaupokei Ukweli wa wokovu uliokuja kwa injili ya maji na Roho, bali wao wanajaribu hata kumhukumu Mungu kwa msingi wa mawazo ya kibinadamu huku wakisema kuwa kila kitu kilianzia katika maji.

Hata hivyo, ndugu zangu wapendwa, ukweli wa wokovu ambao Yesu Kristo ameutoa upo wazi kabisa. Vitu vyote vilitoka kwa Yesu Kristo, na vivyo hivyo vitu vyote ni lazima mwishoni virejee kwa Muumba, ili viweze kuokolewa au kuhukumiwa, au kubarikiwa ama kulaaniwa. Lakini watu hawalitambui hili. Hawafahamu jinsi ulivyo mkuu wokovu wa injili ya maji na Roho uliotimizwa na Yesu, na wala hawafahamu jinsi upendo huu ulivyoletwa kwetu kwa wingi kupitia Ukweli wa injili, na jinsi ambavyo Kristo ametuokoa na kutufunika katika pendo lake. Hivyo, ilikuwa ni muhimu sana wawepo baadhi ya walimu ambao wanaweza kufundisha Ukweli wa injili ya maji na Roho kwa wale ambao hawaifahamu. Musa aliisikia sauti ya Mungu na akainuliwa na Mungu, na akaufundisha Ukweli wa Mungu kwa watu wa Israeli. Vivyo hivyo, sisi nasi tunahitaji mwalimu kama huyo.

Miezi sita kabla Yesu hajazaliwa hapa duniani, Mungu Baba alimtuma kwanza mtu aliyeitwa Yohana Mbatizaji ili watu waweze kumtambua Yesu Kristo kupitia Yohana Mbatizaji, na kutambua kile ambacho amekifanya kwa ajili yao. Pamoja na kuwa tulikuwa hatumfahamu Yesu Kristo ambaye ni Mungu mwenyewe, kwa kupitia ushuhuda wa Yohana Mbatizaji, tuliweza kuufahamu Ukweli na kutambua “Aah, hivi ndivyo Yesu Kristo alivyo! Haya ni mambo ambayo Yesu aliyafanya hapa duniani. Yaani, ameufunua upendo wa Mungu na rehema zake, na ameleta wokovu kwa wale wote wanaoamini katika injili ya maji na Roho.”

Yohana Mbatizaji, Mtu Aliyetumwa Toka Kwa Mungu

Katika Yohana 1:6-7 imeandikwa hivi, *“Palitokea mtu,*

ametumwa kutoka kwa Mungu, jina lake Yohana. Huyu alikuja kwa ushuhuda, ili aishuhudie ile nuru, wote wapate kuamini kwa yeye.” Kama unavyofahamu, Mtume Yohana na Yohana Mbatizaji ni watu wawili tofauti wanaotumia jina moja. Kama tunavyoweza kuona kuwa hata mwandishi wa Maandiko ya Marko pia alikuwa akiitwa Yohana (Matendo 12:12), jina Yohana lilikuwa ni jina lililokuwa limezoeleka katika nyakati hizo. Na ni kawaida kwa watu tofauti kutumia jina linalofanana, kama vile Yohana, Robati, Jeni, na kadhalika. Pamoja na kuwa wote walikuwa na jina linalofanana, Biblia inamtaja aliyetangulia kuwa ni Yohana Mbatizaji kwa kuwa ndiye aliyembatiza Yesu. Ukiachilia mbali kule kufanana kwa majina yao, Yohana Mbatizaji si Mtume Yohana, maana huyu wa pili aliitwa na Yesu Kristo ili kuwa mmoja wa wanafunzi wake na akaishuhudia injili ya maji na Roho.

Imeandikwa kuwa, *“Huyu alikuja kwa ushuhuda, ili aishuhudie ile nuru”* (Yohana 1:7). Yohana Mbatizaji alitumwa hapa duniani kabla ya Yesu na akaishuhudia ile Nuru. Hii Nuru ina maanisha nini? Kama ambavyo mwanga wa jua ni wa muhimu sana kwa kila kiumbe hai ili kiweze kukua, Yesu Kristo ndiye Nuru halisi inayotawala kila uhai na kumwoko kila mtu. Jukumu la Yohana Mbatizaji lilikuwa ni kuishuhudia hii Nuru. Ingawa kimsingi Yesu Kristo ni Mungu mwenyewe, alikuja hapa duniani na akazitoweshea mbali dhambi zako zote na zangu tunaishi katika dhambi. Kama ambavyo Yesu Kristo alivyozipokea dhambi zetu zote mara moja na kwa wote kwa kupitia ubatizo wake na akafa Msalabani kwa ajili yetu kwa sababu ya dhambi hizi, bas yeye ni Nuru ambayo imetupatia maisha mapya. Jukumu la Yohana Mbatizaji lilikuwa ni kuishuhudia huduma ya Yesu. Yohana Mbatizaji alishuhudia kazi yote iliyotimizwa na Yesu Kristo, akashuhudia jinsi ambavyo alizichukua katika mwili wake dhambi zote kwa

kupitia ubatizo wake, na jinsi ambavyo alikufa Msalabani akiwa amezibeba dhambi hizi. Vivyo hivyo, hata kama tumemkubali Yesu Kristo kuwa ni Mwokozi wetu, ukweli ni kuwa hatuwezi na imani ya kweli ikiwa tutaliweka kando jukumu la Yohana Mbatizaji.

Hata hivyo, kuna watu wengi ambao wanafikiri kimakosa kuwa Yohana Mbatizaji alishindwa. Wanafikiri hivi, “Sawa, alikuja miezi sita kabla ya Yesu Kristo.” Lakini ukiwa unawaza hivi, basi ni hakika kabisa kuwa huwezi kukutana na Yesu Kristo kwa usahihi, yeye aliyekuja kwa maji na Roho, hivyo ni lazima uusikilie ushuhuda wa ubatizo unaotolewa na Yohana Mbatizaji. Ikiwa ushuhuda huu ni sahihi, basi ni lazima uuamini. Na kwa sababu hiyo, Yohana Mbatizaji ni mtu wa muhimu sana. Mtume Yohana aliyeandika Injili ya Yohana aliweza pia kufahamu kuwa Yesu Kristo alikuwa ni nani huku akiushukuru ushuhuda uliotolewa na Yohana Mbatizaji. Aliweza kutambua kuwa Yesu Kristo ni Masihi ambaye watu wa taifa lake walikuwa wakimngojea, na pia aliweza kufahamu maana ya kweli ya ubatizo wa Yesu na kifo chake Msalabani. Ukichukulia ule ukweli kuwa Mtume Yohana, ambaye alikuwa ni mwanafunzi wa Yesu, alikutana na Yesu kisha akamwamini kwa kupitia ushuhuda wa Yohana Mbatizaji, Je, si dhahiri basi kuwa ushuhuda huu ni wa muhimu sana kwako na kwangu? Ikiwa tutalidharau jukumu la Yohana Mbatizaji, basi ni wazi kuwa itakuwa ni vigumu sana kwako na kwangu kukutana na Bwana aliyekuja kwa injili ya maji na Roho. Pasipo kuamini katika ushuhuda wa ubatizo ambao Yohana Mbatizaji aliutoa, basi ni hakika kuwa wokovu utakuwa ni mgumu kama ilivyo vigumu kwa ngamia kupita katika tundu la sindano na au kwa matajiri kuingia katika Ufalme wa Mungu. Yeyote asiyeamini katika ushuhuda wa Yohana Mbatizaji hawezi kuifahamu vizuri injili ya maji na Roho.

Yohana Mbatizaji Aliishuhudia Nuru

Je, hii Nuru ni nani? Ni Yesu Kristo aliyekuja kwa maji na Roho. Ni nani ambaye ni Nuru ya kweli ya wokovu wa nafsi yako? Ni Yesu Kristo aliyekuja kwa maji ina Roho. Ni huyu Yesu Kristo ambaye Yohana Mbatizaji alimshuhudia. Hata hivyo, watu wa Israeli kwa wakati ule hawakuamini hivyo. Pamoja na kuwa ulimwengu uliumbwa na Yesu, watu wake hawakumpokea wakati alipokuja hapa duniani. Pamoja na kuwa walikuwa wakimngojea Masihi, wakati Mwokozi Yesu alipokuja wao hawakumwamini, kwa kuwa hawakumtambua. Yohana Mbatizaji alikuwa amewashuhudia akisema, “Hakuna zaidi ya Yesu ambaye ni Mwanakondoo wa Mungu. Yeye ni Mwana wa Mungu aliyezichukua dhambi zetu kama vile mwanakondoo wa sadaka ya kuteketezwa wa Agano la Kale, alizitoweshea mbali dhambi zote, na kwa sababu hiyo akatufanya sisi kuwa watu wa Mungu na akautimiza Ufalme wa Mungu. Yeye ni Mwokozi wa wanadamu. Yeye ndiye Masihi ambaye mmekuwa mkimngojea. Yeye ni wa ukoo wa Ibrahimu aliyekuja kupitia kabila ya Yuda, ambaye ni mmoja kati ya watoto kumi na mbili wa Yakobo. Yeye ndiye Mfalme ambaye atakuja kwa wakati wake.”

Lakini pamoja na hayo, watu wa Israeli bado hawakumwamini. Kwa nini hawakumwamini? Hawakumwamini Yesu kwa sababu walimtazama kwa namna ya kimwili kwa kutumia macho yao ya kimwili. Hakukuwa na mtazamo wa nje wa kuvutia kwa Yesu Kristo kama ulivyo mzizi katika ardhi kavu. Yesu alielezewa kama vile mzizi katika ardhi kavu (Isaya 53:2). Sasa, ule mwonekano wake wa nje ulikuwaje? Kwanza, bila shaka alikuwa ni mrefu, na pili, pengine alikuwa ni mwembamba sana. Unapoangalia michoro kadhaa ya Yesu Kristo alipokuwa akihojiwa katika mahakama

ya Pilato, basi unaweza kushangaa jinsi uso wake ulivyokuwa umenyauka. Yaani ni mtu aliyekuwa mwembamba sana kiasi kuwa hakuna anachovutia ukimtaza kwa mtazamo wa nje—hivi ndivyo Yesu alivyokuwa.

Alizaliwa Bethlehemu kama ilivyokuwa imetabiriwa na akakulia Nazareti, Yesu alizichukua katika mwili wake dhambi za wanadamu mara moja na kwa wote kwa kubatizwa na Yohana Mbatizaji akiwa na umri wa miaka 30 ili kuitimiza haki yote ya Mungu kwa mujibu wa Neno.

Hata hivyo, watu wa Israeli hawakumwamini Yesu. Hawakumwamini hata pale Yohana Mbatizaji alipowashuhudia akisema, *“Tazama! Mwanakondoo wa Mungu, aichukuaye dhambi ya ulimwengu!”* (Yohana 1:29) Yesu alikuwa amekuja hapa duniani kibinafsi, hata hivyo watu wa Israeli, ambao ni watu wake mwenyewe, hawakumpokea.

Hata hivyo Mtume Yohana aliendelea kusema, *“Bali wote waliompokea aliwapa uwezo wa kufanyika watoto wa Mungu, ndio wale waliaminio jina lake; waliozaliwa, si kwa damu, wala si kwa mapenzi ya mwili, wala si kwa mapenzi ya mtu, bali kwa Mungu.”* (Yohana 1:12-13). Kifungu hiki ni moja kati ya vifungu ambavyo Wakristo wanapenda kuvikariri. *“Bali wote waliompokea aliwapa uwezo wa kufanyika watoto wa Mungu”* (Yohana 1:12). Yohana Mbatizaji alishuhudia kuwa Yesu Kristo, ambaye ni Nuru, alikuja hapa duniani, akazibeba dhambi zetu zote mara moja na kwa wote kwa kubatizwa, akazibeba dhambi zako zote za kidunia na za kwangu hadi Msalabani, alisulubiwa, akaimwaga damu yake, akafufuka tena toka kwa wafu, na kwa sababu hiyo ametuokoa toka katika dhambi zote za ulimwengu. Mtume Yohana pia alisema kuwa wale wanaompokea Yesu Kristo aliyekuja kwa injili ya maji na Roho katika mioyo ya, basi Mungu amewapa haki na uwezo wa kufanyika kuwa wana wa Mungu. Kwa maneno mengine,

Mungu Baba ametoa uwezo huo kwa wale wanaoamini katika Yesu Kristo aliyekuja kwa injili ya maji na Roho.

Ni lazima tuamini kuwa Bwana si Mwokozi tu wa taifa la Israeli, bali Yeye ni Mwokozi wa wanadamu wote. Yohana Mbatizaji aliushuhudia ubatizo wa Yesu Kristo, damu yake Msalabani, kifo chake, na kufufuka kwake. Hivyo basi, kwa imani, kila mtu katika ulimwengu huu ni lazima aamini juu ya mambo hayo katika moyo wake. Haki na uwezo wa kufanyika wana wa Mungu imetolewa kwa wale wote wanaoamini katika Yesu Kristo, aliyesulubiwa akiwa amejitwika dhambi za ulimwengu ambazo alizibeba kupitia ubatizo wake. Hivyo ni lazima tuikubali hii Nuru ya kweli ya Wokovu.

Yesu Kristo alizipokea dhambi zako na zangu kwa kubatizwa na Yohana Mbatizaji. Ubatizo wa Yesu unaoelezwa katika Mathayo 3:13-17 ndio ule uliozipeleka dhambi zako kwenda kwa Yesu Kristo, na kisha akazibeba dhambi hizo hadi Msalabani. Ni lazima utambue na kuamini kuwa Yesu alibatizwa katika Mto Yordani kabla ya kusulubiwa ili aweze kuzichukua dhambi zako. Ni baada ya Yesu kujitwika dhambi za ulimwengu kwa kubatizwa ndipo alipoweza kuimwaga damu yake ya thamani Msalabani na akafufuka tena toka kwa wafu, na kwa sababu hiyo aliibeba adhabu ya dhambi zako zote kwa niaba yako. Hivyo, unaweza kuufikia wokovu wako pale tu utakapoamini katika injili ya maji na Roho, na kwamba Kristo amekuokoa kwa namna hiyo. Ni lazima umpokee Yesu Kristo, ambaye ni Nuru ya Wokovu katika moyo wako hali ukiwa na ufahamu sahihi wa injili ya maji na Roho. Ni lazima umpokee Yeye katika moyo wako. Ni lazima ukumbuke kuwa Mungu ametoa haki na uwezo wa kufanyika wana wa Mungu kwa wale ambao wanaamini katika injili ya maji na Roho.

Je, Umempokea Yesu Kristo Kama Mwokozi Wako?

Je, unaamini kwa moyo wako wote kuwa Yesu ni Mfalme wa wafalme na Mwokozi wako? Na kwamba yeye ni Mfalme wetu na Nabii, na kwamba ndiye Kuhani Mkuu wa Ufalme wa Mbinguni. Bwana alikuja hapa duniani akafanyika mwili wa mwanadamu, alizibeba dhambi za wanadamu kwa kupitia mwili wake mwenyewe na wala si kwa mnyama wa sadaka ya kuteketezwa, akafa Msalabani, akafufuka tena toka kwa wafu, na kwa sababu hiyo amefanyika kuwa Mwokozi wetu wa kweli. Yeye amefanyika kuwa Mwokozi wa wote wanaoamini katika injili ya maji na Roho. Bwana ametoa haki na uwezo wa kufanyika wana wa Mungu kwa wale wote wanaoamini katika injili ya maji na Roho. Mimi ninaamini katika Ukweli huu. Je, wewe pia unaamini katika injili ya maji na Roho? Je, umeipokea injili ya maji na Roho katika moyo wako?

Je, wale wanaoipokea injili ya maji na Roho kwa mioyo yao yote ni akina nani? Watu wanaoipokea injili hii katika mioyo yao ni wale wanaokiri moja kwa moja kuwa mawazo yao ni mabaya na ni wale wanaamini kuwa Neno la Yesu Kristo halina makosa. Ni lazima tuamini kuwa Yesu Kristo ametuokoa kwa kupitia injili ya maji na Roho kwa kuja hapa duniani; na kwamba Yeye ni Mungu mwenyewe na Bwana wa uzima aliyeumba ulimwengu na vitu vyote vilivyomo ndani yake; na kwamba alitumba katika matumbo ya mama zetu na akatufanya tuzaliwe hapa duniani, na kwamba ametukuomboa toka katika kifo kwa kuzibeba dhambi zetu kwa kupitia ubatizo alioupokea toka kwa Yohana Mbatizaji na kwa kufa Msalabani. Ikiwa mtu hakubaliani na ukweli huu, au ikiwa hashukuru kwa moyo wake wote, basi ni hakika kuwa mtu huyo hauamini Ukweli huu. Watu wa jinsi hiyo ni wale wanaosikiliza kwa

masikio yao na kuona kwa macho yao, lakini kamwe si mioyo yao.

Ikiwa bado hauwezi kuamini katika injili ya maji na Roho hata pale inapoonekana kuwa wazi, basi ni dhahiri kuwa una tatizo kubwa. Watu wa jinsi hiyo hawawezi kuupata usafisho wa dhambi toka kwa Mungu, na kwa sababu hiyo watalaaniwa. Je, kuna mtu miongoni mweni anayefikiri kuwa kulaaniwa na Mungu si jambo kubwa? Katika lugha ya Kiingereza, moja kiapo kibaya ni kule kusema “haki ya Mungu na kisha ukaapiza.” Ni tumaini gani ambalo mtu anaweza kuwa nalo ikiwa atalaaniwa na Mungu? Ni hakika kuwa mtu huyo hana tumaini. Mtu aliyelaaniwa na Mungu ni mtu mwenye taabu na aibu na hawezi kuishi tena hapa ulimwenguni. Kila mtu anahitaji kubarikiwa na Mungu ili aweze kuishi. Wakati fulani unaweza kuchukiwa na wengine, lakini ukweli ni kuwa huwezi kwenda kuzimu kwa sababu hiyo. Hata hivyo, ikiwa umelaaniwa na Mungu, basi ni hakika kuwa utakuwa ni mtu mwenye taabu na aibu na kwamba maisha yako katika ulimwengu huu yatakuwa hayabebeki.

Ikiwa unachukiwa na watu kwa sababu ya Mungu, basi fahamu kuwa chuki hiyo itakurudia wewe ikiwa ni baraka, lakini ikiwa unasifikwa na watu na kuchukiwa na Mungu, basi ni hakika kuwa unaelekea katika maangamizi. Je, unataka kulaaniwa na kupoteza hata kila kidogo ulichonacho sasa? Ikiwa haupendi hivyo, basi ni lazima uamini katika injili iliyonenwa, injili ya Neno la maji na Roho. Ni lazima uamini kwa moyo wako wote kuwa Yesu Kristo ambaye ni Nuru anakupenda, na kwamba amekuoka toka katika dhambi zako zote. Unaweza kubarikiwa ikiwa unalipokea na kuliadini Neno hili la Kweli, kwamba Yesu Kristo aliyeumba ulimwengu na vitu vyote vilivyomo ndani yake, na ambaye ni Bwana wako, ni Masihi ambaye amekuoka.

Biblia inasema, *“Bali wote waliompokea aliwapa uwezo wa kufanyika watoto wa Mungu, ndio wale waliaminio jina lake” (Yohana 1:12)*. Vipi kuhusu wewe? Je, umepokea kweli uwezo wa kufanyika mwana wa Mungu kwa kupitia injili ya maji na Roho? Mungu atakupatia uwezo huu mara tu utakapoamini katika Neno la Injili ya maji na Roho kwa moyo wako. Yeyote anayeamini katika wokovu wa Yesu Kristo, nguvu zake, na upendo wake basi mtu huyo anafanywa kwa mwana wa Mungu. Mtu anaweza kufanyika mwana wa Mungu kwa nguvu ya injili ya maji na Roho. Ikiwa mtu amefanyika kuwa mwana wa Mungu kwa imani, basi mtu huyo ana mamlaka ya Mungu. Hata katika ulimwengu wa kidunia, wana wa wenye nguvu huwa wanainuliwa ili waweze kupata faida kadhaa. Hivyo, kwa kuzingatia ukweli kuwa Mungu ni Baba yetu, je, kutakuwa na uwezo au haki yoyote inayozidi furaha yetu? Kwa kweli hapana! Hivyo ni muhimu sana kwako kumpokea Yesu.

Je, umempokea nani? Je, ni nani uliyempokea kweli kwa furaha? Ikiwa mgeni atakutembelea, je, utampokea mtu huyo kwa shukrani? Hapana, hutaweza. Lakini ikiwa mmoja wa jamaa zako akikutembelea, je, hautampokea kwa mikono miwili? Ni hakika kuwa utampokea. Yesu amezitoweshea mbali dhambi zako zote kwa injili ya maji na Roho na amekufanya kuwa mwana wa Mungu ili uweze kupokea baraka zote za kimbangu na kidunia. Je, huwezi sasa kumpokea huyu Yesu? Je, kuna sababu yoyote ya wewe kusita kumpokea Yesu Kristo katika moyo wako ilhali Yeye ni Mungu mwenyewe anayekupenda? Ninawasihi na kuwaamuru ninyi nyote kumpokea Yesu Kristo katika furaha kupitia injili ya maji na Roho kwa kuamini injili hii.

Ongoza Maisha Yako Pamoja na Yesu Kristo

Wakati baadhi ya watu katika ulimwengu huu wanamfahamu Yesu kiusahihi na kumpokea kwa shukrani kupitia injili ya maji na Roho, kuna watu wengi pia ambao hawana mapenzi na Ukweli huu na kwa sababu hiyo hawamkubali Yesu. Hapa Korea kuna mithali inayosema, “Chumvi iliyo katika meza ya kupikia jikoni itaonekana kuwa na radha pale tu inapokuwa imetumika katika kupikia.” Vivyo hivyo, unapolisikia Neno la Mungu likisema kuwa Yesu alizitoweshea mbali dhambi zetu zote kwa injili ya maji na Roho na akatuwezesha kufanyika wana wa Mungu, basi ni lazima uliweke Neno hili katika moyo wako na kuliadini. Yesu Kristo amekupatia baraka zote za duniani na za Mbinguni, lakini utaweza kuziteka baraka hizi pale utakapomtambua kuwa ni Mwokozi wako na kumpokea katika moyo wako. Kama hautampokea katika moyo wako, basi ni hakika kuwa huwezi kuzipokea baraka hizi.

Kwa kutumia kielelezo, hebu tufikirie kuwa mtu fulani anailinda ngome yake yeye mwenyewe. Wakati wavamizi wanapokuja hakutakuwa na njia ya kuwazuia ikiwa wavamizi hao watakuwa na nguvu kuliko yeye hata kama atajaribu kwa kiasi gani. Ni hakika kuwa hatimaye atatupwa nje ya ngome, atapoteza kila kitu, na kisha atakutana na maangamizi binafsi. Vivyo hivyo, hatupaswi kuyaongoza maisha yetu peke yetu. Badala yake, tunapaswa kuyaongoza maisha yetu pamoja na Yesu Kristo. Ili kufanya hivyo ni lazima tumpokee Yeye katika mioyo yetu.

Wale wanaomwamini Yesu Kristo si watu wajinga. Bali, wale wanaomwani Yesu ni watu wenye busara na makini. Hivyo ninawasihi na kuwaamuru ninyi nyote kuamini katika ubatizo wa Yesu Kristo na damu yake Msalabani, muamini

kuwa Yeye ni Mungu mwenyewe na Mwokozi, na kwa sababu hiyo kumkubali kwa mioyo yenu yote. Kumbuka kuwa baraka za Mungu za milele zinawaongojea ikiwa tu mtampokea Kristo katika mioyo yenu. Basi yeyote asiyeamini hivyo ni mjinga.

Dola ya zamani ya Inka inasifika kwa hazina zake za dhahabu na fedha. Dhahabu na fedha zilikuwa ni nyingi mno katika dola hii kiasi kuwa watu wa Ulaya walishangazwa sana walipofika kwa mara ya kwanza katika dola hii. Hata hivyo, pamoja na kujivunia utajiri huo, Wahispania walipoivamia dola hii ya Inka iliweza kuanguka mbele ya askari 200 tu. Kwa kuwa wainka hawakuwa wamekumbana na ustaarabu wa Magharibi, walishangazwa sana na Wahispania, na kwa sababu hiyo waliwakaribisha kwa mikono miwili. Katika safari zao, Wahispania walijionea jinsi dola hii ilivyokuwa imejaa dhahabu, fedha, na vidani vingine vya thamani. Kwa kweli katika hali ya kawaida ya kiasili mioyo yao ilijawa na wivu. Pamoja na kuwa Dola ya Inka ilikuwa na ustaarabu ulioendelea hatimaye iliangukia katika baruti za Wahispania. Haya yalikuwa ni matokeo ya wainka kushindwa kuithamini dhahabu na kuichukua hata kama ilikuwa haina bei. Ikiwa hauifahamu thamani halisi ya dhahabu basi dhahabu itakuwa ni sawa na jiwe lolote lile lisilo na kazi. Hata kama una dhahabu ya kukufanya uweze kuishi maisha yako yote katika fahari, ukweli utabaki kuwa ikiwa hauifahamu thamani yake basi dhahabu hiyo itakuwa haina maana.

Nini kitatokea ikiwa utaidharau dhahabu yako kwa kutotambua thamani yake? Ni hakika kuwa utaishia kuipoteza kwa adui zako. Kama vile wainka walivyoshindwa kuwatambua adui zao, vivyo hivyo bila shaka hautapenda kulaaniwa na kuangamia kwa sababu ya ujinga wa kutowatambua maadui kati ya marafiki. Ni lazima utambue kuwa ikiwa hautailisha nafsi yako na ikiwa hautaitambua

thamani ya kidani cha maisha ya injili ya maji na Roho katika Yesu Kristo ilivyo, basi ni hakika kuwa utakuwa ukielekea katika njia ya maangamizi kama vile Dola ya Inka ilivyopotea toka katika uso wa dunia pamoja na kuwa na ustaarabu uliokuwa umeendelea.

Yesu Kristo alikuja hapa duniani akafanyika mwili wa mwanadamu, akazichukua dhambi zako zote kwa kubatizwa na Yohana, alikufa Msalabani, akafufuka toka kwa wafu, na kwa sababu hiyo amefanyika kuwa Mwokozi wa kweli. Ikiwa pamoja na ukweli huu, hauamini wala haumpokei Yesu Kristo katika moyo wako, Yeye ambaye anatoa faida nyingi kwa moyo wako, na badala yake unamwangalia kama asiye na maana, basi ni dhahiri kuwa badala ya kubarikiwa utalaaniwa. Ni lazima umtambue Yeye anayesimama karibu nawe, na ni lazima ufungue moyo kwa Yeye aliyetayari kukusaidia. Ikiwa utamkubali yeyote yule, basi anaweza kubadilika na kuwa adui yako, hali akikuinulia upanga na kukunyang'anya kila kitu. Wale wasiomwamini Mungu ni kama vile kizazi cha nyoka. Vipi kuhusu wewe? Je, umefanyika kweli kuwa mwana wa Ufalme wa Mungu kwa kumwamini Yesu kwa moyo wako wote? Ni muhimu utambue kuwa wale wote wasiomwamini Mungu ni maadui wako, na kwamba utakapokuwa ukiwahubiria Neno na kuwangojea, basi yapasa usichangamane nao.

Wakati ninapolihuburi Neno la Mungu, wakati mwingine ninapatwa na hasira ya haki kutokana na ukweli kuwa kuna viongozi wengi wa Kikristo hapa duniani ambao hawamwamini Mungu. Watu hawa hujisifu kutokana na vyeti vyao vya kitaaluma, hadhi yao katika jamii, na faida za kidunia wazipatazo, lakini wanafahamu kuwa hatimaye mambo hayo yote yatapita, na kwamba wao ni kama kasha la uchafu mbele za Mungu? Ndugu zangu waamini, kumfahamu na kumwamini

Yesu Kristo ni jambo la thamani sana ambalo mtu anaweza kulifanya. Mtu anaweza kushikilia kitu gani pasipo kuifahamu injili ya maji na Roho ya Yesu? Kujivunia mamlaka ya kidunia pasipo kumfahamu Yesu ni bure na ni jambo la kijinga.

Ndugu zangu waamini, kumwamini Yesu Kristo hakumaanishi kumtambua na kumkubali kuwa ni Mwokozi ili tu kujipatia baraka za kidunia. Njia pekee kwetu sisi ili tuweze kupokea ondoleo la dhambi na kufanyika wana wa Mungu ni kumkubali Yesu Kristo, aliyekuja kwetu kwa injili ya maji na Roho kama Mwokozi wetu. Wale ambao maombi yao yanajibiwa katika ulimwengu huu ni wale tu wanaoamini katika injili ya Yesu Kristo ya maji na Roho. Wao wanaweza kupokea baraka zitolewazo na Mungu na kisha kupata neema na utukufu. Wale ambao wamempokea Yesu katika mioyo yao ni wale wanaofahamu na kuamini kuwa Yesu Kristo, aliyekuja kwetu kwa injili ya maji na Roho, ndiye atupaye wokovu. Sasa ni lazima tuutambue Ukweli huu na kisha tumpokee Yesu ambaye ni Mkuu katika mioyo yetu.

Uwezo wa kufanyika wana wa Mungu si kitu ambacho kinapatikana kupitia damu ya ukoo kimwili. Wala haupatikani kwa kuziamsha hisia za kibinadamu. Wala haupatikani toka katika desturi za kidini za familia fulani, au kwa kusema, “Kwa kuwa wazazi wangu wanaamini, basi na mimi pia ninamwamini Yesu.” Biblia inasema kuwa wana wa Mungu ni wale waliozaliwa tena upya si kwa damu, wala kwa mapenzi ya mwili, wala kwa mapenzi ya mtu (Yohana 1:13), bali kwa kuamini katika injili ya maji na Roho (Yohana 3:5).

Haupaswi kuamini injili ya maji na Roho kwa sababu ya mtu fulani tu, bali ni lazima uamini kwa ridhaa yako binafsi. Huwezi kusema, “Sawa, basi nitaamini pia kwa sababu yako. Familia yangu ni ya Kikristo, kwa hiyo haiwezekani nisimwamini Yesu. Hivyo, ili nisitofautiane na wanafamilia

yangu, basi nitamwamini Yesu na kuhudhuria kanisani.” Bali, unapaswa kuamini katika injili ya maji na Roho kwa moyo wako wote, na kwa ridhaa yako. Kuamini huko kutokane na ridhaa yako binafsi. Unapoamini kuwa Yesu aliyekuja kwa maji na Roho ni Mwokozi wako, basi imani hiyo itokane na mapenzi na ridhaa yako.

Wale Waliozaliwa Tena Upya kwa Maji na Roho Wataufurahia Utukufu Pamoja na Mungu

Kule kusema kuwa mtu amezaliwa na Mungu kuna maanisha hivi: Mungu Baba aliupenda sana ulimwengu hata akamtuma Mwanae kuja hapa duniani, kupitia injili ya maji na Roho, amekuokoa wewe na mimi toka katika dhambi za ulimwengu; na pale unapomwamini huyu Yesu Kristo aliyekuja toka kwa Mungu Baba kuwa ni Mwokozi wako, basi unazaliwa tena upya kama mwana wa Mungu. Hivi ndivyo unavyobarikiwa na Mungu. Yesu Kristo aliahidikuwa atakuja hapa duniani kama uzao wa mwanamke na kufanyika Mwokozi wetu (Mwanzo 3:15). Kwa mujibu wa ahadi hii, ni kweli kuwa Yesu alikuja hapa duniani na akalitimiza Neno lililokuwa limeahidiwa.

Kule kusema kuwa Yesu alizaliwa na Mungu maana yake ni kuwa Yesu ni Mungu aliyefanyika mwili. Kwa maneno mengine, Mungu mtakatifu alizaliwa hapa duniani akiwa amefanyika mwili wa mwanadamu. Sisi tumekutana na Yesu Kristo na tumeweza kutambua kwa hakika kuwa ni Mwana wa Mungu kupitia Neno la Mungu, pia tumetambua kuwa kupitia Mwanae, Mungu Baba ametupatia zawadi ya wokovu ya kufanyika kuwa wana wake. Mambo haya yote yametokana na na injili ya maji na Roho ambayo imetuokoa wewe na mimi.

Mungu ametuwezesha kufahamu kuwa wokovu huu huu si wa uongo, basi ni Ukweli halisi, na ametuwezesha kuuamini ukweli huo kwa kupitia Neno lake.

Mimi siwezi kuhubiri kitu kingine chochote kile zaidi ya injili ya maji na Roho. Kungekuwa na maana gani ikiwa ningekuwa nazungumzia kitu ambacho si cha kweli hali nikiwa nimesimama mbele yenu sasa? Kama ningelikuwa nafanya hivyo, yaani kuongea kitu ambacho si cha kweli, basi ni hakika kuwa kusingelikuwa na muda mbaya na usio na maana na uliolaaniwa kama muda huu. Na pengine mmoja wenu angelisema, “Ondoka kwenye mimbari! Acha kuhubiri sasa hivi! Ninaweza kufanya vizuri ikiwa nitasimama badala yako hapo kwenye mimbari!” Ukweli ni kuwa kama ningelikuwa ninahubiri kitu kingine zaidi ya Ukweli wa injili ya maji na Roho, basi ninyi nyote mngeliweza kusema hivyo kwangu.

Ndugu zangu waamini, ninyi ni wataamu wa kila kitu isipokuwa tu katika Neno la Mungu. Kila mmoja wenu ni mtaalamu katika fani fulani, kuanzia utunzaji wa nyumba hadi katika taaluma, sanaa, falsafa, elimu, utengenezaji wa magari, na kadhalika. Vivyo hivyo, sisi sote ni wataalamu katika fani kadha wa kadha za kidunia, lakini jambo ambalo ni muhimu zaidi ni kwamba tunapaswa kuwa wataalamu wa imani ambao tunalisikia na kuliadini Neno la Mungu, ambalo limekuja kwa injili ya maji na Roho.

Ninatumaini na kuomba kuwa ninyi nyote mtaipokea injili ya maji na Roho katika mioyo yenu kwa furaha, na kwamba mtazipokea baraka za Mungu kwa furaha, mtaishi kwa furaha, na kisha kusimama mbele za Mungu siku ile ya mwisho. Kwa kifupi, hebu tupokee kule kuoshwa kwa dhambi na kisha tufurahie kwa shukrani utukufu wa Mungu katika maisha yetu. Hebu tupokee baraka za wokovu zilizokuja kwa injili ya maji na Roho. Je, ndugu zangu waamini mnaamini katika injili hii?

Ninatoa shukrani zangu zote kwa Mungu hali nikiweka imani yangu katika injili ya maji na Roho. ☒

MAHUBIRI

6



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Je, Unazifahamu Huduma za Watumishi Wawili wa Mungu?

< Yohana 1:30-36 >

“Huyu ndiye niliyenena habari zake ya kwamba, ‘Yuaja mtu nyuma yangu, ambaye amekuwa mbele yangu; kwa maana alikuwa kabla yangu.’ Wala mimi sikumjua; lakini kusudi adhihirishwe kwa Israeli ndiyo maana mimi nalikuja nikibatiza kwa maji.’ Tena Yohana akashuhudia akisema, Nimemwona Roho akishuka kama hua kutoka mbinguni; naye akakaa juu yake. Wala mimi sikumjua; lakini yeye aliyenipeleka kubatiza kwa maji, huyo aliniambia, Yeye ambaye utamwaona Roho akishuka na kukaa juu yake huyo ndiye abatizaye kwa Roho Mtakatifu. Nami nimeona, tena nimeshuhudia ya kuwa huyu ni Mwana wa Mungu. Tena siku ya pili yake Yoana alikuwa amesimama pamoja na wawili katika wanafunzi wake. Akamtazama Yesu akitembea, akasema, ‘Tazama, Mwanakondoo wa Mungu!’”

Kifungu cha maandiko cha leo kinatoka katika injili ya Yohana 1:30-36. Watumishi wa Mungu wanaoamini katika injili ya maji na Roho wanafahamu wote kuwa Yesu ni Mwana wa Mungu na Mwokozi wa wenye dhambi. Vivyo hivyo, wale ambao wanamfahamu na kumwamini Mungu kwa kweli wanaweza kutambua kuwa Yohana Mbatizaji aliitimiza

huduma muhimu na ya thamani akiwa kama mtumishi wa Mungu.

Katika Kipindi cha Agano la Kale, Baadhi wa Watumishi Walitengwa Ili Kuwekwa Wakfu kwa Mungu

Wanadhiri kama vile Samsoni walikuwa wametengwa na kuchaguliwa na Mungu hata kabla ya kuzaliwa kwao ili waweze kuyaweka maisha yao wakfu kwa Mungu. Vivyo hivyo mnadhiri Yohana ambaye alimbatiza Yesu, pia alizaliwa hapa duniani kama mwanadamu aliyekuwa amewekwa maalumu na Mungu hata kabla ya kutungwa mimba katika tumbo la mama yake Elizabeti. Hivyo, wakati Elizabeti alipopata mimba ya Yohana Mbatizaji, malaika alisema, *“Kwa sababu atakuwa mkuu mbele za Bwana; hatakunywa divai wala kileo; naye atajzwa Roho Mtakatifu hata tangu tumboni mwa mamaye.”* (Luka 1:15). Kama kifungu hiki kinavyoonesha, Yohana Mbatizaji alikuwa ni mtu maalum aliyekuwa ametengwa na kuchaguliwa na Mungu.

Wakati Yohana Mbatizaji alipokua, Roho Mtakatifu alimfanya atambue kuwa Yesu alikuwa ni Mwana wa Mungu ili kwamba aweze kumshuhudia Yesu Kristo kwa usahihi. Na ndio maana Yohana alikiri hivi, *“Wala mimi sikumjua; lakini yeye aliyenipeleka kubatiza kwa maji, huyo aliniambia, Yeye ambaye utamwaona Roho akishuka na kukaa juu yake huyo ndiye abatizaye kwa Roho Mtakatifu”* (Yohana 1:33).

Yohana Mbatizaji alikuwa ni mtu aliyekuwa amekabidhiwa kazi maalum toka kwa Mungu. Kabla hajaiweka mikono yake juu ya Yesu ili kumbatiza, Yohana Mbatizaji alikuwa amepokea ufunuo wa Roho Mtakatifu akimwambia,

“utakapokuwa ukiwabatiza watu, yeye ambaye Roho Mtakatifu atamshukia huyo ndiye Mwana wa Mungu.” Imeandikwa hivi, *“Wala mimi sikumjua; lakini yeye aliyenipeleka kubatiza kwa maji, huyo aliniambia, Yeye ambaye utamwaona Roho akishuka na kukaa juu yake huyo ndiye abatizaye kwa Roho Mtakatifu. Nami nimeona, tena nimeshuhudia ya kuwa huyu ni Mwana wa Mungu.”* (Yohana 1:33-34). Hivyo Yohana Mbatizaji alifanyika kuwa mtu ambaye alizipitisha dhambi za wanadamu kwenda kwa Yesu kwa kumbatiza. Baada ya kuwa amembatiza Yesu, Yohana Mbatizaji alimshuhudia Yesu akisema, *“Tazama! Mwanakondoo wa Mungu aichukuaye dhambi ya ulimwengu!”* (Yohana 1:29) Vivyo hivyo, Yohana Mbatizaji aliweza kushuhudia kuwa Yesu aliyekuwa amebatizwa alikuwa ni Mwana wa Mungu na Mwokozi aliyekuwa amezibeba dhambi za mwanadamu.

Hali akimshuhudia Yesu, Yohana Mbatizaji alisema: “Yeye ni Mwana wa Mungu, Mwanakondoo wa Mungu na Mwokozi aliyekuwa ametabiriwa miaka mingi iliyopita katika Agano la Kale.” Mwana wa Mungu alikuja hapa duniani kama mwanadamu, alizipokea dhambi zote za mwanadamu mara moja na kwa wote kwa kupitia ubatizo wake alioupokea toka kwa Yohana Mbatizaji, alikufa Msalabani, akafufuka tena toka kwa wafu, na akajishuhudia mwenyewe, na kwa sababu hiyo akadhihirisha kuwa Yeye alikuwa ni Mwokozi wa kudumu wa mwanadamu. Kama sehemu ya huduma yake, Yohana Mbatizaji alitoa ushuhuda, akishuhudia kuwa Yesu Kristo alijitwika dhambi zote za mwanadamu, na kwamba ataimwaga damu yake Msalabani na kisha kufufuka tena toka kwa wafu. Wakati Yohana Mbatizaji alipombatiza Yesu, alitambua bila shaka kuwa Yesu alikuwa ni Mwana wa Mungu. Mungu alifanya isiwezekane kwa yeyote anayeifahamu haki ya Mungu kukana kuwa Yohana Mbatizaji ni mtumishi wa Mungu

aliyezipitisha dhambi za wanadamu kwenda kwa Yesu kwa kumbatiza. Kwa maneno mengine, Mungu alihakikisha kuwa wale wote wanaomwamini Mwanae wataweza kutambua kuwa Yohana Mbatizaji ni nabii wa mwisho wa Agano la Kale na Kuhani Mkuu wa mwisho katika dunia hii aliyezipitisha dhambi zote za mwanadamu kwenda kwa Yesu kwa kumbatiza.

Ikiwa mtu halitambui hili, basi ni hakika kuwa mtu huyo haliamini Neno la Mungu kwa uaminifu; na mtu huyo si yule aliyempata Mwokozi kwa kupitia injili ya maji na Roho. Ili sisi tuweze kuokolewa toka katika dhambi zote za ulimwengu huu kwa mujibu wa Neno la Maandiko lililoandikwa, ni lazima tuifahamu huduma ya Yohana Mbatizaji, yaani huduma ya kuzipitisha dhambi zote za ulimwengu kwenda kwa Yesu mara moja na kwa wote, na pia ni lazima tuamini huduma hii.

Katika 1 Yohana 5:5-8, Mtume Yohana, ambaye ni mwanafunzi wa Yesu anashuhudia hivi: *“Mwenye kuushinda ulimwengu ni nani, isipokuwa ni yeye aminiye ya kwamba Yesu ni Mwana wa Mungu? Huyu ndiye aliyekuja kwa maji na damu, Yesu Kristo; si katika maji tu, bali katika maji na katika damu. Naye Roho ndiye ashuhudiaye, kwa sababu Roho ndiye kweli. Kwa maana wako watatu washuhudiao [mbinguni, Baba, na Neno, na Roho Mtakatifu, na watatu hawa ni umoja. Kisha wako watatu washuhudiao duniani], Roho, na maji na damu; na watatu hawa hupatana kwa habari moja.”*

Yohana Mbatizaji pia aliushuhudia Ukweli huu kuwa Yesu alizibeba dhambi za mwanadamu kwa kubatizwa, na kwamba alikufa ili kuwa kipatanisho kwa dhambi hizo zote, na kwamba Yesu alikuwa ni Mwana wa Mungu. Vivyo hivyo, huduma ya Yohana Mbatizaji na huduma ya Yesu zinahusiana sana kwa uwazi. Huduma ya Yohana Mbatizaji haikuwa kwa ajili ya kuzipitisha dhambi zote za mwanadamu tu kwenda kwa Yesu kwa kumbatiza Yesu, bali ilikuwa ni kwa ajili ya

kumshuhudia Yesu kama ifuatavyo: “Yesu Kristo ndiye Mwokozi hasa wa wanadamu. Yeye ni Mwokozi na Masihi aliyezibeba na kuzioshelea mbali dhambizote za ulimwengu huu mara moja na kwa wote. Yeyote aaminiye kuwa Yesu Kristo aliyekuja hapa duniani ni Mwokozi ataokolewa toka katika dhambi zote.” Kwa kupitia huduma za Yohana Mbatizaji na ile ya Yesu, tunaweza kupata Ukweli halisi wa wokovu na kufahamu kuwa Yesu Kristo ni Mwokozi wetu. Hivyo, imefanywa iwezekane kwetu kuokolewa kwa imani hata sasa. Ikiwa sisi sote tunaamini katika Neno la Mungu na kulifuata, basi sisi sote tutaifahamu huduma ya Yohana Mbatizaji, na hivyo itakuwa haiwezekani kwetu kutoamini kuwa Yohana alikuwa ni mtumishi aliyetumwa na Mungu.

Yohana Mbatizaji alimshuhudia Yesu wakati alipokuwa hapa duniani, alishuhudia kuwa Yesu alikuwa ni Mwana wa Mungu na Mwokozi wa wanadamu. Hata hivyo, ni watu wachache sana waliolifahamu hili pamoja na kuwa Yohana alishuhudia. Yohana Mbatizaji aliushuhudia Ukweli, akisema, “Tazama! Mwanakondoo wa Mungu aichukuaye dhambi ya ulimwengu!” Lakini hata hivyo ni watu wachache sana walioweza kuunganisha kati ya Ukweli huo na huduma ya Yohana Mbatizaji, na ni wachache zaidi walioamini. Yesu aliweza kuzibeba dhambi zote za wanadamu mara moja na kwa wote kwa sababu ya ule ubatizo aliokuwa amebatizwa na Yohana Mbatizaji. Kabla ya maelezo yaliyotolewa katika kifungu cha Maandiko cha leo, Yohana Mbatizaji aliyekuja ndiye pekee aliyefahamu kuwa Yesu ni Mwana wa Mungu na Mwokozi wa wanadamu; Masihi wa kweli aliyezibeba dhambi zote za mwanadamu kupitia ubatizo wake na kwamba ataibeba adhabu ya dhambi zote Msalabani.

Ushuhuda wa Yohana Mbatizaji Ulikuwa wa Kweli

Yohana Mbatizaji alizipitisha dhambi za ulimwengu huu kwenda kwa Yesu mara moja na kwa wote kwa kumbatiza Yesu. Kisha akashuhudia Ukweli huu kwa wale wote wanaomwamini Yesu kuwa ni Mwokozi wa wanadamu. Ushuhuda wa Yohana Mbatizaji ulikuwa na lengo la kuwafanya watu wote wafahamu kuwa Yesu alibeba dhambi zote za mwanadamu kwa kubatizwa na yeye Yohana. Huduma ya Yohana Mbatizaji ilikuwa maalum kwa kumbatiza Yesu.

Wakati Yohana Mbatizaji alipokuwa akiwabatiza watu katika Mto Yordani, Yesu alikwenda kwa Yohana Mbatizaji ili abatizwe. Yesu akamwambia, *“Kubali hivi sasa, kwa kuwa ndivyo itupasavyo kuitimiza haki yote” (Mathayo 3:15)*. Yesu Kristo aliyasema haya ili aweze kuzichukua dhambi zote za kila mtu mara moja kwa kupitia ubatizo alioupokea toka kwa Yohana Mbatizaji. Wakati Yohana Mbatizaji alipombatiza Yesu, Roho Mtakatifu alishuka toka mbinguni kama vile hua kisha Mungu Baba akashuhudia, *“Wewe ndiwe Mwanangu, mpendwa wangu, ninayependezwa nawe.”*

Yohana Mbatizaji sio tu alimpatia Yesu ubatizo ambao uliitimiza haki ya Mungu, bali alitufanya sisi kwa kupitia ushuhuda wake tutambue kuwa Yesu ni Mwokozi wetu wa kweli. Wakati Mungu Baba alipomwamuru Yohana Mbatizaji kuzipitisha dhambi za ulimwengu kwenda kwa Yesu, na wakati Yesu alipozikubali na kuzipokea kwa kubatizwa, basi mapenzi ya Mungu Baba yalitimizwa, na hii ndio sababu sisi sote tuliweza kuokolewa toka katika dhambi zote za ulimwengu kwa kuamini katika injili ya maji na Roho iliyotolewa na Bwana. Yesu alidhihirishwa katika ulimwengu huu kwa kupitia Yohana Mbatizaji. Na hii ndio sababu tunaweza kuamini kuwa

Yesu Kristo, aliyekuja kwa maji na Roho, ni Mwokozi wa wanadamu. Kwa lugha nyingine, Yohana Mbatizaji alishuhudia ili kumwonyesha Yesu kuwa ni Mwokozi wa wanadamu wote katika ulimwengu huu.

Kwa kupitia ushuhuda huu wa Yohana Mbatizaji, Mungu ametufanya sisi kutambua na kuamini kuwa Yesu ni Mwokozi aliyezibeba dhambi zetu zote na kuzioshelea mbali kwa kubatizwa kwake. Hivyo basi, sasa inawezekana kwako na kwangu na kwa mwingine yeyote, kutambua kuwa Yesu ni Mwokozi wa wanadamu. Sisi sote tunaweza kuwa na imani ya kweli kupitia ubatizo ambao Yesu aliupokea toka kwa Yohana Mbatizaji na damu yake aliyoimwaga Msalabani. Kwa kuwa Yesu alizichukua katika mwili wake dhambi zote za ulimwengu mara moja na kwa wote kwa kubatizwa na Yohana Mbatizaji, na kwa kuwa alisulubiwa ili kubeba adhabu ya dhambi zote za ulimwengu, basi yeyote anayeamini hivyo anaweza kuzaliwa tena upya na kufanyika kuwa mmoja wa watu wa Mungu. Yesu ametoa pia ushahidi na uthibitisho kuwa yeyote anayeamini katika injili ya maji na Roho basi ni hakika kuwa amepokea ondoleo la dhambi, na hii pia ni kwa wale wote wanaomwamini Yesu kuwa ni Mwokozi aliyewakomboa toka katika dhambi za ulimwengu.

Kwa wale wote wanaoamini katika ubatizo wa Yesu Kristo kwa kupitia ushuhuda wa Yohana Mbatizaji—yaani, wale wanaoamini kuwa Yesu ni Mwana wa Mungu na Mungu Mwenyewe, na kwamba alizitoweshea mbali dhambi zote mara moja na kwa wote kwa kubatizwa katika Mto Yordani, na kwamba alizikomesha dhambi zetu zote pamoja na adhabu ya dhambi kwa kusulubiwa na kuadhibiwa badala yetu—basi ni hakika kuwa Mungu amewawezesha watu wa jinsi hivyo kuzaliwa tena upya. Hivyo basi, sasa unapaswa kuamini kuwa Mungu amezitoweshea mbali dhambi zako zote na kwamba

umeokolewa kwa kuamini katika injili ya maji na Roho.

Mungu amewafanya wale wote wanaoamini katika injili ya maji na Roho kuwa hawana dhambi na amewaokoa toka katika dhambi kwa kupitia Mwanae, hii haijalishi jinsi watu hao walivyo na udhaifu na mapungufu. Ukweli huu ni Ukweli wa injili ya maji na Roho. Ikiwa mtu yeyote anaamini katika injili ya Yesu ya maji na Roho kwa moyo wake, basi mtu huyo atakua hana dhambi. Yeyote anayemwamini Yesu kuwa ni Mwokozi wake basi mtu huyo atafanywa kuwa asiye an dhambi, lakini kwa wale wasiomwamini Yesu Kristo aliyekuja kwa injili ya maji na Roho, basi ni hakika kuwa watu hao watabakia na dhambi. Kila mtu anaweza kufanyika asiye na dhambi ikiwa mtu huyo atamwamini Yesu kuwa ni Mwokozi, ambaye Yohana Mbatizaji alimshuhudia na ambaye alikuja kwa maji na damu (1 Yohana 5:6-8). Haijalishi jinsi mtu alivyo mgomvi, mwenye mapungufu, dhaifu, na mwenye makosa mengi, ukweli ni kuwa mtu huyo akimwamini Yesu kuwa ni Mwokozi wake na kuamini injili ya maji na Roho, basi mtu huyo ataokolewa toka katika dhambi zote na atafanyika kuwa mwenye haki.

Watu hawawezi kufanya lolote zaidi ya kubakia kuwa ni wenye dhambi kwa kuwa hawamwamini Yesu kuwa ni Mwokozi aliyewakomboa toka katika dhambi. Hata hivyo, kwa wale wanaoamini kuwa Yesu ni Mwokozi wao aliyekuja kwa injili ya maji na Roho, basi dhambi zao zote zimetoweshwa mbali. Ikiwa tunamwamini kweli Yesu Kristo kuwa ni Mwokozi wetu, basi ni lazima tutambue kuwa Yesu alizibeba dhambi zetu zote mara moja na kwa wote na akazioshelea mbali kwa kule kubatizwa na Yohana Mbatizaji katika Mto Yordani.

Yesu Alibatizwa na Yohana Mbatizaji Katika Mto Yordani

Mathayo 3:13 inasema, *“Wakati huo Yesu akaja kutoka Galilaya mpaka Yordani kwa Yohana ili abatizwe.”* Yesu alikuwa amekwenda kwa Yohana Mbatizaji ili abatizwe, kisha akamwambia Yohana, *“Kubali hivi sasa; kwa kuwa ndivyo itupasavyo kuitimiza haki yote” (Mathayo 3:15).*

Yohana Mbatizaji alikuwa ni mtumishi aliyekuwa ametuwa na Mungu, naye Yesu, baada ya kuwa amebatizwa na Yohana, ambaye ni mwakilishi wa wanadamu, alizibeba dhambi zetu zote mara moja na kwa wote na akazioshelea mbali mara moja. Hivyo basi, Yesu alihitaji kubatizwa na Yohana Mbatizaji ili aweze kuzichukua dhambi zote za ulimwengu katika mwili wake. Ingawa mara ya kwanza Yohana Mbatizaji alikataa kumbatiza Yesu, hatimaye alikubali na kumbatiza Yesu kwa amri ile aliyokuwa amepewa na Yesu, ni kwa ubatizo huu ndipo Yesu alipoweza kuzipokea dhambi zote za ulimwengu. Vivyo hivyo, wakati Yohana Mbatizaji alipoiweka mikono yake juu ya kichwa cha Yesu na kumbatiza, basi Yesu aliweza kuzichukua dhambi za ulimwengu kwa ubatizo huo, akafa Msalabani, na akafufuka tena toka kwa wafu. Baada ya kubatizwa na Yohana, Yesu alitoka ndani ya maji jambo ambalo linaonyesha kuwa atafufuka baada ya kifo chake cha upatanisho Msalabani.

Jambo hili lilifanyika sawia na Neno la Mungu lilitabiriwa katika Agano la Kale. Ubatizo ambao Yesu aliupokea katika Agano Jipya ulikuwa ni utimilifu wa unabii wa Agano la Kale unaomaanishwa katika utaratibu wa sadaka ya kuteketezwa: ambapo ili kuzitoweshea mbali dhambi za watu wake, Mungu alitumia utaratibu wa kuzihamisha dhambi za kila mwaka kwenda kwa mbuzi wa kisingizio wakati Kuhani Mkuu

alipoiweka mikono yake juu ya mbuzi huyo wa kisingizio katika Siku ile ya Upatanisho. Hivyo, Yesu alizibeba dhambi zote za mwanadamu na akazioshelea mbali kwa ubatizo wake.

Siku iliyofuata baada ya Yesu kubatizwa, Yohana Mbatizaji alimwona Yesu akitembea akasema: “Tazameni enyi watu! Yeye ni Mwanakondoo wa Mungu anayezichukua dhambi za ulimwengu! Yeye ni Mwanakondoo halisi wa Mungu. Yeye ni Mwokozi wa wanadamu anayejitwika dhambi za ulimwengu. Yeye ni Mwokozi wa wenye dhambi. Yeye ni Mwokozi wako, Mwokozi wangu, na Mwokozi wa watu.” Yohana Mbatizaji alikishuhudia kitu muhimu cha wokovu kwa namna hii. Yohana aliweza kushuhudia hivyo kwa sababu alimfahamu Yesu kuwa ni nani.

Kwa hakika, Yesu alikuwa ni Mwanakondoo wa Mungu aliyekuwa akizibeba dhambi za ulimwengu. Wakati Yohana Mbatizaji alipombatiza Yesu, basi Yesu, kwa kupitia Yohana Mbatizaji aliweza kufanyika kuwa Mwanakondoo wa Mungu aliyepokea dhambi zote za ulimwengu. Hii ndio sababu siku iliyofuata Yohana Mbatizaji aliweza kushuhudia juu ya ubatizo wa Yesu, *“Tazama! Mwanakondoo wa Mungu aichukuaye dhambi za ulimwengu!”* (Yohana 1:29) Yesu alizibeba katika mwili wake dhambi zote za hapa ulimwenguni kwa ubatizo wake, na akawaokoa wanadamu wote kikamilifu kwa kuimwaga damu yake Msalabani na kuhukumiwa adhabu mara moja. Sasa, inawezekanaje basi kukawepo masalia ya dhambi? Kwa kuzingatia ule ukweli kuwa Yesu alizibeba dhambi zote kwa kupitia ubatizo wake na akaimwaga damu yake ya thamani ili kulipa mshahara wa hizo dhambi, inawezekanaje basi kukawa na dhambi katika ulimwengu huu?

Ikiwa hauamini katika injili ya maji na Roho, basi ni hakika kuwa dhambi zako zitabaki kama zilivyo. Lakini ikiwa unaamini kwa kweli katika injili ya maji na Roho, basi

umeoshwa dhambi zako zote na umepokea ondoleo kamili la dhambi. Imewezekanaje kuwa hivyo? Kwa sababu ikiwa mtu yeyote ana imani ya kuamini kuwa Yesu alijitwika dhambi za ulimwnegu kwa kubatizwa na Yohana Mbatizaji, basi mtu wa jinsi hiyo ameokolewa pasipo masharti yoyote. Hii ni kwa sababu wokovu toka katika dhambi hautimilizwi kwa jitihada za mtu binafsi, bali umeshatimilizwa kikamilifu na Mwokozi mwenyewe. Ikiwa mtu ana hata ile imani kidogo katika injili ya maji na Roho, basi mtu huyo ameokolewa toka katika dhambi zote. Hivyo hakuna hata mmoja ambaye hawezi kupokea ondoleo la dhambi ikiwa mtu huyo anaifahamu kwa kweli injili ya maji na Roho na ikiwa anamfahamu Yesu kikamilifu. Yesu alikuja kwa maji na Roho, na kila mtu anayemfahamu na kumwamini kiusahihi amepokea ondoleo la dhambi. Kwa kuwa Yesu amekwishazichukulia mbali dhambi za ulimwengu kwa kubatizwa kwake, basi haiwezekani kwa mtu anayeamini katika ukweli huu kubakia na dhambi.

Ikiwa bado una dhambi zimebakia, basi fahamu kuwa ni kwa sababu haumtambui Yesu, na wala hutambui na kuamini kuwa Yesu amefanyika kuwa mbadala wa upatanisho wako. Ikiwa kweli unamwamini Yesu, inawezekanaje basi dhambi za ulimwengu zikabakia wako wakati Yesu alikwishazichukulia mbali? Haiwezekani! Hivyo ikiwa unaamini katika sadaka ya Yesu ya upatanisho, basi ni hakika kuwa hauna dhambi; lakini kama hauamini, basi ni hakika kuwa wewe bado ni mwenye dhambi.

Kila Mtu ni Lazima Afahamu na Kuamini Katika Huduma za Watumishi Wawili Waliopakwa Mafuta

Ni kwa kuamini katika Yesu Kristo kuwa ni Mwokozi wako ndipo unapoweza kuokolewa toka katika dhambi—kama sivyo, basi utakabiliana na adhabu ya dhambi. Haijalishi jinsi ulivyo na mapungufu, ulivyo mwovu, dhaifu, mnyonge, katili, mwenye vurugu, usiye na maana, na mpotofu kama yeyote anavyoweza kuwa, ukweli ni kuwa ikiwa unamwamini Yesu basi hauna dhambi. Kila mtu anafanywa kuwa asiye na dhambi ikiwa tu anaifahamu injili ya Yesu kiusahihi na kuamini kiusahihi. Na hii ndio maana ni muhimu sana kwetu sote kumfahamu Yesu kupitia injili ya maji na Roho.

Ni vipi mtu anaweza kumfahamu Yesu? Mtu ni lazima kwanza afahamu na kuamini katika injili ya maji na Roho ili aweze kumfahamu Yesu kiusahihi. Kama vile Petro alivyomfahamu Yesu na kukiri, “*Wewe ndiwe Kristo, Mwana wa Mungu aliye hai*” (*Mathayo 16:16*), sisi pia tunaweza kumfahamu Yesu na kukiri yafuatayo: “Bwana, Wewe ni Kristo, Mfalme wa wafalme, na Mungu wa uumbaji. Wewe ni Mungu mwenyewe na pia ni Mwana wa Mungu aliye hai. Wewe ni Kuhani Mkuu wa Mbinguni, Nabii, na Mfalme. Wewe ni Mungu wangu, Mfalme wangu, Kuhani Mkuu wa Ufalme wa Mbinguni ambaye umezitoweshea mbali dhambi zangu zote mara moja na kwa wote, na wewe ni Nabii wa kweli uliyenifundisha Ukweli huu.” Wale wote waliopokea ondoleo la dhambi wanaweza kuikiri imani yako kwa jinsi hii.

Baada ya kuuawa kwa Yohana Mbatizaji, watu wa wakati ule walikuwa na mawazo ya ajabu kuhusu Yesu. Wakati Yesu alipokuwa akiwafufua wafu na kuwaponya wagonjwa, baadhi ya watu walidhani kuwa Yesu ni Yohana Mbatizaji. Kwa

mfano Mfalme Herode alifikiri kuwa “Yohana Mbatizaji amefufuka! Na Kwamba Yesu ni Yohana aliyefanyika mwili toka wafu!” Herode aliogopa sana kwa kumuua Yohana Mbatizaji. Wengine walisema, “Hapana, Yesu si Yohana Mbatizaji. Bali anaweza kuwa nia Eliya. Eliya alikuwa amepaa kwenda Mbinguni pasipo kuonja mauti; pengine amerudi tena. Ni Eliya tu ndiye angeliweza kufanya mambo kama hayo.” Lakini wengine walisema, “Hapana, yume Mtu si Eliya. Yeye ni mwema sana. Labda anaweza kuwa ni Yeremia. Pamoja na kuwa anaweza kuwa mpole na mkimya kwa nyakati fulani, Yeye anamwelewa sana mwanadamu na amejaa huruma. Pengine yeye ni Yeremia, yule Nabii wa Machozi.”

Watu wengi walifikiria tofauti kuhusu Yesu na kila moja alikuwa na uelewa wake binafsi. Lakini Yesu alimuuliza Petro, “Petro wewe unafikiri kuwa mimi ni nani?” Petro akajibu, “Wewe ni Kristo, Mwana wa Mungu aliye hai.” Katika hili jibu fupi kunapatikana imani ya kweli ya Petro. Pamoja na kuwa Petro alikuwa ni mvuvi wa kawaida, alikuwa ni mtu mwenye imani kubwa kiasi kuwa aliweza kuitaja waziwazi nafsi ya Yesu kwa jibu fupi.

Wale wanaomwamini Yesu kiusahihi kuwa ni Mwokozi wao wanaweza kuieleza vizuri injili ya maji na Roho kwa usahihi na uwazi. Wanaweza kusema, “Yesu ameziondolea mbali dhambi zangu zote kwa maji na damu.” Wakati Petro alipoikiri imani yake kwa Yesu, Yesu alimwambia, “Heri wewe Simoni Bar-yona; kwa kuwa mwili na damu havikukufunulia hili, bali baba yangu aliye mbinguni.” Kwa maneno mengine, ni Mungu Baba ndiye aliyemfanya Petro kuelewa hivyo.

Ukweli huo unafanana kabisa na uelewa wetu pia. Tunapolihubiri Neno la Mungu kwa watu wengine, ni nani basi anayewafundisha hao watu? Wakati ulipoikubali na kuipokea

injili hii, ni nani basi aliyekufundisha Ukweli huu katika moyo wako? Ni Bwana mwenyewe ndiye aliyekufundisha Ukweli na kukufanya uuamini huku akisema, “kwa kule kuja kwangu kwa maji na damu nimekuokoa toka katika dhambi zote.” Ni Bwana ndiye aliyetufanya tulitambue na kulifahamu Neno la injili ya maji na Roho.

Watu wengi sana wanasema kuwa wanamwamini Yesu kuwa ni Mwokozi wao, lakini imani yao imejengwa katika misingi ya hisia. Hii ni kwa sababu hawana ufahamu sahihi kuhusu Yesu. Hii ni hali ya kawaida katika Ukristo wa leo. Watu wengi wamemwamini Yesu kwa miongo mingi pasipo hata kutambua kuwa Yesu ni Mwokozi aliyekuja kwa injili ya maji na Roho. Wanapoulizwa, “Huyu Yesu mnayemwamini ni nani?” wao hujibu, “Ni kweli, ninamwamini Yesu, lakini siifahamu injili hii ya maji na Roho.” Sasa, watu hawa wameendelea kumwamini Yesu kwa miongo mingi katika ufahamu upi? Ni dhahiri kuwa wamekuwa wakimwamini Yesu kwa mujibu wa hisia zao binafsi.

Petro alipomwamini Yesu alifahamu kiusahihi kuwa Yesu ni nani. Na ndio maana akasema, “*Wewe ni Kristo, Mwana wa Mungu aliye hai.*” Kwa ukiri huu, Petro alikuwa akimaanisha, “Wewe ni Mungu wangu, Mwokozi wangu, na Nabii wangu pia. Lakini pia Wewe ni Mwana wa Mungu na Mungu Mwenyewe.” Kwa hiyo, Petro alimwamini Yesu akiwa na ufahamu sahihi; lakini siku hizi Wakristo wengi wanadai kumwamini Yesu pamoja na kuwa hawaifahamu haki yake. Wakristo wote wanaokiri kumwamini Yesu basi wanapaswa sasa kumwamini na kumfahamu kiusahihi kwa mujibu wa Neno la Mungu.

Pia wanapaswa kuwa na ufahamu sahihi kuhusu Yohana Mbatizaji. Pia wanapaswa kuwafahamu watumishi wengi wa Mungu wanaoonekana katika Agano la Kale. Ni kweli kuwa

ufahamu ni wa muhimu sana katika kila sehemu ya maisha. Kama ni hivyo, inawezekanaje basi kwa mtu kumwamini Yesu wakati akiwa mjinga? Ile dhana ya kwamba unaweza kuokolewa hata kama unamwamini Yesu kivyovyote, yaani hata kama haumfahamu Yesu, basi imani hiyo ni potofu mbele za Mungu. Imani ya jinsi hiyo ni mawazo tu ya mtu binafsi. Hata kama unamwamini Yesu, ikiwa hauutambui uungu wa Yesu, kwamba Yeye ni Mungu Mwenyewe, basi imani ya jinsi hiyo ni utupu.

Kwa kuwa Yesu ni Mwana wa Mungu ndio maana alibatizwa kwa ajili yetu ili kuzipokea dhambi za ulimwengu, na akaivumilia huduma yake ya kuteseka na kufa Msalabani. Hivi ndivyo Mungu alivyofanya ili kuwaokoa wenye dhambi toka katika dhambi. Sisi tumefanyika kuwa tusio na dhambi kwa kuamini katika haki ya Mungu. Ikiwa Yesu angelikuwa ni mtu wa kawaida, basi isingeliwezekana kwa sisi kuokolewa toka katika dhambi na pia Yesu asingelitambuliwa kama miongoni mwa watu wakuu na mashuhuri ulimwenguni. Ikiwa unamwamini Yesu kwa misingi ya kidunia, yaani ukimfikiria kuwa ni miongoni mwa wale wenye hekima wakuu wanne, basi ni hakika kuwa huwezi kuokolewa toka katika dhambi.

Yesu ni Mungu Mwenyewe. Yeye ni Mwokozi aliyekuja kwa injili ya maji na Roho. Ni Mwana wa Mungu tu ndiye angeliweza kuwa Mwokozi wa wanadamu kwa kuwa wanadamu wote walikuwa wameangukia katika dhambi. Unapaswa kutambua hapa kuwa ule ukweli kuwa Yesu ni Mungu Mwenyewe na kwamba si mwanadamu tu, ndio uliofanya ubatizo wake alioupokea toka kwa Yohana Mbatizaji na kifo chake Msalabani kuwa na maana kwako wewe na kwangu na kwa wale wote wanaomwamini Yesu. Yeyote anayeamini katika haki ya Yesu kwa moyo wake ataufikiwa wokovu kwa imani, na kwamba kila mmoja ataweza kuzaliwa

upya. Hivyo, ni lazima uamini katika injili ya maji na Roho.

Wale ambao hawajazaliwa tena upya, hata kama wanakiri kuwa wanamwamini Yesu, basi watu hao bado wana dhambi ndani yao. Kwa watu wa jinsi hiyo, hata kama Yohana Mbatizaji alimshuhudia Yesu akisema, *“Tazama! Mwanakondoo wa Mungu aichukuaye dhambi za ulimwengu!”* basi Neno hili la Mungu kwao ni kama kifungu cha kawaida na dhambi itabaki kama ilivyo katika roho zao. Kwa kuwa watu hawa hawaliamini Neno la Mungu lililokuja kwa injili ya maji na Roho, basi dhambi zote za ulimwengu zimebaki ndani yao. Kwa kuwa dhambi za ulimwengu bado zimo ndani ya mioyo yao, basi hawawezi kusema kuwa hawana dhambi hata kama wanamwamini Yesu. Vivyo hivyo, kwa kuwa bado wanaendelea kufanya dhambi katika nyakati tofauti katika maisha yao, basi watu hao bado ni watenda dhambi na hawawezi kusema kuwa wao ni wenye haki. Kwa maneno mengine, kwa kuwa wanamwamini Yesu pasipo ufahamu sahihi wa haki Yake, basi wao bado ni wenye dhambi, na hawawezi kuwa watu wenye haki; wataendelea kuishi na kufa na kuzikwa chini ya dhambi za ulimwengu.

Ikiwa una ufahamu sahihi wa huduma ya Yohana Mbatizaji na huduma ya Yesu, na ikiwa unaziamini huduma hizo kiusahihi, basi unaweza kuwa mtu asiye na dhambi bila kujali jinsi ulivyo na mapungufu, na pia unaweza kusema kwa mtu yeyote kwa ujasiri kuwa wewe ni mwenye haki. Inawezekanaje basi kwa wewe kusema hivyo? Unaweza kusema kuwa wewe ni mwenye haki kwa sababu unaamini katika haki ya Mungu. Ni sahihi kwa kuwa unaamini katika haki ya Mungu na ndio maana sasa hauna dhambi.

Wanadamu wanawezaje kuzaliwa tena upya? Yesu alisema kuwa ni lazima wazaliwe tena upya kwa maji na Roho. Hii ina maanisha kuwa tunazaliwa tena upya kwa kuamini

kuwa Yesu ni Mungu Mwenyewe na Mwana wa Mungu wa thamani, na kwamba Yeye ni Mwokozi aliyewaokoa wenye dhambi kwa kubatizwa na kuimwaga damu yake, na kwamba Yeye ndiye nabii aliyetufundisha—yaani ni kwa kuamini kuwa Yesu ametuokoa kwa kubatizwa na Yohana Mbatizaji na kwa kuimwaga damu yake Msalabani.

Kuzaliwa Tena Upya Ni Kupokea Ondoleo la Dhambi kwa Kuamini Katika Injili ya Maji na Roho

Katika injili ya maji na Roho, ‘maji’ yanamaanisha ni ubatizo wa Yesu na ‘Roho’ ina maanisha kuwa Yesu ni Mungu Mwenyewe. Pamoja na kuwa Yesu ni Mungu Mwenyewe, huyu Mungu aliyeinuliwa alikuja hapa duniani akiwa kama mwanadamu, alizichukua katika mwili wake dhambi zetu kwa kubatizwa, na akaimwaga damu yake Msalabani. Yeye ni Mwokozi ambaye ametufanya sisi kuwa tusio na dhambi sisi sote tunaomwamini yeye kwa mioyo yetu. Sisi tulizaliwa tena upya kwa kuamini katika ubatizo wa Yesu alioupokea na damu yake aliyoimwaga kama sadaka ya upatanisho. Wokovu wetu umefikiwa kwa kuamini kuwa Yesu ni Mwana wa Mungu na Mungu Mwenyewe, na kwamba dhambi zetu zote zilipitishwa kwenda kwake kwa kupitia ubatizo wake, na kwamba aliimwaga damu yake ya thamani Msalabani ili kuwa kipatanisho kwa dhambi zote kwa ajili yetu. Kuamini hivi ni kuamini katika injili ya maji na Roho. Hii ni kwa sababu Yesu ni Mungu Mwenyewe na Mwokozi wetu. Sababu inayotufanya kuwa tuamini katika uungu wa Yesu, yaani kuwa Yesu ni Mungu Mwenyewe, ni kwa sababu tunaamini kuwa Mungu Mwenyewe alikuja hapa duniani kama Mwokozi Yesu,

akazichukua dhambi za ulimwengu kwa kuupokea ubatizo katika mwili wake, akaimwaga damu iliyokuwamo ndani ya mwili wake Msalabani ili kuzioshelea mbali dhambi zetu zote, na kwa sababu hiyo amewaokoa wote wanaoamini katika ukweli huu. Hakuna zaidi ya imani hii inayoweza kumfanya mtu azaliwe tena upya.

Biblia inaeleza kuwa Yesu Kristo ndiye aliyekuja kwa maji na damu (1 Yohana 5:6). Maji yanayotajwa katika kifungu hiki yana maanisha ni ubatizo wa Yesu alioupokea toka kwa Yohana Mbatizaji, wakati damu inamaanisha ni damu ya Yesu aliyoimwaga Msalabani. Yesu alisema hatuwezi kuuona wala kuingia katika Ufalme wa Mungu hadi pale tutakapozaliwa tena upya kwa maji na kwa Roho. Pia alisema kuwa yeyote aliyezaliwa tena upya kwa maji na Roho anaweza kumwita Mungu kuwa ni Baba yake. Mungu amefanya iwezekane kwa mtu kuzaliwa tena upya ikiwa tu mtu huyo ataamini katika ubatizo wa Yesu alioupokea toka kwa Yohana Mbatizaji, na iwapo ataamini katika Ukweli kuwa Yesu ni Mwana wa Mungu, na pia kama ataamini katika huduma ya Yesu. Yeyote anayeamini kuwa Yesu amezioshelea mbali dhambi zetu zote kwa kubatizwa na Yohana Mbatizaji kwa ajili yetu basi mtu huyo atazaliwa tena upya. Kwa maneno mengine, mtu anafanywa kuwa asiye na dhambi kwa kuamini katika injili ya maji na Roho. Yesu alisema kuwa wale wote Yesu ni Mungu Mwenyewe na Mwokozi wao, na kwamba Mungu Mwenyewe amefanyika kuwa Mwokozi wao, basi ni hakika kuwa watu hao watafanywa kuwa watu wa Mungu.

Kama watu wenye haki tuliozaliwa tena upya, wewe na mimi tunaweza kwa ujasiri kabisa kumwelezea mtu yeyote juu ya msingi wa imani yetu kwa kusema, “Nimeokolewa toka katika dhambi kwa kuamini katika injili ya maji na Roho.” Na hii ndio maana ya kuzaliwa tena upya kwa kumwamini Yesu.

Mtu anafanywa kuwa mwenye haki ikiwa tu atazaliwa tena upya kwa kuamini katika injili ya maji na Roho iliyotolewa na Yesu.

Zaidi ya yote, kuzaliwa tena upya kwa maji na Roho maana yake ni kwamba tumeshafishwa toka katika dhambi zetu zote kwa kuamini kuwa Yesu alizipokea dhambi zetu zote na akazoshelea mbali kwa kubatizwa na Yohana. Wale wanaoamini kuwa dhambi zao zilipitishwa kwenda katika kichwa cha Yesu kwa kupitia Yohana Mbatizaji ndio wale waliopata ondoleo kamili la dhambi. Watu hawa wanazaliwa tena upya kwa kuamini kuwa Yesu ni Mungu Roho, na kwamba huyu Yesu, aliyezibeba dhambi zao zote akahukumikiwa kwa ajli yao kwa kuimwaga damu yake ya thamani Msalabani, ni Mungu Mwenyewe. Pia, imani ya jinsi hiyo inaamini kuwa Yesu, aliyekuja kwa ubatizo na damu ili kuwaokoa wanadamu, si mtu wa kawadaia bali ni Mungu Mwenyewe.

Katika Injili ya Yohana sura ya 3 Yesu alisema mtu anaweza kuingia na kuuona Ufalme wa Mungu ikiwa tu atazaliwa tena upya kwa maji na Roho. Sisi tunaoamini hivi ndio wale waliozaliwa tena upya kwa maji na Roho. Sasa inapokuja hoja ya mtu yeyote anawezaje kuzaliwa tena upya, basi jibu ni mtu anazaliwa tena upya kiusahihi kwa kuamini kuwa Yesu ni Mungu Mwenyewe, na kwamba alikuja hapa duniani akafanyika mwili wa mwanadamu, akabatizwa, akahukumikiwa Msalabani, na kwamba kwa sababu hiyo ametuokoa sisi kikamilifu toka katika dhambi zote.

Wale wanaoamini kuwa Mungu amewaokoa wote toka katika dhambi kwa kupitia injili ya maji na Roho ni watu ambao wamezaliwa tena upya. Sasa wamezaliwa kwa mara nyingine. Sisi kama wanadamu tusingeliweza kukwepa kifo kwa sababu ya dhambi zetu; hivyo kwa kuzipitisha dhambi

zetu zote kwenda kwa Yesu kwa kupitia imani yetu katika ubatizo wa Yesu na damu yake, basi dhambi zetu zote ziliondolewa mbali wakati ule Yesu alipobatizwa. Wakati Yesu alipokufa Msalabani, sisi nasi tulikufa nae; na wakati alipofufuka tena toka kwa wafu, sisi nasi tulihuishwa pamoja na Yesu. Hivyo kuamini mambo haya kwa moyo wako wote ndiyo imani halisi inayomwokoia kila mtu toka katika dhambi.

Hata hivyo, wale wasioamini kuwa Yesu ni Mungu Mwenyewe na Mwana wa Mungu, na kwamba Yesu ametuokoa kwa kupitia maji na damu hawawezi kuzaliwa tena upya kwa sababu dhambi zao hazijaoshelewa mbali. Miongoni mwa wale wanaodai kumwamini Yesu kuwa ni Mwokozi wao, yaani wale wanaoamini katika maji Yake na damu yake, hao wamezaliwa tena upya kwa maji na Roho. Lakini kuna wengine ambao hawaamini kuwa Yesu aliyezioshelea mbali dhambi zao zote kupitia maji na damu, ni Mungu Mwenyewe, na kwamba huyu Mungu amewaokoa kwa jinsi hiyo. Ni wazi kuwa watu wasioamini hivyo bado hawajazaliwa tena upya. Hii ina maanisha kuwa kila mtu anabakia kuwa mwenye dhambi pale tu anapokuwa haamini katika injili ya maji na Roho.

Ni majaliwa ya mwanadamu kuzaliwa mwenye dhambi na kubakia mwenye dhambi hadi mwisho wa maisha yake. Watu wanaendelea kuwa wenye dhambi kwa sababu hawaamini kwa mioyo yao juu ya Ukweli wa wokovu kwamba Yesu Mwokozi wao ni Mwana wa Mungu na Mungu Mwenyewe; na kwamba huyu Mungu alikuja hapa duniani akafanyika mwili wa mwanadamu, akabatizwa na kuimwaga damu yake Msalabani, na kwamba siku ya tatu akafufuka tena toka kwa wafu, na kwamba kwa sababu hiyo amewafanya kuwa wenye haki na kuwageuza kuwa watu wa Mungu mwenyewe. Hii ndio sababu sisi sote tunapaswa kuamini katika injili ya maji na Roho, na

kisha kupokea ondoleo la dhambi na kuzaliwa upya.

Ninaposema kuwa ni lazima umwamini Yesu kuwa ni Mwokozi wako bila shaka unaweza kufikiria juu ya imani ya kishirikina; yaani imani inayomwamini Yesu kuwa ni Mwokozi pasipo ufahamu wowote. Mimi simaanishi hivyo. Imani sahihi ni ile ya kulifahamu Neno la Mungu la kweli pasipo shaka na kuliadini hali ukiwa na ufahamu sahihi. Hii ndio imani ya kweli. Nitatumia mfano ufuatao katika kulielezea hili ili lieleweke kwa urahisi zaidi.

Hebu tuseme kuwa tupo katika treni inayokwenda. Kwa kuwa tumo ndani ya treni, ukweli unabaki kuwa tunaendelea na safari hata kama tumekaa behewa la katikati ya treni au behewa la mwisho. Vivyo hivyo, ikiwa tumekaa katika behewa la kwanza, au ikiwa tumekaa karibu kabisa na konda wa treni, ukweli unabaki kuwa sisi sote tunasafiri sawia. Lakini kinachotembea ni treni na sio sisi. Treni ndilo linalotembea kwa kuwa lina injini. Mabehewa mengine yanatembea kwa kuwa yameungana na lile behewa lenye injili na haya mabehewa mengine yanayongwa kadri dereva wa treni anavyotaka. Hivyo, tunapokuwa tumepanda ndani ya mabehewa haya, sisi sote tunaweza kufika mahali tunapokwenda bila kujalisha tumeketi katika behewa lipi. Ni wazi kuwa ni makosa kufikiri kuwa treni inajiendea tu. Treni isiyo na injini si treni kamili bali ni kipande kikubwa cha chuma.

Vivyo hivyo, imani inahitaji msingi imara unaoweza kukuongoza kama vile injili ya treni inavyofanya. Imani sahihi ni kuamini katika nguvu za kimsingi za ubatizo wa Yesu, Msalaba wake, kifo chake, na ufufuo wake. Ikiwa unamwamini Yesu katika hali ya upofu, yaani pasipo kufahamu vizuri jinsi alivyokuokoa kwa kupitia maji na damu, basi imani yako si imani ya kweli. Ikiwa hiyo si imani, basi ni kitu gani? Ni kama

vile kufukuza tembo mweupe. Kumwamini Yesu pasipo kuufahamu ukweli uliomo katika maji na Roho ni kama vile kuamini katika nadharia za kufikirika. Ni sawa na kutengeneza mungu wa kubuni kisha ukamwabudu kwa kumsujudia.

Ndugu zangu waamini, ili muweze kuzaliwa tena upya kwa kuamini katika injili ya maji na Roho, basi mnapaswa kuwa na ufahamu sahihi wa huduma ya Yesu, na pia ni lazima muifahamu kikamilifu huduma ya Yohana Mbatizaji. Ikiwa Yohana Mbatizaji hangelikuwa amefahamu kuwa Yesu ni Mwokozi, basi ni hakika kuwa leo hii tungelikuwa hatujaokolewa toka katika dhambi. Ikiwa Yohana Mbatizaji asingelikuwa na imani isiyoyumbishwa kwamba amezipitisha dhambi za ulimwengu kwenda kwa Yesu kwa kumbatiza, basi angeliwezaje tena kutoa ushuhuda kwa watu wa Israeli huku akishuhudia kuwa Yesu ni Mwanakondoo wa Mungu aichukuaye dhambi ya ulimwengu? Yohana asingeliweza kushuhudia hivi ikiwa angelikuwa hafahamu alichokuwa amekifanya. Pia Yohana Mbatizaji alihitaji ushahidi ili aweze kushuhudia. Ushahidi upi? Kulipasa kuwepo kwa ushahidi wa Neno ili kuonyesha kuwa Yohana Mbatizaji amezipitisha dhambi za ulimwengu kwenda kwa Yesu kwa kumbatiza. Wale walio na ushahidi huu ndio wale ambao wamezipitisha dhambi zao kwenda kwa Yesu kwa ubatizo wa Yesu.

Hivyo basi, mwenye dhambi anazaliwa tena upya ikiwa tu anaamini katika ubatizo wa Yesu na damu yake Msalabani; vinginevyo hakuna mwenye dhambi anayeweza kuzaliwa upya. Ikiwa unataka kuzaliwa tena upya, basi unapaswa kuifahamu injili ya maji na Roho kwa usahihi na kuamini. Unapoifahamu injili ya maji na Roho na kisha ukaiamini kiusahihi, basi tambua kuwa hii ndio imani halisi ya kukufanya uzaliwe tena upya toka katika dhambi. Ni lazima utambue kuwa Yesu, Mungu Mwenyewe, alizibeba dhambi zote za mwanadamu

katika ulimwengu huu mara moja na kwa wote kwa kuupokea ubatizo katika mwili wake kama Kuhani Mkuu wa Mbinguni. Pia ni lazima utambue kuwa Yesu aliadhibiwa Msalabani mara moja, na kwamba siku ya tatu alifufuka tena toka kwa wafu. Pia ni lazima utambue kuwa kwa sasa Yesu ameketi mkono wa kuume katika kiti cha enzi cha Mungu Baba. Yesu alituhadithi kuwa atakuja kutuchukua sote tunaomwamini. Unaweza kuzaliwa tena upya toka katika dhambi ikiwa unafahamu na kuamini katika yale niliyoyazungumza hadi sasa. Ikiwa unaamini kiupofu kuwa Yesu ni Mwokozi wako pasipo kuifahamu injili ya maji na Roho ambayo Yesu ametupatia, basi ni hakika kuwa huwezi kuzaliwa tena upya.

Ni nani ambao Yesu Kristo anawapeleka katika Ufalme wa Mbinguni? Anawapeleka wale tu ambao wamezaliwa tena upya kwa kuamini katika injili ya maji na Roho. Ni akina nani basi ambao wamezaliwa tena upya kwa kuamini katika injili ya maji na Roho? Ni wale wanaofahamu na kuamini kuwa Yesu ni Mungu Mwenyewe na Mwana wa Mungu, na wanaoamini kuwa dhambi zao zote na dhambi zote za ulimwengu zilipitishwa kwenda kwa Yesu wakati alipobatizwa na Yohana, na kwamba alizioshelea mbali dhambi zote, akahukumiwa kwa kuimwaga damu yake Msalabani, na kwamba akafufuka tena toka kwa wafu—basi watu wanaomini hivi ndio waliozaliwa tena upya kwa maji na Roho kama Yesu alivyosema. Huu ndio ujumbe mkuu wa injili ya maji na Roho, na huu ndio Ukweli wa kuzaliwa tena upya.

Katika siku za Agano la Kale, kulikuwa na nabii aliyemitwa Habakuki, na Bwana alisema kupitia nabii huyu akisema, *“Tazama, roho yake hujivuna, haina unyofu ndani yake; lakini mwenye haki ataishi kwa imani yake”* (Habakuki 2:4). Wanadamu wanamajivuno kama vile Lusifa kwa kuwa ile sumu yake imewaathiri wanadamu wote. Hata hivyo, kifungu

hiki cha maandiko kinasema kuwa hata wale waovu wanaweza kufanywa wenye haki, na wale waliofanywa wenye haki wataishi kwa imani.

Ikiwa unaamini kwa moyo wako wote kuwa Yesu ni Mungu Mwenyewe, na kwamba alizibeba dhambi zako na kuzioshelea mbali wakati alipobatizwa na Yohana Mbatizaji, na kwamba aliadhibiwa Msalabani kwa niaba yako, na kwamba siku ya tatu alifufuka tena toka kwa wafu, na kwamba ameketi mkono wa kuume wa Mungu, na kwamba atarudi tena akiwa kama hakimu, basi ni hakika kuwa unaweza kuzaliwa tena upya na kufanyika mwenye haki kwa imani hii. Ikiwa unaamini hivi, ni hakika kuwa Roho Mtakatifu atakuja moyoni mwako na atakutia muhuri akisema, “Umezaliwa tena upya. Wewe ni mmoja wa watu wangu.” Hivyo ndivyo unavyofanywa asiye na dhambi kwa imani. Wenye haki ambao wameiokolewa toka katika dhambi kwa kuamini katika injili ya maji na Roho hawana dhambi mbele ya macho ya Mungu, hii haijalishi jinsi walivyo na mapungufu. Kwa imani ni watu wasio na dhambi, na kiuhalisia ni watu pia wasio na dhambi. Hata kama wanatenda dhambi, watu hao wanabaki kuwa wasio na dhambi. Ni kweli kuwa hawana dhambi kabisa. Je, bado una dhambi? Hapana, dhambi zako zote zimetoweshwa.

Wale wasiofahamu wala kuamini kuwa Yesu ni Mwokozi ambaye ameziondolea mbali dhambi zao zote kwa kupitia injili ya maji na Roho ni Wakristo wazushi. Kwa upande mwingine, wale wanaoamini kwa kweli katika ubatizo na damu ya Yesu Msalabani ni Wakristo wa kweli wasio na dhambi. Yeyote anayeamini katika injili ya maji na Roho ana ufahamu sahihi wa haki ya Mungu na anamwamini Mungu kiusahihi.

Yohana Mbatizaji alimfahamu Yesu vizuri. Ndio maana katika Yohana 1:29 alimshuhudia Yesu akisema, *“Tazama! Mwanakondoo wa Mungu aichukuaye dhambi ya ulimwengu!”*


Yohana Mbatizaji alishuhudia kuwa hakukuwa na dhambi ulimwenguni. Waamini katika injili ya maji na Roho pia wanashuhudia kuwa hawana dhambi, lakini wale wasioamini katika injili hii wanashuhudia kuwa bado wana dhambi zikiwa zimesalia kama zilivyo.

Kwa kupitia kifungu cha leo cha Maandiko toka injili ya Yohana 1:30-36 tunaweza kuona kuwa ukweli kwamba tumezaliwa tena upya au la kunategemea ikiwa tunamwamini Mungu hali tukiifahamu haki ya Yesu au la. Kwanza ni lazima tuifahamu Ukweli wa injili ya maji na Roho, na ni lazima tuamini Ukweli huu kwa mioyo yetu yote. Kuamini hivi ni imani sahihi mbele ya macho ya Mungu.

Nahitimisha kwa kusema kuwa, kufahamu na kuamini katika ubatizo wa Yesu alioupokea toka kwa Yohana, na damu yake aliyoimwaga Msalabani, na neema ya kifo chake na ufufuo—ni imani sahihi inayokuokoa, na imani hii ni Ukweli. Ninawasihi ninyi nyote muamini hivyo. ☒

MAHUBIRI

7



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Kwa Nini Yesu Alipaswa Kuupokea Ubatizo?

< Yohana 3:22-36 >

“Baada ya hayo Yesu na wanafunzi wake walikwenda mpaka nchi ya Uyahudi; akashinda huko pamoja nao, akabatiza. Yohana naye alikuwa akibatiza huko Ainoni karibu na Salimu, kwa sababu huko kukulikuwa na maji tele; na watu wakamwendea, wakabatizwa. Maana Yohana alikuwa hajatiwa gerezeni basi palitokea mashindano ya wanafunzi wa Yohana na Myahudi mmoja juu ya utakaso. Wakamwendea Yohana, wakamwambia, Rabi, yeye aliyekuwa pamoja nawe ng’ambo ya Yordani, yeye uliyemshuhudia, tazama, huyo anabatiza na watu wote wanamwendea. Yohana akajibu akasema, Hawezi mtu kupokea neno lolote isipokuwa amepewa kutoka mbinguni. Ninyi wenyewe mwanishudia ya kwamba nalisema, Mimi siye Kristo, bali nimetumwa mbele yake. Aliye naye bibi harusi ndiye bwana harusi; lakini rafiki yake bwana harusi, yeye anayesimama na kumsikia, aifurahia sana sauti yake bwana harusi. Basi hii furaha yangu imetimia. Yeye hana budi kuzidi, bali mimi kupungua. Yeye ajaye kutoka juu, huyo yu juu ya yote. Yeye aliye wa dunia, asili yake ni ya dunia, naye anena mambo ya duniani. Yeye ajaye kutoka mbinguni yu juu ya yote. Yale aliyoyaona na kuyasikia ndiyo anayoyashuhudia, wala hakuna anayeukubali ushuhuda wake. Yeye aliyekubali ushuhuda wake ametia muhuri ya kwamba Mungu ni kweli. Kwa kuwa yeye aliyetumwa na Mungu huyanena maneno ya Mungu; kwa

sababu hamtoi Roho kwa kipimo. Baba ampenda Mwana, naye amempa vyote mkononi mwake. Amwaminiye Mwana yuna uzima wa milele; asiye mwamini Mwana hataona uzima, bali ghadhabu ya Mungu inamkalia.”

Jukumu la Yohana Mbatizaji Aliyembatiza Yesu na Dhumuni la Ubatizo

Watu wengi hawafahamu ni kwa nini Yesu alikuja hapa ulimwenguni na akaupokea ubatizo toka kwa Yohana Mbatizaji. Lakini ni lazima tufahamu vizuri kuhusu dhumuni la ubatizo ambao Yesu aliupokea, kuhusu Yohana Mbatizaji ambaye alimbatiza Yesu, na kuhusu uhusiano kati ya watu hao wawili. Kwa hiyo, kwanza kwa kutumia aya za Maandiko ninataka kuangalia habari za msingi na dhumuni la ubatizo wa Yesu uliotolewa na Yohana Mbatizaji katika Mto Yordani. Na ili kufanya hivyo ni lazima tugeukie katika Injili ya Mathayo na kisha kumchunguza Yohana Mbatizaji aliyembatiza Yesu.

Tukio la Yohana Mbatizaji kumbatiza Yesu linaonekana katika Injili ya Mathayo sura ya 3 aya ya 1-12, na katika Injili ya Mathayo sura ya 3 aya ya 3 inasema, *“Kwa sababu huyo ndiye aliyenenwa na nabii Isaya, akisema, Sauti ya mtu aliaye nyikani, itengenezeni njia ya Bwana, yanyosheni mapito yake.”* Na katika aya ya 11 inasema, *“Kweli mimi nawabatiza kwa maji kwa ajili ya toba; bali yeye ajaye nyma yangu ana nguvu kuliko mimi, wala sistahili hata kuvichukua viatu vyake; yeye atawabatiza kwa Roho Mtakatifu na kwa moto.”*

Yohana Mbatizaji aliishi maisha ambayo yalikuwa yanatofautiana sana na ya wengine kwa kuishi nyikani hali akivaa mavazi yaliyotengenezwa kwa singa za ngamia na huku akila nzige na asali. Yeye alizikemea dhambi za Waisraeli.

Aliwaambia wamrudie Mungu na kuacha dhambi ya kuabudu miungu. “Tubuni. Itengenezeni njia ya BWANA.” Ujumbe wa Yohana ulilenga kuwaambia Waisraeli kugeuka na kuacha kuabudu miungu ya kigeni na kisha kujiandaa kumpokea Masihi kwa sababu Yesu Kristo Mwokozi wa wanadamu wote atakuja katika ulimwengu huu.

Yohana Mbatizaji alikuwa ni mtumishi wa Mungu aliyetumwa kuja hapa ulimwenguni miezi 6 kabla ya Yesu. Yohana alikwishajua kuwa Mwokozi, yaani Masihi, atazichukua dhambi zote za ulimwengu katika mwili wake kwa kuupokea ubatizo hapo baadaye na kisha kuzioshelea mbali dhambi hizo. Kwa hiyo, aliwahubiria watu wengi ili kwamba waweze kukwepa toka katika maisha ya dhambi yaliyo mbali na Mungu na kisha kumrudia Mungu kwa kumwamini Yesu Kristo. Na watu wengi waliolisikia neno lake walizitubia dhambi zao na wakapokea ubatizo wa toba kupitia kwa Yohana Mbatizaji katika Mto Yordani. Katika ubatizo wa Yohana kulikuwa na malengo mawili. Lengo la kwanza lilikuwa ni kuwafanya watu wazitambue dhambi zao na kisha kutubu. Na lengo la pili, ambalo ni lengo muhimu sana, lilikuwa ni kuwafanya wapokee ondoleo la dhambi kwa kumwamini Mwokozi Yesu Kristo.

Lakini kulikuwa na watu wengi sana waliotaka kuupokea ubatizo kwa ajili ya faraja yao ya muda pasipo hata kufahamu vizuri dhumuni la ubatizo wa Yohana Mbatizaji. Hao walikuwa ni Mafarisayo na Masadukayo. Yohana Mbatizaji aliwaambia, *“Enyi wazao wa nyoka, ni nani aliyewaonya ninyi kuikimbia hasira itakayokuja? Basi zaeni matunda yapasayo toba; wala msiwaze mioyoni kwamba, ‘Tunaye baba, ndiye Ibarahimu’”* (Mathayo 3:7-9). Yohana Mbatizaji aliwaambia wanasiasa, waliokuwa wakiabudu miungu, na kwa watu wengine ambao hawamwamini Mungu na badala yake wanaabudu miungu hata

kama ni Waisraeli kwamba “Msiendeleo kudumu katika desturi, bali geukeni muache kuiabudu miungu mingine na kisha mumwamini Yesu kwa mioyo yenu yote, Yeye ambaye atazisafisha dhambi zote mara moja kwa kupitia upatanisho wa dhambi zenu.”

Je, toba ya kweli ni ipi? Toba ya kweli ni kumgeukia Mungu toka katika njia mbaya na kutokuamini kunakotokana na kutokuamini kiusahihi na pia ni kuipokea injili ya ondoleo la dhambi ambalo Yesu Kristo amelitoa. Yohana Mbatizaji alilitimiza jukumu la kuwageuza Waisraeli toka katika njia mbaya na kisha kuwafanya watubu kwa unyenyekevu mbele za Mungu, kisha aliona mapema kuwa Yesu atazichukua dhambi za watu wote katika mwili wake kwa kupitia ubatizo. Hii ndio sababu alisema ni lazima wapokee wokovu toka katika dhambi zao zote kwa kumwamini Yesu kuwa ni Mwokozi wao. Hii ni hoja ya msingi sana ambayo Yohana Mbatizaji aliihubiri akiwa nyikani.

Je, Unaamini Kuwa Ule Ubatizo Ambao Yesu Aliupokea ni Ubatizo Ambao Ulizichukua Dhambi Zetu Zote?

Kitu cha kwanza ambacho Yesu alikifanya wakati wa maisha yake hapa duniani ilikuwa ni kuupokea ubatizo toka kwa Yohana Mbatizaji ili kuzichukua dhambi zote za mwanadamu katika mwili wake. Na siku ile Yesu alipoupokea ubatizo wa upatanisho toka kwa Yohana Mbatizaji mlango wa Mbinguni ulifunguka. Injili ya Mbinguni inayosema kuwa tunapokea wokovu toka katika dhambi zote kwa kumwamini Yesu kuwa ni Mwokozi ilianza wakati huo. Hivyo, tunaweza kusema kuwa maisha ya kijamii ya Yesu yalianzia na ubatizo

wake. Ile picha tunayoiona wakati Yesu alipokuwa anabatizwa katika Mathayo 3:15 ulikuwa ni utaratibu ule ule wa kuwekea mikono katika utaratibu wa sadaka ya kuteketezwa wa Agao la Kale (Mambo ya Walawi 4:27-31, Mambo ya Walawi 1:1-3).

Kila Neno latika Agano Jipya na Agano la Kale linahusiana na kile kiliachoandikwa katika Isaya 34:16, *“Tafuteni katika kitabu cha BWANA mkasome; hapana katika mmoja atakayemkosa mwenzake; kwa maana kinywa changu kimeamuru, na roho yake imewakusanya.”* Katika Agano la Kale Kuhani Mkuu alizihamishia dhambi za watu kwenda kwa mbuzi wa kisingizio kwa kuiweka mikono yake juu ya kichwa chake wakati wa kutoa sadaka ya kuteketezwa kwa Mungu. Sehemu inayofanana na eneo hili katika Agano Jipya ni kwamba Yesu alizichukua dhambi zote za wanadamu kwa kuupokea ubatizo toka kwa Yohana mbatizaji, aliyekuwa mwakilishi wa wanadamu wote na wa ukoo wa Haruni Kuhani Mkuu. Kazi ya wokovu ambayo Yesu ameitimiza kwa kupitia injili ya maji na Roho ilikuwa ni mapenzi ya Mungu ambayo yalitabiriwa tangu wakati wa Agano la Kale. Kama nilivyokwisha sema, watu wa Agano la Kale walizihamishia dhambi za siku moja au za mwaka mzima kwenda kwa mnyama wa sadaka ya kuteketezwa kwa kuwekewa mikono. Watu waliokuwa wametenda dhambi walipokea ondoleo la dhambi wakati yule mnyama aliyekuwa amezichukua dhambi zao alipoimwaga damu yake na kufa kwa niaba ya wenye dhambi. Vivyo hivyo, Yesu alikuja hapa ulimwenguni mwanzoni mwa kipindi cha Agano Jipya na akalitimiza Neno kwa kuzibeba dhambi za wanadamu wote kama ilivyokuwa imetabiriwa katika Isaya 53:1-7 kwa kuupokea ubatizo toka kwa Yohana Mbatizaji kwa niaba ya wenye dhambi wote.

Sasa, Yohana Mbatizaji aliyembatiza Yesu alikuwa ni mtu wa namna gani? Yohana Mbatizaji alikuwa wa ukoo wa Haruni

ambaye alichaguliwa kama Kuhani Mkuu wa mwisho kisha akawa mwakilishi wa wanadamu ambaye alikuwa ametumwa na Mungu Mwenyewe kuja hapa ulimwenguni, pia alikuwa ni mtumishi wa Mungu aliyekuwa ametumwa hapa ulimwenguni miezi 6 kabla ya Yesu ili kuishuhudia Kweli kwamba Yesu Kristo atakuja hapa ulimwenguni na kuzichukua dhambi zote za ulimwengu kwa kuupokea ubatizo toka kwa Yohana.

Dhambi zetu zote zilihamishiwa kwenda kwa Yesu mara moja baada ya Yesu kuupokea ubatizo kupitia Yohana Mbatizaji katika mwaka wa 30 B.K. Njia ya ondoleo la dhambi kwa wenye dhambi wote ilifunguliwa kwa kazi hii. Ni lazima tumrudie Yesu ambaye ni bwana wa injili ya ondoleo la dhambi na kupokea usafisho wa dhambi zote mara moja kwa kumwamini Yesu aliyeupokea ubatizo katika mwili wake ili kuwaokoa wenye dhambi wote toka katika dhambi.

Kivuli cha Kweli cha Usafisho wa Dhambi ni Kule Kuwekea Mikono Katika Agano la Kale na Mfano Wake Halisi ni Ubatizo wa Yesu Katika Agano Jipya

Tutaangalia kwa karibu kabisa juu ya ubatizo wa Yesu ambao ulizichukua dhambi zote za ulimwengu. Ubatizo ambao Yesu aliupokea toka kwa Yohana Mbatizaji una maanisha ni ‘kusafishwa, kukizwa, kuzipitisha.’ Kama maana ya neno hili inavyohusika, tendo la Yesu la kuupokea ubatizo toka kwa Yohana Mbatizaji lina maanisha kuwa Yesu alizipokea dhambi zote za ulimwengu mara moja. Hivyo, ina maanisha kuwa, “Dhambi zote za ulimwengu zilihamishiwa kwenda kwa Yesu.” Kwa kupitia ubatizo huo, dhambi zetu zote zilihamishwa kwenda kwa Yesu na hivyo wanadamu wote

waliweza kupokea usafisho wa dhambi. Kwa ufafanuzi zaidi, dhambi za ulimwengu zilihamishiwa kwenda kwa Yesu kisha akalipa gharama ya dhambi hizi kwa niaba yetu kwa kufa Msalabani kwa sababu Yesu alikuwa ameupokea ubatizo wa kuzichukua dhambi, na ndio maana hatimaye Yesu aliweza kutoa baraka ya ondoleo la dhambi kwa wale wote wanaoamini katika Ukweli huu.

Ubatizo wa Yohana Mbatizaji kwa Yesu ulikuwa ni ubatizo wa upatanisho uliokuwa umefanywa sawasawa na kule kuwekewa mikono katika Agano la Kale. Kitendo cha kuwekewa mikono katika Agano la Kale kinafanana na ukweli kuwa Yesu Kristo atakuja hapa ulimwenguni na kuzisafisha dhambi zote za ulimwengu mara moja kwa kuupokea ubatizo. Yohana Mbatizaji aliushuhudia ukweli kwamba Yesu alikuwa ni Mwokozi kwa kumpatia ubatizo wa kuzihamishia dhambi kwenda kwa Yesu, na Yesu aliweza kutuokoa sote toka katika dhambi zetu kwa kuzichukua dhambi zote za mwanadamu katika mwili wake kwa kuupokea ubatizo toka kwa Yohana Mbatizaji kwa muundo wa kuwekewa mikono. Kama vile Kuhani Mkuu katika Agano la Kale alivyoiweka mikono yake juu ya kichwa cha yule mbuzi wa kisingizio katika Siku ya Upatanisho, vivyo hivyo Yohana Mbatizaji katika Agano Jipya aliweka mikono yake miwili juu ya kichwa cha Yesu na akampa ubatizo wa kuzihamishia dhambi za ulimwengu.

Mara Yesu alipotoka ndani ya maji baada ya kuzamishwa kikamilifu ndani ya maji akiwa ameisha batizwa, sauti ya Mungu Baba toka Mbinguni ikasikika. *“Huyu ni mwanangu, mpendwa wangu, ninayependezwa naye”* (Mathayo 3:17). Kwa hali hii Mungu Baba Mwenyewe aliishuhudia injili ya ondoleo la dhambi. Neno lote la unabii, injili ya wokovu, vimetimizwa kwa kupitia ubatizo wa Yesu na damu yake Msalabani.

Agano Jipya linashuhudia hili kwa kupitia Neno. Unabii

wa Agano la Kale kwamba Yesu Kristo atazichukua dhambi zote za ulimwengu katika mwili wake umetimizwa katika Agano Jipya kwa Yesu kuja hap aulimwenguni na kwa kuupokea ubatizo ambao unazichukua dhambi zote za ulimwengu. Neno la Mungu lilishuhudia kuwa ubatizo ambao Yohana Mbatizaji alimpatia Yesu ulikuwa ni ubatizo wa msamaha uliozihamisha dhambi za wenye dhambi wote wa ulimwengu, pia ulikuwa ni ubatizo wa upatanisho ambao uliitimiza haki ya Mungu kwa kupitia kitendo cha Yesu cha kuzichukua dhambi zote za mwanadamu mara moja.

Katika Mathayo 3:15, hebu tuangalie kile ambacho Yesu alikisema wakati alipokuwa akipokea ubatizo. Imeandikwa, *“Kubali hivi sasa, kwa kuwa ndivyo itupasavyo kuitimiza haki yote” (Mathayo 3:15).* Katika lugha ya Kiyunani, neno ‘kwa kuwa’ ni ‘οὐτως γάρ (*hutos gar*)’, inayo maanisha ‘kwa namna hii,’ au ‘itupasavyo,’ au ‘hakuna njia nyingine zaidi ya hii.’ Hili neno linaonyesha kuwa Yesu alizichukua dhambi za wanadamu juu yake na kwa usahihi kwa kupitia ubatizo alioupokea toka kwa Yohana Mbatizaji. Hivyo, hii ina maanisha kuwa ubatizo ambao Yesu aliupokea toka kwa Yohana Mbatizaji ulikuwa ni “njia ya kipekee ambayo ni ya haki zaidi na sahihi katika kuziondolea mbali zote za ulimwengu.” Maandiko yanaeleza mengi kuhusu Neno la injili ya kweli ya maji na Roho.

Wakristo wanafanya aina mbili za ubatizo: ubatizo wa kuzamisha na ubatizo wa kunyunyuzia. Ubatizo kwa njia ya kunyunyuzia unaofanyika katika nyakati zetu hauhusiani kabisa na ubatizo wa Yesu ambao ulizichukulia mbali dhambi za ulimwengu mara moja. Kimsingi, neno ‘ubatizo’ maana yake ni “kusafisha dhambi zetu.” Lakini, ubatizo wa nyakati hizi uliorahishwa una maanisha kuwa mtu amebatizwa ili kuwa Mkristo. Yesu alizichukua dhambi zote za ulimwengu kwa kupitia ubatizo alioupokea. Ubatizo uliorahisishwa unalingana

kimaandishi na ule ubatizo ambao Yesu aliupokea katika Mto Yordani, lakini ni vitu viwili tofauti kabisa. Kama ilivyo katika Agano la Kale, ubatizo wa kweli ulizihamishia dhambi zote za watu kwenda kwa mnyama wa sadaka ya kuteketezwa kwa kuwekea mikono juu ya kichwa chake, vivyo hivyo Bwana wetu alizichukua dhambi za wanadamu mara moja kwa kuupokea ubatizo kwa namna hiyo kwa kuwekewa mikono na Yohana Mbatizaji.

Yesu aliupokea ubatizo wa jinsi hiyo toka kwa Yohana Mbatizaji na akaitimiza haki yote kwa kupigiliwa misumari Msalabani hali akiwa amezibeba dhambi zote za ulimwengu. Wanafunzi wa Yesu wanaoufahamu ukweli huu waliwahubiria Wayahudi wakisema, *“Tubuni basi, mrejee, ili dhambi zenu zifutwe, zipate kuja nyakati za kuburudishwa kwa kuwako kwake Bwana” (Matendo 3:19)*. Njia ambayo mwanadamu anaweza kufanyika asiye na dhambi ni kwa kupitia imani inayoamini katika ubatizo wa Yesu aliupokea toka kwa Yohana Mbatizaji na damu yake Msalabani. Yesu Mwokozi alikuja katika Mto wa Yordani, akaupokea ubatizo, na akazipokea dhambi zote za mwanadamu katika mwili wake mara moja kwa kupitia ubatizo aliupokea. Hivyo basi, Maandiko yanasema kuwa tunazaliwa tena upya kwa kuupokea wokovu toka katika dhambi kwa kuamini katika ubatizo wa Yesu aliyezichukua dhambi zote za wanadamu wote na kwa kuamini katika damu ambayo aliimwaga Msalabani ambayo imejaa hukumu ya dhambi.

Neno toka Mathayo 3:13-17 linaeleza, *“Wakati huo Yesu akaja kutoka Galilaya mpaka Yordani kwa Yohana ili abatizwe. Lakini Yohana alitaka kumzuia, akisema, “Mimi nahitaji kubatizwa na wewe, nawe waja kwangu?” Yesu akajibu akamwambia, “Kubali hivi sasa; kwa kuwa ndivyo itupasavyo kuitimiza haki yote.” Basi akamkubali. Naye Yesu alipokwisha*

kubatzwa mara akapanda kutoka majini; na tazama mbingu zikamfunukia, akamwona Roho wa Mungu akishuka kama hua, akija juu yake; na tazama sauti kutoka mbinguni ikisema, 'Huyu ni Mwanangu, mpendwa wangu, ninayependezwa naye.'"

Katika Agano la Kale, watu walizihamishia dhambi zao kwa mnyama wa sadaka ya kuteketezwa kwa kumwekea mikono, na katika Agano Jipya, Yesu alizichukua dhambi zote za mwanadamu mara moja kwa kuupokea ubatizo toka kwa Yohana Mbatizaji. Sentensi isemayo "*Kwa kuwa ndivyo itupasavyo kuitimiza haki yote*" toka Mathayo 3:15 ina maanisha kuwa Yesu aliitimiza haki ya Mungu kwa kuupokea ubatizo ambao ulizioshelea mbali dhambi za watu wote. Hivyo ametupatia wokovu wa ondoleo la dhambi.

Luka sura ya 1 inaeleza kuwa Zakaria, baba wa Yohana Mbatizaji, alikuwa ni kuhani toka zamu ya Abiya, mjukuu wa Haruni. Kwa nini Mungu alimtuma Yohana Mbatizaji, wa ukoo wa Haruni, kuja hapa ulimwengu? Mungu alimtuma Yohana Mbatizaji kama yule ambaye atazihamishia dhambi zote za ulimwengu kwenda kwa Yesu. Kila Neno katika Maandiko lina sehemu inayohusiana pia katika maandiko (Isaya 34:16). Mambo ya Walawi 16:29-30 inaeleza juu ya taratibu za Siku ya Upatanisho. Wakati ule, waliitenga siku moja kila mwaka na kisha Haruni Kuhani Mkuu aliyekuwa mwakilishi wa Waisraeli alilifanya lile tendo la kuiwekea mikono ya ombi la msamaha ambayo ilizihamishia dhambi zote za watu kwenda katika yule mbuzi wa kisingizio.

Ili Yesu aweze kuitoa sadaka ya milele kwa mujibu wa utaratibu wa sadaka ya kuteketezwa, ilipaswa awepo mtu ambaye aliwawakilisha wanadamu kama vile Haruni katika Agano la Kale, na ili kulitimiza jukumu hili, Mungu alimtuma Yohana Mbatizaji wa ukoo wa Haruni Kuhani Mkuu miezi 6

kabla hajamtuma Yesu. Huyu Yohana Mbatizaji aliyekuja hapa ulimwnguni kwa mujibu wa wito wa Mungu alihubiri akisem, “Tubuni, enyi wazao wa nyoka,” kisha akasema, “Masihi amekuja. Wale wasiogeuka na kuachana na miungu watachomwa katika moto wa milele.”

Matendo 3 aya ya 19 inaeleza, *“Tubuni basi, mrejee, ili dhambi zenu zifutwe, zipate kuja nyakati za kuburudishwa kwa kuwako kwake Bwana”* Hata hapa, wanafunzi wa Mungu wanazungumzia juu ya ubatizo wa kusafisha dhambi, yaani siku ya kuburudishwa kwa kupitia kusafishwa dhambi katika mioyo itatimizwa mbele ya Bwana ikiwa tu watakuwa wanaamini katika injili ya maji na Roho. Wale wanaoamini katika ubatizo wa kuoshelea dhambi watapokea wokovu na kupata uzima wa milele kwa kuzipitisha dhambi zao zote kwenda kwa Yesu kwa kuwa Yohana Mbatizaji aliufanya ubatizo wa kuhamishia dhambi za ulimwengu kwenda kwa Yesu. Watu wanapokea ondoleo la dhambi mara moja kwa kuamini katika ubatizo na damu ambayo kwa hiyo Yesu alizipatanisha dhambi za ulimwengu mzima.

Hebu tugeukie lile tukio ambapo Yesu alikuwa akiupokea ubatizo toka kwa Yohana Mbatizaji. Katika Mathayo 3:14-16, tunamwona Yesu akimkaribia Yohana Mbatizaji na kusema, “Nibatize.” Kisha Yohana Mbatizaji alimkatalia akisema, “Itawezekanaje mimi kukubatiza Wewe? Unawezaje wewe kuja kwangu? Mimi ninahitaji kubatizwa na Wewe.” Yohana Mbatizaji, ambaye alimfahamu Yesu jinsi alivyo, alikuwa haelewi ni kwa nini mtu mdogo kama yeye alipaswa kumbatiza Yesu. Lakini hatimaye, Yohana Mbatizaji aliufanya ubatizo ambao ulizihamishia dhambi zote kwenda kwa Yesu kwa kuwa alifahamu dhumuni la kazi ambayo Yesu alitaka kuitimiza kwa kupitia ubatizo. Wokovu wa kuzipatanisha dhambi zote za mwanadamu ulitimizwa kwa kupitia tendo hili. Hii ni injili ya

kweli ya maji na Roho.

Yohana Mbatizaji alimwambia Yesu katika Mathayo 3:14, *“Mimi nahitaji kubatizwa na wewe, nawe waja kwangu?”* lakini Yohana Mbatizaji alimbatiza Yesu na akamfanya azipokee dhambi zote za ulimwengu katika mwili wake ili kulitimiza Neno lililotabiriwa katika Agano la Kale. Kwa hiyo, Yesu aliweza kuzichukua dhambi zote katika mwili wake na kufanyika kuwa Mwokozi katika ulimwengu huu. Dhambi zote za ulimwengu huu zilitoweka kwa kupitia ubatizo wa Yesu alioupata toka kwa Yohana Mbatizaji.

Yesu alikuwa ni Mwana wa Mungu Mwenyewe lakini hakuja hapa ulimwenguni ili awe mfalme wa ulimwengu huu. Badala yake, alizichukua dhambi zote za ulimwengu kwa kuupokea ubatizo katika mwili wake ili kuwaokoa wenye dhambi wote ulimwenguni toka katika dhambi. Hivyo ndivyo Yesu Kristo alivyofanyika kuwa Mwokozi aliyetuokoa toka katika dhambi zetu zote. Ninataka ufahamu na uamini kuwa ili Yesu aweze kutuokoa, basi ilimpasa kwanda kupokea ubatizo wa kuzichukua dhambi za ulimwengu toka kwa Yohana Mbatizaji na kisha kwenda Msalabani. Ubatizo ambao Yesu aliupokea toka kwa Yohana Mbatizaji ulikuwa ni ushahidi wa ondoleo la dhambi ambao ulizishughulikia dhambi zote za wanadamu. Kama vile Mungu alivyoweka sheria katika Agano la Kale ili kwamba dhambi za watu ziweze kuhamishiwa kwa kuwekea mikono juu ya mnyama wa sadaka ya kuteketezwa, basi vivyo hivyo, dhambi za ulimwengu zilihamishiwa kwenda kwa Yesu wakati alipoupokea ubatizo toka kwa Yohana Mbatizaji, na kwa sababu hiyo, sisi nasi tumepokea baraka ya ondoleo la dhambi kwa kupitia imani.

Yesu alipaswa kuitimiza ahadi ya Mungu ya kuzichukua dhambi kwa kuupokea ubatizo toka kwa Yohana, ambaye ni mwakilishi wa wanadamu. Hata Maandiko yanathibitisha

ukweli kuwa ule ubatizo ambao Yesu aliupokea katika Agano Jipya ulikuwa ni ‘ubatizo wa kuhamishia dhambi’ kama lilivyo tendo la kuwekea mikono katika Agano la Kale. Watu wote katika ulimwengu huu wanaweza kuwekewa huru toka katika dhambi zao ikiwa tu watafahamu na kuamini katika ubatizo wa Yesu na damu yake Msalabani ambavyo kwa jumla yake vinaunda Ukweli wa kuzichukua dhambi. Kuufahamu Ukweli huu ni njia ya kupokea wokovu toka katika dhambi. Hakuna njia nyingine zaidi ya hii.

Ubatizo wa Kusafisha Dhambi Ambao Yesu Aliupokea

Katika Mathayo sura ya 3, tunaweza kumwona Yohana Mbatizaji akimkatalia Yesu alipojaribu kupata ubatizo. Yohana alisema, *“Mimi nahitaji kubatizwa na wewe, nawe waja kwangu?”* Yesu alimjibu na akasema, *“Kubali hivi sasa, kwa kuwa ndivyo itupasavyo kuitimiza haki yote.”*

Ikiwa tutalifafanua Neno hili basi lina maanisha hivi: “Yohana Mbatizaji, ni lazima nizichukue dhambi zote za ulimwengu katika mwili wangu kwa kupitia ubatizo wako ili watu wa ulimwengu huu waweze kupokea ondoleo la dhambi zao zote mara moja na kwa wote kwa kuuamini ubatizo wangu wa kuzichukua dhambi na kuiamini damu ninayoimwaga. Kwa hiyo, kubali hivi sasa, sasa hivi.” Baada ya kupitia mchakato huu, Yesu Kristo aliupokea “ubatizo wa kuzichukua dhambi” toka kwa Yohana Mbatizaji na injili ya ondoleo la dhambi ilianza katika ulimwengu huu tangu wakati huo. Dhambi zote za ulimwengu zilihamishiwa kwenda katika kichwa cha Yesu Kristo wakati Yohana Mbatizaji alipoufanya ubatizo wa kuzichukua dhambi kwa Yesu. Na wale wote wanaoamini

katika ondoleo la dhambi kwa kupitia maji na Roho ambalo Yesu alilifanya wanafanyika kuwa watoto wa Mungu Baba kwa sababu Yesu aliyezichukua dhambi zetu alikufa Msalabani kwa ajili yetu na sasa ameketi mkono wa kuume wa Mungu Baba katika kiti cha enzi. Injili ya ondoleo la dhambi kwa kupitia maji na Roho ilianza tangu Yesu Kristo alipokuja hapa ulimwenguni na kuupokea ubatizo wa kuzichukua dhambi katika mwili wake.

Katika Wagalatia 3:27 Mtume Paulo anaandika, *“Maana ninyi nyote mliobatizwa katika Kristo mmemvaa Kristo.”* Si kifungu hiki tu, kuna sehemu nyingi katika Maandiko ambazo zinashuhudia juu ya ubatizo wa kusafishia dhambi. Ni lazima tuamini kuwa ubatizo wa Yesu na damu yake Msalabani ni injili ya kusafisha dhambi inayotufanya tuzaliwe tena upya kwa kupitia maji na Roho.

“Kubali Hivi Sasa”

Katika Mathayo sura ya 3 aya ya 15, Bwana Yesu alisema, *“Kwa kuwa ndivyo itupasavyo kuitimiza haki yote.”* Hili neno ‘haki yote’ lina maanisha ni ubatizo wa Yesu ambao unawafanya watu wote kuwa wasio na dhambi kwa kuzichukua dhambi zote katika mwili wake. Maandiko yanaeleza kuwa ubatizo wa Yesu wa kuzisafisha dhambi ni “haki yote” ya Mungu.

Yohana Mbatizaji alizihamishia dhambi za ulimwengu kwenda kwa Yesu kwa kumbatiza Yesu kwa mfano wa kuwekea mikono kama ilivyokuwa ikifanywa katika kichwa cha mnyama wa sadaka ya kuteketezwa katika Agano la Kale. Yohana Mbatizaji aliyekuwa ametumwa hapa ulimwenguni kama kuhani aliyewawakilisha wanadamu alilitimiza Neno la

agano la kuzichukua dhambi na kuzipeleka kwa Yesu (Mambo ya Walawi sura ya 16 na 17), na kwa kupitia utaratibu huu wote dhambi zote zilihamishiwa kwenda katika kichwa cha Yesu kama Mungu alivyokuwa amedhamiria. Ninawataka muupokee Ukweli kwamba dhambi zenu zote zilipitishwa kwenda kwa Yesu.

Ubatizo wa kuzipitisha dhambi kwa kuiweka mikono miwili juu ya kichwa cha Yesu ulikuwa ni ubatizo sahihi wa kuiweka mikono ili kuzichukua dhambi kwa ajili ya wokovu wa Mungu wa haki. Yesu alitukomboza sisi sote tunaoamini katika ubatizo na damu na kwa sababu hiyo ametukomboza kikamilifu tokakatika dhambi zote za ulimwengu kwa kuupokea ubatizo wa kuzichukua dhambi za mwanadamu toka kwa Yohana Mbatizaji.

Mbingu Zilifunuka

Mathayo 3:16-17 inasema, *“Naye Yesu alipokwisha kubatizwa mara akapanda kutoka majini; na tazama, mbingu zikamfunukia, akamwona Roho wa Mungu akishuka kama hua, akija juu yake; na tazama, sauti kutoka mbinguni ikisema, ‘Huyu ni Mwanangu, mpendwa wangu, ninayependezwa naye.’”*

Mlango wa Mbinguni ulifunguka wakati Yesu alipoupokea ubatizo wa kuzichukua dhambi za ulimwengu ili kuzishughulikia kwa haki. Kwa sababu hiyo, watu wengi wamepokea neema ya kujisajili katika Ufalme wa Mbinguni kwa kupitia ubatizo wa Yesu wa kuzichukua dhambi na damu yake Msalabani. Yesu aliitimiza injili ya ondoleo la dhambi kwa kuupokea ubatizo wa maji katika Mto Yordani katika Agano la Kale. Ahadi ya Mungu iliyokuwa imeahidiwa miaka

elfu nyingi katika Agano la Kale ilitimizwa. Dhambi zote za ulimwengu huu zilipitishwa kwenda katika mwili wa Yesu wakati ule Yesu alipoupokea ubatizo toka kwa Yohana Mbatizaji. Hii ina maanisha kuwa dhambi zote za mwanadamu zilipatanishwa kwa mujibu wa mapenzi ya Mungu Baba. Hivyo, wanadamu wote walipokea wokovu toka katika dhambi za ulimwengu.

Yesu alizichukua na kuzibeba dhambi zetu na kisha akaenda Msalabani katika Kilima cha Golgotha ili kulipa gharama ya dhambi zetu pamoja na kuwa Yeye hakuwa na dhambi. Katika kipindi cha miaka mitatu cha huduma yake ya wazi baada ya kuupokea ubatizo, Yesu aliihubiri injili kuwa alikuwa akizichukua dhambi za ulimwengu kwa kupitia ubatizo alioupokea. Popote alipokwenda aliwahubiri Ukweli wa injili katika ubatizo wa kuzichukua dhambi na damu kwa wenye dhambi wote akisema, “Mwanangu, jipe moyo na ufurahi, dhambi zako zimesamehewa.” Katika Injili ya Yohana sura ya 8 aya ya 11, Yesu alimwambia yule mwanamke aliyekutwa akifanya uzinzi, “Wala mimi sikuhukumu.” Hii ina maanisha kuwa asingeliweza kumhukumu kwa kuwa alikuwa ameichukua hata ile dhambi ya uzinzi. Hii ina maanisha kuwa Yesu aliyekuwa amezichukua dhambi zote ndiye yeye pekee atakayeipokea hukumu na adhabu ya dhambi za ulimwengu. Wakati wa miaka 3 wa huduma yake ya wazi, Yesu aliwashuhudia wenye dhambi waliokuwa wameelemewa na dhambi zao kwamba walikuwa wamekwishasamehewa. Hii ni kwa sababu Yesu Mwenyewe alikuwa ni Mwokozi aliyekuwa amezipokea dhambi za wenye dhambi kwa kupitia ubatizo wake.

Yesu aliyekuwa amezichukua dhambi zote za ulimwengu katika mwiliw ake kwa kupitia ubatizo wa kuzichukua dhambi aliipokea adhabu kali ya Msalaba kama mshahara wa dhambi

zote. Yesu alifikiria juu ya maumivu makali ya adhabu ya Msalabani ambayo alikuwa anakwenda kukabiliana nayo kisha akamwambia Mungu Baba, “Ooh Baba yangu, kama inawezekana kikombe hiki kiniepuke. Pamoja na kuwa nimezichukua dhambi za ulimwengu kwa kuupokea ubatizo, je, hakuna njia nyingine zaidi ya kifo changu?”

Kama nilivyokwisha sema katika utangulizi wa mahubiri haya kwamba ubatizo wa Yesu ulikuwa ni sawa na ule utaratibu wa kuwekea mikono katika Agano la Kale. Kwa kuwa katika utaratibu wa sadaka ya kuteketezwa wa Agano la Kale yule mnyama wa sadaka aliyekuwa amezibeba dhambi kwa kuwekewa mikono alichinjwa na damu yake kuchukuliwa, basi vivyo hivyo Yesu aliyekuwa amezichukua dhambi za wanadamu kwa kupitia ubatizo kwa namna ile ile ya kuwekewa mikono alipaswa kwa hakika kuimwaga damu yake ya sadaka ya kuteketezwa. Yesu alilifahamu hili tangu mwanzoni, lakini pia alifahamu jinsi ile adhabu ya Msalabani aliyokuwa anaikabili ilivyokuwa ya kutisha kwa kuwa alikuwa na mwili wa kibinadamu kama wanadamu.

Yesu aliomba hadi jasho likabadilika na kuwa damu kwa sababu ya hofu kuu ya mateso, lakini Yesu hakuendelea na mawazo hayo ya hofu hadi mwisho. Hivyo, akaenda tena mara ya pili akaomba akisema, *“Baba yangu, ikiwa haiwezekani kikombe hiki kiniepuke nisipokunywa, mapenzi yako yatimizwe”* (Mathayo 26:42). Kisha akakinywea kikombe cha adhabu ya Msalabani kwa nidhamu. Yesu alizichukua dhambi zote za ulimwengu katika mwili wake kwa kupitia ubatizo wake akalipa gharama ya dhambi hizi kwa kufa Msalabani na akawakomboa wanadamu wote toka katika dhambi zao na amewaokoa wote wanaoamini katika injili ya maji, damu, na Roho.

Yesu alipaswa kufa Msalabani kwa ajili ya wanadamu

wote kwa sababu alikuwa ameupokea ubatizo. Kama Maandiko yanavyosema, *“Kwa maana mshahara wa dhambi ni mauti; bali karama ya Mungu ni uzima wa milele katika Kristo Yesu Bwana wetu.”* (Warumi 6:23), Yesu alikipokea kifo cha haki ambacho tulipaswa tukiteseeke kwa sababu mshahara wa kila dhambi ni kifo. Mungu aliutimiza wokovu kwa kupitia Yesu Neno la agano kwa watu waliomwamini Mungu. Mungu aliahidi kuwa atamtuma Mwokozi ambaye atazichukua dhambi za ulimwengu kwa kupitia ubatizo wa kuwekea mikono, na Yesu aliipokea hukumu ya adhabu ya dhambi za ulimwengu kwa niaba yetu Msalabani kwa mujibu wa mapenzi ya Mungu, kama alivyosema, *“Abba, Baba, si kama nitakavyo mimi, bali kama utakavyo wewe.”*

Kwa mujibu wa fikra za Shetani Ibilisi, alishindwa na kifo cha Yesu kwa sababu tatizo la dhambi kwa wanadamu wote lilitatuliwa na njia ya wokovu ilifunguliwa kwa kupitia kifo cha Yesu. Ikiwa Yesu asingelikua Msalabani, basi tatizo la dhambi za wanadamu wote zingelikuwa hazijatatuliwa na ni hakika kuwa wanadamu wote ingeliwapasa kwenda kuzimu. Hicho ndicho Shetani Ibilisi alichokuwa anakitaka.

Hii ndio sababu Shetani Ibilisi muda wote alikaa karibu na Yesu ili kumjaribu ili kwamba asiangikwe Msalabani. Lakini Yesu hakukwepa na hatimaye aliutimiza wokovu. Pia tendo hili la Yesu lililitimiza Neno ambalo Mungu alimwambia Shetani Ibilisi katika kitabu cha Mwanzo sura ya 3 aya ya 15,

*“Nami nitaweka uadui
Kati yako na huyo mwanamke,
Na kati ya uzao wako na uzao wake;
Huo utakuponda kichwa,
Na wewe utamponda kisigino.”*

Wanadamu wote wanatoka ukoo wa Adamu, wana wa mwanadamu wa kwanza, lakini Yesu pekee ni wa ukoo wa

mwanamke kwa kuwa alizaliwa kwa Mariamu pasipo kuwa na mahusiano ya kindoa na mwanamume bali yeye alizaliwa akitungwa mimba kwa uwezo wa Roho Mtakatifu. Yesu aliizuia kazi ya Shetani Ibilisi kwa kuutoa wokovu kwa mwanadamu. Kwa sababu hiyo, alikiponda kichwa cha Shetani Ibilisi.

Unabii unaoeleza kuwa Yesu atatuokoa unaonekana kwa wazi katika Kitabu cha Hesabu katika Agano la Kale. Ni tukio ambalo lilitokea wakati Musa alipomwomba Mungu ili kuwaokoa Waisraeli waliokuwa wakiumwa na nyoka wa moto kwa sababu ya kumlalamikia Mungu wakati walipokuwa wakiishi katika msitu mkubwa. Mungu aliyajibu maombi ya Musa kwa kusema, *“Jifanyie nyoka wa shaba, uikaiweke juu ya mti, na itakuwa kila mtu aliyeumwa, aitazamapo ataishi”* (Hesabu 21:8). Musa alilisema Neno la Mungu kwa Waisraeli waliokuwa wakifa kwa maumivu ya kuumwa na nyoka. Aliwaambia hivi, “Sikiliza, enyi Waisraeli! Mwangalieni nyoka wa shaba juu ya ule mti. Wale watakaouangalia mti wataishi.” Kisha wale walioamini hivi wakamwangalia yule nyoka wa shaba juu ya mti waliwekwa huru toka katika dhambi ya kumlalamikia Mungu na walipokea wokovu. Maelezo haya yanalifunua Neno la Mungu linalosema kuwa Bwana alikwisha mhukumu Shetani Ibilisi na akalitatua tatizo la sumu yake kwa kupitia tendo la haki la Yesu, ambalo ni ubatizo wake wa haki na kifo chake Msalabani. Pia maelezo haya ulikuwa ni unabii kuhusu Yesu ambaye atakuja ulimwenguni na kuupokea ubatizo wa upatanisho na kisha kuipokea adhabu ya dhambi badala ya wenye dhambi.

Sasa mmesikia kuwa “Wale wanaouangalia ubatizo wa usafisho wa dhambi ambao Yesu aliupokea ili kuzichukua dhambi zote na ile damu aliyoimwaga kwa kupitia kifo chake Msalabani kwa imani wataokolewa toka katika adhabu ya

dhambi zao zote.” Injili ya kweli ambayo Bwana ametupatia ni injili inayosema, “Ni lazima tumwamini Bwana aliyekuja hapa ulimwenguni akazichukua dhambi zote za ulimwengu kwa kuupokea ubatizo wa kuzichukua dhambi, akaimwaga damu yake Msalabani kama gharama ya dhambi hizo, na kisha akafufuka tena toka kwa wafu na akatuokoa kikamilifu ili sisi tuweze kupokea wokovu toka katika dhambi.”

Utaishi Ikiwa Utamwalia Nyoka wa Shaba

Kati ya watu waliokuwa wakiumwa na nyoka wakati walipomlalamikia Mungu katika Kitabu cha Hesabu, basi wale wote waliolisikiliza Neno la Musa na wakamwalia nyoka wa shaba aliyekuwa amewekwa juu ya mti walipona majeraha ya kuumwa na nyoka kikamilifu kwa kupitia imani yao. Vivyo hivyo, watu wanaoamini katika ubatizo wa Yesu na damu yake Msalabani katika nyakati za leo wanaweza pia kupna kabisa toka katika dhambi zao zote na adhabu ya dhambi mara moja; lakini wale wasioamini hivi hawawezi kuupokea wokovu toka katika dhambi zao sawa kabisa na wale walioifanya mioyo yao migumu kwa kutoliamini Neno la Mungu na kumwalia yule nyoka wa shaba aliyekuwa amewekwa mtini ambao walikufa kwa sababu sumu ya nyoka ilienea katika miili yao.

Kama vile Neno lilivyoandikwa katika Yohana 3:16, *“Kwa maana jinsi hii Mungu aliupenda ulimwengu”* na kama vil Neno toka Yohana 3:14 linavyosema, *“Na kama vile Musa alivyomwinua yule nyoka jangwani, vivyo hivyo Mwana wa Adamu hana budi kuinuliwa,”* Yesu Kristo aliyekuwa amezichukua dhambi zote za ulimwengu katika mwiliw ake kwa kupitia ubatizo wa upatanisho alipaswa kuinuliwa juu Msalabani na hatimaye akaziondolea mbali dhambi zetu zote

pasipo kuacha mabaki yoyote yale. Na wale wanaoamini katika yote haya wanaweza kufanyika wana wa Mungu na wakaenda katika Ufalme wa Mbinguni. Yesu aliupokea ubatizo toka kwa Yohana Mbatizaji kwa mtindo wa kuwekewa mikono na akaimwaga damu yake, akafa Msalabani hali akiwa na dhambi za uimwengu, na akafufuka toka kwa wafu. Watu wote wanaweza kuupokea wokovu wa kweli kwa kumwangalia Yesu kwa imani, Yeye ambaye ametuokoa sisi kwa kupitia ubatizo wa upatanisho na damu yake Msalabani.

Yohana Mbatizaji alisema, “Ninyi wenyewe mwanishuhudia kuwa nalisema nanyi kuwa, ‘Mimi siye Kristo,’” na kwamba “Mimi si si Bwana na si Mwokozi, bali Kristo ndiye Mwokozi wa kweli. Mimi ni mmoja wa watumishi wake aliyetumwa mbele yake. Mimi ni mtumishi wa Mungu ambaye nitazihamishia dhambi za ulimwengu kwenda kwa Yesu na Yesu ni Bwana harusi.” Pia Yohana Mbatizaji alisema, *“Aliye naye bibi harusi ndiye bwana harusi; lakini rafiki yake bwana harusi, yeye anayesimama na kumsikia, aifurahia sana sauti yake bwana harusi. Basi hii furaha yangu imetimia. Yeye hana budi kuzidi, bali mimi kupungua”* (Yohana 3:29-30). Kisha Yesu akafanyika kuwa Bwana wetu wa kweli kwa mujibu wa ushuhuda huu. Yohana Mbatizaji alimbatiza Yesu na akazihamishia dhambi zetu zote kwenda katika kichwa cha Yesu na hivyo wale wote wanaomwamini Yesu kwa mioyo yao yote, Yeye aliyezipokea dhambi na kulipa gharama ya dhambi kwa kifo chake watapokea wokovu toka katika dhambi na kisha kupata baraka ya uzima wa milele. Mungu alitupatia injili ya ubatizo wa Mungu na damu inayowafanya wenye dhambi wote kuwa wenye haki kwa imani. Kwa kupitia imani hii, wale wote wanaouamini ubagizo wa Yesu wa kuzichukua dhambi na damu yake msalabani wanapokea wokovu. Ni lazima upokee ondoleo sahihi la dhambi kwa kuamini injili hii kwa moyo wako wote.

Maombi ya Kweli Yanaweza Kutolewa Kwa Kuamini Katika Ubatizo wa Yesu Unaozisafisha Dhambi za Ulimwengu

Hata watumishi wa Mungu hawawezi kumbatiza au kumwombe mtu yeyote yule. Wanawaomba na kuwabatiza wale ambao wanaouamini ubatizo wa kusafisha dhambi na damu ya Msalaba kama ushahidi wa imani yao. Wakati mtumishi anayebatiza anapombatiza mtakatifu aliyezaliwa tena upya anayeamini katika injili ya maji na Roho, basi mtumishi huyo anaweka mikono yake juu ya kichwa cha mtakatifu huyo na kuomba hivi, “Mungu, ninakuomba umbariki huyu kaka (au dada) katika mwili na katika roho, ili kwamba aweze kukutumikia wewe kwa uaminifu katika maisha yake yote.” Maombi haya yanatokana na fikra kuwa mtumishi pamoja na anayebatizwa wanaamini kwa mioyo yao injili ya ubatizo na damu ya Yesu.

Lakini watu wanapokea ubatizo kwa sababu ipi? Ubatizo ni ishara kuwa dhambi zangu zote zimehamishiwa kwenda kwa Yesu kwa kupitia ule ubatizo ambao Yesu aliupokea na kwamba nilikufa pamoja naye wakati Yesu Kristo alipokufa Msalabani na kisha nikafufuka pamoja naye wakati Yesu alipofufuka. Hivyo, wakati mtu anapoupokea ubatizo ambao ni unafanana na ule ambao Yesu aliupokea, basi mtu huyo anakiri kuwa amepokea wokovu kwa kuamini kikamilifu juu ya ubatizo wa Yesu na damu yake aliyoimwaga Msalabani. Ubatizo wa maji unafanyika kwa sababu hiyo. Wale wanaoamini katika mioyo yao kwamba ule ubatizo ambao Yesu aliupokea ulikuwa na lengo la kusamehe na kuzipatanisha dhambi zao basi watu hao wanaweza kupokea ubatizo katika jina la Mungu Baba, Mwana, na Roho Mtakatifu. Hii ni kwa sababu watu hao wamekwisha okolewa toka katika dhambi

zote za ulimwengu. Dhumuni la halisi la ubatizo wa kidesturi tunaoufanya ni kwa ajili ya anayebatizwa kuthibitisha kuwa amefanyika kuwa kiumbe kipya na kwamba nafsi yake ya kale imekufa na kupita. Kama ilivyoandikwa katika 2 Wakorintho 5:17, “Hata imekuwa, mtu akiwa ndani ya Kristo amekuwa kiumbe kipya; ya kale yamepita tazama! Yamekuwa mapya”

Maisha ya imani mara baada ya kupokea ondoleo la dhambi yanapaswa kuwa ya kiimani kwa kuamini na kulifuata Neno la Mungu lililoandikwa. Hatupaswi kuishi maisha ya kiimani kwa kufuata hisia zetu. Imani ya kweli inasimama katika tumaini letu kuwa Yesu alizichukua dhambi zetu zote kwa kupitia ubatizo wa kuzichukua dhambi. Yesu alizioshelea mbali na kuzichukua dhambi zetu zote ambazo zilikuwa ni kubwa na nene kama vile mawingu na ukungu kwa kupitia ubatizo toka kwa Yohana Mbatizaji. Kisha Yesu akaipokea adhabu Msalabani kwa ajili ya hizo dhambi. Na kwa miaka mitatu kabla hajasulubiwa, aliihubiri injili akiwa kama Mwanakondoo wa Mungu, pia aliushuhudia ukweli kuwa alikuwa ni Mungu kwa kuzifanya kazi za Mungu Baba. Ni lazima tuamini katika mioyo yetu kuwa Bwana alizichukua dhambi zetu zote kwa kupitia ubatizo wa kuzichukua dhambi na akaishi kila siku akilithibitisha hili kwa kupitia Neno lililoandikwa.

Hata kama mtu amezaliwa tena upya kwa kupitia injili ya maji na Roho, kama anafikiria kwa msingi wa mawazo ya kimwili, basi anaweza kufikiria hivi, “Ninawezaje kuwa sina dhambi wakati siwezi kufanya lolote zaidi ya kutenda dhambi kila siku.” Hivyo basi, wale waliopokea ondoleo la dhambi ni lazima waachane na mawazo binafsi ya kimwili kisha wamtumikie Mungu kwa kuliadini Neno la Mungu na kuitumikia Injili ya maji na Roho wanapokuwa wakiishi hapa ulimwenguni. Haya ndio maisha ya watu waliopokea ondoleo

la dhambi na hii ndio imani ya kweli.

Yohana Mbatizaji alitangaza kuwa Yesu aliyepatanisha dhambi za ulimwengu ni “Mwanakondoo wa Mungu azichukuaye dhambi za ulimwengu” (Yohana 1:29), na kwamba alizichukua dhambi hata zile ambazo tutazifanya kesho na dhambi zote ambazo tumezifanya hadi sasa. Vyanzo vyote vya dhambi ambavyo tulizaliwa navyo toka kwa mama zetu, na dhambi zote kubwa na ndogo ambazo tumezifanya katika ulimwengu huu tangu tulipozaliwa—basi dhambi hizo zote zilipitishwa kwenda kwa Yesu mara tu alipoupokea ubatizo toka kwa Yohana Mbatizaji sawasawa na ushuhuda wake. Kwa kweli ni lazima tuuthibitishe ubatizo wa kuzichukulia dhambi ambao Yesu aliupokea kwa kupitia Maandiko na kisha tuitumie injili hii katika maisha yetu. Pia ni lazima tuamini kwa uthibitisho kwamba sio zile dhambi ambazo tumezifanya tu ndizo zilizopitishwa kwa Yesu Kristo, bali kwamba Yesu Kristo alizichukua dhambi zote tunazozifanya katika maisha yetu kwa kupitia ubatizo wa upatanisho. Dhambi ambazo tumezifanya tangu tulipozaliwa, pamoja na zile ambazo tutazifanya hapo baadaye zilihamishwa kwenda kwa Yesu wakati Yesu alipoupokea ubatizo takaribani miaka 2000 iliyopita. Hii ni injili ya kweli ya maji na Roho iliyofunuliwa katika Neno la Mungu. Hii ni injili ya kweli ya Mbinguni. Ni lazima tuifahamu na kuamini injili hii. Kuamini injili hii ni imani ya kweli na baraka ya wokovu.

Injili ya Yohana 1:29 inashuhudia kuhusu Yesu, “*Tazama! Mwanakondoo wa Mungu aichukuaye dhambi ya ulimwengu!*” Pia Maandiko yanasema, “Yale aliyoyaona na kuyasikia ndiyo anayoyashuhudia, wala hakuna anayeukubali ushuhuda wake. Yeye aliyeukubali ushuhuda wake ametia muhuri ya kwamba Mungu ni kweli” (Yohana 3:32-33). Wale wanaouamini ubatizo wa kuzisamehe dhambi na katika damu

ya Msalaba kuwa ni Ukweli wanapokea wokovu toka katika dhambi zote za ulimwengu. Lakini wale wasioifahamu kweli kwamba dhambi zao zimehamishwa kwa kupitia ubatizo ambao Yesu aliupokea na wasioamin hivi basi hao wanaendelea kuamini kuwa zile dhambi wanazozifanya kila siku bado zimo ndani yao na hatimaye wanaelekea katika mlango wa kuzimu. Kwa kuwa watu wengi hawaufahamu Ukweli wa ubatizo ambao Yesu aliupokea na damu yake Msalabani, basi ndio maana wanadanganywa na waalimu wa uongo na hivyo wanaishi katika imani potofu.

Kufikiria kama wanavyofikiria wao, kwamba una dhambi pamoja na kuwa umemwamini Yesu ni ushahidi kuwa umedanganywa na Ibilisi Shetani. Ibilisi anawaeleza hivi, “Unawezaje kuwa hauna dhambi wakati unafanya dhambi kila siku?” Lakini, pamoja na kuwa unaweza kuwa ni mtu mwenye dhambi kwa kufikiria kimwili, ukweli ni kuwa unaweza kupokea ondoleo la dhambi ikiwa unaliamini Neno la Mungu lililojidihirisha kupitia injili ya maji na Roho. Ibilisi mjanja anawadanganya watu wasio na imani kwa kusema, “Wewe ni mwenye dhambi kwa sababu unafanya dhambi kila siku.” Lakini tunaweza kulishinda jaribu hilo la Ibilisi ikiwa tutakuwa ni watu tusio na dhambi kwa kuamini katika ubatizo na damu ya Yesu. Je, unafikiri kuwa wewe ni mwenye dhambi pamoja na kuwa unamwamini Yesu? Sisi tunaoamini katika injili ya maji na Roho hatuna dhambi. Yesu alizitoweshea mbali dhambi zetu zote kwa kupitia ubatizo na damu yake.

Ukweli ni kuwa hatuwezi kusema kuwa hatuna dhambi hasa kama tutaangalia yale tunayoyafanya wakati tunaishi katika ulimwengu huu. Lakini tumepokea ondoleo la kweli la dhambi kwa kuuamini wokovu wake kwa kupitia injili ya ubatizo na damu ya Yesu. Tunafikia hatua ya kufahamu kuwa hatuna dhambi ndani yetu pale tunapoamini kikamilifu juu ya

ubatizo wa Yesu wa upatanisho wa dhambi na damu yake Msalabani. Tunaimba, “Nimepokea ondoleo la dhambi. Umepokea ondoleo la dhambi kwa kupitia ubatizo wa Yesu. Nimepata wokovu, Umepata wokovu” kisha tunataka kuwashirikisha wengine injili hii hali tukiwa na mioyo yenye furaha sana. Kwa jinsi hiyo tunaongozwa na Roho Mtakatifu.

Ninausisitiza ukweli kuwa mtu aliyezaliwa tena upya hana dhambi kwa kuwa kuna ubatizo wa Yesu wa upatanisho na kuna huruma ya damu. Kabla hatujaufahamu ubatizo wa Yesu wa upatanisho mioyo yetu ilikuwa katika kifungo cha dhambi, inawezekanaje basi tukawa na dhambi ndani yetu wakati tunaamini kuwa dhambi zetu zote zimehamishiwa kwenda kwa Yesu kwa kupitia ubatizo wa Yesu wa msamaha? Kama vile Warumi 8:1 inavyosema, “*Sasa, basi, hakuna hukumu ya adhabu juu yao walio katika Kristo Yesu,*” Ninataka mfahamu kwamba hakuna yoyote ile ndani yetu.

Neno la Mungu linathibitisha wokovu wa Yesu kwa kusema, “*Hili ni agano nitakaloagana nao baada ya siku zile, anena Bwana, Nitatia sheria zangu mioyoni mwao, Na katika nia zao nitaziandika*” (*Waebrania 10:16*). Tunapouamini ubatizo wa ondole la dhambi ambao Yesu aliupokea na damu yake Msalabani basi tunaweza kutambua kuwa hatuna dhambi; hivyo basi, hii injili tuliyopewa na Mungu ambayo imetufanya sisi kuwa wakamilifu na wasio na dhambi inakuwa ni kitu cha thamani sana. Maisha ya kweli ya kiroho, yanaonekana wazi kwa kupitia imani inayoamini katika Neno la Mungu lililoandikwa na katika injili ya maji na Roho.

Mtu Anayeamini Katika Ubatizo wa Yesu wa Upatanisho na Damu yake Msalabani Hawezi Tena Kuwa Mwenye Dhambi

Wale wanaoamini katika ubatizo ambao Yesu aliupokea na damu yake Msalabani hawana dhambi. Wakati nilipokuwa siamini katika moyo wangu juu ya injili ya maji na Roho, basi dhambi katika moyo wangu hazikuweza kuondoka hata pale nilipofanya sala za toba. Lakini siku moja, baada ya kuifahamu injili ya ubatizo wa Yesu wa upatanisho na Msalaba, nilitambua kuwa dhambi zangu zote zimeondolewa. Baadhi wanapoyaangali mabadiliko yetu huwa wanatuuliza hivi, “Kwa nini moyo wako umekuwa mweupe kiasi hiki?” Na tunapowajibu, “Ni kwa sababu sina dhambi katika moyo wangu,” ndipo hutuambia “Basi ikiwa hamna dhambi hatimaye mtatenda dhambi bila kujizuia!”

Huwa tunawajibu watu wa jinsi hiyo kwa namna hii, “Usiseme hivyo. Ingawa watu ni viumbe ambao hawawezi kujizuia zaidi ya kutenda dhambi, ukweli ni kuwa Yesu amekwisha zishughulikia dhambi zote za ulimwengu huu kwa kuupokea ubatizo wa upatanisho wa dhambi. Kwa sasa sina dhambi kwa kuwa ninaamini hivyo! Na ndio maana nina hamu ya kujitoa kuitumikia injili Kanisani, pia katika Warumi sura ya 6 Mungu ameandika kuwa kila mtu anapaswa kufanya hivi. Nina hamu ya kuifanya kazi ya haki kwa sababu sina dhambi katika moyo wangu. Kazi ya Mungu inatutaka tuamini na kuihubiri nguvu ya ubatizo wa Yesu wa ondoleo la dhambi na damu yake, na kwa sababu hiyo ni lazima tuihubiri injili ya ubatizo wa upatanisho na wokovu kwa ulimwengu mzima. Ikiwa tutamwamini Yesu ambaye ni Bwana wa upatizo wa upatanisho, basi ni hakika kuwa hatutakuwa wenye dhambi tena. Ni lazima tuamini wokovu wa ubatizo wa kuzisamehe

dhambi na upatanisho wa damu ya Mwana wa Mungu na ni lazima tuishike imani hii. Sasa ninashukuru! Sasa nimepokea wokovu. Sasa nimekuwa mmoja wa watu wa Mungu! Mim ni mwenye haki! Halleluya!” Je, unaweza kuifikiria furaha ya Mungu anapowaangalia watu wa imani kama hao?

Maandiko yanasema, “Tuseme nini basi? Tudumu katika dhambi ili neema izidi kuwa nyingi? Hasha! Sisi tulioifia dhambi tutaishije tena katika dhambi?” (Warumi 6:1-2). Pia andiko linasema, “Ni nini basi? Tufanye dhambi kwa sababu hatuwi chini ya sheria bali chini ya neema? Hasha! Hamjui ya kuwa kwake yeye ambaye mnajitoa nafsi zenu kuwa watumwa wake katika kumtii, mmekuwa watumwa wake yule mnayemtii, kwamba ni utumishi wa dhambi uleto mauti, au kwamba ni utumishi wa utii uleto haki. Lakini Mungu na ashuhukuriwe, kwa maana tulikuwa watumwa wa dhambi, lakini mlitii kwa mioyo yenu ile namna ya elimu ambayo mliwekwa chini yake; na mlipokwisha kuwekwa huru mbali na dhambi, mkawa watumwa wa haki. Nasema kwa jinsi ya kibinadamu kwa sababu ya udhaifu wa miili yenu. Kwa kuwa kama mlivyovitoa viungo vyenu vitumiwe na uchafu na uasi mpate kuasi, hivyo sasa vitoeni viungo vyenu vitumiwe na haki mpate kutakaswa” (Warumi 6:15-19).

Ni Nani Anayepokea Roho Mtakatifu wa Mungu?

Wale wanaopokea baraka za mbinguni ni watu ambao wamepokea wokovu toka katika dhambi zao zote kwa kuamini katika injili ya maji na Roho, ambayo ni injili ya ubatizo wa Yesu na damu yake. Matendo ya Mitume sura ya 2 aya ya 38-39 inaeleza jinsi ambavyo watu walimpokea Roho Mtakatifu: “Petro akwaambia, ‘Tubuni mkabatizwe kila mmoja kwa jina

lake Yesu Kristo, mpate ondoleo la dhambi zenu, nanyi mtapokea kipawa cha Roho Mtakatifu. Kwa kuwa ahadi hii ni kwa ajili yenu, na kwa watoto wenu, na kwa watu wote walio mbali, na kwa wote watakaotwa na Bwana Mungu wetu wamjie.” Kubatizwa kwa jina la Yesu Kristo maana yake ni kuamini kuwa Yesu alizichukua dhambi zetu zote na kwamba kwa sababu hiyo tunapokea usafisho wa dhambi kwa imani.

Tunampokea Roho Mtakatifu ambaye Mungu anamtoa kama kipawa pale tunapouamini ubatizo wa Yesu ambao umezichukulia mbali dhambi zote za ulimwengu na damu yake Msalabani. Mara tunapoamini katika ubatizo na damu ya Yesu kwa mioyo yetu yote, basi hapo ndipo Roho Mtakatifu anashuka katika mioyo yetu. Roho Mtakatifu wa Mungu anakuja katika mioyo ya waliozaliwa tena upya wakati wanapofahamu na kuuamini ukweli kuwa dhambi zao zote zimehamishwa kwa kupitia ubatizo wa Yesu Kristo na kwamba adhabu yote ya hizo dhambi imeondolewa kwa kupitia adhabu ya Yesu Msalabani. Hivyo basi, Roho Mtakatifu anatushuhudia na anasema, “Ndiyo, hiyo ni sahihi” hasa wakati tunapoamini juu ya ubatizo na damu ya Yesu kuwa ni Neno la wokovu wetu. Roho Mtakatifu anashuhudia, “Ni sahihi! Hauna dhambi. Unaamini kuwa Yesu aliupokea ubatizo ili kuzitoweshea mbali dhambi zako zote na kwamba Yeye aliyeimwaga damu yake Msalabani si mwingine bali ni Mwana wa Mungu.”

Sasa ni lazima tuuamini Ukweli wa injili ya maji na Roho katika mioyo yetu, ukweli unaosema Yesu aliupokea ubatizo wa kusafisha dhambi na akatuokoa sisi sote kwa kufa Msalabani kwa niaba yetu. Hapo ndipo tunapofikia hatua ya kufahamu kuwa Roho wa Mungu anakaa ndani ya mioyo ya wale wote wanaoamini katika ubatizo wa kuzichukua dhambi na damu ya Msalaba. Ninamshukuru Mungu kwa kuamini katika injili ya maji na Roho kwa moyo wangu wote. Halleluya! ☒

MAHUBIRI

8



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Ieneza Injili ya Kweli na Tendo la Haki la Yesu

< Mathayo 3:1-17 >

“Siku zile aliondokea Yohana Mbatizaji akihubiri katika nyika ya Uyahudi, na kusema, ‘Tubuni; kwa maana ufalme wa mbinguni umekaribia.’ Kwa sababu huyo ndiye aliyenenwa na nabii Isaya, akisema:

‘Sauti ya mtu aliaye nyikani:

‘Itengenezeni njia ya BWANA;

Yanyoosheni mapito yake.’”

Naye Yohana mwenyewe alikuwa na vazi lake la singa za ngamia, na mshipi wa ngozi kiunoni mwake; na chakula chake kilikuwa nzige na asali ya mwitu. Ndipo walipomwendea Yerusalemu, na Uyahudi wote, na nchi zote za kandokando ya Yordani; naye akawabatiza katika mto wa Yordani, huku wakiziungama dhambi zao. Hata alipoona wengi miongoni mwa Mafarisayo na Masadukayo wakiujia ubatizo wake, aliwaambaia, Enyi wazao wa nyoka, ni nani aliyewaonya ninyi kuikimbia hasira itakayokuja? Basi zaeni matunda yapasayo toba; wala msiwaze mioyoni mwenu kwamba, Tunaye baba, ndiye Ibrahimu; kwa maana nawaambia ya kwamba Mungu aweza katika mawe haya kumwinulia Ibrahimu watoto. Na shoka limekwisha kuwekwa penye mashina ya miti; basi kila mti usiozaa matunda mazuri hukatwa na kutupwa motoni. Kweli mimi nawabatiza kwa maji kwa ajili ya toba; bali yeye ajaye nyuma yangu ana nguvu kuliko mimi, wala sistahili hata kuvichukua viatu vyake; yeye atawabatiza kwa Roho

Mtakatifu na kwa moto. Ambaye pepeto lake li mkononi mwake, naye atausafisha sana uwanda wake; na kuikusanya ngano yake ghalani, bali makapi atayateketeza kwa moto usiozimika. Wakati huo Yesu akaja kutoka Galilaya mpaka Yordani kwa Yohana ili abatizwe. Lakini Yohana alitaka kumzuia akisema, ‘Mimi nahitaji kubatizwa na wewe, nawe waja kwangu?’ Yesu akajibu akamwambia, Kubali hivi sasa; kwa kuwa ndivyo itupasavyo kuitimiza haki yote. Basi akamkubali. Naye Yesu alipokwisha kubatizwa mara akapanda kutoka majini; na tazama, mbingu zikamfunukia, akamwona Roho wa Mungu akishuka kama hua, akija juu yake; na tazama, sauti kutoka mbinguni ikisema, ‘Huyu ni mwanangu, mpendwa wangu, ninayependezwa naye.’”

Ni hakika kuwa Yohana Mbatizaji alikuwa ni mtu muhimu sana katika Biblia. Yohana Mbatizaji aliwalilia watu wa Israeli ili wafanye toba. Ni lazima tuzikumbuke kikamilifu kazi za Yesu na Yohana Mbatizaji. Yesu, aliyekuja hapa duniani aliwaokoa wanadamu, akitii mapenzi ya Mungu wakiwa pamoja na Yohana Mbatizaji. Yohana Mbatizaji na Yesu walikuja hapa duniani na wakayakamilisha matendo ya haki.

Yohana Mbatizaji aliwahasisha watu wa Israeli kumrudia Mungu. Tunaweza kuona katika Mathayo 3:7 kwamba kwa ujasiri kabisa Yohana Mbatizaji aliwakemea Mafarisayo na Masadukayo pale alipowaona wakimjia kwa ubatizo kwa kusema: *“Enyi wazao wa nyoka, ni nani aliyewaonya ninyi kuikimbia hasira itakayokuja?”* Huyu Yohana Mbatizaji aliwakemea watu wa Israeli kwa ukali kama nabii: *“Tubuni, enyi wazao wa nyoka!”* Yohana Mbatizaji

alikuwa ni nabii aliyefanya matendo ya haki mbele ya macho ya Mungu na alikuwa ni nabii wa mwisho katika kipindi cha Agano la Kale.

Baadhi ya watu wanashangaa kuwa ilikuwaje kwa Yohana Mbatizaji kama nabii wa Mungu kusema maneno ya kutisha kama “Wazao wa nyoka.” Hata hivyo, Biblia imeandika na inatueleza kuwa lile alilolifanya lilikuwa ni tendo la haki mbele za Mungu. Manabii wote wanatakiwa kuwa ni watu wanaoweza kulipigia kelele tendo la haki ya Mungu. Kisha akatokea mwingine ambaye naye aliyatekeleza matendo ya haki pamoja na Yohana Mbatizaji. Na huyo alikuwa ni Yesu.

Katika Biblia, Masadukayo ni wanasiasa. Ni wanasiasa wa ulimwengu. Wao wanaweka mkazo zaidi katika mambo ya siasa za ulimwengu huu kuliko kumtumikia Mungu. Kwa upande mwingine, Mafarisayo walikuwa ni viongozi wa dini wahafidhina. Kwa pamoja walidai kuliadini Neno la Mungu kama lilivyokuwa, lakini walimkana Yesu.

Mungu alisikitishwa sana alipowaona watu hawa. Je, watu hawa mbele za Mungu ni waovu au la? Ukweli ni kuwa mbele za macho ya Mungu Mafarisayo na Masadukayo ni waovu.

Mafarisayo hawakumwamini Yesu kuwa ni Masihi. Na hii ndiyo sababu ilikuwa sahihi kwa Yohana Mbatizaji kuwaita kuwa ni wazao wa nyoka. Yohana Mbatizaji hawakuwambeleza watu wa kidini wa wakati ule. Bali badala ya kuwambeleza Mafarisayo na Masadukayo, yeye alijaribu kuwageuza kwa kuwakemea kuwa ni wazao wa nyoka. Yohana Mbatizaji aliwafundisha watu waliokuwa wakimrudia Mungu kuwa kutubu pekee hakutoshi, bali wanapaswa kuwa na matunda yanayoendana na toba yao na kwamba walipaswa kuachana na uovu. Kwa mfano, walipaswa kwenda kurudisha fedha zote walizokuwa wamewanyonya watu. Kisha baada ya kufanya hivyo ndipo walipapaswa kwenda kwake kwa ubatizo

na hivyo kumrudia Mungu.

Tunapoyasikiliza madai yake, kwa hakika tunaona kuwa alikuwa ni mtumishi aliyetumwa na Mungu. Katika kipindi ambacho Yohana Mbatizaji alionekana, kilikuwa pia ndio kipindi ambacho Yesu Kristo alianza huduma yake ya wazi. Tangazo la Yohana Mbatizaji lilikuwa na lengo la kuisaidia kazi ya Yesu. Kwa kipindi hicho hakukuwa na mtumishi wa Mungu aliyewahi kutokea kwa watu wa Israeli kwa takribani miaka 400. Hivyo, kutokea kwa Yohana Mbatizaji kulikuwa ni fursa pia kwa watu wa Israeli kusikia majaliwa ya Mungu na sauti ya Mungu.

Yohana Mbatizaji alisema: “Wazao wa nyoka, tubuni na mumrudie Mungu. Geukeni toka katika kuabudu miungu. Mnapaswa kuikana miungu ya kigeni na kisha mumrudie Mungu ili kuikwepa hukumu ya Mungu.” Kwa kweli ilikuwa ni baraka kubwa kwa watu wa Israeli kwa mtumishi wa Mungu kuwakemea na kuwashauri hivyo. Taifa zima la Israeli lilitikisika kwa maneno ya Yohana Mbatizaji. Muujiza wa Makuhani Wakuu, Masadukayo, Mafarisayo kuja kwa Yohana Mbatizaji kuungama na kutubu na kisha kumrudia Mungu ulitokea.

Yohana Mbatizaji anashuhudia juu ya uwezo wa Yesu Kristo, *“Kweli mimi nawabatiza kwa maji kwa ajili ya toba; bali yeye ajaye nyuma yangu ana nguvu kuliko mimi, wala sistahili hata kuvichukua viatu vyake; yeye atawabatiza kwa Roho Mtakatifu na kwa moto. Ambaye pepeto lake li mkononi mwake, naye atausafisha sana uwanda wake; na kuikusanya ngano yake ghalani, bali makapi atayateketeza kwa moto usiozimika.”* (Mathayo 3:11-12). Anashuhudia kuwa yeye anafanya kazi ya kuwakemea ili kuwageuza watu wamwendee Mungu, lakini anasema kuwa yeye anayekuja baada yake atabatiza kwa Roho Mtakatifu na kwa moto.

Yohana Mbatizaji alisema kuwa watu waliozaliwa tena upya kwa kumwamini Yesu watakusanyika Mbinungi kama vile ngano na wale ambao hawajazaliwa tena upya wataatengwa kwa pepeteo kama vile makapi na kisha watachomwa kwa moto usiozimika.

Ni lazima tufahamu kuwa Yohana Mbatizaji aliwahubiria watu ili wafanye toba kwa Mungu, na kwamba Yesu Kristo, alipokuja hapa ulimwenguni, aliupokea ubatizo toka kwa Yohana Mbatizaji. Kwa mujibu wa Injili ya Luka, Yesu alibatizwa alipokuwa na miaka thelathini (Luka 3:23). Ni kwa nini Yesu alitaka kubatizwa alipokuwa na miaka thelathini? Hii ni kwa sababu ilimpasa mtu kuwa ni miaka ‘thelathini’ ndipo aweze kuyachukua majukumu ya Ukuhani Mkuu. Katika Agano la Kale, Mungu alisema kuwa watoto wa Makuhani Wakuu wataweza kuchukua majukumu ya Ukuhani Mkuu watakapofikisha miaka thelathini (Hesabu 4:35). Vivyo hivyo, Yesu alipofikisha miaka 30, alibatizwa na Yohana Mbatizaji.

Sababu iliyomfanya Yesu kuupokea ubatizo toka kwa Yohana Mbatizaji ilikuwa ni kuitimiza haki yote ya Mungu. Yesu alibatizwa na Yohana Mbatizaji ili kuzichukua dhambi za kila mmoja hapa ulimwenguni.

Hata hivyo, watu wanachanganyikiwa na hawafahamu ni kwa nini Yesu alibatizwa na Yohana Mbatizaji. Ubatizo wa Yesu uliofanywa na Yohana Mbatizaji ni siri iliyofunuliwa katika Biblia. Watu wengi hawaifahamu siri ya ubatizo na wanaelewa kimakosa juu ya ubatizo wa Yesu. Wanadhani kuwa alibatizwa ili kutuonyesha mfano au kuonyesha unyenyekevu.

Ni lazima tufahamu kuwa Yesu alikuja hapa ulimwenguni na alibatizwa ili kumwokoza kila mmoja hapa ulimwenguni toka katika dhambi. Yesu aliweza kulitimiza tendo la haki la kuzichukua dhambi za ulimwengu kwa kubatizwa na Yohana

Mbatizaji pale alipokuja hapa ulimwenguni. Tendo la haki ni kwamba Yesu alizichukua dhambi zote za ulimwengu mara moja na kwa wote kwa kubatizwa na Yohana Mbatizaji. Ubatizo wa Yesu ulikuwa na lengo la kuitimiza haki yote ya Mungu ambayo ilikuwa ni ya kumpendeza Mungu. Bwana wetu alikuja hapa ulimwengu kutuokoa toka katika dhambi zetu zote. Alibatizwa ili kuzichukua dhambi zako na zangu mara moja na kwa wote na kisha akaimwaga damu hadi kifo kwa ajili yetu. Bwana alizichukua dhambi zote za ulimwengu mara moja na kwa wote.

Katika Mathayo 3:15, “*haki yote*” ina maanisha ni tendo la Yesu kuzichukua dhambi zote za ulimwengu kwa kubatizwa na Yohana, na kisha kumwaga damu haki kifo Msalabani. Kwa wakati ule, Yesu alizichukua dhambi zote za ulimwengu, yaani dhambi zetu zote. Hii ni bahati nzuri kwetu, lakini je tunamshukuru Mungu kwa hilo?

Wapendwa Wakristo, je, katika ulimwengu huu tunafanya dhambi au la? Ukweli ni kuwa tunafanya dhambi. Je, tunafanya dhambi chache hapa na pale? Je, tunafanya dhambi kubwa? Ni hakika kuwa unafanya dhambi nyingi sana katika ulimwengu huu, na dhambi zote unazozifanya zimejumuishwa katika dhambi zote za ulimwengu. Yesu alizibeba dhambi zote za ulimwengu mara moja na kwa wote kwa kubatizwa na Yohana Mbatizaji, na akaimwaga damu yake hadi kifo Msalabani kwa ajili ya wote, na kwa sababu hiyo akasafishiria mbali dhambi na hukumu.

Ingeliwezekanaje basi kwa wewe na mimi kuwa wasio na dhambi ikiwa Yesu asingalizichukua dhambi zako zote na zangu mara moja na kwa wote? Ukweli huu ndiyo haki ambayo Bwana wetu aliitimiliza kwa kubatizwa na kuimwaga damu yake alipokuja hapa ulimwenguni. Yesu ni Mwokozi aliyekuja hapa ulimwengu kama mwana wa Mungu na akazishughulikia

dhambi za ulimwengu na hukumu ya dhambi kwa ajili yetu.

Tunachopaswa Kukumbuka

Tunapoisherekea Krismasi mwaka huu, ni lazima tukumbuke kuwa Yohana Mbatizaji na Yesu waliitimiza haki ya Mungu ambayo hakuna mtu awaye yote ambaye angeliweza kufanya hivyo. Tunapoishereka Krismasi, tunahitaji kufikiri: ‘ninawezaji kujiunga katika kazi hii ya haki ninapoisherekea Krismasi, tunapomkumbuka Bwana wetu aliyeitimiza haki?’ kuliko ‘ninawezaje kufurahi? Ninawezaje kujenga kumbukumbu nzuri?’ Kwa hakika tunaweza kuikumbuka kazi ya Yohana Mbatizaji na ile ya Yesu. Sisi pia, tunapaswa kuwa wale wanaomfikiria Yesu na Yohana Mbatizaji walioitimiza haki yote katika Krismasi hii. Tunapaswa kuyatoa maisha yetu katika kuieneza hiyo haki ya Mungu. Baada ya kuwa tumepokea ondoleo la dhambi kwa kuamini katika injili ya maji na Roho, basi ni lazima tuendeleo kuishi maisha yanayoieneza injili hii.

Je, tutakuwa akina nani ikiwa hatutajitolea katika huduma hii ya haki inayoieneza injili ya maji na Roho? Tunawezaje kutegemea kuzipata baraka za Mungu ikiwa hatushiriki katika huduma hii ya haki? Ni lazima tushiriki kwa kuwa tunafahamu kuwa Yesu ametuokoa kwa kuzichukua dhambi zote za wanadamu. Je, si jambo muhimu kuieneza injili ya maji na Roho katika ulimwengu wote? Je, tunaweza kuyafanya matendo ya haki kwa jinsi ya mwili? Je, tunaweza kukwepa kutenda dhambi kwa kutojaribu kuzifanya? Je, sisi wenye mapungufu, tunawezaje basi kuishi maisha ya haki baada ya kuwa tumepokea ondoleo la dhambi? Je, ingeliwezekana kuieneza injili ya maji na Roho ambayo imetuokoa toka katika

dhambi za ulimwengu kwa kupitia Yesu aliyekuja hapa ulimwenguni, akazibelea dhambi zote kwenda Msalabani, akaimwaga damu yake na kufa ili kwamba aweze kuichukua hukumu ya dhambi badala yetu? Je, ni kazi gani ambayo ingeliweza kuwa njema ambayo mimi na wewe tunaifanya hapa ulimwenguni? Je, Mungu atafurahishwa na tabia zetu njema na matendo mema yanayokumbukwa?

Kazi ambayo ni ya haki kabisa kwetu sisi hapa ulimwenguni ni kuieneza injili ya maji na Roho. Jambo la haki ni kuitoa mioyo yetu yote na nguvu katika kuieneza injili ya maji na Roho. Haijalishi una mwonekano gani, Mungu atafurahishwa na wewe pale tu utakaposhiriki katika kuieneza injili ya maji na Roho.

Wakati Yesu alipokuwa akibatizwa alisema: *“kwa kuwa ndivyo itupasavyo kuitimiza haki yote. Basi akamkubali”* (Mathayo 3:15); je, maneno hayo yana maanisha nini? Haya ni maneno ya ushuhuda yanayotueleza kuwa Yesu alizichukua dhambi zote za ulimwengu ambazo tulikuwa tumezifanya kwa ubatizo aliokuwa ameupokea toka kwa Yohana Mbatizaji. Wakati Yesu alipokuwa amebatizwa na Yohana Mbatizaji, dhambi zote za ulimwengu zilipitishwa kwenda kwa Yesu mara moja na kwa wote. Yesu alizipokea dhambi zote za ulimwengu zikiwemo dhambi zako na zangu kwa kupitia ubatizo wake mara moja na kwa wote. Hivi ndivyo mwili wa Yesu ulivyoweza kuzichukua dhambi zote za ulimwengu, na hivi ndivyo ilivyofanya iwezekane kwa Yeye kuipokea hukumu pale mikono na miguu yake ilipoangikwa Msalabani. Hata hivyo, hii haimaanishi kuwa dhambi ilikuwa juu ya nafsi yake. Ni lazima uupokee wokovu wako kwa kuamini kwamba Yesu alikuja hapa ulimwengu na akaitimiza haki ya Mungu, na kwamba Yohana Mbatizaji alishiriki katika huduma hii kuu kwa kuzipitisha dhambi kwenda kwa Yesu kwa kumwekea

mikono juu yake.

Yohana Mbatizaji ambaye ni mwakilishi mkuu miongoni mwa wale waliozaliwa na mwanamke alifanya mambo mawili kama mtumishi wa Mungu.

Jambo la kwanza lilikuwa ni kuuonyesha bayana uovu wa kila mmoja. Aliwahubiria watu ili wamrudie Mungu kwa kuwakemea akisema, “Kuitumikia miungu mingine badala ya Mungu ni dhambi.” Jambo la pili ni kwamba alimbatiza Yesu ili kuzipitisha dhambi za kila mmoja hapa ulimwenguni kwenda kwa Yesu. Hii ni haki ya Mungu ambayo ilikuwapo kwa ajili yako na mimi. Hii ndiyo ile haki ambayo Bwana likuja kuitimiza hapa ulimwenguni.

Yesu alikuja hapa ulimwenguni ili kuzipokea dhambi zako na zangu na kuzibeba. Kisha akaupokea ubatizo ili kuzibeba dhambi za kila mmoja hapa ulimwenguni, yaani dhambi zako, dhambi za wanao, na dhambi za wana wao, dhambi za wazazi wako, dhambi za mababu zako, dhambi za uikoo wako, na dhambi za kila mmoja tangu Adamu hadi siku ya mwisho, ingawa hatujui ni lini ulimwengu huu utakoma. Yesu aliupokea ubatizo ili kuzitoweshea mbali dhambi zetu na kisha kutusafisha na hizo dhambi.

Neno ‘kubatiza’ lina maanisha ni “kusafisha kwa kuzamiza, kulowanisha, kuosha, kufanya kitu kiwe safi kwa maji, kunawa, au kuoga.” Hivyo, Yesu alibatizwa ili kuzibeba dhambi zote za ulimwengu. Yesu alizisafisha dhambi zetu kwa kuzipokea kupitia kwa Yohana Mbatizaji. Ni kama vile nguo zako zinavyooshwa hasa unapoziosha kwa maji, ni kama vile uchafu wako unapoondoka wakati unapooga kwa maji, Yesu alizisafisha dhambi zetu na kutufanya safi kwa kuupokea ubatizo na akazichukua dhambi zote za mioyo yetu kupitia Yohana Mbatizaji.

Ndugu zangu Wakristo, je, unaamini katika injili ya maji

na Roho? —Ndiyo.— Je, unaamini kuwa Bwana alikuja hapa ulimwenguni, alibatizwa, na akafa Msalabani ili kuitimiza haki ya Mungu?

Tunapoisherekea Krismasi, ni lazima tumkumbuke Yesu Bwana wetu aliyeitimiza haki kwa ajili yetu. Imelandikwa, *“Basi, mlapo, au mnywapo, au mtendapo neno lolote, fanyeni yote kwa utukufu wa Mungu” (1 Wakorintho 10:31)*. Tunapoisherekea Krismasi, tunapaswa kutafakari kwa yale ambayo ni haki, yaani tunawezaje kuishi maisha ya haki na kuamini kwa uthabiti. Wewe na mimi tunapaswa kuiweka imani yetu katika Yesu Kristo hapa ulimwenguni na kufahamu kuwa ipo siku tutarudi kwa Mungu. Tunapaswa kuyaishi haya maisha tuliyonayo hapaulimwengu kwa kuifanya kazi ya haki. Je, ni kazi gani ambazo tunapaswa kuzifanya mbele za Mungu? Ni lazima tufikirie kwanza juu ya haki. Inatupasa kufikiria kwa kina kuwa haki yenyewe ni kitu gani kabla hatujafikiria ikiwa tunapaswa kuishi kwa ajili ya haki ya Mungu.

Ninamshukuru Mungu sana ninaposherekea Krismasi hii. Na ninakuombea ili kwamba uweze kufanya “jambo la haki.” Ni jambo gani la haki ambalo unaweza kulifanya mbele za Mungu? Je, tunaweza kufanya jambo lolote la haki kwa kujitahidi kutenda vizuri kwa miili yetu? Usijaribu kamwe kufikiria hivyo. Kujaribu kufanya jambo la haki kwa mwili ni sawa na mnara uliojengwa juu ya mchanga ambao unaweza kuanguka wakati wowote. Hata kama umekuwa mwema katika maisha yako yote, basi ukifanya kosa moja tu, basi ile haki yote ya kibinadamu inakuwa imepotea.

Haki ya kweli ni kuieneza kila siku injili ya maji na Roho, ambayo kwa hiyo Mungu amezifutulia mbali dhambi zetu zote. Kushiriki katika kuieneza injili hii ni kushhiriki katika kazi ya Mungu. Wewe na mimi tunaishi kwa ajili ya dhumuni la kazi hii. Haijalishi ikiwa unafanya kazi katika kampuni au unamiliki

biashara yako, basi tambua kuwa ni jambo la haki kwako kujitoa kwa ajili ya injili hii ya maji na Roho. Ikiwa hauwezi kufanya hivyo wewe mwenyewe, basi itakuwa haki ikiwa utajitoa kwa maombi na kwa vitu vichache. Lolote mfanyalo, ikiwa ni kula au kunywa, tambua kuwa kuishi ukiieneza injili hii ni haki.

Wapendwa Wakristo, pamoja na kuwa hatujapitia aya za Biblia moja baada ya nyingine, ni hakika kuwa umeyasikia maneno haya. Ninaamini kuwa unayaamini maneno haya kuwa ni Kweli. Je, unaamini kuwa Yesu alikuja hapa ulimwenguni na akaitimiza haki yote? Je, unaamini kuwa Bwana ameitimiza kazi kuu ambayo inazifutulia mbali dhambi zote, yaani dhambi zako na zangu? —Ndiyo.—

Kwa kweli ni bahati njema kuwa Yesu alizibeba dhambi zote, na tunashukuru kuwa aliitimiza ‘haki yote.’ Hivi tungeomboleza vipi ikiwa angelikuwa amezichukua baadhi ya dhambi za wengine? Hata hivyo, kumbuka kuwa dhambi yoyote ambayo umeitenda, Yesu alikwisha ichukua. Uwe na imani thabiti. Na ninaamini unampendeza Mungu kwa imani yako na ufanye matendo ya haki kwa imani yako. Ninaamini kuwa utaishi kwa imani. Na ninaamini kuwa unakwenda Mbinguni kwa imani uliyonayo. Ninaamini kuwa wewe ni mtu usiye na dhambi kwa mujibu wa imani yako. Ninaamini kuwa wweni mtu unayempokea Roho Mtakatifu kwa kuamini katika injili ya kweli ya maji na Roho.

Kwa hakika ninamshukuru Mungu tena kwa sababu ninaamini katika injili ya maji na Roho. Wapendwa Wakristo, je, mnaamini katika injili ya maji na Roho? —Ndiyo.— Ninaamini kuwa ninyi nyote ni wale wanaoamini kwa hakika katika injili ya kweli wakati huu tunapoisherekea Krismasi. Halleluya! ☒

MAHUBIRI

9



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Uhusiano Kati ya Kazi ya Yohana Mbatizaji na Injili ya Upatanisho wa Dhambi zetu

< Mathayo 21:32 >

“Kwa sababu Yohana alikuja kwenu kwa njia ya haki, ninyi msimwamini; lakini watoza ushuru na makahaba walimwamini, nanyi hata mlipoona, hamkutubu baadaye, ili kumwamini.”

Yohana Mbatizaji Aliyetumwa na Mungu

Katika Injili ya Yohana sura ya 1 aya ya 6-7 imeandikwa hivi kumhusu Yohana Mbatizaji *“Palitokea mtu ametumwa kutoka kwa Mungu, jina lake Yohana. Huyu alikuja kwa ushuhuda, ili aishuhudie ile nuru, wote wapate kuamini kwa yeye.”* Katika kifungu hiki, Mtume Yohana anashuhudia umuhimu wa ubatizo ambao Yohana Mbatizaji alimpatia Yesu huku akiuhusianisha na injili ya wokovu.

Hali akizungumzia kuhusu Yohana Mbatizaji, Yesu alisema, *“Huyu alikuja kwa ushuhuda, ili aishuhudie ile nuru.”* Katika kifungu hiki, Yesu anashuhudia kuwa hakuna mtu mwingine zaidi ya Yohana Mbatizaji ambaye alikuwa amezipitisha dhambi zote za ulimwengu kwa kupitia ubatizo aliokuwa ameupokea. Yohana Mbatizaji alimshuhudia Yesu ili

kwmaba, “*wote wapate kuamini kwa yeye.*” Mtume Yohana anatueleza kuwa kwa kupitia ushuhuda wa Yohana Mbatizaji, watu wote ulimwenguni wanaweza kuuamini Ukweli ambao unaeleza kuwa Yesu amewaokoa wenye dhambi wote kwa ubatizo alioupokea na damu yake Msalabani.

Kwa maneno mengine, kifungu hiki kina maanisha kuwa ikiwa Yohana Mbatizaji asingeliushuhudia wokovu wa maji na Roho, basi watu wasingeliweza kuufahamu wokovu ambao kwa huo Yesu amewaokoa wenye dhambi kwa ubatizo wake na damuyake Msalabani. Hivyo basi, imani ambayo haijajengwa katika ufahamu wa kwa nini Yohana Mbatizaji alimbatiza Yesu ni imani isiyo na maana. Wale waliokutana na Yesu kwa kupitia injili ya maji na Roho ndio wanaoweza kuimiliki imani sahihi.

Je, Yohana Mbatizaji Alikuwa Mtu wa Aina Gani?

Kwa majaliwa ya Mungu, Kuhani Zakaria na mkewe Elizabeti walimpata Yohana Mbatizaji wakiwa na umri wa uzee na hivyo wakasifu, “*Nawe, mtoto, utaitwa nabii wake aliye juu, kwa maana utatangulia mbele za uso wa Bwana umtengenezee njia zake; uwajulishe watu wake wokovu, katika kusemehewa dhambi zao*” (Luka 1:76-77). Yohana Mbatizaji, akiwa kama nabii wa Aliye juu, na mwakilishi wa wanadamu, alizipitisha dhambi zote za ulimwengu kwa kuufanya ubatizo kwa Yesu na akawafanya watu wamwamin Yesu kwa kuihubiri injili hii ambao kwa hiyo watu wanaweza kupokea wokovu.

Hakuna zaidi ya Yohana Mbatizaji ambaye aliihuburi habari njema ili kutufahamisha kuwa tumeokolewa toka katika hukumu kwa kuwa ubatizo wa Yesu ulikuwa ni upatanisho kwa ajili ya dhambi zetu zote. Mungu alimtuma Yohana

Mbatizaji kuja hapa ulimwenguni kama mwakilishi wa wanadamu ili kuifanya kazi ya kuzipitisha dhambi za watu kwenda kwa Yesu. Katika injili ya Luka 1:78, sababu ya tendo hilo inaelezwa hapa, *“Kwa njia ya rehema za Mungu wetu ambazo kwa hizo mwangaza utokao juu umetufikia”* Hili neno, *“Ambazo kwa hizo”* lina maanisha kuwa watu wote watauona wokovu kwa kupitia Yohana Mbatizaji kama vile mwangaza utokao juu unavyowaangaza wale waliokaa katika giza na bonde la uvuli wa mauti.

Yesu amekuwa kipatanisho kwa dhambi zote za mwanadamu. Katika ulimwengu huu, ni nani anayetuongoza katika njia za haki? Ni Yesu. Kwa kuwa Yohana Mbatizaji alizipitisha dhambi zetu zote kwenda kwa Yesu kwa kupitia ubatizo, basi ni hakika kuwa Yohana Mbatizaji ametuongoza katika injili ambayo kwa hiyo Bwana amezipatanisha dhamib zetu zote.

Hebu tuangalie vizuri kuwa Yohana Mbatizaji ni nani toka katika Maandiko. Haya ni Maneno toka Luka 1:1-14. *“Kwa kuwa watu wengi wametia mikono kutunga kwa taratibu habari za mambo yale yaliyotimizwa katikati yetu, kama walivyohadithia wale waliokuwa mashahidi wenye kuyaona, na watumishi wa lile neno tokea mwanzo, nimeona vema mimi nami, kwa kuwa nimejitafutia usahihi wa mambo hayo yote tangu mwanzo, kukuandikia kwa taratibu, Theofilo Mtukufu, upate kujua hakika ya mambo yale uliyofundishwa.*

Zamani za Herode, mfalme wa Uyahudi, palikuwa na kuhani mmoja, jina lake Zakaria, wa zamu ya Abiya, na mkewe alikuwa mmojawapo wa wazao wa Haruni, jina lake Elizabeti. Na wote wawili walikuwa wenye haki mbele za Mungu, wakiendelea katika amri zote za Bwana na maagizo yake bila lawama. Nao walikuwa hawana mtoto, maana Elizabeti alikuwa tasa, na wote wawili ni wazee sana.

Basi ikawa, alipokuwa akifanya kazi ya ukuhani katika taratibu ya zamu yake mbele za Mungu, kama ilivyokuwa desturi ya ukuhani, kura ilimwangukia kuingia katika hekalu la Bwana ili kufukiza uvumba. Na makutano yote ya watu walikuwa wakisali nje saa ya kufukiza uvumba. Akatokewa na malaika wa Bwana, amesimama upande wa kuume wa madhabahu ya kufukizia. Zakaria alipomwona alifadhaika, hofu ikamwingia.

Lakini yule malaika akamwambia, “Usiogope, Zakaria, maana dua yako imesikiwa na mkeo Elizabeti atakuzalia mtoto mwana mume, na jina lake utamwita Yohana. Nawe utakuwa na furaha na shangwe, na watu wengi watakufurahia kuzaliwa kwake.””

Luka, mtumishi mwenza wa Mtume Paulo, aliitoa injili hii kwa mtu wa mataifa aliyeitwa Theofilo, mtu aliye na cheo kikubwa. Hata hivyo, kwa kuwa mtu huyu alikuwa hayafahamu Maandiko, ilimbidi Luka kumweleza habari za Biblia kwa kina, na hii ndio sababu Luka alianza kuiandika injili tangu wakati wa kuonekana kwa Yohana Mbatizaji. Ili kuelezea injili kimsingi, ilikuwa ni muhimu kwa Luka kuelezea ukoo wa Yohana Mbatizaji na maelezo kuhusu kuzaliwa kwake. Kwa kutumia maneno hayo tutajaribu kuangalia juu ya kuzaliwa kwa Yohana Mbatizaji na huduma yake kwa kina.

Tukikiangalia kifungu hicho hapo juu, kuna kifungu kidogo ndani yake kinachosema, *“Zamani za Herode, mfalme wa Uyahudi, palikuwa na kuhani mmoja, jina lake Zakaria, wa zamu ya Abiya, na mkewe alikuwa mmojawapo wa wazao wa Haruni, jina lake Elizabeti.”* (Luka 1:5). Hapa imeelezwa kwa wazi kuwa mama wa Yohana Mbatizaji anatoka katika ukoo wa Haruni, lakini kwa upande wa baba yake Zakaria ni lazima tutafute kwa kina juu ya ukoo wake katika taifa la Isareli

ambako alizaliwa. Baba wa Yohana Mbatizaji alikuwa ni Zakaria. Na Luka anaeleza kuwa alikuwa ni kuhani toka katika zamu ya Abiya.

Sasa, huyu Abiya, ambaye ni babu wa kuhani Zakaria ni yupi? Tunapokiangalia Kitabu cha kwanza cha Mambo ya Nyakati sura ya 24 aya ya 10 kuna kifungu kinachoeleza, “*Ya saba Hakosi, ya nane Abiya.*” Mungu aliwaongoza watu wa Israeli kwa kumweka Musa kama mpatanishi, kisha Mungu alimchagua Haruni, kaka yake na Haruni, kuwa Kuhani Mkuu. Mungu aliwafanya wazao wa Haruni kuzifanya sadaka za kuteketezwa zilizokuwa zikifanyika ndani ya Hema Takatifu la Kukutania. Lakini Nadabu na Abihu, wana wa wawili wa haruni walikufa wakati wakitoa sadaka kwa moto usiotakiwa mbele ya Mungu wakati wa sadaka ya kuteketezwa (Hesabu 26:61).

Baada ya kifo cha wana hao wawili, wana wengine wawili wa Haruni, Elieza na Ithamari waliyachukua majukumu ya ukuhani. Lakini wana wa watoto hawa wawili waliongezeka, hivyo wakati wa Daudi, ilikuwa ni muhimu kuwagawa katika makundi ya ukuhani ili waweze kuingia katika Hema Takatifu la Kukutania na kumtumikia Mungu. Hivyo, waliwagawa makuhani katika makundi 24 wakizingatia nyumba ya Elieza na Ithamari.

Kisha kama ilivyoandikwa, “*Akawagawanya Daudi, na Sadoki wawana wa Eleazari, na Ahimeleki wa wana wa Ithamari, katika utumishi kwa kadiri ya usimamizi wao. Wakaonekana wakuu wengi wa wana wa Eleazari kuliko wa wana wa Ithamari; wakagawanyika hivi; wana wa Eleazari kulikuwa na kumi na sita, waliokuwa wakuu wa mbari za baba zao; na wana wa Ithamari, sawasa na mbari za baba zao, wanane. Ndivyo walivyogawanyika kwa kura, wao kwa wao; kwani kulikuwa na wakuu wa patakatifu, na wakuu wa Mungu,*

wana wa Elezari, na wa wana wa Ithamari pia” (1 Mambo ya Nyakati 24:3-5), Daudi aliyagawa makundi ya ukuhani ili wamtumikie Mungu ndani ya Hema Takatifu la Kukutania.

Kati ya zamu ambazo zimeonyeshwa hapakatika kifungu hiki ni, *“Ya nane kwa Abiya,”* Kama tulivyokwisha soma katika Kitabu cha Kwanza cha Mambo ya Walawi sura ya 24 aya ile ya 10 inaendana na kifungu kinachosema *“palikuwa na kuhani mmoja, jina lake Zakaria, wa zamu ya Abiya” (Luka 1:5),* Luka anathibitisha kuwa huyu Zakaria alikuwa ni kuhani toka katika zamu ya Abiya ambayo ni kati ya ukoo wa Kuhani Mkuu Haruni. Zaidi ya yote, kama inavyoelezwa kuwa Elizabeti alikuwa anatoka ukoo wa Haruni. Hivyo, Yohana Mbatizaji anatoka katika ukoo wa Kuhani Mkuu Haruni (Luka 1:5) kwa sababu baba yake, Zakaria alikuwa ni kuhani wa zamu ya Abiya. Kwa kuwa Elizabeti naye anatoka katika ukoo wa Haruni, basi ni dhahiri kuwa Yohana Mbatizaji alizaliwa kati ya watu wawili wanaotoka katika ukoo wa Haruni Kuhani Mkuu.

Luka alipaswa kuielezea sehemu hii vizuri ili kwamba Theofilo aweze kufahamu kuwa Yohana Mbatizaji akiwa kama mwakilishi wa wanadamu alikuwa amezipitisha dhambi za ulimwengu kwenda kwa Yesu. Hebu tukitafute kifungu cha Maandiko kinachotueleza kuwa wana wa nyumba ya haruni waliyafanya majukumu ya Kuhani Mkuu.

Yohana Mbatizaji Aliyezaliwa Katika Familia ya Makuhani Wakuu

Mtoto wa Kuhani Mkuu aliyarithi majukumu ya kutoa sadaka ya kuteketezwa kwa ajili ya upatanisho. Katika Kitabu cha Hesabu sura ya 20 aya ya 28-29, *“Kisha Musa akamvua*

Haruni mavazi yake, akamvika mwanawe Eleazari mavazi hayo Haruni akafa huko katika kilele cha mlima; Musa na Eleazari wakatelemka mlimani. Na mkutano wote ulipoona ya kuwa Haruni amekufa, wakamwombolezea Haruni muda wa siku thelathini, maana, nyumba yote ya Israeli ikamwombolezea.” Mungu aliutoa Ukuhani Mkuu wa taifa la Israeli kwa Haruni na wanawe na akasema kuwa hii itakuwa ni amri ya milele (Mambo ya Walawi 16:34). Hii ndio sababu Haruni na wana wake waliyafanya majukumu ya kutoa sadaka za kuteketezwa, ambazo zilizikomboa dhambi za watu wa Israeli mbele za Mungu.

Kutoka 28:1-2, imeandikwa hivi, “*Nawe umlete Haruni ndugu yako karibu nami, na wanawe pamoja naye, miongoni mwa wa wana Israeli, ili anitumikie katika kazi ya ukuhani. Haruni, na Nadabu, na Abihu, na Eleazari, na Ithamari, wana wa Haruni. Nawe utamfanyia Haruni ndugu yako mavazi matakatifu, kwa utukufu na kwa uzuri.”*

Pia Kutoka 29:1-9, inaeleza yafuatayo: “*Nawe uwafanyie jambo hili, ili kuwatakasu, wapate kunitumikia mimi katika kazi ya ukuhani; twaa ng’ombe mmoja mume kijana, na kondoo waume wawili walio wakamilifu, na mkate usiotiwa chachu, na maandazi yasiyotiwa chachu yaliyokandwa kwa mafuta, na keki zisizotiwa chachu zilizotiwa mafuta,; utazifanya za unga mzuri mwembamba wa ngano. Nawe vitie vyote katika kikapu, uvilete ndani ya kikapu, pamoja na huyo ng’ombe, na hao kondoo waume wawili.*

Kisha mlete Haruni na wanawe hata mlangani pa hema ya kukutania, ukawaoshe kwa maji. Kisha twaa hayo mavazi na kumvika Haruni; itie kanzu, na joho ya naivera, na kumkaza kwa huo mshipi wa naivera uliosukwa kwa ustadi; nawe mvike kile kilemba kichwani, na ile taji takatifu utaitia katika kile kilemba. Ndipo utakapotwaa hayo mafuta ya kutiwa, na

kummiminia kichwani mwake, na kumtia mafuta. Kisha walete hao wanawe na kuwavika kanzu. Nawe uwakaze mishipi, Haruni na wanawe, na kuwavika kofia; nao watakuwa na huo ukuhani kwa amri ya milele; nawe utawaweka Haruni na wanawe kwa kazi takatifu.”

Hivyo, kwa niaba ya taifa la Isareli, Mungu aliichagua nyumba ya Haruni, kaka mkubwa wa Musa, kuyafanya majukumu ya Ukuhani Mkuu, kwa kutoa sadaka ya kuteketezwa katika Siku ya Upatanisho kwa Mungu. Hakuna aliyeweza kulipinga jukumu hili. Ukuhani Mkuu kwa nyumba ya Haruni ulikuwa ni amri iliyokuwa imewekwa na Mungu. Ukuhani huu Mkuu hakikuwa ni kitu ambacho kila mtu angeliweza kukifanya. Ni Makuhani Wakuu tu toka katika nyumba ya Haruni ndio walioweza kuingia patakatifu pa patakatifu ndani ya Hema Takatifu la Kukutania mara moja kwa mwaka na kisha kuyafanya majukumu ya Ukuhani Mkuu. Waliweza kuzipatanisha dhambi za mwaka mmoja tu za watu wa Israeli na kwa Waisraeli wote. Hii ndio sababu Mungu alimwambia Musa, *“Nawe umlete Haruni ndugu yako karibu nami, na wanawe pamoja naye, miongoni mwa wa wana Israeli, ili anitumikie katika kazi ya ukuhani. Haruni, na Nadabu, na Abihu, na Eleazari, na Ithamari, wana wa Haruni. Nawe utamfanyia Haruni ndugu yako mavazi matakatifu, kwa utukufu na kwa uzuri.”* (Kutoka 28:1-2).

Ule ukweli kuwa ni Haruni na ukoo wake tu ndio wangeluweza kuwa na Ukuhani Mkuu yalikuwa ni maamuzi ya yaliyokuwa yamepangwa na Mungu. Mungu alimwamuru Haruni na ukoo wake kuyafanya majukumu ya Ukuhani Mkuu milele, tangu siku za Agano la Kale hadi wakati wa kuja kwa Yesu wakati wa kipindi cha Agano Jipya. Wana wa Haruni wamekuwa wakiyafanya majukumu ya Ukuhani Mkuu ambayo yanajumuisha amri ya milele ya wokovu, ambayo ni

upatanisho wa dhambi uliopangwa na Mungu.

Hii ndio sababu Luka alikuwa akimwelezea Yohana Mbatizaji kama Kuhani Mkuu wa mwisho wa Agano la Kale kwa kuueleza ukweli kuwa Zakaria alikuwa anatoka katika nyumba ya Haruni Kuhani Mkuu. Agano la Kale lilifikia mwisho kwa Yohana Mbatizaji, akiwa mwakilishi wa wanadamu alipoifanya kazi ya kuzipitisha dhambi zote za ulimwengu kwenda kwa Yesu, na tangu hapo, wakati wa Yesu, yaani wakati wa neema ulianza. Mungu aliongelea juu ya historia ya mwanadamu kwa kuigawa katika vipindi maalum vya kuzingatiwa.

Yohana Mbatizaji Alimbatiza Yesu Kristo

Kwa kuwa Yohana alimbatiza Yesu, ndio maana tunamwta Yohana Mbatizaji. Sasa, nini maana ya ubatizo katika Biblia? Neno “Ubatizo” au kwa Kiyunani “βάπτισμα” (*baptisma*) lina maanisha ni “kuzamishwa.” Kwa Kiyunani “Kubatiza” au “*baptizo*” ni kuzamisha au kuingia ndani ya maji, kuosha kwa kuchovya au kuzamisha, kufanya kitu kiwe safi kwa maji, kunawa, na kuoga. Pia ina maanisha ni kuhamishia au kupitisha. Kwa kuupokea ubatizo toka kwa Yohana Mbatizaji, basi dhambi zote zilipitishwa kwenda kwa Yesu, naye Yesu amefanyika kuwa Mwokozi kwa waaminifu kwa kuzichukua dhambi za ulimwengu mzima, kwa kufa badala yetu akilipa mshahara wa dhambi, na kwa kufufuka toka kwa wafu. Bwana aliupokea ubatizo ambao kwa huo alizichukua dhambi kwa niaba yetu na akafa Msalabani. Hii ni kwa sababu mshahara wa dhambi ni mauti.

Kwa kuwa tendo la ubatizo linafanyika katika mtindo wa kuzamisha na kuwekea mikono, basi ndio maana pia linaitwa

‘desturi ya kuzamisha.’ Maneno hayo yote yana maana moja. Neno ‘ubatizo’ pia lina maanisha ni ‘kusafisha.’ Ubatizo ambao Yesu aliupokea toka kwa Yohana Mbatizaji katika Mto Yordani ulikuwa ni ubatizo wa ondoleo la dhambi ambao kwa huo ametusafisha toka katika dhambi za ulimwengu baada ya kuzichukua dhambi hizo katika mwili wake. Kwa kuwa dhambi zote za mwanadamu zilipitishwa kwenda kwa Yesu kwa Yeye kuupokea ubatizo toka kwa Yohana Mbatizaji, basi ndio maana tuliweza kuupokea wokovu kwa kuuamini ubatizo. Ikiwa tutangalia kwa undani juu ya maana ya ubatizo ambao Yesu aliupokea, basi hapo tutapata maana nne: “kuosha,” “kupitisha,” “kuhamishia,” na “kuzikwa.”

Watu wa Agano la Kale, ili waweze kupokea ondoleo la dhambi, walileta wanyama wa sadaka ya kuteketezwa kama vile mbuzi, kondoo, ng’ombe, na kadhalika, na alipaswa kuwa mnyama asiye na mawaa, kisha waliiweka mikono ya kichwa cha mnyama huyo ambaye dhambi zilipitishwa kwenda kwake. Tendo hili ni sawa kabisa na maana ya neno ubatizo (kwa Kiyunani βάπτισμα), yaani ubatizo ambao Yesu aliupokea. Katika Agano la Kale, watu waliiweka mikono yao juu ya mbuzi ili kuzipitisha dhambi za taifa kwenda kwa mbuzi huyo, na kwa kuwa mbuzi alikuwa amezichukua zile dhambi, basi alipaswa kufa ili kuzipatanisha dhambi za hao watu.

Katika Agano la Kale, Haruni Kuhani Mkuu aliwawakilisha watu wote wa Israeli. Huku akiliwakilisha taifa la Israeli, Kuhani Mkuu alizihamishia dhambi kwa kuiweka mikono juu ya kichwa cha mbuzi na kwa kuichukua damu ya mnyama baada ya kumchinja na kisha kuiweka katika pembe za madhabu ya sadaka ya kuteketezwa. Alitoa dhabihu ya dhambi katika Siku ya Upatanisho mbele za Mungu kwa niaba ya watu. Katika Agano Jipya, ni Yohana Mbatizaji ndiye aliyekuwa mwakilishi wa wanadamu wote. Hivyo, Yesu

alizichukua dhambi za ulimwengu kwa kuupokea ubatizo toka kwa Yohana Mbatizaji, na ili kuzipatanisha dhambi hizo za mwanadamu, Yesu aliimwaga damu yake na kufa Msalabani. Yesu amewaokoa wote wanaomwamini kwa kufufuka kwake toka kwa wafu.

Mkuu Kati ya Wote Waliozaliwa na Wanawake

Tunapoangalia Mathayo 11:11, Yesu anamshuhudia Yohana Mbatizaji akisema, *“Amin, nawaambieni, hajaondokea mtu katika wazao wa wanawake aliye mkuu kuliko Yohana Mbatizaji.”* Yohana Mbatizaji alizipitisha dhambi za ulimwengu mara moja na kwa wote kwa kumbatiza Yesu kwa mujibu wa amri za Mungu za milele akiwa kama Kuhani Mkuu wa wanadamu wote, kama vile Haruni Kuhani Mkuu (Mathayo 3:15). Yohana Mbatizaji alikuwa na sifa za kuwa Kuhani Mkuu wa wanadamu wote. Na hii ndio sababu Yohana Mbatizaji, akiwa kama Kuhani Mkuu wa mwisho wa Agano la Kale, aliweze kuzipitisha dhambi za wanadamu kwenda kwa Yesu kwa kumbatiza. Katika Agano Jipya, kuhani Zakaria alikuwa anatoka katika nyumba ya Haruni, na asili ya Kuhani Mkuu ilikuwa ni kama ifuatavyo:

Katika Kitabu cha Kwanza cha Mambo ya Nyakati Sura ya 24 Aya ya 10

Zamu za Makuhani Wakuu ambao ni wana wa Haruni wakitoa sadaka za kuteketezwa zimeonyeshwa katika Agano la Kale, na zamu ya kuhani ‘Abiya’ ipo katika zamu ya nane. Hata hivyo, katika Agano la Kale, kuhani alichaguliwa *“kama*

ilivyokuwa desturi ya ukuhani,” kama tunavyoweza kuona toka katika Injili ya Luka sura ya 1 aya ile ya 9. Kama ilivyokuwa katika Agano la Kale, mtu aliyechaguliwa hapa aliwekwa kuwa Kuhani Mkuu, akibeba majukumu ya Ukuhani Mkuu wa Agano la Kale na kisha kuyatimiza majukumu ya ukuhani. Desturi hii ilirithishwa toka kizazi hadi kizazi tangu siku za Agano la Kale hadi wakati wa Zakaria, ambaye ni baba wa Yohana Mbatizaji.

Zakaria alikuwa ni Kuhani Mkuu aliyezaliwa katika nyumba ya Abiya, ya ukoo wa Haruni. Kama vile simba anavyoweza kuzaa wanasimba, Mungu alifanya hivyo ili kwamba Kuhani Mkuu atoke katika ukoo wa Haruni Kuhani Mkuu tu. Hivyo, Yohana Mbatizaji, toka katika nyumba ya Kuhani Mkuu, alilichukua jukumu la kuwa mpatanishi; yaani kuhani ambaye atautimiza unabii kuhusu wokovu wa Mungu, kama ulivyoahidiwa katika Agano la Kale, naye ndiye aliyezipitisha dhambi zote za uliwmgeng kwenda kwa Yesu, naye ni mkuu kati ya wote waliozaliwa na wanawake. Kifungu hiki cha Mathayo 11:11-13 kinalishuhudia hili. Hii ndio maana Yesu, hali akimwonyesha Yohana Mbatizaji, alishuhudia kuwa yeye Yohana ni Eliya atakayekuja kama ilivyotabiriwa katika Agano la Kale (Malaki 4:5).

Shuhuda za Mitume Kuhusu Ubatizo wa Yesu Ambao Umezichukua Dhambi za Mwanadamu

Ubatizo ambao Yesu aliupokea ulikuwa ni upatanisho kwa ajili ya dhambi, yaani dhambi za ulimwengu, ambazo Yesu alikuwa amezichukua kwa ubatizo ule. Ushahidi wa ubatizo ambao Yesu aliupokea unaonyeshwa mara kadhaa katika nyaka za Paulo na Petro na pia katika waraka wa

Yohana. Hebu kwanza tuangalie kifungu cha Maandiko kuhusu ubatizo wa Yesu kwa kupitia Nyaraka za Paulo. Kwanza tutaangalia kifungu toka Warumi 6:2-7.

“Hasha! Sisi tuliofia dhambi tutaishije tena katika dhambi? Hamfahamu ya kuwa sisi sote tuliobatizwa katika Kristo Yesu tulibatizwa katika mauti yake? Basi tulizikwa pamoja naye kwa njia ya ubatizo katika mauti yake, kusudi kama Kristo alivyofufuka katika wafu kwa njia ya utukufu wa Baba, vivyo hivyo na sisi tuenende katika upya wa uzima.

Kwa maana kama tulivyounganika naye katika mfanowa mauti yake, kadhalika tutaunganika kwa mfano wa kufufuka kwake; tukijua neno hili, ya kuwa utu wetu wa kale ulisulibishwa pamoja naye, ili mwili wa dhambi ubatilike, tusiitumikie dhambi tena; kwa kuwa yeye aliyekufa amehesabiwa haki mbali na dhambi.”

Imani ya Mtume Paulo kwamba tumepokea ubatizo, na kuunganishwa pamoja na Yesu, ni imani inayoamini katika injili ya kwamba ubatizo wa Yesu umezichukulia mbali dhambi za ulimwengu na umezipatanisha dhambi hizo. Injili ya upatanisho wa dhambi inayotajwa katika Biblia ni injili ya maji na damu ambayo kwa hiyo Yesu aliupokea ubatizo na akasulubiwa. Katika Biblia, injili ya upatanisho wa dhambi inayoshuhudiwa na mitume, inatueleza kuwa Yesu amezichulia mbali dhambi zote za kidunia.

Mtume Petro anauelewa na kuelezea vipi ubatizo wa Yesu? Katika 1 Petro 3:21, Petro alisema, *“Mfano wa mambo hayo ni ubatizo, unaowaokoa ninyi pia siku hizi; (siyo kuwekea mbali uchafu wa mwili, bali jibu la dhamiri safi mbele za Mungu), kwa kufufuka kwake Yesu Kristo.”* Mtume Petro anasema kuwa ubatizo ambao Yesu aliupokea toka kwa Yohana Mbatizaji ni mfano wa wokovu ambao kwa huo Yesu amezipatanisha dhambi zetu.

La zaidi kabisa, Mtume Yohana alisema, “*Mwenye kuushinda ulimwengu ni nani. Isipokuwa ni yeye aminiye ya kwamba Yesu ni Mwana wa Mungu? Huyu ndiye aliyekuja kwa maji na damu, Yesu Kristo; si katika maji tu, bali katika maji na katika damu. Naye Roho ndiye ashuhudiaye, kwa sababu Roho ndiye kweli. Kwa maana wako watatu washuhudiaio mbinguni Baba, na Neno, na Roho Mtakatifu, na watatu hawa ni umoja. Kisha wako watatu washuhudiaio duniani, Roho na maji na damu; na watatu hawa hupatana kwa habari moja*” (1 Yohana 5:5-8). Mtume Yohana anatueleza kuwa tunapokea wokovu wa Mungu ambao umezipatanisha dhambi zetu zote kwa kumwamini Mwokozi aliyekuja kwa maji na kwa damu.

Ipi ni Imani Sahihi Katika Kumwamini Yesu Kristo?

Vivyo hivyo, Mitume walisema kuwa ubatizo (maji) ambao Yesu aliupokea ni mfano wa wokovu unaowakoa wenye dhambi, na kwamba wale waliozaliwa tena upya wanaweza kuushinda ulimwengu kwa kuamini katika injili ya upatanisho wa dhambi ambayo ilikamilishwa na ubatizo na damu ya Yesu. Hivyo, tunaweza kuona kuwa kuna tofauti kubwa sana kati ya imani ambayo Mitume waliamini na imani ya leo ya watheolojia ambao wanaamini katika damu ya Msalaba tu. Siku hizi watheolojia wanaamini damu ya Yesu tu, lakini Biblia inashuhudia kuwa wenye dhambi wanaweza kupokea wokovu pale watakapouamini ubatizo wa Yesu na damu yake Msalabani. Hivyo basi, ni lazima tufahamu kiusahihi, na kisha kuamini katika injili ambayo kwa hiyo Yesu amezipatanisha dhambi zetu zote kwa ubatizo wake na damu yake. Ubatizo ambao Yesu aliupokea na damu yake Msalabani ni vitu vya

muhimu sana katika kuikamilisha injili sahihi. Na hii ni injili ambayo imezipatanisha dhambi zote za ulimwengu. Katiak Agano la Kale na katika Agano Jipya, imeandikwa kuwa injili ya upatanisho wa dhambi ni injili ya ubatizo na maji, na injili hii inazitoweshea mbali dhambi zote za ulimwengu.

Mathayo, mwanafunzi wa Yesu anaandika hivi katika Mathayo 3:15-16, *“Yesu akajibu akamwambia, “Kubali hivi sasa; kwa kuwa ndivyo itupasavyo kuitimiza haki yote.” Basi akamkubali. Naye Yesu alipokwisha kubatizwa mara akapanda kutoka majini; na tazama, mbingu zikamfunukia, akamwwona Roho wa Mungu akishuka kama hua, akija juu yake.”* Hapa, Mungu anatueleza kuwa dhambi zote za ulimwengu zilipitishwa kwenda kwa Yesu kwa Yeye kuupokea ubatizo toka kwa Yohana Mbatizaji. Kifungu hiki kinaishuhudia haki ya wokovu ambayo Mungu ameikamilisha kwa kupitia injili ambayo kwa hiyo dhambi zetu zimepatanishwa.

Bada ya kuupokea ubatizo, Yesu alizichukua dhambi za watu wote katika ulimwengu huu, na kisha akashuhudia juu ya wokovu wake kwa muda wa miaka 3. Baada ya miaka hii mitatu, alikufa Msalabani akaimwaga damu yake na akafufuka siku ya tatu. Kwa kufanya hivyo, ameukamilisha wokovu kwa wale wote wanaouamini Ukweli huu, na kwa sasa ameketi mkono wa kuume katika kiti cha enzi cha Mungu Baba.

Pia wanafunzi wa Yesu wanaeleza hivi, *“Kadhalika Kristo naye, akiisha kutolewa sadaka mara moja azichukue dhambi za watu wengi; atatokea mara ya pili pasipo dhambi, kwa hao wamtazamiao kwa wokovu”* (Waebrania 9:28). Kifungu hiki kina maanisha kuwa Bwana atatokea mara ya pili kwa wale ambao wanamtazamia. Yaani, kwa wale ambao kwa imani wameupokea wokovu kwa kupitia upatanisho wa dhambi kwa kuuamini ubatizo wa Yesu aliupokea na damu yake Msalabani.

“Na tazama, sauti kutoka mbinguni ikisema, Huyu ni Mwanangu, mpendwa wangu, ninayependezwa naye” (Mathayo 3:17). Kifungu hiki kinazungumzia ukweli kuwa Yeye ambaye dhambi zote za ulimwengu zimehamishwa kwake kwa kupitia ubatizo, na kisha akazipatanisha dhambi hizo, si mwingine bali ni Yesu. Baadhi ya watheolojia hawaufahamu Ukweli huu ambao kwa huo Yesu amezipatanisha dhambi za mwanadamu kwa ubatizo wake na damu yake. Ni vipofu wa kiroho, hawawezi kulitambua kikamilifu Neno halisi la Mungu. Na kwa sababu ya uelewa huu duni, watu wanaamini kuwa ‘Yesu amezichukua baadhi ya dhambi za ulimwengu,’ lakini haya ni mawazo yanayotokana na ujinga wa kutoufahamu ubatizo wa Yesu ambao unaunda injili ya upatanisho wa dhambi.

Kama ambavyo taifa la Isareli lilikombolewa toka katika dhambi katika Agano la Kale kwa tendo la Kuhani Mkuu kuzipitisha dhambi kwa kuiweka mikono yake juu ya mnyama wa sadaka ya kuteketezwa, na kisha mnyama huyo akaimwaga damu yake, basi vivyo hivyo Yesu aliwaokoa wanadamu kwa jinsi Mungu alivyokuwa ameahidi. Yesu alikuwa ni mwanakondoo wa sadaka ya kuteketezwa katika Agano Jipya. Alikuwa akimhitaji Yohana Mbatizaji, mwakilishi wa wanadamu ambay atazipitisha dhambi zote za ulimwengu kwenda kwa Yesu. Hii ndio sababu Mungu Baba alimtuma Yohana Mbatizaji miezi 6 kabla ya kumtuma Yesu.

Yohana Mbatizaji alikuwa ni mtumishi wa Mungu aliyekuwa ametabiriwa katiak Kitabu cha Malaki katika Agano la Kale. Yeye si mwingine zaidi ya yule mjumbe wa Mungu aliyetabiriwa katika Kitabu cha Malaki 3:1-3. Pia ikiwa tutaangalia Mathayo 10:10-11 katika Agano Jipya, Bwana alihitaji kuupokea ubatizo ambao ungelimwezesha kuzichukua dhambi zote za wanadamu kama Mwokozi, na kwamba

baadaye angelizipatanisha dhambi hizo. Hivyo, Yesu alimhitaji mtumishi wa Mungu ambaye atambatiza. Hii ndio sababu Yohana Mbatizaji alizipitisha dhambi za ulimwengu kwenda wka Yesu kwa ubatizo, hali akitii amri ya Yesu, *“Kubali hivi sasa, kwa kuwa ndivyo itupasavyo kuitimiza haki yote”* (Mathayo 3:15).

Katika Agano la Kale, Sadaka ya kuteketezwa ilikufa au kuuawa baada ya kuzichukua dhambi za mtu mmoja au taifa moja. Lakini Yesu Kristo mwana wa Mungu alikuja hapa duniani na akikifungua kipindi cha Agano Jipya. Alizibeba dhambi za ulimwengu pasipo kuacha hata moja, ili kuzipatanisha dhambi zote za mwanadamu. Kisha, ilimpasa kufa kwa kusulubiwa ikiwa ni gharama ya kuzipatanisha hizo dhambi. Ili Yesu aweze kumkomboa milele mwanadamu toka katika dhambi za ulimwengu, basi ilimpasa kuzipatanisha dhambi zote za ulimwengu kwa kuupokea ubatizo toka kwa Yohana Mbatizaji na kufa Msalabani na kisha kufufuka baada ya siku tatu. Mungu amewaokoa toka katika dhambi zao zote wale wanaoamini katika injili ya ubatizo wa Yesu na damu yake.

Yohana Mbatizaji Alikuwa ni Mjumbe wa Mungu

Mathayo 11:11-14 inamshuhudia Yohana Mbatizaji. Hebu tusome Injili ya Mathayo sura ya 11, aya ya 7 hadi ile ya 14: *“Na hao walipokwenda zao Yesu alianza kuwaambia makutano habari za Yohana, Mlitoka kwenda nyikani kutazama nini? Unyasi ukitikiswa na upepo? Lakini mlitoka kwenda kuona nini? Mtu aliyevikwa mavazi mororo? Tazama, watu wavaao mavazi mororo wamo katika nyumba za wafalme. Lakini kwa nini mlitoka? Ni kuona nabii? Naam nawaambia,*

na aliye mkuu zaidi ya nabii. Huyo ndiye aliyeandikiwa haya:

‘Tazama, mimi namtuma mjumbe wangu mbele ya uso wako,

Atakayeitengeneza njia yako mbele yako.’

‘Amin, nawaambieni, hajaondokea mtu katika wazao wa wanawake aliye mkuu kuliko Yohana Mbatizaji; walakini aliye mdogo katika ufalme wa mbinguni ni mkuu kuliko yeye. Tangu siku za Yohana Mbatizaji hata sasa ufalme wa mbinguni hupatikana kwa nguvu, nao wenye nguvu wauteka. Kwa maana manabii wote na torati walitabiri mpaka wakati wa Yohana. Na ikiwa mnataka kukubali, yeye ndiye Eliya atakayekuja.’”

Watu walienda nyikani ili kumwona Yohana Mbatizaji. Yohana Mbatizaji alikuwa akiwahubiria watu akiwaambia watubu. Yesu alipowaona watu wakienda kumwona Yohana Mbatizaji, alisema, “Mlikwenda nyikani kufanya nini? Mtu aliyevaa mavazi mororo? Wale wavaao mavazi mororo wamo katika nyumba za wafalme.” Lakini nabii Yohana Mbatizaji alikuwa nyikani.

Maneno haya ya Yesu yanauonyesha Ukweli kuwa Mungu alimweka Yohana Mbatizaji hapa duniani kama mwakilishi wa wanadamu, na pia akafanya ambatize Yesu. Wakati Yesu alipokuwa akiutoa ushuhuda binafsi kuhusu Yohana Mbatizaji alisema hivi, “Mlikwenda nyikani kutazama nini? Kwa nini mlikwenda kumwona mtu aliyevaa mavazi ya singa za ngamia kama mtu wa porini? Mlikwenda kutazama nini? Je, mlikwenda kutazama mtu aliyevaa mavazi mororo? Mtu wa jinsi hiyo avaaye mavazi mororo yumo katika nyumba za wafalme. Lakini yeye ni mkuu kuliko wafalme,” pia Yesu alishuhudia kuwa Yohana Mbatizaji alikuwa ni mkuu kati ya wale waliozaliwa na wanawake huku akisema, “Mlitoka kutazama nini? Mlikwenda kumwona nabii? Ndiyo, yeye ni zaidi ya nabii.”

Katika siku za Agano la Kale, manabii walichukuliwa kuwa ni wakuu kuliko wafalme. Sasa, ni nani aliyekuwa mkuu kuliko manabii wote wa Agano la Kale? Si mwingine basi ni Yohana Mbatizaji. Yesu mwenyewe alishuhudia kuwa Yohana Mbatizaji ni mwakilishi wa wanadamu, kisha Yesu akasema kuwa Yohana Mbatizaji ni mkuu kuliko wanadamu wote. Yohana Mbatizaji alikuwa ni mtumishi wa Mungu, aliyekuwa ametumwa miezi 6 kabla ya kuzaliwa kwa Yesu. Na kwamba alizaliwa ili kuzipitisha dhambi za ulimwengu kwa kumbatiza Yesu. Hivyo Bwana alisema, *“Naam nawaambia, na aliye mkuu zaidi ya nabii. Huyu ndiye aliyeandikiwa haya, ‘Tazama, mimi namtuma mjumbe wangu mbele ya uso wako, Atakayeitengeneza njia yako mbele yako.’”* Katika hili Biblia inaandika kwa wazi kabisa na inamshuhudia Yohana Mbatizaji.

Yohana Mbatizaji, ambaye alikuwa ameshuhudiwa na Yesu, sasa anamshuhudia Yesu kama hivi. *“Tazama! Mwanakondoo wa Mungu aichukuaye dhambi ya ulimwengu!”* (Yohana 1:29) Yohana Mbatizaji ndiye aliyemshuhudia Yesu, kwa kusema, “Yesu amezichukuali mbali dhambi zote za ulimwengu, naye si mwingine bali ni Mwana wa Mungu,” huyu Yohana alikuwa ni mkuu kuliko watu wote na kuliko manabii wote. Inaweza kuelezwa hivi, Yohana Mbatizaji alikuwa ni Kuhani Mkuu kwa sababu wazazi wake wote wanatoka katika ukoo wa Haruni. Tunafahamu kuwa katika Agano la Kale Mungu alikuwa amemchagua Haruni kuwa Kuhani Mkuu wa Israeli kwa miaka 40. Mungu alikuwa amemkabidhi Ukuhani Mkuu milele kwake na kwa wazao wake, na kwa sababu hiyo hakuna shaka kwamba Yohana Mbatizaji alikuwa ni mwakilishi wa wanadamu, na kama kuhani ambaye amezipitisha dhambi zote za wanadamu kwenda kwa Yesu.

Kisha Bwana Yesu akaendelea kusema, *“Tangu siku za*

Yohana Mbatizaji hata sasa ufalme wa mbinguni hupatikana kwa nguvu, nao wenye nguvu wauteka” (Mathayo 11:12). Kifungu hiki kinaonyesha kuwa Yesu amefanyika kuwa Mwokozi wa watu kwa kuzipokea dhambi za ulimwengu kwa kupitia Yohana Mbatizaji. Yesu ameushuhudia ukweli kuwa Yohana Mbatizaji amezipitisha dhambi zote za ulimwengu kwenda kwake. Maneno yanayopatikana katika Mathayo 11:12 yanashuhudia kuwa dhambi za ulimwengu, dhambi zote za mwanadamu, zimepitishwa kwenda kwa Yesu kwa ule ubatizo wa Yesu. Waamini katika injili ya Mbinguni, ambayo ni injili ya ubatizo wa Yesu alioupokea na damu yake, wanaamini kuwa Yesu alikwenda na kufa Msalabani baada ya kuwa amezichukua dhambi zao zote kwa ule ubatizo aliokuwa ameupokea.

Ushuhuda wa Zakaria

Baada ya kuusikia ujumbe wa malaika kuwa Mungu atampatia mtoto wa kiume, mara ya kwanza Zakaria hakuweza kuamini. Hivyo, akapewa adhabu ya kuwa bubu. Baadaye, baada ya kuliona Neno la Mungu likitimia, Zakaria alimwita yule mtoto Yohana kama alivyokuwa ameamuru malaika. Basi wakati huo ulimi wake ukafunguka na akaweza kusema. Hali akiwa amejawa na Roho Mtakatifu, Zakaria alianza kumsifu Mungu kama ifuatavyo.

“Na Zakaria, baba yake, akajazwa Roho Mtakatifu, akatabiri, akisema:

*‘Atukuzwe Bwana, Mungu wa Israeli,
Kwa kuwa amewajilia watu wake, na kuwakomboa,
Ametusimamishia pembe ya wokovu,
Katika mlango wa Daudi, mtumishi wake.*

*Kama alivyosema tangu mwanz,o
Kwa kinywa cha manabii wake watakatifu,
Tuokolewe na adui zetu,
Na mikononi mwao wote wanaotuchukia,
Ili kuwatendea rehema baba zetu,
Na kulikumbuka agano lake takatifu,
Uapo aliomwapia Ibrahimu, baba yetu,
Ya kwamba atatujalia sisi,
Tuokoke mikononi mwa adui zetu,
Na kumwabudu pasipo hofu,
Kwa utakatifu na kwa haki mbele zake siku zetu zote.
'Nawe, mtoto, utaitwa nabii wake aliye juu;
Kwa maana utatangulia mbele za uso wa Bwana
umtengenezee njia zake,
Uwajulishe watu wake wokovu
Katika kusamehewa dhambi zao,
Kwa njia ya rehema za Mungu wetu,
Ambazo kwa hizo mwangaza utokao juu umetufikia;
Kuwaangaza wakaao katika giza na uvuli wa mauti,
Na kuiongoza miguu yetu kwenye njia ya amani.'*
Yule mtoto akakua, akaongezeka nguvu rohoni, akakaa
majangwani hata siku ya kutokea kwake kwa Israeli." (Luka
1:67-80).

Katika kifungu hiki, baba yake na Yohana alitoa unabii unaonyesha jinsi ambavyo Yohana Mbatizaji atakuwa, na jinsi atakavyoyabeba majukumu ya ukuhani. Pia alitabiri kuwa Yohana Mbatizaji atakuwa mtumishi wa Mungu. Hasa alitabiri kwamba, "Nawe, mtoto, utaitwa nabii wake aliye juu; kwa maana utatangulia mbele za uso wa Bwana umtengenezee njia zake, uwajulishe watu wake wokovu katika kusamehewa dhambi zao," (Luka 1:76-77). Kifungu hiki kinashuhudia kuhusu injili. Kwa kupitia injili ya maji na Roho, Yohana

Mbatizaji anakuwa ni shahidi wa Ukweli kwetu sisi tunaomwamini Yesu. Yohana Mbatizaji alituambia kuwa tumepokea ondoleo la dhambi kwa kuuamini ubatizo wa Yesu na damu yake ambayo imezipatanisha dhambi zetu. Ili aweze kuzipatanisha dhambi zetu, Yesu alizichukua dhambi zote za ulimwengu kwa kupitia ubatizo aliokuwa ameupokea toka kwa Yohana Mbatizaji. Pia Yohana aliushuhudia ukweli kuwa amezipitisha dhambi zote za ulimwengu kwa kumbatiza Yesu. Kwa maneno mengine, alitufanya sisi tuufahamu wokovu tuupatao kwa upatanisho wa dhambi kwa kupitia ushuhuda wake.

Kila mtu anaupokea wokovu toka katika dhambi kwa kuuamini ubatizo wa Yesu na damu yake. Pia, kwa kupitia ushuhuda wa Yohana Mbatizaji, kila mtu aliweza kufahamu kuwa Yesu ni Mwokozi ambaye amezipatanisha dhambi zake zote. Ikiwa watu wasingeliifahamu injili ya upatanisho ambayo ilitimizwa kwa kupitia ubatizo ambao Yohana Mbatizaji alimpatia Yesu, basi ingeliwezekana vipi wakawa na uhakika wa asilimia 100% kuwa Yesu ni Mwokozi wao?

Ikiwa mtu haufahamu Ukweli wa injili ya upatanisho wa dhambi, basi ni hakika kuwa hakuna wokovu wala uzima wa milele kwa mtu wa jinsi hiyo. Ikiwa ungelimwamini Yesu pasipo kuifahamu huduma ya Yohana Mbatizaji, basi imani yako ingelikuwa ni imani potofu, na ungelikuwa unaishi maisha potofu ya Kikristo. Ungelikuwa unafanya vitu kama kutegemea mafundisho ya dini yanayotajwa katika theolojia. Hata hivyo, ikiwa unafahamu kuwa Yohana Mbatizaji ni nani na ikiwa unaufahamu Ukweli kuhusu aina ya ubatizo ambao Yohana Mbatizaji alimpatia Yesu kwa ajili ya wokovu, yaani ubatizo ambao umezipatanisha dhambi za wanadamu, basi ni hakika kuwa utaokolewa toka katika dhambi zote kwa sababu ya kuwa kuuamini Ukweli huu.

Katika kitabu cha Mwanzo, kuna habari zinazoelezea tangu wakati kulipokuwa hakuna dhambi, wakati wa Adamu na Hawa, wanadamu wa kwanza hadi siku za Ibrahimu aliyekuwa wa ukoo wa Seti na wa Shemu baada ya Adamu na hawa kufanya dhambi; hadi wakati wa ukoo wa Yakobo. Katika Kitabu cha Kutoka, yaani mwanzo wa siku ambapo Torati iliandikwa. Basi baada ya kuvuka Bahari ya Shamu, Waisraeli walizipokea amri wakiwa katika nyika za Sinai kupitia kwa Musa, na waliishi kwa mujibu wa amri hizo.

Na wakati wa siku hizi za Torati, Mungu aliwapatia watu wa Israeli utaratibu wa sadaka ya kuteketezwa wa Hema Takatifu la Kukutania. Mungu aliwafanya watoe dhabihu ambapo Kuhani Mkuu atazipitisha dhambi zote za watu kwa kuiweka mikono yake juu ya kichwa cha mbuzi wa makosa, na kisha kwa kupitia kifo cha mnyama huyo wa sadaka ya kuteketezwa, basi dhambi zao zote zilipatanishwa.

Lakin kipindi hiki cha Torati kinafikia mwisho kwa ujio wa kipindi cha neema; yaani wakati ambapo Yesu aliupokea ubatizo. Mara baada ya ubatizo wa Yesu aliokuwa amebatizwa na Yohana Mbatizaji, basi hapo ndipo wokovu wote ulioahidiwa kwa upatanisho wa dhambi wakati wa kipindi cha Agano la Kale ulifikia mwisho. Dhambi za wanadamu wote ziliondolewa na wokovu toka katika dhambi ulikamilifu kwa kupitia ubatizo ambao Yesu aliupokea na damu yake aliyoimwaga.

Kuhani Zakaria alimsikia Mungu akimwambia kuwa atampatia mtoto wa kiume. Kwa kuwa Elizabeti mke wa Zakaria alikuwa ni mzee. Basi kwa mujibu wa kibinadamu ilionekana kuwa mwanamke mzee hawezi kuzaa mtoto. Lakini mke wa Zakaria alipata mimba kama Mungu alivyosema. Miezi sita baadaye, Bikira Mariamu naye akapata ujauzito. Malaika alimtokea Mariamu na akamwambia, “Salaam

uliyepewa neema,” Mariamu akamwambia yule malaika *“Tazama mimi ni mjakazi wa Bwana! Na iwe kwangu kama ulivyosema” (Luka 1:38).*

Hivyo, baada ya kuivaa neema ya Mungu, Mariamu alipokea baraka ya kumzaa Yesu Kristo. Hata hivyo, tukio hili la Bikira Mariamu kupata mimba linaweza kuitwa ni baraka. Kiuhalisia, ilikuwa ni marufuku kufanya uzinzi, hasa kwa kuzingatia sheria ya Kiyahudi. Ni sawa na ilivyo siku hizi kwa mwanamke ambaye hajaolewa kuzaa mtoto, jambo hilo linaonekana kuwa si jema. Wakati huo, tendo la jinsi hiyo lilisababisha mtu kutoolewa daima. Lakini neema ya Mungu ilimfanya Mariamu kuifurahia heshima na utukufu, badala ya kukumbana na unyonge wa kimwili.

Baada ya kuikiri imani yake, Mariamu alianza kuulea ujauzito wake. Ukweli ni kuwa mimba ya Mariamu ya kumzaa Yesu ilipatikana kwa uwezo wa Roho Mtakatifu kama yule malaika wa Mungu alivyosema. Hivyo, kwa kupitia mwili wa Bikira Mariamu, Yesu Kristo, ambaye ni Mwokozi wetu alizaliwa. Mariamu hakuwa wa ukoo wa Haruni. Yeye anatoka katika ukoo wa Yuda. Yusufu aliyekuwa amemchumbia Mariamu, pia alikuwa ni wa ukoo wa Yuda. Hivyo, Yesu Kristo alizaliwa katika famili ya wafalme. Kwa kuwa Yesu Kristo ni Mfalme, basi ilimpasa kuja kwa kupitia nyumba ya wafalme. Hiyo inaendana kabisa na ule mnyororo wa fikra, ambapo tunaona kwa kuwa Yohana Mbatizaji alikuja kama Kuhani Mkuu wa mwisho, basi ilimpasa aje kupitia katika nyumba ya Makuhani Wakuu, yaani kwa kupitia ukoo wa Haruni.

Mungu alimtuma Yesu, na kabla ya kumtuma Yesu, alimtuma Yohana Mbatizaji, nabii mkuu na mtumishi wa Mungu. Ni kwa kufanya hivyo ndipo unabii wa Agano la Kale ulipotimizwa, na ndio maana iliwezekana kwetu sisi

kumwamini Mungu vizuri. Kwa kuwa Ukuhani Mkuu ni kitu kilichokuwa kimewekwa na Mungu milele, basi dhambi za ulimwengu zilipaswa kupitishwa kwenda kwa Yesu kwa kupitia ubatizo toka kwa mmoja wa wazao wa Haruni ambaye alikuwa ni Yohana Mbatizaji, akiwa kama Kuhani Mkuu wa wanadamu.

Haruni alikuwa ni Kuhani Mkuu wa kwanza katika Israeli, na alikuwa ni kaka mkubwa wa Musa. Baba yao mkuu alikuwa anaitwa Lawi (mwana wa Yakobo); babu yake alikuwa anaitwa Kohathi; baba yake aliitwa Amram; mama yake aliitwa Yokebedi; na dada yake mdogo aliitwa Miriam (Kutoka 6:16-20). Haruni alikuwa na watoto walioitwa, Nadabu, Abihu, Elieza, na Ithamari (Kutoka 6:23, Hesabu 3:2). Tangu wakati ambapo Musa aliupokea wito toka kwa Mungu wa kutoka Misri, Haruni alikuwa akimsaidia Musa, maana alikuwa hawezi kuongea vizuri, na kwa sababu hiyo Haruni alizungumza badalal yake (Kutoka 4:10, 7:10). Pia, wakati sherehe za kufanya agano kati ya Mungu na Waisraeli zilipokuwa zikifanyika katika Mlima Sinai, Musa pamoja na Haruni na wanawe wawili na wazee sabini wa Israeli, walimwona Mungu, kisha wakala na kunywa. Hii inaonyesha kuwa ukoo wa Haruni ulikuwa ukiwawakilisha watu wa Israeli (Kutoka 24:1-11).

Kisha, tangu wakati ambapo Mungu aliwaamuru kulijenga Hema Takatifu la Kukutani kwa ajili ya watu wa Israeli, Haruni na wanawe wanne waliwekwa wakfu toka kwa Mungu na wakaupokea ukuhani (Kutoka 29:1-9, 40:13-16). Haruni, kama Kuhani Mkuu wa kwanza wa Israeli, alifanya ukuhani kwa miaka 40, na kwa sababu hii kabila ya Rubeni waliyapinga mamlaka ya Haruni kama Kuhani Mkuu.

Lakini, kwa mujibu wa amri ya Mungu, maua ya mlozi yalichanuka katika fimbo ya Haruni iliyokuwa ikiliwakilisha

kabila la Lawi kati ya makabila kumi na mbili yaliyokuwa yameweka fimbo; na hapo ilithibitishwa kuwa ukuhani ulitolewa na Mungu kwa nyumba ya Haruni (Hesabu 17:1-10). Wakati Haruni alipokuka akiwa na miaka 123, mavazi ya Haruni yalivaliwa na Eliazari mwanawe, na Eliazari akawa Kuhani Mkuu mahali pa Haruni (Hesabu 20:23-29). Mwandishi wa Kitabu cha Waebrania anashuhudia ukweli kuwa Haruni alikuwa ni Kuhani Mkuu wa hapa duniani na kwamba Yesu alikuwa ni Kuhani Mkuu wa Mbinguni (Waebrania 7:11-28).

Ni Wazi Kuwa Yohana Mbatizaji Alikuwa ni Kuhani Mkuu Atakayembatiza Yesu Kichwani Ili Kuzipatanisha Dhambi za Ulimwengu

Yesu anaushuhudia ukweli kuwa Yohana Mbatizaji ni mwakilishi wa wanadamu. Kama ilivyoandikwa katika Mathayo 11:10-11, *“Huyo ndiye aliyeandikiwa haya, ‘Tazama, mimi namtuma mjumbe wangu mbele ya uso wako, atakayeitengeneza njia yako mbele yako.’ Amin, nawaambieni, hajaondokea mtu katika wazao wa wanawake aliye mkuu kuliko Yohana Mbatizaji; walakini aliye mdogo katika ufalme wa mbinguni ni mkuu kuliko yeye.”* Yohana Mbatizaji aliufanya ukuhani wa kuzipitisha dhambi za mwanadamu kwenda kwa Yesu, Mwanakondoo wa Mungu wa sadaka ya kuteketezwa.

Lango la Mbinguni Lilifunguliwa Tangu Wakati wa Yohana Mbatizaji

Tunapoanza kuifanya kazi fulani, basi ni hakika kuwa tunajiandaa kuifanya kazi ile kikamilifu. Vivyo hivyo, Mungu alimwandaa kwanza Yohana Mbatizaji ili kuzitoweshea mbali dhambi za ulimwengu. Ushahidi ni huu hapa: *“Mwanzo wa Injili ya Yesu Kristo, Mwana wa Mungu. Kama ilivyoandikwa katika nabii Isaya:*

‘Tazama, namtuma mjumbe wangu mbele ya uso wako, Atakayeitengeneza njia yako.’

‘Sauti ya mtu aliaye nyikani:

‘Itengenezeni njia ya BWANA;

Yanyoosheni mapito yake.’

Yohana alitokea, akibatiza nyikani, na kuuhubiri ubatizo wa toba liletalo ondoleo la dhambi. Wakamwendea nchi yote ya Uyahudi, nao wa Yerusalemu wote, wakabatizwa katika mto wa Yordani, wakiziungama dhambi zao. Na Yohana alikuwa amevaa singa za ngamia na mshipi wa ngozi kiunoni mwake, akala nzige na asali ya mwitu. Akahubiri akisema, Yuaja nyuma yangu aliye na nguvu kuliko mimi, ambaye mimi sistahili kuinama na kulegeza gidamu ya viatu vyake. Mimi niliwabatiza kwa maji; bali yeye atawabatiza kwa Roho Mtakatifu.” (Marko 1:1-8).

Tutamwangua kwa kina Yohana Mbatizaji, ambaye ni mwandaaji wa injili ya Mbinguni. Tukisoma Kitabu cha Malaki katika Agano la Kale, tunaweza kuona kuwa makuhani wakati wa Malaki walikuwa ni mafisadi kabisa. Kwa sababu hiyo, hakukuwa na kuhani aliyekuwa sawa mbele za Mungu kati ya Waisraeli kabla ya kuja kwa Yesu miaka 2,000 iliyopita. Wakati huo, makuhani walikuwa ni mafisadi kiasi kuwa walikuwa wamezitupa amri za Neno la Mungu, yaani utaratibu

wa sadaka ya kuteketezwa uliotolewa na Mungu na amri zake.

Kwa kwa sababu hiyo, ilimpasa Mungu kuwa na kuhani mwaminifu, ambaye ni mjumbe wake azaliwe hapa duniani. Hivyo, Mungu alimtuma mjumbe wake, na huyo si mwingine bali ni Yohana Mbatizaji, ambaye ni mwandaaji wa injili ya Mbinguni. Yohana Mbatizaji alitumwa hapa duniani miezi 6 kabla Yesu. Kwa kuwa wakati wote Mungu alitumia kuhani mwakilishi ili kuzipitisha dhambi za watu kwenda katika mnyama wa sadaka ya kuteketezwa, basi ilimpasa Mungu kumtuma Yohana mbatizaji kwa kazi hiyo. Hivyo, Mungu alimtuma Yohana Mbatizaji na akamfanya kuwa kuhani mwakilishi wa wanadamu. Lakini kwa kuwa Yohana Mbatizaji asingeliweza kuishi pamoja na makuhani mafisadi, basi yeye aliwahasisha Waisraeli kutubu wakati akiwa anaishi peke yake nyikani.

Katika Injili ya Marko sura ya 1 aya ile ya 2, inaeleza, *“Kama ilivyoandikwa katika nabii Isaya: ‘Tazama, namtuma mjumbe wangu mbele ya uso wako, atakayeitengeneza njia yako.’* Hata hivyo, yeye aliyekuwa akihubiri nyikani alikuwa akihubiri ubatizo wa toba ambao ungeliwaongoza kupata ondoleo la dhambi. Kulikuwa na aina mbili za ubatizo zilizokuwa zimetolewa na Yohana Mbatizaji.

Aina ya kwanza ya ubatizo ulikuwa ni ubatizo wa toba ambao aliwapatia watu wa Israeli, na huu ulikuwa ni ubatizo ambao ulifanya watu waliokuwa wamemwacha Mungu kumrudia Kristo ambaye alikuwa ni mpatanishi wa milele kwa ajili ya dhambi zao. Yohana Mbatizaji, akiwa kama nabii, aliwapatia watu ubatizo wa toba hasa wale wale ambao waliokubali na kuzitubia dhambi zao; pia aliwafanya watu watambue kuwa ni wenye dhambi wanaoelekea kuzimu. Hivyo, watu walikuja mbele ya Yohana Mbatizaji wakaupokea ubatizo wa maji kama ishara ya kuuthibitisha ukweli kuwa wao ni

wenye dhambi mbele za Mungu.

Ubatizo wa pili ulikuwa ni ule ambao Yohana Mbatizaji alimpatia Yesu na huu ulikuwau ni ubatizo ambao ulizipitisha dhambi zote za ulimwengu kwenda katika mwili wa Yesu. Yohana Mbatizaji aliwashuhudia wale waliopokea ubatizo wa toba mbele za Mungu, ili waweze kumwamini Yesu ambaye alikuwa amezichukulia mbali dhambi za ulimwengu kwa ubatizo.

Wakati Yesu alipokuwa anakaribia kuupokea ubatizo toka kwa Yohana Mbatizaji, Yesu alimwambia Yohana Mbatizaji hivi, *“Kubali hivi sasa, kwa kuwa ndivyo itupasavyo kuitimiza haki yote” (Mathayo 3:15)*. Kama ilivyoandikwa katika kifungu hiki, Maneno ya unabii wa Mungu yanayosema kuwa Yesu atazichukua dhambi za wanadamu na kuzipatanisha yalitimizwa. Watu wote wanaomwamini Yesu wanapaswa kuuamini ubatizo pia na damu ya Yesu, na kisha kuiamini injili ya upatanisho wa dhambi. Kwa kuwa Yohana Mbatizaji, mwandaaji wa injili ya Mbinguni, alikuwa amezipitisha dhambi za ulimwengu kwenda kwa Yesu milele kwa kumbatiza Yesu kama kipatanisho tosha kwa dhambi za ulimwengu, basi ni hakika kuwa Yohana Mbatizaji amefanya iwezekane kwetu sisi kuingia Mbinguni kwa kumwamini Yesu. Yesu amefanyika kuwa ni Njia ya kwenda Mbinguni. Je, unaamini hivi?

Katika Injili ya Marko sura ya 1 aya ya 14-15, maandiko yanasema, *“Hata baada ya Yohana kutiwa gerezani, Yesu akaenda Galilaya, akihubiri Habari N jema ya Mungu, akisema, wakati umetimia, na ufalme wa Mungu umekaribia; tubuni na kuiamini injili.”* Injili ni “habari njema,” na kwa Kiyunani ni *“euaggelion.”* Habari kwamba Yesu amezichukulia mbali dhambi za ulimwengu kwa kuzipokea katika mwili wake wakati alipoupokea ubatizo toka kwa

Yohana Mbatizaji kwa ajili ya upatanisho wa dhambi, kwa hakika hiyo ni injili ya Mbinguni. Dhambi zote za ulimwengu zimepitishwa kwenda kwa Yesu kwa kupitia Yohana Mbatizaji hasa wakati Yesu alipoupokea ubatizo wake.

Injili inayozipatanisha dhambi za mwanadamu ilikuwa ni injili ya ubatizo wa Yesu alioupokea na damu yake Msalabani. Dhambi za ulimwengu ina maanisha ni dhambi za watu ambazo wamezifanya hapa ulimwenguni. Watu wote wanaotajwa hapa ni pamoja na wewe na wajukuu wako watakaozaliwa baaaye. Na dhambi zako ni dhambi zote zilizopita, zilizopo, na zitakazokuja (yaani si dhambi ulizozifanya awali tu bali ni pamoja na dhambi zote ambazo utazifanya hapo baadaye), kwa ujumla wake ndio zinazoitwa dhambi za ulimwengu. Zaidi ya yote, neno ulimwengu halimaanishi kuwa ni Dunia tu, bali linamaanisha ni mwanzo na mwisho wa kila kitu duniani.

Yohana Mbatizaji Alikuwa Kuuhubiri Ukweli wa Upatanisho wa Dhambi

Yohana Mbatizaji alikuwa akiwa amebeba Ukweli wa haki, au Ukweli wa wokovu, ambao kwa huo Mungu amezipatanisha dhambi za wanadamu kama ilivyoandikwa, *“Kwa sababu Yohana alikuja kwenu kwa njia ya haki, ninyi msimwamini; lakini watoza ushuru na makahaba walimwamini; nanyi hata mlipoona, hamkutubu baadaye, ili kmwamini”* (Mathayo 21:32). Yohana Mbatizaji alikuwa kuuhubiri Ukweli wa haki. Yohana Mbatizaji alikuwa ni nabii aliyekuwa ametumwa na Mungu kuja ulimwenguni ili kwamba awaongoze watu wote kwenda kwenye haki. Kwa kuzipitisha dhambi za watu wote kwenda kwa Yesu, basi yeyote anayeamini katika Ukweli huu

anaweza kupokea ondoleo la dhambi. Watu wengi wamepokea wokovu kwa kuamini na kuwa na imani katika Ukweli wa wokovu ambao Yohana aliushuhudia, hasa alipotoa ushuhuda juu ya ‘injili ya upatanisho wa dhambi,’ ambapo yeye ndiye alizipitisha dhambi zote za ulimwengu kwenda kwa Bwana.

Mathayo 21:32 inasema, *“Kwa sababu Yohana alikuja kwenu kwa njia ya haki, ninyi msimwamini; lakini watoza ushuru na makahaba walimwamini; nanyi hata mlipoona, hamkutubu baadaye, ili kmwamini.”* Hii sentensi inayosema, *“Kwa sababu Yohana alikuja kwenu kwa njia ya haki,”* inazungumzia kazi za Yohana Mbatizaji, akiwa kama Kuhani Mkuu wa mwisho wa Agano la Kale (Mathayo 11:13), hasa baada ya kuzipitisha dhambi zote za mwanadamu kwenda kwa Yesu kwa ubatizo.

Lakini, kwa nini unafikiri watoza ushuru na makahaba waliuamini ubatizo wa Yesu ambao kwa huo Yohana Mbatizaji alizipitisha dhambi za ulimwengu kwenda kwa Yesu? Ni lazima tufikirie zaidi ni kwanini makahaba na watoza ushuru waliupokea wokovu toka katika dhambi zao wote kwa kuamini kazi ya haki iliyokuwa imefanywa na Yesu Kristo na Yohana Mbatizaji. Na kwa nini watu wengi sana waliteseka kwa maangamizi kwa kutokuwa na imani juu ya huduma hii ya haki? Makahaba na watoza ushuru walikuwa ni watu wa kawaida waliokuwa wanatenda dhambi nyingi.

Kama ingelikuwa Yohana Mbatizaji hajaifanya kazi ya kuzipitisha dhambi za ulimwengu kwenda kwa Yesu mara moja na kwa wote, basi ni hakika kuwa makahaba na watoza ushuru wasingeliweza kuupokea wokovu toka katika dhambi zao ambazo zilikuwa ni nzito kama mawingu ya ukungu. Watoza ushuru na makahaba waliamini katika mioyo yao kuwa ule ubatizo ambao Yesu aliupokea toka kwa Yohana Mbatizaji ulikuwa ni ubatizo wa upatanisho kwa ajili ya dhambi zao zote,

na kwa sababu hiyo walipokea wokovu. Pia waliamini kuwa Yesu alikuwa ni Mwana wa Mungu, na kwamba wamepokea wokovu wa milele kwa kuwa na imani kwamba Yesu alikuwa ni Mwanakondoo wa Mungu wa sadaka ya kuteketezwa aliyekuwa ametumwa ili kuwaokoa toka katika dhambi zao zote.

Kama isingelikuwa jukumu la Yohana Mbatizaji katika injili ya upatanisho wa dhambi, ingeliwezejane basi kwetu sisi kumwamini Yesu na kupokea wokovu? Unaweza kusema, “Siuamini ubatizowa Yesu, lakini bado ninamwamini Yesu.” Ikiwa ni hivyo, unafikiri kuwa Yesu anaweza kuwa Mwokozi wako pasipo wewe kuwa na imani kwamba dhambi zako zimepatanishwakwa ubatizo wa Yesu? Kama ni hivyo, basi ina maanisha kuwa Yesu alikufa pasipo kuzichukua dhambi zako kwa ubatizo wake. Je, unafikiri unaweza kuzaliwa tena upya kwa kumwamini Yesu? Ndugu wapendwa waamini, naomba mfikirie tena kuhusu hili.

Mungu alimtuma Yohana Mbatizaji, na akapanga ili Yesu azichukue dhambi zako zote kwa kupitia Yohana Mbatizaji ili aweze kukukomboza toka katika dhambi zako na adhabu ya dhambi. Ikiwa Mungu ameamua kuzipitisha dhambi zako kwenda kwa Yesu kwa kupitia ubatizo wa Yesu, basi kama utaupinga uamuzi wa Mungu hutaweza kupokea wokovu. Ikiwa utaipinga injili ya Yesu ya ubatizo na damu yake, basi ni hakika kuwa huwezi kukombolewa. Badala yake, kwa sababu ya kuupinga mpango wa Mungu, basi wewe utakuwa ni mmoja kati ya wale ambao wamepangwa kwenda kuzimu. Ninafikiri kuwa utafikiria vizuri kuhusu ipi ni imani ya kweli kwa kuzingatia Neno la Ukweli.

Ni sahihi kwamba upokee wokovu kwa kumwamini Yesu kwa mujibu wa mpango uliopangwa na Mungu. Je, hisia zako zikoje sasa hivi? Ninaamini kuwa utayatupilia mbali mawazo

yako na kisha ukauamini Ukweli kuwa dhambi zao zote zimeondolewa mbali kwa kupitia Ubatizo wa Yohana Mbatizaji ambao alimpatia Yesu. Ninawaomba ili kwamba muyaamini mapenzi ya Mungu yanayotaka kutuokoa kwa maji na Roho.

Ikiwa unaamini kuwa dhambi zako zote zimepishwa kwenda kwa Yesu, basi wewe ni mwenye haki kwa kuwa hauna dhambi kwa imani, na wenye haki wanaoamini hivi wanaenda Mbinguni kwa mujibu wa sheria ya Mungu ya neema. Ikiwa hauwezi kuubali ukweli kuwa dhambi zako zote zimepitishwa kwenda kwa Yesu na Yohana Mbatizaji, basi hiyo ina maanisha kuwa umeukataa wokovu wa Mungu. Je, bado utaendelea kuikataa njia ya haki ambayo Yohana Mbatizaji ameifanya kwa Yesu? Ikiwa utaipinga baraka hii, basi unapaswa kufahamu kuwa itakuwa ni sawa na kuikataa mipango yote ya Mungu na kwa sababu hiyo utakuwa ni mtoto mwovu, unayeukataa Ukweli kwa mawazo yako mwenyewe.

Baada ya kumbatiza Yesu katika Mto Yordani, siku ya pili yake Yohana Mbatizaji alimshuhudia akisema, *“Tazama! Mwanakondoo wa Mungu aichukuaye dhambi ya ulimwengu!”* (Yohana 1:29) Yesu alizipokea dhambi za ulimwengu, na miaka 3 baada ya kuupokea ubatizo, alikufa Msalabani kama gharama ya hizo dhambi.

Dhambi haina uzito wowote. Haina dhambi, harufu, au umbo, na wala haitoi sauti. Kwa kuwa mtu hawezi kuiona kwa kupitia milango ya fahamu (ufahamu wa kuona, kunusa, kuonja, na kugusa), watu hawaihisi katika maisha yao. Usijaribu kufikiri kwa kutumia hisia zao na ufahamu kuwa dhambi zako zimetoweshwa. Hisia hubadilika. Lakini, Neno la Mungu, ambalo ni Ukweli kuwa Yesu amezitoweshea mbali dhambi za ulimwengu haubadiliki milele.

Nina imani kuwa sasa unaliamini Neno la Ukweli ambalo

kwa hilo Yohana Mbatizaji alishuhudia akisema, *“Tazama! Mwanakondoo wa Mungu aichukuaye dhambi ya ulimwengu!”* (Yohana 1:29) Yesu alishuhudia kwa miaka 3 akisema, *“Mimi ni njia, kweli, na uzima”* (Yohana 14:6), pia alishuhudia kuwa ubatizo ambao Yesu aliupokea na damu yake ni upatanisho wa dhambi za mwanadamu. Yesu alituambia sisi tunaoamini kuishi maisha ya ufuasi kuieneza injili ya ubatizo wa Yesu na damu yake.

Ndugu waamini, Nabii Isaya alisema, *“Semeni na moyo wa Yerusalemu, kauambieni kwa sauti kuu ya kwamba vita vyake vimekwisha, uovu wake umeachiliwa; kwa kuwa amepokea kwa mkono wa BWANA adhabu mara dufu kwa dhambi zake zote”* (Isaya 40:2). Ndiyo, hii ni kweli. Yesu ametuokoa kwa kuzichukua dhambi zako na zangu kwa kupitia ubatizo aliupokea toka kwa Yohana Mbatizaji, kwa kufa Msalabani kama fidia kwa dhambi hizo, na kwa kufufuka kwake. Kitu cha kwanza ambacho Mungu alikifanya ili kuzipatanisha dhambi za wanadamu na kutuokoa ni kumtuma Yohana Mbatizaji. Ukweli ni kuwa Mungu alimtuma kwanza Yohana Mbatizaji, ambaye ni mjumbe wa Mfalme ili kutuokoa wenye dhambi toka katika dhambi. Biblia inasema hivyo.

Katika Kitabu cha Malaki katika Agano la Kale sura ya 3 aya ya 1 inasema hivi, *“Angalieni, namtuma mjumbe wangu, naye ataitengeneza njia mbele yangu; naye Bwana mnayemtafuta atalijilia hekalu lake ghafula; naam, yule mjumbe wa agano mnayemfurahia, angalieni, anakuja, asema BWANA wa majeshi.”* Katika Kitabu cha Malaki, katika Agano la Kale Mungu aliahidi kumtuma Yohana Mbatizaji, mjumbe wa Mungu.

Mungu ametufanya sisi wanadamu tupokee upatanisho wa dhambi katika Yesu kwa kupitia Yohana Mbatizaji, mtumishi wake. Yohana Mbatizaji alizipitisha dhambi za ulimwengu

kwenda kwa Yesu kwa kumbatiza. Hii ni njia ya kutufanya sisi kuiandaa njia ya kwenda Mbinguni kwa kutufanya tupokea ondoleo la dhambi, na hii ni njia ya wokovu ambayo imetuokoa sisi wanadamu. Na ni hakika kuwa hakuna njia nyingine ya wokovu zaidi ya hii. Bwana alisema, *“Mimi ni njia, kweli na uzima”* (Yohana 14:6).

Kule kusema Yesu amezipatanisha dhambi zetu zote kwa Yeye kuzichukua dhambi zetu kwa kupitia ubatizo wake na kwa kufa Msalabani, basi hiyo ni njia na Ukweli unaotuwzesha kuupokea wokovu. Tunaweza kupata maisha mapya kwa kuamini hivyo. Je, ulizihamishia dhambi zako zote kwenda kwa Yesu wakati Yohana Mbatizaji alipozipitisha zote za ulimwengu kwa kumbatiza Yesu? Je, unauamini Ukweli huu? Huu ulikuwa ni mpango wa Mungu, uliokuwa umepangwa na Mungu, na unaowanufaisha wenye hekima. Ikiwa unaukataa ukweli huu, basi ni hakika kuwa huwezi kuingia katika Ufalme wa Mungu. Mungu aliupokea ubatizo wa Yohana Mbatizaji na akazipatanisha dhambi zako zote ili kukuokoa. Ninaamini kuwa utaiamini njia ya wokovu iliyofunguliwa na Yesu. Ninatumaini kuwa ninyi nyote hamtaikataa njia ya uzima.

“Tangu siku za Yohana Mbatizaji hata sasa ufalme wa mbinguni wapatikana kwa nguvu, na wenye nguvu wauteka” (Mathayo 11:12). Kupatikana kwa nguvu maana yake ni kuwa watu wanaouamini ukweli kuwa dhambi zote za ulimwengu zilipitishwa kwenda kwa Yesu wakati alipoupokea ubatizo toka kwa Yohana Mbatizaji wataingia Ufalme wa Mbinguni kwa imani kwa kuwa hawana dhambi. Sasa, Ufalme wa Mbinguni upo kwa wale wanaoamini kuwa dhambi za ulimwengu zilipitishwa kwenda kwa Yesu kwa kupitia Yohana Mbatizaji. Yeyote anayeiamini injili ya upatanisho wa dhambi ambayo kwa hiyo Yohana Mbatizaji alizipitisha dhambi zote za

ulimwengu kwenda kwa Yesu atapokea wokovu pasipo shaka. Ndugu waamini, ni nani anayetuandalia njia ya kwenda katika Ufalme wa Mbinguni?

Mungu anasema, *“Angalieni, namtuma mjumbe wangu, naye ataitengeneza njia mbele yangu,”* hii ina maanisha kuwa Mungu alimwandaa Yohana Mbatizaji ili kwamba tuweze kuingia katika Ufalme wa Mbinguni. Yohana Mbatizaji ametufanya sisi kuwa wenye haki, wasio na dhambi, na watoto wa Mungu kwa kuitimiza kazi ya kuzihamishia dhambi zetu kwenda kwa Yesu Kristo. Mungu alituandaa ili kwamba tuweze kuingia katika Ufalme wa Mbinguni. Yohana Mbatizaji, mjumbe aliyetumwa na Mungu mwenyewe, aliiandaa njia kwa niaba yetu ili kwamba tuweze kwenda katika Ufalme wa Mbinguni huku yeye akiwa ni mwakilishi wa kila mmoja wetu. Yohana Mbatizaji aliiandaa njia kwetu sisi wanadamu ili tuweze kuzaliwa tena upya.

“Wakati huo Yesu akaja kutoka Galilaya mpaka Yordani kwa Yohana ili abatizwe. Lakini Yohana alitaka kumzuia, akisema, Mimi nahitaji kubatizwa na wewe, nawe waja kwangu? Yesu akajibu akamwambia, Kubali hivi sasa; kwa kuwa ndivyo itupasavyo kuitimiza haki yote. Basi akamkubali. Naye Yesu alipokwisha kubatizwa mara akapanda kutoka majini; na tazama, mbingu zikamfunukia, akamwona Roho wa Mungu akishuka kama hua, akija juu yake; na tazama, sauti kutoka mbinguni ikisema, ‘Huyu ni Mwanangu, mpendwa wangu ninayependezwa naye’” (Mathayo 3:13-17).

Yohana Mbatizaji aliifanya kazi ya haki. Huduma ya Yohana Mbatizaji kwamba amezipitisha dhambi za watu wote wa ulimwengu huu kwenda kwa Yesu ilikuwa ni tendo la haki. Hii ni injili ya upatanisho wa dhambi, na haki ya Mungu na pia ni njia ya kuupata wokovu ambayo Yohana aliishuhudia. Ili kupokea wokovu, basi ni lazima tuutambue na kuuamini katika

mioyo yetu ubatizo wa Yesu, damu yake aliyoimwaga, na ufufuko wake, ambavyo kwa pamoja vinaifanya injili ya upatanisho wa dhambi.

Pia, Yesu aliitimiza haki ya Mungu kwa ubatizo wake. Yesu aliukamilisha wokovu wa mwanadamu kwa kuzichukua dhambi za ulimwengu mzima kwa kupitia ubatizo wa Yohana Mbatizaji, na kwa kufa Msalabani baada ya kuwa amezipatanisha dhambi hizo zote.

Tunakiangalia Kitabu cha Waebrania, Yesu anatajwa kuwa ni Kuhani Mkuu wa Mbinguni baada ya zamu ya Melkizedeki. Yeye hana ukoo, na yeye si mwana wa Haruni. Yesu Kristo si wa ukoo wa Adamu, bali Yeye ni Mwana wa Mungu. Na kuwa Yeye ni Muumba wetu na anayejiita *“Mimi niko ambaye niko.”* Basi ni dhahiri kuwa hana ukoo. Lakini aliuacha utukufu wa Mbinguni akaja hapa duniani ili kuwaokoa watu wake. Yesu alikuja hapa duniani katika mwili wa mwanadamu na akaupokea ubatizo katika Mto Yordani ili kuwaokoa wanadamu kwa kuzipatanisha dhambi zao; alifanya hivyo wakati watu walipokuwa wakihangaika baada ya kuanguka katika dhambi kwa sababu ya majaribu ya ibilisi.

Hebu tusome Mathayo 3:15 kwa pamoja. *“Yesu akajibu akamwambia, ‘Kubali hivi sasa, kwa kuwa ndivyo itupasavyo kuitimiza haki yote.’ Basi akamkubali.”* Yesu alimwamuru Yohana Mbatizaji, mwakilishi wa dunia, kukubali mara moja. Yohana Mbatizaji alitii kwa kusema, *“Ndiyo nitafanya hivyo.”* Kisha, Yesu akiweka mbele kichwa chake kumwelekea Yohana na akabatizwa. Kama vile Kuhani Mkuu alivyofanya kuiweka mikono juu ya kichwa cha mbuzi wa makosa ili kuzihamishia dhambi za mwaka mzima za Waisraeli kwenda kwa huyo mbuzi kama tunavyoona katika Agano la Kale, basi vivyo hivyo, Yohana Mbatizaji alizipitisha dhambi za ulimwengu kwenda kwa Yesu kwa kumbatiza Yesu.

Wokovu Toka Katika Dhambi Umekamilishwa Kwa Kanuni ya Uwakilishi

Wakati nchi moja inaposaini mkataba na nchi nyingine, mkataba ule unakuwa halali wakati viongozi wa nchi zote mbili wanapokuwa wameusaini mkataba huo, kila mmoja wao akiwawakilisha watu wa taifa lake. Vivyo hivyo, wokovu wetu ulikamilishwa chini ya kanuni ya uwakilishi. Yohana Mbatizaji, akiwawakilisha wanadamu wote alizipitisha dhambi kwenda kwa Yesu. Na Yesu aliupokea ubatizo toka kwa Yohana Mbatizaji. Katika neno ubatizo, kuna maana ya kiroho ya “kusafisha, kuzika, kupitisha, na kuhamishia.” Katika Agano la Kale, wakati mwenye dhambi alipokuwa akizipitisha dhambi kwenda kwa mbuzi kwa kumwekea mikono, basi dhambi hizo zilipitishwa kwenda kwa mbuzi huyo na huyo mbuzi ilimpasa kufa ili kuzipatanisha dhambi hizo.

Katika Mambo ya Walawi 16:21, kuna kifungu kinachosema, *“Na Haruni ataweka mikono yake miwili juu ya kichwa cha yule mbuzi aliye hai, na kuungama juu yake uovu wote wa wana wa Israeli, na makosa yao, naam, dhambi zao zote; naye ataziweka juu ya kichwa chake yule mbuzi, kisha atampleka aende jangwani kwa mkoo wa mtu aliye tayari.”* Kama kifungu hiki kinavyosema, kila mwaka katika Siku ya Upatanisho, Haruni alifanya tendo la kuwekea mikono kwa kuiweka mikono yake juu ya kichwa cha mbuzi wa makosa kwa mujibu wa kanuni ya uwakilishi kwa niaba ya watu, kadri Haruni alivyoiiweka mikono yake, basi dhambi zote za watu wa Israeli zilipitishwa kwenda kwa yule mbuzi kwa kupitia mikono ya Haruni (Mambo ya Walawi 16:20-22). Je, watu wa Israeli walikuwa na dhambi wakati huo? Hapana, hawakuwa nazo. Kwa kanuni ile ile, kwa kupitia ubatizo ambao Yesu aliupokea toka kwa Yohana Mbatizaji, mwakilishi wa

wanadamu, basi mapenzi ya Mungu ya kuzipatanisha dhambi za mwanadamu yalitimizwa.

Katika Agano la Kale, mnyama wa sadaka ya kuteketezwa alipokea kule kuwekewa mikono ambako kulizipitisha dhambi za watu (Mambo ya Walawi 16:21). Ubatizo ambao Yesu aliupokea toka kwa Yohana Mbatizaji katika Mto Yordani (Mathayo 3:13-17) ni sawa na ile sadaka ya kuteketezwa kwa ajili ya upatanisho. Maneno yanayosema hivi, *“Kubali hivi sasa, kwa kuwa ndivyo itupasavyo kuitimiza haki yote”* (Mathayo 3:15), yana maana inayofanana na “Nitaitimiza haki yote katika ulimwengu huu kwa kuzichukua mgongoni mwangu dhambi zote za ulimwengu kwa kuupokea ubatizo toka kwako.” Na neno *“Kwa kuwa”* lina maanisha “kwa wewe kunipatia ubatizo, na kwa mimi kuupokea ubatizo toka kwako.” Maneno haya *“Kwa kuwa,”* kama yalivyotajwa hapa kwa Kiyunani ni ‘οὐτως γάρ’. Na maneno haya yanaweza kuwa na maana kama hii, ‘hasa kwa njia hii,’ ‘kwa namna inayofaa zaidi,’ au ‘hakuna njia nyingine zaid ya hii.’

Hivyo msemu unaosema, *“Kwa kuwa ndivyo itupasavyo kuitimiza haki yote,”* maana yake ni “ni sahihi kwamba nizichukue dhambi za wanadamu wote, kwa namna inayofaa zaidi, wewe uufanye ubatizo juu yangu nami niupokee ubatizo toka kwako.” Kwa lugha nyingine, Bwana anasema, “Watu wote wanaenda kuzima kwa kuwa wana dhambi. Kila mtu anateseka sasa kwa sababu ya dhambi. Wananyanyaswa na Ibilisi. Hawawezi kuzipokea baraka kwa sababu ya dhambi. Hivyo, ili kuwabariki watu wote na ili waweze kuingia Mbinguni, basi ni lazima niupokee ubatizo tokwa kwako. Wewe ni wa ukoo wa Haruni. Hivyo, ukiwa kama mwakilishi wa wanadamu, basi unapaswa kuufanya ubatizo kwangu kwa niaba ya kila mtu. Nitaupokea ubatizo toka kwako. Kwa kufanya hivi haki yote itakuwa imetimizwa katika ulimwengu

huu.” Wakati Yesu alipomwambia Yohana Mbatizaji, “Fanya ubatizo juu yangu,” Yohana Mbatizaji alijibu, “Ndio nitafanya hivyo.” Kisha Yohana Mbatizaji akaiweka mikono yake juu ya kichwa cha Yesu kisha akaiondoa. Tangu wakati huo, dhambi zote zilipitishwa kwenda kwa Yesu Kristo kikamilifu.

Je, kulikuwa na tukio lolote lile ambapo Yesu alifanya dhambi? Hapana, halikuwepo. Kwa kuwa Yesu Kristo alitungwa mimba kwa uwezo wa Roho Mtakatifu, Yeye alizaliwa pasipo kuwa na dhambi. Wala hakutenda dhambi katika ulimwengu huu. Sisi wanadamu tunazaliwa na dhambi, lakini Yesu hakuzaliwa na dhambi. Wakati alipokuwa akiishi hapa duniani, Yesu hakutenda dhambi yoyote ile, wala hakufanya kosa lolote. Lakini kwa nini unadhani ilimpasa Yesu kufa kwa kupigiliwa misumari Msalabani?

Katika huduma ya wazi ya Yesu Kristo, kazi ya kwanza aliyoifanya ilikuwa ni kuzichukua dhambi zetu zote kwa kuupokea ubatizo katika Mto Yordani. Yesu alizichukua dhambi zote za watu kwa kupitia Kuhani Mkuu wa mwisho aliyeitwa Yohana Mbatizaji, mwakilishi wa wanadamu. Hii ndio sababu Yesu aliipokea adhabu na kufa Msalabani. Hii ndio maana ni kwanini Yesu Kristo, wakati alipokuwa akiishi katika miaka ile 3, hata baada ya kumwona yule mwanamke mzinzi alisema, “Hata mimi sikuhukumu. Ni lazima niipokee hukumu. Ni lazima nife Msalabani kwa ajili yako.”

Yesu alikwenda kuomba katika Bustani ya Gethisemane, “Si kama nitakavyo mimi, bali kama utakavyo wewe.” Mara ya kwanza aliomba kwa nguvu sana, “Baba, ikiwa ni mapenzi yako kikombe hiki kiniepuke.” Lakini muda si mrefu, aliutii mpango wa Mungu wa wokovu. Pamoja na kuwa Yesu alitaka kuukwepa kama ingeliwezekana, na kwa kufuata mapenzi ya Baba, baadaye Yesu aliacha na kusema, “Si kama nitakavyo mimi, bali kama utakavyo wewe,” kisha akaundaa moyo wake.

Yesu alifahamu kuwa Mungu alitaka yeye afe. Hivyo, kuanzia wakati huo, alipelekwa katika mahakama ya Pilato, aliteswa, alipigwa kwa mijeledi iliyokuwa imeandaliwa kwa wakosaji chini ya hukumu ya kifo, hadi mwili wake ulipokuwa umeraruka, na hatimaye aliangikwa Msalabani, akiwa nusu mfu.

Pilato alimuuliza Yesu, “Wewe ni Kristo? Wewe ni Mwokozi? Mwana wa Mungu?” Yesu alijibu, “Huyo unayemsema ni mimi. Wewe wasema.” Wakati pilato aliposema, “Ikiwa utasema maneno sahihi nitakuachilia. Nina mamlaka ya kufanya hivyo,” Yesu alijibu, “*Wewe hungekuwa na mamlaka yoyote juu yangu, kama usingepewa kutoka juu*” (Yohana 19:11), kisha akakaa kimya kama mwanakondoo mbele ya wakatao manyoya.

Kwa nini unafikiri Yesu alifanya hivyo? Ukweli ni kuwa Yesu alipaswa kuteseka kwa haki kwa kuadhibiwa na kusulubiwa, kwa kuwa alikuwa amezichukua dhambi za ulimwengu kwa ubatizo wake. Ni mpaka pale Yesu alipoipokea adhabu ya dhambi kwa kusulubiwa ndipo vita dhidi ya dhambi ilipofikia ukomo. Na ni kuanzia hapo ndipo watu wangelikoma kuteseka na dhambi. Ni kuanzia hapo ndipo wanadamu wote wangelikuwa huru mbali na dhambi na kukombolewa toka katika utumwa wa dhambi, na ndio maana Yesu alikaa kimya kama vile kondoo mbele ya wamkatao manyoya. Hii injili ya ubatizo wa Yesu na damu yake ambayo imezipatanisha dhambi za wanadamu wote.

Bwana Amezipatanisha Dhambi Zote za Ulimwengu Kikamilifu

Katika Injili ya Yohana sura ya 1 aya ya 29 Yohana

alimshuhudia Yesu, na ilikuwa ni siku ya pili yake baada ya ubatizo wa Yesu akisema, *“Tazama! Mwanakondoo wa Mungu aichukuaye dhambi ya ulimwengu!”* Yohana Mbatizaji alimpatia Yesu ubatizo ambao ulizipatanisha dhambi zote za mwanadamu. Wakati Yesu alipomwendea Yohana Mbatizaji mara baada ya Yesu kuwa amebatizwa, Yohana Mbatizaji alishuhudia huku akiwaambia watu kuwa, *“Tafadhali hebu mwangalieni Yesu. Yeye ni Mwakondoo wa Mungu aichukuaye dhambi ya ulimwengu. Ninyi watu, hebu mwangalieni Yeye! Yeye ni Mwanakondoo wa Mungu aichukuaye dhambi ya ulimwengu.”* Kwa kuwa alikuwa amezipitisha dhambi zote za wanadamu kwenda kwa Yesu kwa ubagtizo, basi ndio maana yeye mwenyewe aliweza kuushuhudia ukweli kuwa Yesu alikuwa ni Mwokozi. *“Tazama! Mwanakondoo wa Mungu aichukuaye dhambi ya ulimwengu!”* (Yohana 1:29) Yesu alikuwa ni Mwanakondoo wa Mungu aliyekuwa amezichukulia mbali dhambi za ulimwengu. Mwana wa Mungu alikuja hapa duniani na akazichukulia mbali dhambi za ulimwengu.

Katika Yohana 1:35-36, Yohana Mbatizaji alishuhudia tena kama ilivyoandikwa, *“Tena siku ya pili yake Yohana alikuwa amesimama pamoja na wawili katika wanafunzi wake. Akamtazama Yesu akitembea, akasema, ‘Tazama Mwanakondoo wa Mungu!’”* Mwanakondoo anayetajwa hapa ina maanisha ni Yesu kama mwanakondoo, ambaye amefanyika kuwa sadaka ya kuteketezwa kwa wanadamu wote, kama vile ilivyokuwa kwa mnyama wa sadaka ya kuteketezwa katika Agano la Kale alivyokufa kwa niaba ya watu.

Mwana wa Mungu, Muumbaji wetu, alikuja hapa duniani na akazitoweshea mbali dhambi zako na zangu kwa ubatizo wake na kwa damu yake aliyoimwaga. Yesu aliupokea ubatizo toka kwa Yohana Mbatizaji na akaimwaga damu yake

Msalabani ili aweze kuzichukua dhambi zote—dhambi ya asili, dhambi binafsi, dhambi zote za makosa, na uovu wowote ule ambao kila mwanadamu ameutenda tangu siku ya Uumbaji hadi mwisho wa dunia.

Yesu alikwisha zitoweshea mbali dhambi zote za ulimwengu takribani miaka 2000 iliyopita. Kwa sasa tunatumia miaka ya kalenda kwa kufuata kuzaliwa kwa Yesu Kristo ambaye ni Mkuu wa historia. Kama unavyofahamu, miaka yote kabla ya Kristo huwa tunaiita ‘K.K.’ na miaka yote baada ya kuzaliwa kwake huwa tunaiita ‘B.K.’ (au kwa Kilatini *Anno Domini*, maana yake ‘katika mwaka wa Bwana wetu’).

Kwa kuwa katika Mwaka 30 B.K, Yesu alizichukua dhambi za ulimwengu kikamilifu kwa kuupokea ubatizo tokwa kwa Yohana Mbatizaji, siku iliyofuata Yohana Mbatizaji alimwonyesha Yesu na kusema, *“Tazama! Mwanakondoo wa Mungu aichukuaye dhambi ya ulimwengu!”* (Yohana 1:29) Kisha siku iliyofuata Yohana Mbatizaji alimshuhudia Yesu akisema, *“Tazama Mwanakondoo wa Mungu!”* (Yohana 1:36) Yohana Mbatizaji aliishuhudia injili ya upatanisho, akisema, “Yesu alizichukulia mbali dhambi zetu zote kikamilifu. Hivyo vita yako imekwisha. Hauna dhambi. Haijalishi ni aina gani ya dhambi umekwisha zifanya, Mwana wa Mungu alizichukulia mbali dhambi hizo.”

Ndugu wapendwa waamini, Mungu alizipatanisha dhambi zetu zote kwa ubatizo wa Yesu. Baada ya kuzipitisha dhambi zote kwenda kwa Yesu, Yohana Mbatizaji alishuhudia, akisema, *“Tazama! Mwanakondoo wa Mungu aichukuaye dhambi ya ulimwengu!”* (Yohana 1:29) Yohana Mbatizaji aliushuhudia Ukweli huu ili kwamba kila mtu apate kumwamini Yesu. Imeandikwa hivi, *“Huyo alikuja kwa ushuhuda, ili aishuhudie ile nuru, wote wapate kuamini kwa yeye”* (Yohana 1:7). Hili ni Neno ambalo linaonekana katika


Injili ya Yohana. Kama Yohana Mbatizaji asingelishuhudia, watu wangelifahamu vipi kuwa Yesu amezichukua dhambi za ulimwengu? Pamoja na kuwa Biblia inasema kuwa Yesu alikufa kwa ajili ya dhambi zetu zote, lakini Yohana Mbatizaji ndiye aliyeshuhudia kwamba, “Baada ya Yesu kuzichukua dhambi za ulimwengu kwa ubatizo wake, Yesu amezichukua dhambi hizo kwenda Msalabani.”

Yohana Mbatizaji alikuwa ni daraja linalounganisha Agano la Kale na Agano Jipya. Yeye alikuwa ni mtumishi wa Mungu aliyefanya jitihada ili Maneno yote ya Agano la Kale yaweze kutimilizwa kwa Yesu. Ninawaomba ili mpokee wokovu wa milele kwa kuamini hivi. Iliwezekana kwa watu wote kuamini kuwa ubatizo ambao Yesu aliupokea ulikuwa ni ubatizo wa kuzichukua dhambi zote za wanadamu, na kwamba kama matokeo ya hilo, Yesu alipaswa kuimwaga damu yake ya thamani Msalabani, uelewa huu unatokana na ushuhuda wa Yohana Mbatizaji na ushuhuda wa wale ambao kwa sasa wanaamini kwa uaminifu.

Ninamshukuru Mungu aliyeruhusu dhambi zetu zote kupatanishwa kwa kumtuma Yohana Mbatizaji na Yesu. ☒

MAHUBIRI

10



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Yesu Aliyekuja Kuzitoweshea Mbali Dhambi Zako

< Mathayo 3:13-17 >

“Wakati huo Yesu akaja kutoka Galilaya mpaka Yordani kwa Yohana ili abatizwe. Lakini Yohana alitaka kumzuia, akisema, ‘Mimi nahitaji kubatizwa na wewe, nawe waja kwangu?’ Yesu akajibu akamwambia, ‘Kubali hivi sasa; kwa kuwa ndivyo itupasavyo kuitimiza haki yote.’ Basi akamkubali. Naye Yesu alipokwisha kubatizwa mara akapanda kutoka majini; na tazama, mbingu zikamfunukia, akamwona Roho wa Mungu akishuka kama hua, akija juu yake; na tazama, sauti kutoka mbinguni ikisema, ‘Huyu ni Mwanangu, mpendwa wangu, ninayependezwa naye.’”

Hata Wakristo wa leo wanakiri kuwa wanamwamini Yesu kuwa ni Mwokozi wao, lakini wengi wao hawafahamu kuwa Yesu ni Bwana aliyetukomboza toka katika dhambi zetu zote kwa kupitia injili ya maji na Roho. Hivyo ni muhimu sana kuwathibitisha kwa kutumia injili hii ya maji na Roho kuwa kwa hakika Yesu ni Mwokozi. Kwa kuwa wote wanazaliwa kama wenye dhambi, basi wote wanapaswa kuamini katika injili ya maji na Roho ili waweze kuoshwa dhambi zao. Kwa maneno mengine, ili waweze kuzaliwa tena upya, ni lazima waamini katika injili ya maji na Roho, na wanaweza kumwona

Bwana mara watakapoamini hivyo tu. Kupokea ama kuto kupokea ondoleo la dhambi na kuzaliwa tena upya kunategemea ikiwa tunamwamini Yesu Kristo kiusahihi.

Kwetu sisi, kitu cha muhimu sana ili kuweza kuufikia ukweli wa ondoleo la dhambi ni kumfahamu na kumwamini Bwanana kile ambacho amekifanya. Wakati Yesu alipowauliza wanafunzi wake, *“Ninyi mwanisema mimi kuwa ni nani?”* Petro alijibu, *“Wewe ndiwe Kristo, Mwana wa Mungu aliye hai.”* Petro aliweza kuikiri imani hii ya kweli kuwa alikuwa ameongozwa na Mungu Baba kuufikia ufahamu huu.

Sasa, ni lazima sisi nasi tuufiki ufahamu sahihi wa injili ya maji na Roho, na kama vile ilivyokuwa kwa Petro, ni lazima tuweze kufanya ungamo la imani ya kweli kwa Bwana wetu. Tunachopaswa kukifahamu hapa ni hitaji la kutambua kuwa ubatizo wa Yesu na damu yake aliyoimwaga Msalabani vilikuwa ni sadaka ambayo Bwana wetu aliifanya ili kujitwika dhambi zetu na kisha kuhukumiwa kwa sababu ya dhambi hizo. Tunapoamini hivyo, basi tunaweza kuokolewa kikamilifu toka katika dhambi zetu zote.

Neno la Mungu limegawanyika katika sehemu mbili: Agano la Kale na Agano Jipya. Agano Jipya ni utimilifu wa unabii wa Agano la Kale. Pia ni maelezo ya tangazo la unabii kuhusu ulimwengu mpya utakaokuja, ambao Bwana aliwaahidi wanafunzi wake. Yesu Kristo atautimiliza ulimwengu huu mpya kwetu sisi. Agano la Kale pia ni Neno la kweli la Mungu ambalo limeandika unabii wa wokovu wa mwanadamu, kwamba Mwana wa Mungu atakuja hapa duniani, na kwamba kama vile mikono ilivyowekwa juu ya mnyama wa sadaka ya kuteketezwa katika Agano la Kale na kisha damu yake kumwagwa, basi vivyo hivyo Yesu atazichukua katika mwili wake dhambi zote za ulimwengu mara moja na kwa wote kwa kubatizwa na Yohana Mbatizaji, ataimwaga damu yake na kufa

Msalabani, na kwa sababu hiyo atawaokoa wenye dhambi wote wa ulimwengu huu toka katika dhambi zao. Kwa kupitia utaratibu wa sadaka ya kuteketezwa uliodhihirishwa katika Hema Takatifu la Kukutania, Bwana wetu ametufunulia kwamba Yeye ni Mwokozi ambaye atazitimiza ahadi zake, na kwamba amezitekeleza ahazi hizo. Kwa lugha nyingine, Agano lote la Kale limetekelezwa kikamilifu na Bwana wetu Yesu Kristo katika Agano Jipya.

Yesu ametupatia injili ya maji na Roho, ili kwamba tunapomwamini Yeye kuwa ni Mwokozi, basi tuweze kufahamu kiusahihi na kuamini kwamba Mwokozi aliyetabiriwa katika Agano la Kale si mwingine bali ni Bwana wetu Yesu Kristo.

Utaratibu wa sadaka ya kuteketezwa katika Agano la Kale ulikuwa ni mawe ya kuvukia kwa ufunuo wa Mungu ili kuweza kuufikia ukweli wote kuhusu wokovu wa Mungu, na unatuwezesha kupokea ondoleo la dhambi bila masharti kwa kufahamu na kuamini katika injili ya maji na Roho. Yesu ametuwezesha kutambua ni kwa nini alipaswa kubatizwa na Yohana Mbatizaji, na kwamba kwa sababu ya huu ubatizo, alipaswa kuimwaga damu yake na kufa Msalabani. Ni mpaka tutakapofikia ufahamu sahihi wa ukweli huu wa injili ndipo tunapoweza kuokolewa kwa kweli na kufanywa watu wa Mungu. Ukweli wa injili ya maji na Roho ambao Yesu ametupatia ndio unaotuwezesha kuzifahamu kiusahihi na kuziamini huduma zake za wazi za wokovu.

Hizi ni Huduma za Maji na Roho Ambazo Yesu Amezitimiza Wakati Alipokuja Hapa Duniani

Neno la msingi katika Agano Jipya ni hili: Kwa kuja hapa

ulimwenguni, Yesu alizichukua katika mwili wake dhambi zote za ulimwengu kwa kupitia ubatizo alioupokea toka kwa Yohana Mbatizaji, na kwa hiyo amelipa mshahara wote wa dhambi hizo kwa damu yake. Uzima na kifo cha nafsi yako vinategemea ikiwa unafahamu na kuamini kiusahihi juu ya injili ya maji na Roho. Na kwa kweli, vitabu vyote 39 vya Agano la Kale na vitabu 27 vya Agano Jipya vinaelezea kwa kina juu ya ukweli huu wa injili ya maji na Roho.

Mnyama wa sadaka ya kuteketezwa aliyetolewa katika Hema Takatifu la Kukutani la Agano la Kale kwa ajili ya dhambi za watu wa Israeli aliweza kuzioshelea mbali dhambi zao, na aliweza kuoshelea mbali dhambi zao kwa kuwa alikuwa amewekewa mikono juu ya kichwa chake, na kisha damu yake kutolewa kwa Mungu. Ni kwa kuufahamu uwiano huu wa utaratibu wa sadaka ya kuteketezwa katika Agano la Kale na ubatizo na damu aliyoimwaga Yesu katika Agano Jipya ndipo tunapoweza kuelewa kwa usahihi juu ya ondoleo la dhambi zetu na kisha kuamini ipasavyo. Kwa maneno mengine, kama vile mwanakondoo wa sadaka ya kuteketezwa au mbuzi aliyapokea maovu ya wenye dhambi kwa kuwekewa mikono na Kuhani Mkuu, basi vivyo hivyo Yesu aliweza kuzipokea dhambi zote za ulimwengu na kisha kuimwaga damu yake na kufa Msalabani baada ya kuwa amebatizwa na Yohana Mbatizaji.

Pamoja na kuwa hatukuweza kuzifahamu habari zote zakina za Biblia, tunapopata ufahamu sahihi na wa wazi juu ya ubatizo na damu aliyoimwaga Yesu katika Agano Jipya hali tukilinganisha na utaratibu wa sadaka ya kuteketezwa wa Agano la Kale, basi ni hakika kuwa tunaweza kupokea ondoleo la dhambi kwa imani. Ni lazima tuiamini injili ya maji na Roho ili tuweze kupokea ondoleo la dhambi lililotolewa na Mungu.

Yesu aliandika injili ya maji na Roho inayoweza

kuzioshelea mbali dhambi zetu zote, na injili hii ni Neno la Mungu lililoandikwa. Yesu amewapatia ukuhani waamini wa injili ya maji na Roho, ili kwamba kila mmoja katika dunia hii aweze kuzioshelea mbali dhambi zake kwa imani. Katika Agano la Kale, Ukuhani uliahidiwa kwa ukoo wa Lawi tu. Ni wana wa Lawi ndio waliokuwa wamepewa jukumu la kuwa waombeaji ambao walizioshelea mbali dhambi za Waisraeli na wakalitimiza pendo la Mungu la haki. Hivyo, sisi waamini wa injili ya maji na Roho ni lazima tuufahamu utaratibu wa sadaka ya kuteketezwa wa Agano la Kale na kisha kuufikia uelewa wa kina juu ya ubatizo wa Yesu na kusulubiwa kwake ili tuweze kuutimiza ukuhani huu kikamilifu mbele za Mungu katika kipindi hiki cha Agano Jipya.

Sasa imeshakuwa miaka 2005 tangu Yesu Kristo alipozaliwa hapa duniani. Huyu Yesu alikuja hapa duniani akiwa ni Mwokozi, na kwa kuupokea ubatizo wake toka kwa Yohana Mbatizaji na kwa kusulubiwa na kuimwaga damu yake, Yesu amezioshelea mbali dhambi zetu zote milele. Hivyo basi, ni muhimu kwamba mwaka wa kuzaliwa kwa Yesu umekuwa ni msingi wa meza ya historia ya dunia. Hii inaonyesha kuwa mwanzo wa kila kitu unatoka kwa Yesu Kristo, na kwamba Yesu Kristo ni Mungu Mwenyewe aliyeuumba ulimwengu huu na ni Mwokozi ambaye amezitoweshea mbali dhambi zetu zote kwa maji na damu yake, na kwamba Yesu anasimama kama mhimili wa historia ya ulimwengu.

Je, Kifungu cha Leo cha Maandiko Kinatueleza Juu ya Kuzihamisha Dhambi Zetu?

Kifungu cha leo cha Maandiko kinaeleza, *“Wakati huo Yesu akaja kutoka Galilaya mpaka Yordani kwa Yohana ili*

abatizwe. Lakini Yohana alitaka kumzuia, akisema, 'Mimi nahitaji kubatizwa na wewe, nawe waja kwangu?' Yesu akajibu akamwambia, 'Kubali hivi sasa; kwa kuwa ndivyo itupasavyo kuitimiza haki yote.' Basi akamkubali. Naye Yesu alipokwisha kubatizwa mara akapanda kutoka majini; na tazama, mbingu zikamfunukia, akamwona Roho wa Mungu akishuka kama hua, akija juu yake; na tazama, sauti kutoka mbinguni ikisema, 'Huyu ni Mwanangu, mpendwa wangu, ninayependezwa naye.'"

Sisi sote ni wana wa Adamu, ambao tunazaliwa tukiwa na aina kumi an mbili za dhambi, yaani tangu siku ile tunapozaliwa hapa duniani, na kwa sababu hiyo sisi sote hatukuwa na chaguo zaidi ya kuadhibiwa na kufa kwa ajili dhambi dhambi zetu mbele za Mungu (Marko 7:21-23). Hatukuweza kukwepa zaidi ya kuishi maisha ya hofu na kufa bila tumaini kwa sababu ya dhambi zetu, na ni kweli kuwa sisi sote tulikuwa tumefungwa ili kukutana na moto wa kutisha wa kuzimu. Hata hivyo, Yesu alizaliwa hapa duniani, wakati ambapo tulikuwa karibu kabisa na maangamizi. Yesu alizaliwa katika hali ya mtu wa chini ili kutukomboza wanadamu toka katika dhambi za ulimwengu. Bwana alikuja hapa duniani na akafanyika mwili wa mwanadamu ili aweze kutuokoa wewe na mimi toka katika dhambi za milele za ulimwengu huu.

Wakati Bwana wetu alipofikisha umri wa miaka 30, alizichukua dhambi za ulimwengu kwa kubatizwa na Yohana Mbatizaji katika Mto Yordani. Wakati huo, Yohana Mbatizaji alikuwa akibatiza ubatizo wa toba kwa Waisraeli wengi ubatizo ambao uliwafanya wengi wao wamrudie Mungu. Lakini ubatizo ambao Yohana Mbatizaji alimpatia Yesu ulikuwa na lengo la kuitimiza haki yote ya Mungu. Ulikuwa ni ubatizo uliotolewa ili kuzihamishia dhambi zote za ulimwengu kwenda katika mwili wa Yesu Kristo, Mwanakondoo wa Mungu.

Yohana Mbatizaji alikuwa ni mwakilishi wa wanadamu (Mathayo 11:11). Na alikuwa ni nabii wa mwisho wa Agano la Kale, na alikuwa ni kuhani halali aliyezaliwa toka katika nyumba ya Kuhani Mkuu, na kwa sababu hiyo alihudumu akiwa kama kuhani wa mwisho wa kipindi cha Agano la Kale (Luka 1:1-21). Hivyo basi, sisi sote ni lazima tuifahamu huduma ya Yohana Mbatizaji pasipo shaka kabla ya kujaribu kuifahamu huduma ya Yesu. Ukweli ni kuwa Yesu Kristo alizipokea dhambi za ulimwengu kwa kupitia ubatizo alioupokea toka kwa Yohana Mbatizaji. Ni lazima tuifahamu ukweli huu na kisha kuuamini. Ni hadi tutakapofahamu kwa kina juu ya huduma ya Yohana Mbatizaji ndipo tunapoweza kuelewa vizuri hali tukiihusianisha na huduma ya Yesu na kwa sababu hiyo tutaweza kuufahamu kwa mapana ukweli wote wa ondole oa dhambi, na utapatanisho wa kweli.

Agano la Kale na Agano Jipya yana unabii mwingi sana na wa kina kuhusu huduma ya Yohana Mbatizaji. Mathayo 11:11 inaandika juu ya Yohana Mbatizaji kama ifuatavyo: *“Amin, nawaambieni, hajaondokea mtu katika wazao wa wanawake aliye mkuu kuliko Yohana Mbatizaji.”* Katika sura ya 3 na ya 4 ya Kitabu cha Malaki katika Agano la Kale, ilitabiriwa kuwa Mungu atamtuma Eliya. Malaki 4:5 inasema, *“Angalieni, nitawapelekea Eliya nabii, kabla haijaja siku ile ya BWANA, iliyo kuu na kuogofya,”* ikifuatiwa na aya ya 6, *“Naye ataigeuza mioyo ya baba iwaelekee watoto wao, na mioyo ya watoto iwaelekee baba zao, ili nisije nikaipiga dunia kwa laana.”* Biblia inatufundisha kuwa Eliya aliyetabiriwa katika Kitabu cha Malaki katika Agano la Kale si mwingine bali ni Yohana Mbatizaji aliyezpitisha dhambi za wanadamu, dhambi za ulimwengu kwenda kwa Yesu kwa kupitia ubatizo aliompata Yesu.

Katika Agano Jipya, Yesu Mwenyewe alisema kuwa

Yohana Mbatizaji alikuwa ni “*mkuu kuliko wote waliozaliwa na wanawake*,” na kwamba ni “*Eliya atakayekuja*” (*Mathayo 11:11-14*). Sasa, jukumu la Yohana Mbatizaji lililotimizwa hapa ulimwenguni ni lipi? Kama mwakilishi wa wanadamu, Yohana Mbatizaji alikuwa ndiye alizipitisha dhambi za ulimwengu kwenda kwa Yesu kwa kumbatiza. Yohana ndiye aliyeitimiza huduma ya kuwageuza mioyo wenye dhambi ili kumwelekea Mungu, na kwamba ndiye aliyembatiza Yesu ili kuzipitisha dhambi za ulimwengu kwenda kwa Yesu. Akiwa mtu aliyezaliwa toka katika ukoo wa Haruni Kuhani Mkuu kwa majaliwa ya Mungu, Yohana Mbatizaji alikuwa na sifa za kuyafanya majukumu ya Kuhani Mkuu (Luka 1:1-10). Hivyo, Yohana Mbatizaji alikuwa ndiye aliyeitimiza huduma ya kikuhani ya kuzipitisha dhambi za kila mtu kwenda kwa Yesu kwa kupitia ubatizo aliompatia Yesu.

Sababu iliyomfanya Yohana Mbatizaji kuja hapa duniani ilikuwa ni kuzipitisha dhambi za ulimwengu kwenda kwa Yesu kwa kumbatiza Yesu. Na Yohana Mbatizaji alikuwa ndiye aliyewakemea watu waliokuwa wamemwacha Mungu na akawashuhudia kuwa Yesu Kristo ni Mwana wa Mungu, Mwanakondoowa Mungu ambaye atazitoweshea mbali dhambi za ulimwengu kwa ubatizo wakena damu yake atakayoimwaga. Yesu aliutimiza unabii wa kuweka mikono juu ya mnyama wa sadaka ya kuteketezwa ulioandikwa katika Kitabu cha Mambo ya Walawi kwa kwenda kwa Yohana Mbatizaji akiwa kama sadaka ya kuteketezwa ambaye atazifanya dhambi za ulimwengu kutoweka na kubatizwa na Yohana Mbatizaji (Mambo ya Walawi 1:3-5).

Hii ndio sababu Yohana Mbatizaji alipaswa kumbatiza Yesu na kuzipitisha dhambi za ulimwengu kwenda kwake, na hivyo kuitimiza haki ya Mungu, ambayo ni mapenzi ya Mungu Baba. Yesu alikuwa ni Mwanakondoo wa Mungu aliyezipokea

dhambi za kila mtu katika ulimwengu huu kwa kubatizwa na na mkuu kati ya wote waliozaliwa na wanawake. Kwa maneno mengine, Yesu alibatizwa na Yohana Mbatizaji kwa sababu alikuwa anataka kuzipokea dhambi za ulimwengu mara moja na kwa wote.

Wakati Yohana Mbatizaji alipokuwa akitoa ubatizo wa toba kwa watu wa Israeli, Yesu alikuja kwake akamwambia, “Nibatize. Inanipasa mimi kubatizwa na wewe ili kuitimiza haki yote ya Mungu” (Mathayo 3:15). Yesu aliupokea ubatizo wake toka kwa Yohana Mbatizaji ili aweze kuzibeba dhambi zote za ulimwengu, kwa kuwa ni kwa ubatizo huo ndio aliweza kuzichukua dhambi za kila mtu hapa ulimwenguni. Yesu amefanyika kuwa Mungu Mwokozi wa milele kwa kuzibeba dhambi zote za ulimwengu huu kwa kupitia ubatizo wake aliupokea toka kwa Yohana Mbatizaji, na kwa kusulubiwa na kisha kuimwaga damu yake Msalabani hadi kifo, na kwa kufufuka tena toka kwa wafu baada ya siku tatu.

Hivyo, Yesu alibatizwa kwa kuwa ndivyo ilivyompasa kuyatimiza mapenzi ya Mungu Baba (Mathayo 3:15). Ni kwa mapenzi haya ya Mungu Baba ndio maana Yohana Mbatizaji aliweza kumbatiza Yesu. Kwa maneno mengine, Yesu alipokea tendo la kuwekewa mikono kiroho kisha akaimwaga damu yake kama vile ilivyokuwa kwa sadaka ya kuteketezwa ya Agano la Kale. Katika Mambo ya Walawi 16, tunaona kwamba mbuzi wawili wa sadaka ya kuteketezwa walizipokea dhambi za mwaka mzima za watu wa Israeli kwa kuwekewa mikono na Kuhani Mkuu. Vivyo hivyo, Yesu alizipokea dhambi zote za ulimwengu mara moja na kwa wote kwa kupitia ubatizo aliupokea toka kwa Yohana Mbatizaji na akaimwaga damu yake ya thamani Msalabani. Hivyo, Yesu ni Mwokozi wa wanadamu aliyezipokea dhambi zao katika kichwa chake kwa kupitia ubatizo aliobatizwa.

Yesu ni Mwana pekee wa Mungu Baba, na Kuhani Mkuu wa Ufalme wa Mungu. Hivyo, Yohana Mbatizaji, ambaye ni mwakilishi wa wanadamu, na ili aweze kulitimiza jukumu lake la ukuhani akiwa kama Kuhani Mkuu wa hapa duniani alipaswa kukutana na Yesu Kuhani Mkuu wa Ufalme wa Mbinguni na kisha kuitimiza haki yote ya Mungu Baba. Upendo wa Mungu wa haki uliweza kudhihirika kwa kupitia ubatizo wa Yesu.

Sasa, ni nani basi aliye juu kati ya Yohana Mbatizaji na Yesu? Kwa kweli, Yesu Kuhani Mkuu wa mbinguni yupo juu kuliko Yohana Mbatizaji. Yesu ameinuliwa kuliko mtu yoyote yule, kwa kuwa Yeye ni Mungu Mwenyewe aliyumba ulimwengu mzima, pia yeye ni Mwana wa Mungu aliyekuja hapa duniani ili kuwaokoa wanadamu toka katiak dhambi za ulimwengu. Yesu alikuja hapa ulimwenguni, alibatizwa na Yohana Mbatizaji ili kuwaokoa wanadamu toka katika dhambi za ulimwengu. Yesu si kiumbe kama tulivyo sisi.

Katika ubatizo ambao Yesu aliupokea toka kwa Yohana Mbatizaji, kuna mfano wa kazi maalumu ya Mungu. Wakati Yesu alipokwenda kwa Yohana Mbatizaji ili abatizwe, Yohana Mbatizaji alimwambia Yesu, “Ninahitaji kubatizwa na Wewe, nawe waja kwangu?” Kama tunavyoweza kuona, mara ya kwanza Yohana Mbatizaji alikataa kuzipitisha dhambi zote kwenda kwa Yesu kwa kumbatiza, lakini hatimaye hakuweza kukataa, kwa kuwa Yesu Mwenyewe alitaka kubatiza ili aweze kuzichukua dhambi zote za ulimwengu. Hivyo, Yesu alimwamuru Yohana Mbatizaji kumbatiza akisema, “*Kubali hivi sasa, kwa kuwa ndivyo itupasavyo kuitimiza haki yote*” (Mathayo 3:15).

Kabla Yesu Kristo hajabatizwa na Yohana Mbatizaji, Wamataifa na Wayahudi pia walikuwa na dhambi katika mioyo yao, na kwa sababu hiyo hawakuweza kuikwepa adhabu na

maangamizi kwa sababu ya dhambi zao. Tunafahamu bayana kuwa kila mtu ni kiumbe dhaifu ambaye hawezi kukwepa kufanya dhambi mbele za Mungu katika ulimwengu huu. Hii ndio sababu Yesu alizichukua dhambi zote ulimwengu katika mwili wake kwa kubatizwa na Yohana Mbatizaji. Ili Yesu aweze kuzichukua katika mwili wake dhambi zote za wanadamu, basi alipaswa kuupokea ubatizo toka kwa Yohana Mbatizaji, ubatizo ambao ungeliitimiza haki yote ya Mungu.

“Kubali hivi sasa, kwa kuwa ndivyo itupasavyo kuitimiza haki yote” (Mathayo 3:15). Hapa, maneno haya kwa Kiyunani, *“haki yote”* ni *“πάσαν δικαιοσύνην” (pasan dikaiosunen)*. Neno hili *‘dikaiosune’* lina maanisha ni *“hali ya usawa zaidi”* au *“haki,”* au *“usawa.”*

Kama ambavyo sadaka ya kuteketezwa ya Agano la kale ilivyozitoweshea mbali dhambi zote za Waisraeli kwa kuzibeba, vivyo hivyo Yesu, katika Agano Jipya, alizioshelea mbali dhambi zote za wanadamu kwa kuja hapa duniani na kwa kuzibeba dhambi zao zote kwa kubatizwa na Yohana Mbatizaji. Kimsingi, Yesu alikuja hapa duniani kama Mwanakondoo wa Mungu, na kwa kufanyika mwanakondoo wa sadaka ya kuteketezwa kwa ajili ya dhambi zetu, Yesu ametukomboa toka katika dhambi za ulimwengu. Sababu iliyomfanya Mwokozi akafanyika mwanadamu na akataka kubatizwa na Yohana Mbatizaji inajengwa katika msingi wa kuitimiza haki ya Mungu.

Yesu alisema, *“Kubali hivi sasa, kwa kuwa ndivyo itupasavyo kuitimiza haki yote.”* Kiroho, hii ina maanisha ni *“Inanipasa kuzichukua katika mwili wangu dhambi za kila mtu mara moja na kwa wote kwa kubatizwa na wewe na kuzioshelea mbali dhambi hizo.”* Hii pia ina maanisha kuwa ule ubatizo ambao Yesu aliupokea toka kwa Yohana Mbatizaji ulikuwa ni utimilifu wa kuwekea mikono katika Agano la Kale,

ambao una maanisha kuwa Yesu alizipokea dhambi za wanadamu mara moja na kwa wote. Hivyo, sisi sote ni lazima tuwe na imani inayofahamu na kuamini katika ukweli uliodhihiriwa katika ubatizo wa Yesu aliupokea. Ni lazima tuyafahamu matokeo ya ubatizo ambayo Yesu aliupokea toka kwa Yohana Mbatizaji na damu yake aliyoimwaga Msalabani, pia ni lazima tuamini hivi kwa usahihi.

Kanisa la Presbeteriani linatoa ubatizo uliofupishwa, ambao waamini wake wanabatizwa kwa kunyunyuziwa badala ya kuzamishwa kwa jina la Baba, Mwana, na Roho Mtakatifu. Katika Maandiko, aina hii ya ubatizo ilitolewa katika maeneo yaliyokuwa na shida ya maji kama vile jangwani. Kwa mfano, Filipo alimbatiza yule Towashi Mwethiopia kwa maji machache. Lakini wakati Yesu alipobatizwa na Yohana Mbatizaji, Yesu alisimama katika Mto Yordani huku nusu ya mwili wake ukiwa ndani ya maji. Ubatizo ambao Yesu aliupokea toka kwa Yohana ulikuwa ni ule ambao Yohana Mbatizaji aliiweka mikono yake miwili juu ya kichwa cha Yesu, akamzamisha ndani ya maji, kisha akamwinua toka ndani ya maji. Ubatizo huu ulikuwa ni sawa na tendo la kuwekewa mikono katika Agano la Kale ambapo Kuhani Mkuu alizipitisha dhambi za Waisraeli kwa kuiweka mikono yake juu ya kichwa cha yule mnyama wa sadaka. Ubatizo ambao Yesu aliupokea toka kwa Yohana Mbatizaji ulikuwa ni ubatizo ambao Yesu alizipokea dhambi za ulimwengu kwa kuzibeba dhambi zote.

Umuhimu wa ukweli kuwa Yohana Mbatizaji aliiweka mikono yake juu ya kichwa cha Yesu wakati akimbatiza ni upi? Katika Agano la Kale, utaratii wa ‘kuwekea mikono’ ulifanywa katika mazingira yafuatayo: 1) kuzipitisha dhambi za mtu kwenda katika sadaka yake ya kuteketezwa (Mambo ya Walawi 1:1-10; 4:1-25); 2) kuwaweka wakfu watumishi wa

Mungu (Hesabu 8:10, 27:18); na 3) kurudisha kufuru kwa aliye kufuru (Mambo ya Walawi 24:14).

Bila kujalisha mazingira yaliyokuwepo, ‘kuwekea mikono’ ilikuwa ni njia ya ‘kupitisha kitu kwenda mahali.’ Kwa mfano, wakati mtumishi anapowekwa wakfu kama mchungaji, wachungaji waliotangulia huiweka mikono yao juu ya kichwa cha mchungaji huo, wakimaanisha kuwa zile nguvu na karama walizopewa na Mungu zinapitishwa na kuhamia kwa huyu mchungaji anayewekwa mikono. Hii ina maanisha kuwa kwa kuwekea mikono, basi karama zote na nguvu ambazo wanazo wachungaji wa zamani zinahamisa kwa huyu mchungaji mpya.

Hata hivyo, mfano halisi wa ‘kuwekea mikono’ ulikuwa ni ule wa utaratibu wa sadaka ya kuteketezwa, ambao ulifanywa ili kuzipitisha dhambi kwenda kwa mnyama wa sadaka ya kuteketezwa. Na kwa kuwianisha hili, sababu iliyomfanya Yohana Mbatizaji akaiweka mikono yake juu ya kichwa cha Yesu ilikuwa ni kuzipitisha dhambi zote ulimwengu kwenda kwa Yesu. Na hii ndio sababu hadi leo hii, wakati wachungaji wanapobatiza waamini, wanaiweka mikono ya juu ya kichwa cha wanaobatizwa. Kwa nini inafanywa hivyo? Ni ishara ya imani yao, kuonyesha kuwa wanaamini kuwa Yesu alizibeba dhambi za ulimwengu kwa kupitia ubatizo wake, na kwamba ndio maana wanabatizwa.

Akiwa kama Mwokozi, Yesu alizichukua dhambi za ulimwengu katika mwili wake kwa kubatizwa na Yohana Mbatizaji, ambaye ni Mwakilishi wa wanadamu. Hii ilikuwa ni sawa na tendo la Kuhani Mkuuu katika Agano la Kale la kuzipitisha dhambi za watu wa Isareli kwenda katika mnyama wa sadaka ya kuteketezwa kwa kuiweka mikono yake huu ya kichwa cha sadaka huyo (Mambo ya Walawi 16:21).

Baada ya kubatizwa na Yohana Mbatizaji, ambaye ni

mwakilishi wa wanadamu, Yesu alizamishwa katika maji kisha akaibuka toka katika maji. Kiroho, hii inaonyesha ukweli kuwa Yesu aliweza kufa Msalabani, akafufuka tena toka kwa wafu kwa kuwa Yesu alikuwa amezichukua dhambi zote za ulimwengu katika mwili wake mara moja na kwa wote kwa kubatizwa na Yohana Mbatizaji, na kwa sababu hiyo Yesu amefanyika kuwa Mwokozi wa kweli. Pia inatueleza kuwa Yesu alizipokea dhambi za ulimwengu huu kwa kupitia ubatizo wake, alijitwika dhambi zetu, ana akahukumiwa kwa ajili ya dhambi hizi zote kwa kuimwaga damu yake na kufa Msalabani.

Kwa kifupi, ubatizo wa Yesu kwa kuwekewa mikono una maanisha kuwa Yesu alizipokea dhambi za ulimwengu, kule kuzamishwa ndani ya maji kuna maanisha ni kifo chake Msalabani, na kule kuibuka kwake toka katika maji kuna maanisha ni kufufuka kwake. Kwa maneno mengine, Yesu ameitimiza haki ya Mungu kwa kuyatimiza matakwa ya sheria ya dhambi na kifo ambayo tulipaswa kukutana nayo. Na hii ndio sababu Biblia inasema, *“Maana yale yasiyowezekana kwa sheria, kwa vile ilivyokuwa dhaifu kwa sababu ya mwili, Mungu, kwa kumtuma Mwanawe mwenyewe katika mfano wa mwili ulio wa dhambi, kwa sababu ya dhambi, aliihukumu dhambi katika mwili, ili maagizo ya torati yatimizwe ndani yetu sisi, tusioenenda kwa kufuata mambo ya mwili, bali mambo ya roho”* (Warumi 8:3-4).

Wakati Yesu alipotoka katika maji, Mungu Baba aliyafungua Malango ya Mbinguni na akasema, *“Huyu ni Mwanangu, mpendwa wangu, ninayependezwa naye”* (Mathayo 3:17). Mungu alikuwa amepanga kuzitoweshea mbali dhambi zote za mwanadamu kwa kupitia Mwanawe kabla ya uumbaji. Kazi hii ilitimizwa kwa Mwanae kuja hapa duniani, na kwa kuzichukua dhambi za mwanadamu kwa kubatizwa na Yohana Mbatizaji, kwa kuimwaga damu yake

Msalabani hadi kifo, na kwa sababu hiyo amewaokoa wanaomwamni toka katika dhambi. Bwana wetu aliyatimiza mapenzi ya Mungu mara moja na kwa wote kwa kubatizwa na kwa kuimwaga damu yake.

Hivyo basi, wakati Yesu alipoyatii mapenzi ya Baba kwa kuzichukua katika mwiliw ake dhambi zote za mwanadamu kwa ubatizo wake, Mungu Baba alifurahisha na Mwanae Yesu, akasema, *“Yeye aliyefanya hivi ni Mwanangu mpendwa, ninayependezwa naye.”* Hii ndio sababu Wakristo wanapaswa kuuamini ubatizo wa Yesu aliupokea toka kwa Yohana Mbatizaji, na pia kuiamini damu ambayo Yesu aliimwaga Msalabani kama adhabu ya dhambi zetu zote. Hii ndio sababu Mungu Baba aliyafungua malango ya Mbinguni na kusema yule aliyebatizwa alikuwa ni Mwanae, anayependezwa naye.

“Tazama, Mwanakondoo wa Mungu Aichukuaye Dhambi ya Ulimwengu!”

Sasa, tukigeukia Yohana 1:29, wewe na mimi ni lazima tuufahamu ushahidi unaothibitsha kuwa Yesu alizichukua dhambi za ulimwengu katika mwili wake mara moja na kwa wote kwa kubatizwa na Yohana Mbatizaji, pia ni lazima tuamini hivi kwa mioyo yetu yote. Siku ya pili yake, Yohana Mbatizaji alipomwona Yesu aliyekuwa amembatiza akitembea, alishuhudia hivi, *“Tazama! Mwanakondoo wa Mungu aichukuaye dhambi ya ulimwengu!”*

Kwa lugha nyingine, Yohana Mbatizaji alishuhudia kuwa, “Hakuna mwingine yeyote ambaye ni Mwokozi wa wanadamu zaidi ya Yesu, Mwokozi ambaye alizipokea dhambi zote za wanadamu kwa kupitia ubatizo wake na ambaye ataimwaga damu yake kwa ajili yao.” Kesho yake, Yohana Mbatizaji

alimwona Yesu tena kisha akashuhudia hivi, *“Tazama Mwanakondoo wa Mungu!”* Kwa kuwa Yesu alikuwa ameishabatizwa na Yohana Mbatizaji, na kwamba sasa alikuwa amezichukua dhambi zote za ulimwengu, basi ilimpasa kusulubiwa na kuimwaga damu yake. Hii ndio maana Yohana Mbatizaji alishuhudia, *“Tazama! Mwanakondoo wa Mungu aichukuaye dhambi ya ulimwengu!”*

Ni lazima tuifahamu maana ya msemu huu “dhambi ya ulimwengu” na kisha kuamua kuuamini ukweli wa ubatizo wake au la. Maana halisi ya dhambi ya ulimwengu ni ipi? Kwa ujumla watu wengi wanafikiri kuwa “ulimwengu” unaotajwa hapa una maanisha ni ule ulimwengu mdogo wanaoishi—ambao ni ufahamu wa yale wanayoyafahamu tangu walipozaliwa hadi sasa. Lakini ufahamu sahihi wa dhambi ya ulimwengu unatusukuma kulifahamu neno “ulimwengu” kuhusisha muda wote tangu mwazo wa ulimwengu hadi mwisho wake.

Niliambiwa kuwa baadhi ya nzi wanaweza kuishi kwa siku moja tu. Kwa wadudu kama hao, kuishi masaa 12 maana yake ni kuishi nusu ya muda wao wa kuishi. Ikiwa wataishi kwa muda mrefu zaidi, basi watakauwa wakiikaribia jioni wakati jua linazama, na kama wataishi hadi masaa 24 basi watakuwa wameishi maisha yao kamili. Hivyo, kwa wadudu kama hao hana ya “kesho” haina maana kwao.

Vivyo hivyo, kwa kuwa tunaishi kwa miaka 70-80, basi ni dhahiri kuwa hatuna ufahamu sahihi wa dhana ya “milele” au dhana ya “isiyo na mwisho.” Hata hivyo, Bwana wetu, Mungu Mwenyezi anatuambia: ulimwengu ni muda tangu dunia hii ilipoanza kuwepo hadi siku ambayo itafikia mwisho wake. Kwa maneno mengine, dhana yetu ya muda ni tofauti na dhana ya muda ya ulimwengu ambayo Mungu anaizungumzia hapa. Muda wa ulimwengu ambao Bwana anatuambia hapa ni mpana

sana kuliko sisi tunavyofikiria.

Imani yetu ni lazima ijengwe katika Neno la Mungu—yaani, ni lazima tuamini nkatika injili ya maji na Roho iliyoandikwa katika Neno la Mungu. Kwa hiyo, tunapoangalia kile ambacho Yohana Mbatizaji alisema—“Mwanakondoo wa Mungu aichukuaye dhambi ya uliwengu”—au kile ambacho Bwana wetu alisema—“Kwa kuwa ndivyo itupasavyo kuitimiza haki yote”—ni lazima tuyafahamu maandiko ili kufahamu kuwa Yesu alizichukua dhambi zote za wanadamu kwa ubatizo wake na akazibeba dhambi zote kwenda Msalabani, ni lazima tuamini hivi kwa mioyo yetu yote.

Ni lini Yesu alizibeba dhambi za ulimwengu? Yesu alizibeba katika mwili wake dhambi zote za ulimwengu mara moja na kwa wote wakati alipozipokea dhambi zote kwa kubatizwa na Yohana Mbatizaji katika Mto Yordani. Msemo unaosema, “*kwa kuwa*” inatokana na neno la Kiyunani ‘*hutos gar*’, linalomaanisha ni ‘kwa njia hii,’ ‘ipasayo zaidi,’ au ‘hakuna njia nyingine zaidi ya hii.’ Neno hili linaonyesha kuwa Yesu alizichukua dhambi za mwanadamu katika mwili wake kwa kupitia ubatizo wake alioupokea toka kwa Yohana Mbatizaji. Kwa maneno mengine, Yesu aliweza kuzitoweshea mbali dhambi zote za ulimwengu pale tu alipoweza kubatizwa na Yohana Mbatizaji. Hivyo ni lazima tuufahamu ubatizo wa Yesu na damu aliyoimwaga kuwa ni ondoleo la dhambi zetu na kisha kuamini hivyo.

Yesu alizichukua katika mwili wake dhambi zote za ulimwengu mara moja na kwa wote kwa kutumia njia hii ya kuzipitisha dhambi za ulimwengu kwenda kwa Yesu, ambapo Yohana Mbatizaji aliweka mikono yake juu ya kichwa cha Yesu, baada ya ubatizo, Yesu aliimwaga damu yake, na kwa sababu hiyo ameitimiza upatanisho wetu kikamilifu. Hili lilikuwa ni dhumuni la ubatizo wa Yesu. Tunafahamu kuwa

katika Agano la Kale, kuwekea mikono katika utaratibu wa sadaka ya kuteketezwa na kuimwaga damu yake kulimaanisha upatanisho kwa Waisraeli. Vivyo hivyo, ni lazima tuamini kwamba Yesu amezioshelea mbali dhambi za kila mtu kwa kupitia ubatizo ambapo alizipokea dhambi zote za ulimwengu, na kwamba tumetakaswa kwa sadaka ya mwili wa Yesu Kristo mara moja na kwa wote (Waebrania 10:10).

Neno “ubatizo,” au “βάπτισμα” (baptisma) kwa Kiyunani lina maanisha ni “kuzamishwa.” Hivyo, “kubatiza” maana yake ni kuzamisha au kutosha kitu chini ya maji. Kwa usahihi zaidi, neno hili lina maanisha ni: 1) kusafisha kwa kuzamisha au kutosha, kuosha, kufanya kitu kuwa safi kwa maji, kunawa, kuoga; 2) kushinda; 3) kuzika; na 4) kupitisha.

Hapa kuna sababu kwamba ni kwa nini unapaswa kuifahamu injili ya maji na Roho kiusahihi na kuiamini: Kwanza kabia, dhambi zako zote zilipitishwa kwenda kwa Yesu kwa kupitia ubatizo ambao aliupokea toka kwa Yohana Mbatizaji. Kwa kuwa Yesu alizipokea dhambi zetu zote za ulimwengu kwa kupitia ubatizo wake, basi wale wote wanaoamini hivi hawana dhambi. Kwa kuwa kwa ubatizo wake Yesu amekwisha zioshelea mbali dhambi zote za ulimwengu, basi ni hakika kuwa hakuna dhambi tena iliyobakia. Yesu alikuwa ni Mwana wa Mungu aliyezichukulia mbali dhambi za ulimwengu. Dhambi hizi za ulimwengu zinajumuisha dhambi zote ambazo umewahi kuzifanya na ambazo utazifanya, yaani tangu zile zilizofanywa utotoni hadi zile zilizofanywa ukubwani, na zile ambazo utazifanya hadi siku utakayokufa. Yesu aliitimiza haki yote kwa kubatizwa na Yohana Mbatizaji, akizibeba dhambi zote hizo hadi Msalabani.

Pili, maana ya kuosha ina maanisha kuwa wakati dhambi za ulimwengu zilipopitishwa kwenda kwa Yesu kwa ubatizo wake, basi dhambi hizo zote ziliioshelewa mbali. Tatu, maana

ya kuzika, inaonyesha kuwa wakati tulipokuwa na dhambi za ulimwengu, basi tulipaswa kuibeba adhabu ya dhambi na kisha kutupwa katika moto wa kuzimu, lakini kwa sasa dhambi zetu zilipitishwa kwenda kwa Yesu kwa kupitia imani yetu katika ubatizo wa Yesu, ndio maana Yesu aliweza kufa kwa ajili ya dhambi zetu kwa niaba yetu. Hii ndio maana Yesu alibatizwa kwa niaba yetu, alikufa kifo cha haki kwa niaba yetu, na akafufuka tena toka kwa wafu. Hivyo, kwa kubatizwa, kusulubiwa, na kwa kuzikwa; kwa kufufuka tena toka kwa wafu; kwa kuketi mkono wa kuume wa Mungu Baba; na kwa kuwafanya wenye dhambi wote kuifahamu injili ya maji na Roho, Yesu amewawezesha wote wanaoamini katika ukweli huu kupokea ondoleo la dhambi zao kwa imani.

Tunapookolewa kwa kumwamini Yesu kuwa ni Mwokozi, kwa kuuamini ubatizo na damu yake Msalabani, basi hapo tunaweza kuwa wana wa Mungu. Kwetu sisi, hii ina maanisha kuwa dhambi zetu zilipitishwa kwenda kwa Yesu. Kwa kuwa Yesu alibatizwa na Yohana Mbatizaj na akaimwaga damu yake Msalabani, basi ni hakika kuwa dhambi zetu haziwezi kuwa pamoja nasi. Dhambi zetu zote, yaani tangu zile tulizozifanya utotoni hadi ukubwani na zile tutakazozifanya hadi siku tutakayokufa, dhambi hizo zote zilipitishwa kwenda katika mji wa Yesu na zilikwisha hukumiwa. Yesu aliweza kuimwaga damu yake Msalabani kwa niaba yetu, akafa, na akafufuka toka kwa wafu kwa sababu dhambi zetu zote zilipitishwa kwenda kwa Yesu, na kwa sababu hiyo ametupatia maisha mapya.

Sasa, ikiwa tunamwamini huyu Yesu kuwa ni Mwokozi, basi sisi sote tunaweza kuwa tusio na dhambi. Wale miongoni mwenu wanaoifahamu injili ya maji na Roho, wanaielewa injili hii, na wale wanaoiamini, basi hao ndio wenye haki. Ninyi si wenye dhambi kamwe. Ninyi ni wenye haki. Mnaweza kuwa wenye haki kwa kuamini katika injili ya maji na Roho.

Hatuwezi kuupata wokovu kwa kutegemea jitihada zetu wenyewe, kwa sababu kwa kufanya hivyo tutaendelea kuwa wenye mapungufu na hivyo kufanya dhambi, lakini Bwana amekwisha zioshelea mbali dhambi zetu zote kwa ubatizo alioupokea toka kwa Yohana Mbatizaji an damu yake aliyoimwaga Msalabani. Hivyo, wokovu unakuja katika moyo yetu kwa kuufahamu ukweli.

Injili ya Maji na Roho Inathibitishwa na Utaratibu wa Sadaka ya Kuteketezwa wa Hema Takatifu la Kukutania la Agano la Kale

Kwanza kabisa, hebu nielezee sura ya kimaumbile ya Hema Takatifu la Kukutani la Agano la Kale. Hema Takatifu la Kukutania lilikuwa ni dogo sana kiumbile, lakini lilizungukwa na ua wa nje ulikuwa na uzio wenye nguzo na pazia safi lililofumwa kwa kitani. Kulikuwa na lango la kuingilia katika ua huu, hivyo baada ya kupita lango hili ukielekea lilipokuwa Hema Takatifu la Kukutania, kulikuwa na madhabahu ya sadaka ya kuteketezwa, na kulikuwa na birika la shaba lililokuwa mbele kidogo baada ya kuipita madhabahu hii. Hema Takatifu la Kukutania liligawanyika katika sehemu mbili: Mahali Patakatifu na Patakatifu pa Patakatifu. Milango ya nyumba hii ya Mungu (mmoja kwa Mahali Patakatifu na mwingine kwa Patakatifu pa Patakatifu), pamoja na lango la ua wake, vyote vilifumwa kwa nyuzi za bluu, zambarau, na nyekundu na kitani safi ya kusokotwa.

Kwa nini Mungu alitengeneza milango yote ya Hema Takatifu la Kukutania kwa kuifuma kwa rangi hizi za bluu, zambarau, na nyuzi nyekundu na kitani safi ya kusokotwa? Ni kwa sababu kwa kupitia rangi hizo, Mungu alikuwa akieleza

jinsi ambavyo Yesu atakuja hapa duniani, na kuzichukua dhambi za ulimwengu mara moja na kwa wote kwa kupitia ubatizo wake ambao ataupokea toka kwa Yohana Mbatizaji, na kisha kusulubiwa na kuimwaga damu yake. Yesu aliufanya mwili wake kuwa sadaka ya kuteketezwa kwa ajili yetu kwa kuupokea ubatizo toka kwa Yohana Mbatizaji na kusulubiwa kwa ajili ya dhambi za ulimwengu.

Kwa kumwamini Yesu kuwa ni Mwokozi, na kwa kuliadini Neno linalotueleza kwamba Yesu aliyekuja kwa rangi ya bluu, zambarau, na nyuzi nyekundu alizichukua dhambi za ulimwengu katika mwili wake kwa kubatizwa, asi ni hakika kuwa sisi tunaweza kukombolewa toka katika dhambi zetu zote kwa imani. Yesu alizitumia nyuzi za rangi hizi za bluu, zambarau, na nyuzi nyekundu, na kitani safi ya kusokotwa kwa ajili ya milango ya Hema Takatifu la Kukutania ili kutueleza kuwa Yeye ni Mfalme wa wafalme, na kwamba ametuokoa toka katika dhambi zetu zote kwa kubatizwa na kusulubiwa. Nyuzi za bluu, zambarau, na nyuzi nyekundu na kitani safi ya kusokotwa zilizotumika katika mlango wa Hema Takatifu la Kukutania si kitu kingine bali ni udhihirisho wa wokovu, unaotueleza kuwa Bwana ametuokoa kikamilifu (1 Petro 3:21).

Hii ndio sababu kama tungeliungufua mlango wa ua wa Hema Takatifu la Kukutania na kuingia, basi tungeliweza kuliona birika la shaba mara baada ya kuipita madhabahu ya sadaka ya kuteketezwa. Madhabahu ya sadaka ya kuteketezwa inatueleza kuwa sheria ya Mungu ya haki kabla ya sheria yake ya wokovu, ambayo ni “yaani imewapasa watu kufa mara moja na baada ya hapo hukumu.” Kwa maneno mengine, kwa kupitia madhabahu ya sadaka ya kuteketezwa, Mungu alitonyesha kuwa tutahukumiwa kwa ajili ya dhambi zetu. Ikiwa tunamwamini kweli Yesu kuwa ni Mwokozi, basi ni

lazima tutambue kuwa katika Agano la Kale, na ili Waisraeli waweze kuokolewa toka katika dhambi zao zote na adhabu ya dhambi, basi walipaswa kuzipitisha dhambi zao kwenda kwa mnyama wa sadaka ya kuteketezwa na kisha kumchinja mbele ya madhabahu.

Vivyo hivyo, Yesu alizichukua dhambi za ulimwengu mara moja na kwa wote kwa kubatizwa na Yohana Mbatizaji, na ndi maana aliweza kusulubiwa na kuimwaga damu yake kwa ajili yetu. Kwa kuja hapa duniani, Bwana wetu alizibeba dhambi zetu kwa kubatizwa na Yohana Mbatizaji na akabeba adhabu yote ya dhambi mara moja na kwa wote. Kwa ufupi, Yesu amefanyika kuwa Mwokozi wetu wa kweli kwa kubatizwa, kwa kuimwaga damu yake, na kwa kufufuka toka kwa wafu ili kutuokoa toka katika dhambi zetu zote na adhabu ya dhambi.

Sasa, Ni Dhambi Zetu Binafsi Zipo Wapi?

Sasa, tufanye nini basi kuhusiana na dhambi zetu binafsi ambazo tutaendelea kuzifanya kila siku kadri tunavyoendelea kuishi? Kaka zangu na akina dada, ikiwa tutaendelea kukumbuka kila siku kuwa dhambi zetu zilipitishwa kwenda kwa Yesu wakati alipobatizwa katika Mto Yordani, yaani ikiwa tutaendelea kuiamini Neno la injili ya maji na Roho kwa mioyo yetu yote, basi ni hakika kuwa tutabakia kuwa tusio na dhambi. Kwa nini? Kwa sababu Yesu, hali akifahamu kuwa tutaendelea kufanya dhambi kila siku, alizichukua katika mwili wake dhambi zote za ulimwengu kwa kubatizwa na Yohana Mbatizaji, akazibeba hadi Msalabani, akaimwaga damu alipokuwa akifa, akafufuka tena toka kwa wafu, na kwa sababu hiyo akazitoweshea mbali dhambi hizo zote mara moja.

Hata hivyo, ukweli huu wokovu, yaani ukweli wa injili ya maji na Roho, unakuwa na nguvu wakati tunapoufahamu na kuuamini kwa mioyo yetu yote. Tunaweza kuwa tusio na dhambi kwa kukumbuka na kuamini kuwa dhambi zetu zote zilipitishwa kwenda kwa Yesu na akazioshelea mbali wakati alipobatizwa na Yohana Mbatizaji, hii ni kwa sababu tunaendelea kufanya dhambi kila siku. Sisi tumeoshwa toka katika dhambi zetu zote za asili na dhambi binafsi kwa imani katika injili ya maji na Roho.

Ndugu wapendwa Wakristo, ikiwa unataka dhambi zako kuondolewa, basi unapaswa kufahamu na kuamini kuwa dhambi zetu zote zilipitishwa kwenda kwa Yesu wakati alipobatizwa. Pia ni lazima ulitafakari Neno la injili ya kweli, hasa pale unapokuwa umefanya dhambi halisi. Ni hapo tu ndipo mioyo yenu inapoweza kusafishwa, na hapo ndipo mnapoweza kukubaliwa kuzitumikia kazi za haki za Mungu. Injili ya maji na Roho inatueleza kuwa dhambi zetu zote zilipitishwa kwenda kwa Yesu wakati alipobatizwa na Yohana Mbatizaji, na kwamba aliadhibiwa kwa sababu ya dhambi hizo Msalabani. Biblia inatueleza juuya ondoleo la dhambi kwa kupitia injili ya maji na Roho.

Sisi sote ni lazima tulizingatie na kuliadini Neno la Mungu kuwa ni kweli. Ikiwa unaadini katika injili ya maji na Roho, basi haiwezekani ukawa na dhambi yoyote ile. Ikiwa tunamwamini Yesu Kristo kuwa ni Mwokozi, basi sisi ni watu wa imani ambao tunaadini kuwa Yesu alizichukua mara moja dhambi zote za ulimwengu katika mwili wake, bila kujalisha aina ya dhambi, kwa kupitia ubatizo alioupokea toka kwa Yohana Mbatizaji. Ubatizo ambao Yesu aliupokea toka kwa Yohana Mbatizaji umemfanya kila mtu kuwa asiye na dhambi, kama vile Kitabu cha Warumi kinavyotueleza, *“Kwa sababu kama kwa kuasi kwake mtu mmoja watu wangi waliingizwa*

katika hali ya wenye dhambi, kadhalika kwa kutii kwake mmoja watu wengi wameingizwa katika hali ya wenye haki (Warumi 5:19).

Kadri tunavyoendelea kuishi katika ulimwengu huu, ni dhahiri kuwa tunatenda dhambi kila siku. Je, dhambi zetu zote zilishapitishwa kwenda kwa Yesu? Dhambi zetu zote zilipitishwa kwenda katika mwili wa Yesu muda mrefu uliopita, takribani miaka 2,000 iliyopita. Je, dhambi ambazo tutazifanya hapo baadaye kwa sababu ya udhaifu wetu zilipitishwa pia kwenda kwa Yesu na je aliadhibiwa pia kwa sababu ya dhambi hizo? Ni kweli kabisa, alizibeba na aliadhibiwa kwa ajili ya dhambi hizo.

Je, hii ina maanisha kuwa ni sahihi na halali kwetu kufanya aina zote za dhambi kadri tupendavyo? Kwa kweli hapana. Hata wale waliozaliwa tena upya kwa kuamini katika injili ya maji na Roho wamefungwa kuendelea kutenda dhambi kwa sababu ya udhaifu wao. Hata hivyo, bado wanaweza kuifanya mioyo yao kuwa safi wakati wote kwa kuitafakari injili ya kweli ya maji na Roho. Ukweli ni kuwa watu wanatenda dhambi kutokana na udhaifu wao kuliko kutokana na hiari yao wenyewe.

Hivyo basi, wakati waamini wa injili ya maji na Roho wanapopitia katika hali ya udhaifu wao, basi wanachopwaswa kukifanya ni kumshukuru Bwana zaidi kwa kuikumbuka imani yao katika ubatizo wa Yesu na damu yake aliyoimwaga, hii ni kwa kuwa Bwana amekwisha zioshelea mbali dhambi zao zote kwa ubatizo wake na damu yake Msalabani na aliadhibiwa kwa ajili ya dhambi hizo. Kwa sasa, waamini hao hawajafungwa na dhambi tena, bali wanajitoa kwa hiari yao katika kuueneza ukweli huu kwa watu wengine. Na wanapofanya hivyo mioyo yao inakuwa na furaha zaidi.

Je, vipi kuhusu wewe? Je, unaamini kwamba ili

kuzitoweshea mbali dhambi zako Yesu alikuja hapa ulimwenguni, alibatizwa na Yohana Mbatizaji, akaimwaga damu yake hadi kifo, kisha akafufuka tena toka kwa wafu? Ndiyo, kwa kweli tunatoa shukrani zetu nyingi kwa Yesu aliyekuja kuzitoweshea mbali dhambi zetu kikamilifu. Na kwa kweli amezifanya dhambi hizo kutoweka mara moja na kwa wote.

Katika Hema Takatifu la Kukutania la Agano la Kale, kama tungeliingia kwa kupitia lango la ua wake na kisha kuipita madhabahu ya sadaka ya kuteketezwa tungeliweza kuliona birika la shaba. Wakati vyombo vingine vyote vya Hema Takatifu la Kukutani vilikuwa na vipimo maalumu, ukweli ni kuwa birika hili la shaba la kunawia halikuwa na vipimo vyovyote. Tukizungumza kiroho, hii ina onyesha kuwa kwa kubatizwa na kwa kuimwaga damu yake, Yesu amezitoweshea mbali dhambi zetu zote pasipo ukomo wa kimahesabu. Vivyo hivyo, birika la shaba halina ukomo katika kuzioshelea mbali dhambi zetu zote. Birika hili lina nguvu ya kuzioshelea mbali hizo dhambi.

Birika hili lilitengenezwa kwa shaba, kitu ambacho kina maanisha kuwa dhambi zote ni lazima ziadhibiwe. Lakini birika hili lilikuwa na maji ya kuiosha mikono na miguu ya kuhani. Hii inatueleza kuwa Bwana amezioshelea mbali dhambi za ulimwengu kwa kubatizwa. Wakati makuhani wa Agano la Kale walipotoa sadaka ya kuteketezwa katika madhabahu ya sadaka ya kuteketezwa, walikuwa wakipatwa na aina mbalimbali ya uchafu, kuanzia damu ya mnyama hadi harufu yake, hasa wakati walipokuwa wakimchinja mwanasadaka wa sadaka ya kuteketezwa baada ya kuwa wameiweka mikono juu yake. Hivyo makuhani hao waliusafisha uchafu huo kw amaji yaliyokuwamo katika birika hilo. Vivyo hivyo, birika hili la shaba lina maanisha ni ubatizo

wa Yesu ambao umezioshelea mbali dhambi zote chafu. Dhambi zote binafsi tunazozifanya katika ulimwengu huu zimekwisha toweshewa mbali kwa kupitia ubatizo wa Yesu. Hivi ndivyo birika la shaba linavyoelezea. Tunaweza kuondolewa dhambi zetu zote kwa kuamini katika ukweli huu na hivyo kuishi wakati wote tukiwa na dhamiri safi milele.

Je, Yesu alibatizwa mara ngapi na Yohana Mbatizaji ili kuzipokea dhambi za ulimwengu? Yesu alibatizwa mara moja tu. Yesu amezioshelea milele dhambi zote za ulimwengu huu kwa kuupokea ubatizo mara moja toka kwa Yohana Mbatizaji. Kwa nini Yesu alibatizwa mara moja? Kwa kuwa Yesu ni Mwana wa Mungu wa milele aliyekuwa na nguvu ya kuzipokea dhambi zote ulimwengu tangu mwanzo wake hadi mwisho na kwa watu wote kwa ubatizo wake. Kama Yesu alivyosema, “Mimi ni Alfa na Omega,” Yeye ni Mungu wa milele. Yesu aliweza kuukamilisha wokovu huu wa milele mara moja na kwa wote kwa kuwa alikuwa ni Mwana wa Mungu aishie milele; na ndio maana alisulubiwa na kuimwaga damu yake mara moja, na kwa sababu hiyo amezioshelea mbali dhambi zetu zote mara moja.

Ni lazima tuufahamu ukweli wa injili ya maji na Roho na kumwamini Yesu kuwa ni Mwokozi. Yesu amezioshelea mbali dhambi zote za ulimwengu kwa kubatizwa mara moja. Dhambi zako zilipitishwa kwenda kwa Yesu mara moja na kwa wote wakati alipobatizwa. Yesu aliitimiza haki yote ya Mungu inayozitoweshea mbali dhambi za ulimwengu kwa kubatizwa mara moja. Ni lazima utambue kuwa dhambi zako zote zilipitishwa kwenda kwa Yesu kwa kupitia ubatizo wake. Na ni lazima uamini hivi. Ukiamini hivi hauna kitu ambacho utakipoteza. Tunapokea ondoleo la dhambi daima kwa imani katika injili ya maji na Roho.

Ikiwa utajikuta unaomba Yesu akusamehe dhambi zako

kila siku, basi ni lazima ufahamu kuwa haujazaliwa tena upya. Pia ni lazima ufahamu ukweli wa injili ya maji na Roho, na ni lazima umwamini Yesu kuwa ni Mwokozi wa kweli kwa mujibu wa injili hii. Wachungaji duniani kote, hasa wale ambao wameuelewa vibaya ubatizo wa Yesu, basi nao wanapaswa kumwamini Yesu tena na tena. Wachungaji wengi hawana ufahamu sahihi wa injili ya maji na Roho ambao umezioshelea mbali dhambi zao. Sasa, unafikiri itawezekanaje kwa wao kuwasaidia wengine kupokea ondoleo la dhambi wakati wao wenyewe hawajalipokea ondoleo hilo la dhambi? Ikiwa kwa namna yoyote ile umekuwa ukijifanya kuwa mtakatifu kwa matendo na mwonekano wa mwili wako hali moyo wako ukibakia kuwa na dhambi, basi tambua kwamba wewe ni mwanadini mnafiki na mwana wa maangamizi. Na ni dhahiri kuwa watu hawataweza kupokea ondoleo la dhambi kwa msaada wako.

Hata hivyo, nafsi yako inaweza kuwekwa huru toka katika dhambi zako zote pale utakapoufahamu ukweli wa wokovu toka katika dini za uongo za duniani hali ukiwa na imani inayofahamu na kuamini katika injili ya maji na Roho. Dhambi zako zinaweza kuoshelewa mbali wakati utakapofahamu kiusahihi juu ya injili ya maji na Roho, Neno la Mungu la uzima, na kisha ukaamini kwa moyo wako wote. Hata hivyo kuna watu wengi sana ambao bado ni mambumbumbu kuhusiana na ukweli kuwa dhambi za ulimwengu zilipitishwa kwenda kwa Yesu wakati alipobatizwa na Yohana Mbatizaji. Hivyo, wewe mwenyewe unapaswa kwanza kuikubali injili ya maji na Roho katika moyo wako kwa kuamini. Yesu alisema, *“Kwa kuwa ndivyo itupasavyo kuitimiza haki yote”* (Mathayo 3:15). Yesu aliitimiza haki yote ya Mungu wakati alipobatizwa. Yesu alizipokea dhambi zote za ulimwengu kwa kupitia ubatizo huu aliokuwa ameupokea. Dhambi zako zote

zilipokelewa na Yesu kwa ubatizo huu.

Je, ninyi si watu wa ulimwengu huu? Kwa kweli ninyi ni watu wa ulimwengu huu. Je, dhambi zenu hazimo katika dhambi za ulimwengu? Kwa kweli zimo. Basi utakapotambua hili, unaweza kukombolewa kwa kupitia ukweli kuwa Yesu alijitwika dhambi zako zote kwa kubatizwa kwake. Kule kutambua kuwa ninyi ni wenye dhambi ambao mmefungwa ili kuadhibiwa kwa sababu ya dhambi hizo ni hatu nzuri ya kuvukia inayokuongoza kutambua kwamba Mwokozi wako pekee ni Yesu Kristo Mwenyewe.

Je, umekuja kwa Kristo? Au bado unasimama nje ya Kristo? Ni lazima ufahamu mahali ambapo unasimama. Ninyi ni watu wa ulimwengu huu. Je, dhambi zetu zote zilipitishwa kwenda kwa Yesu au la? Zilipitishwa. Je, sasa mnakubali kuwa wale Wakristo wanaosema, “Bwana, bado mimi ni mwenye dhambi,” hawajazaliwa tena upya? Pamoja na kwamba wanamwamini Yesu, bado hawafahamu kuwa dhambi zetu zilipitishwa kwenda kwa Yesu kwa kupitia ubatizo wake, na kwa sababu hiyo wanaitegemea damu ya Msalaba tu na wanateseka kila siku, hali wakimwomba Mungu kuwasamehe dhambi zao.

Hata hivyo, Mtume Paulo alituambia nini? Alituambi kuwa, *“Furahini siku zote, ombeni bila kukoma; shukuruni kwa kila jambo; maana hayo ni mapenzi ya Mungu kwenu katika Kristo Yesu” (1 Wathesalonike 5:16-18)*. Hivyo, ikiwa tutalia na kumng’ang’ania Bwana huku tukimwomba atusamehe dhambi zetu, basi hayo yote yatakuwa ni kuukufuru ubatizo wake na damu aliyomwaga. Aina hii ya imani ni matusi kwa Yesu.

Je, Sisi Sote Tunaamini Katika Injili ya Maji na Roho?

Yesu alibatizwa na Yohana Mbatizaji. Dhambi zetu zote zilipitishwa kwenda kwa Yesu wakati Yesu alipobatizwa mara moja na kwa wote. Baada ya kuzipokea dhambi za ulimwengu kwa kupitia ubatizo wake, Yesu alimwaga damu yake na kufa Msalabani. Kisha akafufuka toka kwa wafu baada ya siku tatu na sasa ameketi mkono wa kuume wa Mungu katika kiti cha enzi cha Mungu.

Hivyo ni muhimu sana kuanza kwa kuufikia ufahamu sahihi ili kufahamu ikiwa Yesu alizichukua dhambi za ulimwengu au la hasa pale alipobatizwa, zikiwemo dhambi zako. Ni lazima tuitike wokovu wa Mungu kwa kuifahamu injili ya maji na Roho na kuiamini. Ni lazima tuyaitike yale ambayo Mungu ameyafanya kwa ajili yetu kwa kusema, “Hiyo ni sawa.” Wakati Biblia inapotueleza kuwa Bwana amezichulia mbali dhambi zote za ulimwengu kwa kubatizwa, basi ni muhimu tuachane na mawazo yetu binafsi na kisha kuliamini Neno hili kama lilivyo. Kama Bwana asingelikuwa amezichukua dhambi zetu kwa kupitia ubatizo wake, basi damu aliyomwaga Msalabani ingelikuwa haina maana. Ni lazima tuiamini injili ya maji na Roho kwa mioyo yetu yote. Bwana amezitoweshea mbali kikamilifu dhambi zote za ulimwengu.

Imani na wokovu havitegemei jitihada zako binafsi. Wokovu wako toka katika dhambi unategemea ikiwa una imani inayoamini katika injili ya maji na Roho ambayo Yesu ametupatia.

Je, sasa unatambua kwamba injili ya maji na Roho ndiyo injili pekee ya kweli, na je unataka kuukiri ukweli huu katika moyo wako? Basi, unapaswa kukiri kama ifuatavyo: “Bwana,

hadi leo hii, nilikuwa sifahamu kuwa ulizibeba dhambi za ulimwengu mara moja na wote kwa kubatizwa; nilikuwa naelewa na kuamini vibaya. Lakini ninakushukuru kwa kunifanya kutambua, hata sasa, kwamba niliuelewa vibaya wokovu wako. Kwa kuwa sasa ninaufahamu na kuelewa ukweli wa maji na Roho, ninauamini na ninakushukuru kwa ajili ya ukweli huo.”

Ninyi pia, ni lazima muifahamu injili ya maji na Roho, na mfahamu kuwa si injili ya mtu mwingine zaidi yenu wenyewe, na kisha muipokee kwa mioyo yenu yote. Kwa kawaida, imani ni kuukiri wokovu kama ulivyo katika mioyo yenu, na hii ni imani ambayo imejengwa katika msingi wa ufahamu sahihi wa Yesu, yaani ufahamu unaowawezesha kumpokea Yesu mioyoni mwenu. Na kuuamin ukweli huu ni njia ya kuwawezesha kufanyika wana wa Mungu, yaani imani inayowatoa toka katika dhambi zenu zote. Je, ufahamu wako wa injili ya maji na Roho ni upi, na unauamini ufahamu huo kwa kiasi gani?

Bwana wetu alisema, *“Tena mtaifahamu kweli, nayo hiyo kweli itawaweka huru”* (Yohana 8:32). Ni lazima tuutambue ukweli wa injili ya maji na Roho kama ulivyo. Hii ni imani ambayo inamwamini Mungu. Yesu ametuokoa toka katika dhambi za ulimwengu kwa maji na Roho, basi wale wanaoamini hivi kwa uhakika mbele za Mungu watazaliwa tena upya.

Je, Ninyi Bado ni Wadeni?

Katika Yohana 3 Yesu alisema, mtu hawezi kuuona wala kuingia katika Ufalme wa Mungu mpaka azaliwe tena upya kwa maji na Roho. Kuzaliwa tena upya kwa maji na Roho

kunawezekana tu pale tunapoamini katika ubatizo wa Yesu, damu yake Msalabani, na ukweli kuwa Yeye ni Mwana wa Mungu na Mwokozi wetu. Je, unaamini katika injili ya maji na Roho?

Hebu tudhanie hapa kuwa mtu amejilimbikizia deni la kufikia dola laki tano. Riba ya deni hilo pekee ni ngumu kulipa. Kwa watu wanaofanya kazi za kawaida, kulipa kiasi hiki cha deni kupo nje ya uwezo wao. Huyu mtu hakuweza kulilipa deni lake na akafilisika na kutoweka. Lakini hata kama atatoroka na kwena kujificha mahali na kufanya kazi kwa nguvu ili kulilipa hilo deni, je, ataweza kweli kulipa hata ile riba tu, ukiachilia mbali deni la msingi? Wakati huo, mdai anayedai anawaendea wale waliomdhamini ili kulipwa pesa zake, lakini hawa wale wadhamini hawana pesa ya kulipa. Basi yule mdai, hali akiwa amekasirika anawaendea wazazi wake anawatisha ili wamlipe deni lake. Wazazi wake hawawezi kulivumilia hili, basi wanaamua kumlipa mdai, kisha yule mdai anawapatia risiti.

Baada ya kumlipa mdai, basi yule baba anaanza kumtafuta mtoto, ambaye bila shaka atakuwa akiteseka kimwili na kiroho. Alimtafuta mtoto wake kila mahali kwa miaka 10 lakini hakuweza kumpata. Siku moja, baada ya miaka 12 kupita, hatimaye mtoto akarudi akiwa ametunza kiasi cha fedha. Alimwendea kwanza baba yake na kumwambia, “Nimetunza dola \$400,000, lakini bado ninapungukiwa dola \$100,000. Je, unaweza kuniazima dola hizo laki moja? Nitakaa pamoja nawe na nitafanya kazi kwa nguvu ili nikulipe.” Kisha yule baba akamkumbatia mwanae kwa machozi, akamwambia, “Nimekwishalipa deni lako lote! Usiwe na shaka tena! Bila shaka utakuwa umeteseka sana muda huu wote!” Kisha yule baba akamwonyesha ile risiti ambayo alimlipia deni mwanae.

Yule mtoto akashangazwa sana hali akiwa amejaa

shukrani, lakini wakati huo huo akafikiri kuwa ameteseka sana bila sababu yoyote ile, akajisema, “Kwa miaka 12 iliyoita, nimeishi maisha yangu kama vile kiumbe aliyekufa, sikuwa na muda hata kidogo wa amani, kitu ambacho sikupaswa kukifanya. Niliishi kama mtu mfu wakati sikuwa mfu. Kwa kweli sikufahamu. Mateso yangu yote yamekuwa ni bure!”

Ndugu Wakristo wapendwa, wale wanaojaribu kupokea msamaha wa dhambi wa kutegemea jitihada zao wenyewe, pamoja na kuwa Yesu amekwisha ziondolea mbali dhambi zao kwa kupitia ubatizo wake na Msalaba, ni hakika kuwa bado wanasumbuliwa na tatizo la dhambi kama ilivyokuwa kwa yule mtoto.

Yesu amekwisha zitoweshea mbali dhambi zetu kwa kubatizwa. Yesu amekwisha zichukulia mbali dhambi zetu zote kwa kubatizwa, na kwa kuibeba adhabu yote ya dhambi kwa kuimwaga damu yake Msalabani, na kwa sababu hiyo ametuokoa. Je, unatambua hili? Kwamba ulifungwa katika dhambi kwa sababu ulikuwa haufahamu kuwa Yesu amekwisha zichukulia mbali dhambi zako wakati alipobatizwa. Ni kweli kuwa Yesu alizichukulia mbali dhambi zako zote. Naomba uamini hivi.

“Hakuna Tena Dhabihu ya Dhambi”

Hebu tugeukie Waebrania 10:1-18: *“Basi torati, kwa kuwa ni kivuli cha mema yatakayokuwa, wala si sura nyenyewe ya mambo hayo, kwa dhabihu zile zile wanazozitoa kila mwaka daima, haiwezi wakati wowote kuwakamilisha wakaribiao. Kama ndivyo, Je, dhabihu hazingekoma kutolewa; kwa maana waabuduo, wakiisha kusafishwa mara moja, wasingejiona tena kuwa na dhambi? Lakini katika dhabihu hizo liko kumbukumbu*

la dhambi kila mwaka. Maana haiwezekani damu ya mafahali na mbuzi kuondoa dhambi.

Kwa hiyo ajapo ulimwenguni, asema:

‘Dhabihu na toleo hukutaka,

Lakini mwili uliniwekea tayari.

Sadaka za kuteketezwa na sadaka za dhambi hukupendezwa nazo.

Ndipo niliposema, ‘Tazama nimekuja—

Katika gombo la chuo nimeandikiwa—

Niyafanye mapenzi yako, Mungu.’’

Hapo juu asemapo, ‘Dhabihu na matoleo na sadaka za kuteketezwa na hizo za dhambi hukuzitaka, wala hukupendezwa nazo’ (zitolewazo kama ilivyoamuru torati), ndipo aliposema, Tazama nimekuja niyafanye mapenzi yako. Aondoa la kwanza, ili kusudi alisimamishe la pili. Katika mapenzi hayo mmepata utakaso, kwa kutolewa mwili wa Yesu Kristo mara moja tu. Na kila kuhani husimama kila siku akifanya ibada, na kutoa dhabihu zile zile mara nyingi; ambazo haziwezi kabisa kuondoa dhambi. Lakini huyu alipokwisha kutoa kwa ajili ya dhambi dhabihu moja idumuyo hata milele, aliketi mkono wa kuume wa Mungu; tangu hapo akingojea hata adui zake wawekwe kuwa chini ya miguu yake. Maana kwa toleo moja amewakamilisha hata milele hao wanaotakaswa. Na Roho Mtakatifu naye amshuhudia; kwa maana, baada ya kusema, Hili ni agano nitakaloagana nao baada ya siku zile, anena Bwana, Nitatia sheria zangu mioyoni mwao, na katika nia zao nitaziandika; ndipo anenapo Dhambi zao na uasi wao sitaukumbuka tena kabisa. Basi, ondoleo la hayo likiwapo, hapana toleo tena kwa ajili ya dhambi.’’

Kifungu hiki kinaeleza kuwa Torati ilikuwa ni “kivuli cha mema yajayo.” Kama ilivyokuwa kwa tendo la kuzipitisha dhambi za mwaka mzima kwa kuwekea mikono katika Agano

la Kale, vivyo hivyo Yesu alikuja hapa duniani akazichukua dhambi zetu zote katika mwili wake kwa kubatizwa na Yohana Mbatizaji. Agano la Kale ni kivuli cha Agao Jipya. Kivuli kinaweza kuwepo wakati kuna kitu halisi kinachosababisha kivuli hicho kiwepo.

Vivyo hivyo, wokovu wa Mungu ulijidhirisha katika utaratibu wa sadaka ya kuteketezwa wa Agano la Kale ambao ulikuja kujionyesha kwa wazi kwa kupitia huduma ya Yesu Kristo. Katika Agano la Kale, kondoo wengi na mbuzi na njiwa walichinjwa na kutolewa sadaka kwa Mungu. Lakini haikuwezekana kwa damu za mafahali na mbuzi kuziondoa kabisa dhambi. Hivyo ondoleo la dhambi la kudumu lilipaswa kutimilizwa na Yesu Kuhani Mkuu wa Mbinguni. Na hii ndio sababu Bwana wetu alikuja hapa ulimwenguni, akabatizwa, na akaimwaga damu yake kwa ajili yetu.

Hali kikimmaanisha Yesu, Kitabu cha Waebrania kinatangaza wazi kuwa Yesu ni Kuhani Mkuu wa Mbinguni. Katika Agano la Kale, Kuhani Mkuu ndiye aliyeziondoa dhambi za Waisraeli kwa kutoa dhabihu kwa Mungu kwa niaba yao. Vivyo hivyo, Bwana wetu alikuja kam Kuhani Mkuu wa Mbinguni. *“Tazama nimekuja—Katika gombo la chuo nimeandikiwa—Niyafanye mapenzi yako, Mungu.”* Yesu alikuja ili kuyafanya mapenzi ya Mungu Baba.

Je, hayo mapenzi ya Mungu Baba ni yapi? Ni kuwaokoa wanadamu wote toka katika dhambi zao. Kwa hakika, hakuna mtu katika sayari hii ambaye angeliweza kuyafanya mapenzi ya Mungu Baba. Alikuwepo mmoja tu ambaye angeliweza kuyafanya mapenzi ya Baba, na huyu si mwingine bali ni Yesu. Kwa kuwa Yesu alizipokea dhambi zote za mwanadamu na kuzitoweshea mbali kwa kutii mapenzi ya Mungu Baba, basi kwa sasa Baba anawapokea wote wanaomwamini Mwanae kama watoto wake Mwenyewe. Haya yalikuwa ni mapenzi ya

Mungu Baba. Kwa maneno mengine, mapenzi ya Mungu ilikuwa ni kuzitoweshea mbali dhambi zetu zote.

Kufuatia mapenzi ya Mungu Baba, Yesu alikuja hapa duniani, alizichukua katika mwili wake dhambi zote za ulimwengu kwa kubatizwa, akaimwaga damu yake na kufa Msalabani, na kwa sababu hiyo ametupatia maisha mapya. Hii ndio sababu Bwana wetu katika Waebrania 10:9 alisema, *“Tazama, nimekuja niyafanye mapenzi yakeo, Mungu.”*

Aya ya 9 inaendelea kusema, *“Aondoa la kwanza, ili kusudi alisimamisha la pili.”* Utaratibu wa sadaka ya kuteketezwa wa Torati haukuweza kutoa wokovu wa milele kwa mwanadamu. Hivyo, Mungu amewapatia wokovu wa milele wale wote wanaoamini katika injili ya maji na Roho, na si Torati. Je, tunaweza kuziosha dhambi zetu kwa kufanya kazi za kuwasaidia watu? Au kwa kufanya sala za toba? Au kwa kutoa sadaka kubwa kwenye makanisa yetu? Hakuna kati ya haya ambalo linaweza kuziondolea mbali dhambi zetu. Kwa kweli hatuwezi kupokea ondoleo la dhambi zetu kwa kutegemea matendo yetu mema. Hii ndio sababu Bwana wetu alikuja hapa duniani ili kubatizwa na kuimwaga damu yake.

Waebrani 10:10 inasema, *“Katika mapenzi hayo mmepata utakaso, kwa kutolewa mwili wa Yesu Kristo mara moja tu.”* Yesu amefanyika kuwa Mwokozi kwa wale wote wanaomwamini kwa kubatizwa mara moja, kwa kufa Msalabani mara moja, na kwa kufufuka tena toka kwa wafu. Wapendwa Wakristo, ni muhimu kwenu kutambua kuwa hauwezi kupokea ondoleo la dhambi kwa kupitia Torati. Lakini utakapoamini katika maji na damu ya Yesu, na kisha kuamini kuwa Yesu ni Mungu Mwenyewe, basi ninyi nyote mnaweza kuingia Mbinguni.

Yesu aliitoa dhabihu ya kudumu kwa mwili wake kwa kubatizwa na kwa kuimwaga damu yake ili kuzifanya dhambi

zetu kutoweka. Yesu amefanyika kuwa Mwokozi wa milele kwa kuja hapa duniani, kwa kubatizwa, kwa kufa Msalabani, na kwa kufufuka tena toka kwa wafu. Je, dhambi zako zilipitishwa kwenda kwa Yesu milele wakati Yesu alipobatizwa? Je, ndio maana Yesu alisema “Imekwisha,” alipokuwa akifa Msalabani? Je, Mungu ameiweka sheria yake ya roho katika mioyo yetu na amezitoweshea mbali dhambi zetu zote? Je, imani yako imejengwa katika injili ya maji na Roho? Je, wewe ni mwenye haki sasa kwa kuamini katika injili hii? Au bado umebakia kuwa mwenye dhambi?

Ninyi nyote ni wenye haki. Kabla ya kulisikia Neno, ninyi nyote mlikuwa ni wenye dhambi, lakini baada ya kulisikia Neno, sasa mmefanyika kuwa wenye haki, na mmejivika mtu mpya ambaye amefanywa upya katika ufahamu (Wakolosai 3:10). Sasa tunawezaje basi kubatizwa katika Yesu? Tunaweza kubatizwa na Yesu, kufa na Yesu, na kisha kuhuishwa pamoja na Yesu kwa kuamini huduma ya Yesu ya haki kwa mioyo yetu yote. Hii ni kanuni ya msingi ya kiimani inayoamini kwa moyo.

Ndugu wapendwa Wakristo, hebu sote tutambue kwamba hakuna njia nyingine ya kuingia Mbinguni isipokuwa kwa imani; hebu sote tuufahamu na kuuamini ubatizo wa Yesu na damu yake badala ya kung’ang’ania haki yetu wenyewe; na kwa kufanya hivyo, hebu sote tuoshwe na kuwa wazi toka katika dhambi zetu zote.

Ninamshukuru Mungu sana, kwa imani yangu, kwa ajili ya injili ya maji na Roho ambayo ametupatia kwa kupitia Bwana wetu. Ni matumaini yangu makubwa na ninaomba kila mmoja wenu afikie hatua ya kuufahamu pasipo shaka ukweli wa injili ya maji na Roho uliofunuliwa katika Mathayo 3:13-17, na kisha muuamini kwa mioyo yenu yote, ili kwamba ninyi nyote mfanywe kuwa watu wa Mungu Mwenyewe.

Baraka zote za Mungu ziwe pamoja nanyi! ☒

MAHUBIRI

11



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

“Tazama, Namtuma Mjumbe Wangu”

< Marko 1:1-5 >

**“Mwanzo wa Injili ya Yesu Kristo, Mwana wa Mungu.
Kama ilivyoandikwa katika nabii Isaya:**

**‘Tazama, namtuma mjumbe wangu mbele ya uso
wako,**

Atakayeitengeneza njia yako.’

‘Sauti ya mtu aliaye nyikani:

‘Itengenezeni njia ya BWANA;

Yanyoosheni mapito yake.”

**Yohana alitokea, akibatiza nyikani, na kuuhubiri
ubatizo wa toba liletalo ondoleo la dhambi. Wakamwendea
nchi yote ya Uyahudi, nao wa Yerusalemu wote,
wakabatizwa katika mto wa Yordani, wakiziungama
dhambi zao.”**

Je, Unamfahamu Yohana Mbatizaji Ambaye Mungu Alimtuma?

Yohana Mbatizaji alikuwa akiuhuburi nyikani ubatizo wa toba wa ondoleo la dhambi. Si hilo tu, alikuwa ni mtu ambaye ataufanya ubatizo wa Yesu ambao utazihamishia dhambi za watu wote wa ulimwengu kwenda kwa Yesu. Kwa kuwa Yohana Mbatizaji alikuwa ni nabii wa mwisho wa kipindi cha Agano la Kale na mtu aliyezaliwa katika nyumba ya Kuhani Mkuu, basi ndio maana alikuwa ni mtumishi ambaye

atazihamishia dhambi zote za wanadamu kwenda kwa Yesu kwa kupitia ubatizo kwa mujibu wa mapenzi ya Mungu.

Wakati Yohana Mbatizaji alipozaliwa hapa duniani, watu wa Israeli walikuwa wakiabudu miungu. Baada ya kuwa wamejaa dhambi kwa sababu ya kuabudu miungu, maumivu yalikuja, na wakaanza kumngojea Mwokozi aliyekuwa ameahidiwa ili kuwaokoa toka katika maumivu yao. Kama walivyotarajia, Mungu Baba alimtuma Yohana Mbatizaji na Mwanawe, Yesu Kristo kuja hapa duniani. Mungu Baba alimtuma Yohana Mbatizaji miezi sita kabla hajamtuma Yesu Kristo hapa duniani ili kuwakomboa wenye dhambi wote toka katika dhambi zao. Yohana Mbatizaji alikuwa ni “sauti ya mtu aliaye nyikani.” Alikuwa ni “Eliya wa kiroho” aliyekuwa ameahidiwa katika Agano la Kale.

Hivyo, sisi sote ni lazima tuwe watu tunaojifunza na kuyaamini mapenzi ya Mungu ambayo yalitekelezwa na Yohana Mbatizaji. Biblia inasema kuwa Yohana Mbatizaji alitumwa miezi sita kabla Yesu hajaja hapa duniani. Mungu alikuwa na maana kamili ya kumtuma Yohana Mbatizaji kabla ya Yesu. Pia ni lazima tufikiri kwa kina zaidi na kisha kuiamini kazi ya Yohana Mbatizaji.

Mungu alimtuma mtumishi wake aliyekuwa anahitajika katika kila kizazi na akawaongoza watu wake katika njia ya haki. Kabla ya kumtuma Yohana Mbatizaji, Mungu hakuwa amemtuma nabii wake kama huyu kwa miaka 400. Hivyo basi, watu wa Israeli walikuwa wakingojea kuonekana kwa mtumishi wa Mungu ambaye atalihubiri Neno la kweli la Mungu. Walikuwa wameishi kwa muda mrefu pasipo kulisikia Neno likihibiriwa na watumishi wa Mungu. Watu wa Israeli walikuwa wamechoka kwa sababu ya kutokuwepo kwa watumishi wa Mungu ambao wangelibaongoza kiusahihi kwa kupitia mapenzi ya Mungu na Neno lake. Walifikia hatua

ambapo walikuwa wakimhitaji mtumishi aliyekuwa ametumwa na Mungu. Yohana Mbatizaji alikuwa ni mtu aliyekuwa ametumwa na Mungu kwa Waisraeli kwa wakati wake. Miezi sita baada ya Mungu kumtuma Yohana Mbatizaji, Mungu alimtuma pia Yesu, Mwanawe, kuja hapa ulimwenguni.

Kisha, Yesu Kristo alitumwa kuja hapa duniani kwa mapenzi ya Mungu Baba. Yeye alikuwa ni Mwana wa Mungu, Mungu wetu, na alikuwa ni Mwokozi mkamilifu wa wenye dhambi. Yeye hakuwa kiumbe kama tulivyo sisi. Kwa hakika, Yesu Kristo alikuwa ni Mungu Mwenyewe, na alikuwa ni Mwana pekee wa Mungu na aliye mwaminifu na aliyekuwa amejinyenyekeza. Yesu Kristo aliyekuja kwa watu wa Israeli, alikuwa ni Mkamilishaji wa Wokovu na aliwaokoa wanadamu wote toka katika dhambi za ulimwengu. Yeye alikuwa ni Mfalme aliyekuwa na nia kuu ya kuutimiza mpango wa Mungu Baba na hivyo akaja hapa duniani katika hali ya chini.

Kama mtu aliyekuwa akiyahubiri nyikani mapenzi ya Mungu, Yohana Mbatizaji alikuwa ni mtumishi wa Mungu, ambaye baada ya wakati kuwadia, alipaswa kumbatiza Yesu ubatizo ambao ulizihamishia dhambi za ulimwengu kwenda kwa Yesu. Kabla hajaifanya kazi hiyo ya haki, aliishi kwa kula nzige na asali ya mwitu akiwa nyikani. Baada ya watu wa Israeli waliokuwa wameishi kwa miaka mingi wakiitumikia miungu kuyasikia mapenzi na Neno la Mungu kwa kupitia Yohana Mbatizaji, basi hapo walianza kulisikiliza Neno la Mungu. Watu wa Israeli walipata uamsho kuhusiana na dhambi zao na hivyo wakaanza kutubu wakimrudia Yehova. Hivyo, walikuwa wakijiandaa kumpokea Yesu ambaye atazisafisha dhambi za mwanadamu mara moja.

Imeandikwa hivi, *“Hajaondokea mtu katika wazao wa wanawake aliye mkuu kuliko Yohana Mbatizaji” (Mathayo 11:11)*. Yeye alikuwa ni nabii wa mwisho wa Agano la Kale

aliyekuwa anawawakilisha wanadamu wote. Alikuwa ni mtu aliyeweza kufanya majukumu ya Kuhani Mkuu wa mwisho hapa duniani. Alikuwa ni mtu ambaye ataziamishia dhambi zote za ulimwengu huu kwa kupitia ubatizo ambao atampatia Yesu.

Kwa upande mwingine, Yesu, aliezipokea dhambi zote za ulimwengu huu mara moja na kwa wote, kwa asili alikuwa ni Mwana wa Mungu na alikuwa ni Mwanakondoo wa sadaka ya kuteketezwa ambaye Mungu alikuwa amemuandaa na aliyekuja kuzichukua dhambi zote za ulimwengu huu mara moja na kwa wote (Yohana 1:29). Yesu alifanyika kuwa Mpatanishi wa kweli kati ya mwanadamu na Mungu. Kwa kuwa Yohana Mbatizaji ndiye alishuhudia hivi, Bwana hali akimwonyesha Yohana Mbatizaji alisema, “Yeye ni Eliya atakayekuja” (Mathayo 11:14). Yohana Mbatizaji, mtumishi wa Mungu, alikuwa ni mtu aliyeshuhudia kuwa Yesu alikuwa ni Mwanakondoo wa Mungu aliyekuja kuichukua adhabu ya dhambi za ulimwengu (Yohana 1:29).

Yohana Mbatizaji Anakuja Kwako Kwa Majaliwa ya Wokovu wa Mungu

Kuzaliwa kwa Yohana Mbatizaji na maelezo ya msingi ya ukoo wake vinaelezwa kwa kina katika injili ya Luka sura ya 1. Tunapoangalia kuzaliwa kwa Yohana Mbatizaji kwa kupitia Neno la Mungu lililoandikwa, basi tunapata kufahamu kuwa Yohana Mbatizaji alizaliwa kwa kazi maalumu na kwa majaliwa ya wokovu wa Mungu.

Kwanza tunafahamu kuwa familia ya Yohana Mbatizaji inatoka katika ukoo wa Makuhani Wakuu wa Agano la Kale (1 Mambo ya Nyakati 24:1-19). Baba wa Yohana Mbatizaji,

Zakaria, anatoka katika familia ya Makuhani Wakuu. Alikuwa ni mtu aliyeyatimiza majukumu yake kwa mujibu wa amri, taratibu, na kanuni za Mungu. Lakini tamanio lake kuu ni kwamba alitamani mkewe Elizabeti aweze kupata mimba. Kisha siku moja, Zakaria aliingia katika madhabahu ili kuyafanya majukumu ya ukuhani kwa mujibu wa zamu yake, na kama ilivyokuwa desturi ya ukuhani. Alipaswa kuufukiza uvumba kwa ajili ya watu wa Mungu maana kura ilikuwa imemwangukia ya kuufukiza uvumba ndani ya hekalu la Bwana (Luka 1:9). Kwa wakati maalum, Mungu alimtuma malaika Gabrieli na akautoa ujumbe wa Mungu kwa Zakaria: *“Usiogope, Zakaria, maana dua yako imesikiwa, na mkeo Elizabeti atakuzaliwa mtoto mwana mume, na jina lake utamwita Yohana”* (Luka 1:13).

Wakati huo, Elizabeti mke wa Zakaria likuwa ni mzee sana, na hivyo Zakaria hakuamini kabisa pamoja na kuwa malaika mjumbe wa Mungu alikuwa amemwambia. Hivyo, Zakaria akawa bubu, kisha makuhani wengine wakafahamu ya kuwa ameona maono katika hekalu, maana aliwaonyesha watu ishara na akawa hawezi kuongea (Luka 1:20-22).

Baada ya muda, kazi ya Mungu ya kushangaza ilitokea katika familia ile. Elizabeti akapata mimba sawasawa na unabii wa malaila Gabriel. Baada ya kupata mimba na mtoto kuzaliwa, wanafamilia walitaka kumpa jina la baba yake Zakaria aliyekuwa wa ukoo wa Haruni Kuhani Mkuu. Zakaria, ambaye hadi wakati huo alikuwa ni kipofu, aliomba kibao cha kuandikia kisha akaliandika jina la mtoto kuwa ni Yohana. Kila mtu aliona ni jambo geni kwa kuwa wakuwa na utaratibu wa kuwapa majina watoto wao kwa kufuata majina yaliyotangulia aktika ukoo ule, kisha ulimi wa Zakaria ulifunguka na akajawa na Roho Mtakatifu na akaanza kumsifu Mungu hali akitabiri hivi:

“Nawe, mtoto, utaitwa nabii wake aliye juu; kwa maana utatangulia mbele za uso wa Bwana umtengenezee njia zake, Uwajulishe watu wake wokovu katika kusamehewa dhambi zao, kwa njia ya rehema za Mungu wetu, ambazo kwa hizo mwangaza utokao juu umetufikia; kuwaangaza wakaao katika giza na uvuli wa mauti, na kuiongoza miguu yetu kwenye njia ya amani” (Luka 1:76-79).

Kinywa cha Zakaria kilifunguka kisha akatoa sauti za kusifu. Alitabiri juu ya maisha ya Yohana akisema, *“Huyu mtoto ni wangu, lakini yeye ni mtumishi wa Mungu ambaye Mungu amemtuma. Ewe mtoto ambaye Mungu amemtoa! Unapokea cheo cha kuwa nabii wake Aliye juu. Utakwenda mbele za Bwana ili umtengenezee njia yake, na watu wote watajifunza juu ya wokovu wa kweli kwa kupitia ondoleo la dhambi kwa watu wa Bwana.”* Hii ndio sababu Yohana Mbatizaji alipata jukumu la kuzihamishia dhambi zote za dunia hii kwenda kwa Yesu na alizaliwa katika familia ya Makuhani Wakuu. Yeye alitumwa hapa ulimwenguni akiwa mtumishi wa Mungu ambaye ni muhimu sana kwa wanadamu wote.

Pia Kitabu cha Malaki katika Agano la Kale kilitabiri juu ya Yohana Mbatizaji wa Agano Jipya kama ifuatavyo. *“Angalieni, nitawapelekea Eliya nabii, kabla haijaja siku ile ya BWANA, iliyo kuu na kuogofya” (Malaki 4:5).* Mungu aliahidi kuwa atamtuma mmoja wa watumishi wake kuja hapa duniani akiwa katika nguvu na roho ya Eliya wa Agano la Kale kabla haijaja siku ile kutisha ambapo ulimwengu huu utachomwa na kutoweka. Yohana alikuwa ni mtumishi wa Mungu ambaye atakuja hapa duniani katika nyakati za mwisho na kuifanya kazi kubwa ya kuwafanya wote waliokuwa wamemwacha Mungu kumrudia.

Katika Mathayo 11:12-14, Yesu alisema, *“Tangu siku za Yohana Mbatizaji hata sasa ufalme wa mbinguni hupatikana*

kwa nguvu, nao wenye nguvu wauteka. Kwa maana manabii wote na torati walitabiri mpaka wakati wa Yohana. Na ikiwa mnataka kukubali, yeye ndiye Eliya atakayekuja.” Yesu alishuhudia kuwa mtumishi wa Mungu kama Eliya aliyekuwa ameahidiwa katika Biblia Agano la Kale ni Yohana Mbatizaji.

“Angalieni, namtuma mjumbe wangu, naye ataitengeneza njia mbele yangu; naye Bwana mnayemtafuta atalijilia hekalu lake ghafula; naam, yule mjumbe wa agano mnayemfurahia, angalieni, anakuja,’ asema BWANA wa majeshi. Lakini ni nani atakayestahimili siku ya kuja kwake? Au ni nani atakayesimama atakapoonekana yeye? Kwa maana yeye ni mfano wa moto wa mtu asafishaye fedha, ni mfano wa sabuni ya mtu afuaye nguo, naye atakaeti kama asafishaye fedha na kuitakasa, naye atawatakasa wana wa Lawi, atawasafisha kama dhahabu na fedha; nao watamtolea Bwana dhabihu katika haki” (Malaki 3:1-3).

Malaki 3:1 inaonyesha kuwa ni Yohana Mbatizaji, hasa pale inaposem, “Angalieni, namtuma mjumbe wangu, naye ataitengeneza njia mbele yangu.” Pia kifungu hiki kinatabiri juu ya kuzaliwa kwa Yesu Kristo hasa pale kinaposema, “Bwana mnayemtafuta atawajilia ghafula.” Tunaweza kuiona huduma yenye umoja ya Yesu Kristo na Yohana Mbatizaji ikiitimiza haki ya Mungu katika Mathayo 3:13-17. Hivyo basi, Yohana Mbatizaji ni nabii wa mwisho wa Agano la Kale na aliweza kufanya kazi ya kuzihamishia dhambi za ulimwengu kwenda kwa Yesu akiwa kama mtumishi wa Mungu aliyekuwa na uwezo wa kiroho kuyafanya majukumu ya Kuhani Mkuu. Kitabu cha Malaki katika Agano la Kale kinatabiri kuwa Yohana Mbatizaji na Yesu watakuja hap aduniani kabla mwisho wa ulimwengu haujaja.

Yohana Mbatizaji Alikuwa Hapa Duniani Katika Roho na Nguvu ya Eliya

Katika Malaki 4:5-6, maandiko yanasema, *“Angalieni nitawapelekea Eliya nabii, kabla haijaja siku ile ya BWANA, iliyo kuu na kuogofya. Naye ataigeuza mioyo ya baba iwaelekee watoto wao, na mioyo ya watoto iwaelekee baba zao, ili nisije nikaipiga dunia kwa laana.”* Na katika Agano Jipya Mathayo 11:14 Yesu alishuhudia hivi, *“Na ikiwa mnataka kukubali yeye [Yohana Mbatizaji] ndiye Eliya atakayekuja.”*

Sasa, kule kusema “nitawapelekea Eliya” kabla ya maangamizi ya ulimwengu huu kuna maanisha nini? Hii ina maanisha kuwa Mungu atamtuma mtumishi wake hapa duniani ambaye atazihamishia dhambi za kila mtu hapa ulimwenguni kwenda kwa Yesu Kristo. Ukweli huu umeandikwa pia katika Isaya 40:3 kama hivi, *“Sikiliza, ni sauti ya mtu aliaye, ‘itengenezeni nyikani njia ya BWANA; nyoosheni jangwani njia kuu kwa Mungu wetu.’”* Kifungu hiki kinamwonyesha Yohana Mbatizaji hapa pale kinaposema, “sauti ya mtu aliaye nyikani.”

Kitabu cha 2 Wafalme kinaeleza habari za kupaa kwa Eliya kama ifuatavyo: *“Ikawa walipokuwa wakiendelea mbele na kuongea, tazama! Kukatokea gari la moto, na farasi wa moto, likawatenga wale wawili; naye Eliya akapanda mbinguni kwa upepo wa kisulisuli.”* Vivyo hivyo, Eliya alikuwa ni nabii wa Mungu aliyekwenda kwa Mungu pasipo kuonja mauti. Mungu aliahidi katika Biblia kuwa atamtuma Eliya, na hii ina maanisha kuwa atamtuma Yohana Mbatizaji ambaye ataweza kuifanya kazi ya Eliya. Alikuwa ni Yohana Mbatizaji ambaye ndiye angelimbatiza Yesu na kuzihamishia dhambi zote za mwanadamu kwenda kwa Yesu mara moja na kwa wote katika Agano Jipya. Nabii Eliya alikuwa ni mtumishi wa Mungu

aliyekuwa na nguvu kubwa ya kuwafanya watu wa Israeli waliokuwa wamejitenga na Mungu kwa sababu ya kuabudu miungu kumrudia Mungu. Katika nyakati za Agano Jipya, Yohana Mbatizaji alikuwa ni mtumishi wa Mungu ambaye atazihamishia mara moja dhambi za wanadamu kwenda kwa Yesu. Yohana Mbatizaji alipewa majukumu ya Kuhani Mkuu. Kati ya watu waliishi hapa duniani, ni Yohana Mbatizaji tu ambaye Mungu alimchagua ndiye aliyepaswa kupewa kazi hii ili aifanye (Mathayo 3:13-17).

Huduma ya Eliya Iliyoandikwa Katika Agano la Kale

Tunaweza kuona nguvu kuu za Eliya hasa pale tutakapozilinganisha kazi za Eliya na manabii wengine katika Agano la Kale. Nabii Isaya katika Agano la Kale pia aliwaambia watu kuiacha miungu na kumrudia Mungu, lakini ni watu wachache sana walioyasikia mahubiri yake na kumrudia Mungu. Yeria, nabii wa machozi, pia aliwaambia watu wake juu ya mapenzi ya Mungu kwa machozi kila siku, lakini hakukua na matunda makubwa kutokana na hiyo huduma yake. Nabii Ezeieli pia aliwahubiri watu wake ili waiache miungu na kumrudia Mungu, lakini idadi ya watu waliomrudia Mungu ilikuwa ni ndogo sana.

Lakini, kazi ya Eliya ilikuwa vipi? Alikuwa ni mtu aliyepigana na kushinda vita ya kiimani dhidi ya manabii 850 wa kidunia ili kuwarudisha watu kwa Mungu, watu ambao walikuwa wakiitumikia miungu mingine. Yeye alikuwa ni mtu aliyekuwa karibu sana na Mungu kiasi kwamba alitembea mbele za Mungu na kuomba, na mvua haikunyesha kwa muda wa miaka mitatu na nusu. Aliishi wakati wa utawala wa

Mfalme Ahabu, na Mfalme Ahabu alikuwa ni mfalme mwovu wa Israeli aliyemkana Mungu na kuitumikia miungu.

Eliya alikuwa ni mtumishi wa Mungu aliyearcha kwamba mvua isinyeshe kwa miaka mitatu na nusu ili kuirudisha mioyo ya watu wa Israeli pamoja na Mfalme Ahabu kwa Mungu. Baada ya miaka mitatu na nusu ya ukame mkali, Mfalme Ahabu aliliamuru jeshi lake kumleta nabii Eliya. Mfalme Ahabu akasema kuwa Eliya alikuwa akiwatesa Waisareli, lakini ukweli ni kuwa Mfalme Ahabu ndiye aliyekuwa akimtesa Mungu na watu wa Israeli. Eliya alitoa pendekezo kwa Mfalme Ahabu; alitaka kumwonyesha Mungu wa kweli ni yupi kwa kupitia maonyesho ya imani. Eliya alipendekeza akisema, *“Mtasisita katikatika ya mawazo mawili hata lini? BWANA akiwa ndiye Mungu, mfuateni; bali ikiwa Baali ni Mungu, haya; mfuateni yeye”* (1 Wafalme 18:21).

Wakati huo, katika Mlima Karmeli kulikuwa na manabii 400 wa Ashera na manabii 450 wa Baali. Eliya alipendekeza wamthibitisha Mungu wa kweli kati ya Yehova na Baali kwa kupitia maonyesho ya imani. Alipendekeza kuwa ili kumthibitisha Mungu wa kweli, basi Mungu wa kweli atakuwa ni yule atakayejibu kwa moto juu ya sadaka ya kuteketezwa. Mwanzoni ilionekana kuwa Eliya atashindwa kwa kuwa alikuwa akipingana na manabii 850 waliokuwa wakiabudu miungu. Je, unadhani ni nani aliyeshinda vita hiyo ya kiimani?

Manabii wa Baali waliliitia jina la Baali tangu asubuhi hadi mchana, lakini hawakupata jibu lolote. Waliruka madhabahuni na wakamwomba Baali. Basi wakati wa adhuhuri ulipokaribia na hakukuwa na jibu, Eliya aliwadhihaki akisema, “Hebu mwiteni kwa sauti, kwa kuwa yeye ni mungu... pengine amelala na anahitaji kuamshwa.” Hivyo, manabii wa Baali wakazidi kuomba kwa sauti zaidi na wakajikata kwa visu na mikuki wakaimwaga damu yake kwa mujibu wa desturi zao,

lakini hakuna kilichotokea hadi ulipokaribia wakati wa kutoa sadaka ya kuteketezwa ya jioni.

Wakati huo, ilikuwa ni zamu ya Eliya sasa kumwonyesha nani alikuwa ni kuwa Mungu wa kweli. Eliya aliufanya mfereji kuizunguka madhabahu akaijaza kwa maji. Aliamuru mapipa manne yajazwe maji na kumiminwa juu ya ile sadaka ya kuteketezwa pamoja na kuni mara tatu, maji yakajaa katika madhabahu yote na yakaujaza ule mfereji. Baada ya kuujaza ule mfereji kwa maji Eliya alianza kuomba. *“Unisikie , Ee BWANA, unisikie, ili watu hawa wajue ya kuwa wewe, BWANA, ndiwe Mungu, na ya kuwa wewe umewageuza moyo wakurudie.”*

Kisha moto wa Bwana Mungu ulishuka toka Mbinguni na ukaichoma sadaka ya kuteketezwa, kuni, mawe, udongo, n hata yale maji yaliyokuwemo katika ule mfereji. Mungu wa Eliya na imani yake Eliya iliwashinda makuhani waliokuwa wakiamini miungu. Kwa nini Eliya alitaka yawepo maonyesho ya imani kuhusu Mungu? Hii ni kwa sababu vile vita vilikuwa ni vya kiroho na vya kiimani, na wala havikuwa vita vya mwili na damu.

Manabii wote 850 na watu wa Israeli waliokuwa wakiwaamini Baali na Ashera waliiona nguvu ya Mungu aliye hai. Mungu, kwa kupitia imani ya Eliya, alionyesha kuwa alikuwa hai na kwa sababu hiyo akawa Mungu wa Israeli. Kwa kuwa nguvu hizi za Mungu zilitimizwa mbele ya macho ya Waisraeli, hakuna hata mmoja aliyeweza kusema kuwa Bwana Mungu hakuwa Mungu wa kweli. Kwa mara ya kwanza, Mfalme Ahabu alijuta kumwamini Baali, na kisha watu wa Israeli walirudi na kuwa na imani kama aliyokuwa nayo Eliya na wakamtafuta Mungu. Kwa sababu ya hilo, Eliya aliitwa mtumishi mwenye nguvu aliyewaleta watu wa Israeli kwa Mungu.

Yohana Mbatizaji alikuwa ni mtumishi wa Mungu aliyekuwa na aina hii ya nguvu kama ya Eliya. Kama vile nabii Eliya alivyowafanya watu wote wa Israeli kumrudia Mungu katika kipindi cha Agano la Kale, vivyo hivyo, Yohana Mbatizaji aliifanya kazi ya kuzihamishia dhambi zote za ulimwengu huu kwenda kwa Yesu mara moja kwa kumbatiza katika kipindi cha Agano Jipya. Yohana alimshuhudia Yesu akisema, *“Tazama! Mwanakondoo wa Mungu aichukuaye dhambi ya ulimwengu!”* (Yohana 1:29) Kwa kufanya hivyo, watu wote ulimwenguni waliweza kwenda mbele za Yesu Kristo, aliyekuja kwa injili ya maji na Roho, wakapokea usafisho wa dhambi zao kwa imani, na hivyo hao watu wakafanyika watu wa Mungu.

Mungu Baba alimtuma Yohana Mbatizaji miezi sita kabla ya Yesu na akamfanya aiandae kazi ya kuzipitisha dhambi zote za ulimwengu kwenda kwa Yesu. Dhambi zote za ulimwengu ziliweza kusafishwa kwa kupitia jukumu la Yohana Mbatizaji na kwa ubatizo ambao Yesu aliupokea. Yesu aliweza kuzipokea dhambi zako zote na dhambi zangu zote mara moja kwa kuupokea ubatizo toka kwa Yohana Mbatizaji, na pia aliangikwa Msalabani, akaimwaga damu yake ili kulipa fidia ya dhambi hizo. Sasa, watu wanaoamini katika jukumu la Yohana Mbatizaji na kazi ya Yesu wanaweza kuupokea wokovu toka katika dhambi zao mara moja. Yule Eliya ambaye Mungu alisema atamtuma katika kitabu cha Malaki katika Agano la Kale, si mwingine bali ni Yohana Mbatizaji (Mathayo 11:14).

Yohana Mbatizaji Aliweza Kuyafanya Majukumu ya Kuhani Mkuu wa Mwisho Hapa Duniani

Kama Yohana angelikuwa hajazaliwa katika nyumba ya

Haruni Kuhani Mkuu, basi ni hakika kuwa asingeliweza kuyafanya majukumu ya Kuhani Mkuu wa mwisho hapa duniani. Ili aweze kufanya hivyo, ilimpasa azaliwe katika nyumba ya Zakaria, wa ukoo wa Haruni Kuhani Mkuu. Kulikuwa na kanuni katika Agano la Kale ambapo ni Kuhani Mkuu tu ndiye aliyeweza kuiweka mikono yake juu ya mbuzi wa makosa asiye na mawaa na kisha kuzihamishia dhambi za Waisraeli ambazo walizifanya kwa mwaka mzima. Ndio maana Yohana Mbatizaji alipaswa kuzaliwa katika nyumbam ya Kuhani Mkuu ili kulitimiza Neno la unabii wa Agano la Kale. Yohana Mbatizaji alikuwa amezaliwa katika nyumba ya Haruni Kuhani Mkuu, na aliweza kuwawakilisha watu wote, akambatiza Yesu Kristo, Mwanakondoo wa Mungu, na kisha akazihamishia dhambi zote za ulimwengu kwenda kwa Yesu mara moja. Lakini leo hii kuna Wakristo wengi ambao wamebakia kuwa wenye dhamb kwa sababu wanamwamini Yesu kuwa ni Mwokozi hali wakimdharau na kulidharau jukumu la Yohana Mbatizaj. Maandiko yameandika hivi. *“Kwa sababu Yohana alikuja kwenu kwa njia ya haki, ninyi msimwamini; lakini watoza ushuru na makahaba walimwamini; nanyi hata mlipoona, hamkutubu baadaye ili kumwamini”* (Mathayo 21:32).

Yohana Mbatizaji alikuja hapa ulimwenguni, lakini Mafarisayo na Makuhani Wakuu na wale wanaomwamini Yesu hivi sasa hawakuizingatia kazi yake. Katika kizazi hiki, kuna watu wengi ambao hawaioni huduma ya Yohana Mbatizaji kuwa ni ya maana, wakati ni huduma ambayo ilizihamishia dhambi za ulimwengu kwenda kwa Yesu. Waamini wa kidini wasioamini katika kazi hii muhimu hawataweza kuifahamu siri ya ubatizo wa Yesu katika injili ya maji na Roho. Maisha ya kiimani pasipo kuiamini kazi hii muhimu ni sawa na kuidhihaki haki ya Yesu na kwa sababu hiyo watakumbana na

hasira ya Mungu.

Leo hii, ni huzuni sana kwani hata Wakristo wanaoamini kuwa Yesu ni Mungu wa wokovu wa kweli hawaufahamu Ukweli unaojulikana kama ‘injili ya maji na Roho’ na wanaishi maisha yao ya kiimani katikati ya imani potofu. Sasa, ni akina nani hapa duniani waliokuwa wakiufahamu na kuuamini Ukweli wa injili ya maji na Roho katika siku za Yesu? Walioamini hivyo walikuwa ni watenda dhambi wakuu kama vile makahaba na watoza ushuru. Hata leo hii, watu ambao kiroho wapo kama makahaba na watoza ushuru wanajaribu kuifahamu na kuiamini haki ya Mungu. Ni aina gani ya watu ambao kiroho ni makahaba? Ni watu wanaotenda dhambi kwa kufuata tamaa za mwili na wanayapoteza maisha yao.

Hivyo, ni nani anayetenda dhambi kwa kufuata tamaa za mwili? Ukweli ni kuwa sisi sote tunatenda dhambi. Sisi pia, ni kama makahaba ambao tunaishi daima tukifanya dhambi katika mioyo yetu kwa kuzifuata tamaa za miili yetu. Lakini kuna watu wachache sana katika kizazi hiki ambao wanakiri katika mioyo yao ukweli kuwa wao ni kama makahaba. Wanapokiri kuwa wao ni lundo la dhambi mbele za Mungu, na kwamba Yesu na Yohana Mbatizaji walikuja kwetu ili kuitimiza njia ya haki ya Mungu, basi dhambi zao zote zinaweza kuoshelewa mbali mara moja.

Hata kwenu ninyi ambao sasa mmekuwa Wakristo mnahitaji imani katika injili ya maji na Roho mbele za Mungu. Yaani imani inayoamini kuwa Yohana Mbatizaji alizihamishia dhambi za ulimwengu kwenda kwa Yesu mara moja na kwa wote wakati alipombatiza Yesu. Jambo la muhimu ni kwamba imani katika injili ya maji na Roho imetuokoa toka katika dhambi zote za ulimwengu. Hivyo, ni lazima tuufahamu ukweli kuwa dhambi zetu zote zilisafishwa mara moja wakati tulipoamini kuwa Yesu alizishughulikia dhambi hizo kwa

kuupokea ubatizo toka kwa Yohana Mbatizaji.

Watoza ushuru katika kipindi cha Agano Jipya walikuwa kiroho kama makahaba, wakikusanya kodi kwa ajili ya mamlaka ya Rumi iliyokuwa inaitawala Isareli. Wakati huo, watoza ushuru walikuwa ni mafisadi sana kiasi kwamba kama walipokea dola \$1,000 kama kodi basi waliweka dola \$300 mifukoni mwao kisha wakalipa kiasi kilichosalia cha dola \$700 kwa utawala wa Rumi. Lakini, pamoja na yote hayo, hawa wao walizifahamu dhambi zao. Hivyo, kulikuwa na watoza ushuru wengi sana na makahaba ambao walimwamini Yesu kuwa ni Mwokozi wao.

Lakini Mafarisayo na wakuu wa makuhani hawakumwamini Yohana. Wao walikazia kwamba walikuwa wakiishi maisha ya haki kwa kuitii Torati ya Mungu ingawa ukweli ni kuwa walikuwa na mapungufu sana. Hivyo basi, walimkana Yohana Mbatizaji aliyekuja katika njia za haki, na pia walimkana Yesu, hali wakijifanya kwamba hawana dhambi. Katika kizazi hiki, Wakristo waovu hawajaribu kufahamu kuwa Yesu amezichukua dhambi zote za ulimwengu kwa kubatizwa na Yohana Mbatizaji. Pia kuna viongozi wa Kikristo wengi wajinga ambao hawaiamini injili ya maji na Roho kwa sababu wanahofia kuwa watapoteza njia inayowawezesha kuishi.

Wakati huo mafarisayo na makuhani wakuu ambao wana vyeo vya juu walizifunika nyuso zao kwa kitambaa kirefu kila walipowaona wenye dhambi, na walijivunia utakatifu wao. Walifanya hivyo kwa kuwa walitaka waonekane kuwa ni wema na watakatifu ilhali mioyo yao ilikuwa imejaa kila aina ya dhambi. Tabia yao mbovu haikuishia hapo; ilifikia mahali ambapo walisimama katika mitaa mikubwa, wakainua mikono yao, na kisha wakawa wakiomba kwa namna ya utakatifu. “Bwana Mungu, tafadhali, tuokoe. Kwa kuwa tunawaombea

watu hawa wajinga, basi tunaomba uwasamehe na uwaokoe.”

Lakini ukweli ni kuwa walikuwa ni wanafiki wa kiroho na wanaojitakia haki. Wale waliokuwa wakilifundisha Neno la Mungu ndio haohao waliokuwa wakisimama kinyuma na haki ya Mungu. Kuna watu wengi wa jinsi katika kizazi hiki. Hawatarajii kuamini kuwa Yohana Mbatizaji alizihamishia dhambi za ulimwengu kwenda kwa Yesu mara moja kwa kumbatiza, na kwamba Yesu alishuhgulikia fidia ya dhambi hizi za ulimwengu mara moja. Hawatarajii kutoamini, bali wanatarajia kuwazuia wengine wanaojaribu kuiamini injili ya maji na Roho ambayo ni haki ya Mungu. Kwa kuwa hawaamini kuwa Yohana amekuja kwa njia za haki, basi ni hakika kuwa hawawezi kuwekwa huru toka katika hukumu ya Bwana.

Yohana Mbatizaji Alitujia Kwa ‘Njia ya haki’

Yohana Mbatizaji alitujia kwa ‘njia ya haki.’ ‘Njia ya haki’ ambayo kwa hiyo Yohana Mbatizaji alitujia ina maanisha ni kuzihamishia dhambi za watu wote kwenda kwa Yesu na kuwakomboa toka katika dhambi zao. Yeyote anayeifahamu na kuiamini injili ya maji na Roho kuwa ni haki ya Mungu anapokea wokovu toka katika dhambi. Kila mtu ni lazima apokee usafisho wa dhambi kwa kupitia ubatizo ambao Yesu aliupokea toka kwa Yohana Mbatizaji. Ili kuitimiza haki ya Mungu, Yesu alizibeba na kuzisafisha dhambi zetu zote, alisulubiwa Msalabani, akafa, akafufuka baada ya siku tatu, kisha akawaokoa wote wanaomwamini toka katika dhambi. Ikiwa hatumwamini katika mioyo yetu Yesu Kristo aliyekuja kwa injili ya maji na Roho, basi ni wazi kuwa hatuwezi kuwa watu watakatifu wa Mungu.

Yesu alizipokea dhambi zote zilikuwa zimehashiwa kwake mara moja kwa kubatizwa na Yohana Mbatizaji, alizibeba dhambi zetu, na akasulubiwa Msalabani, na alikufa kwa ajili yetu. Hivyo, sasa tunapaswa kuamini katika injili ya maji. Imani inayotuwezesha kusafishwa toka katika dhambi zetu ni ile inayoamini kuwa kwa kupitia ubatizo wake alioupokea, Yesu amezichukua dhambi zetu zote mara moja, alisulubiwa Msalabani, na alikufa Msalabani kwa ajili yetu. Mtu asiyeamini katika injili ya maji na Roho hawezi kwenda Mbinguni. Hakuna njia nyingine yoyote inayotuwezesha kwenda Mbinguni zaidi ya kuamini katika injili ya maji na Roho na kuzifanya dhambi zetu zisafishwe. Lakini Mafarisayo na viongozi wa kindi wa wakati huo walikuwa wakiupinga Ukweli wa wokovu kwa sababu hawakuamini kuwa Yesu alikuwa ni Mungu. Pia kuna Wakristo wanaotuzunguka ambao wanamwamini Yesu kimakosa. Hao ni wale ambao pamoja na kuwa wanamwamini Yesu, ukweli ni kuwa wanazipalilia dhambi katika mioyo yao.

Yohana Mbatizaji alikuja kwetu akiwa katika njia ya haki ya Mungu. Yesu aliwatokea watoza ushuru na makahaba na akawaeleza kuwa kuna aina 12 za dhambi katika mioyo ya watu. Yesu alitufundisha juu ya injili ya maji na Roho ambayo inazisafisha dhambi zetu. Bwana amewawezesha watu wote kupokea ondoleo la dhambi, yaani wote wanaoamini katika injili ya maji na Roho ambayo imefanyika kuwa ni haki ya Mungu. Yohana Mbatizaji alilitimiza jukumu la Kuhani Mkuu aliyezipitisha dhambi zote za ulimwengu za wale wanaoiamini haki ya Bwana. Hata sasa, Yohana Mbatizaji, anakuja kwetu katika njia ya Kweli iliyo na haki ya Mungu. Injili ya maji na Roho ni ‘haki ya Mungu’ ambayo Yohana aliifahamu na kuihubiri. Unapaswa kuiamini haki ya Mungu ambayo Yohana Mbatizaji na Yesu waliitimiza.

Katika Agano Jipya imeandikwa hivi, *“Palitokea mtu ametumwa toka kwa Mungu, jina lake Yohana. Huyu alikuja kwa ushuhuda, ili aishuhudie ile nuru, wote wapate kuamini kwa yeye”* (Yohana 1:6-7). Yohana Mbatizaji aliishuhudia juu ya haki ya Yesu, na watu wote walifikia hatua ya kumwamini Yesu kuwa ni Mwokozi kwa kupitia ushuhuda wa Yohana Mbatizaji. Ikiwa Yohana Mbatizaji asingelikuwa ameifanya kazi ya kuzihamisha dhambi za ulimwengu kwenda kwa Yesu Kristo kwa kupitia ubatizo, basi tungeliwezaje kumwamini Yesu kuwa ni Mwokozi na kisha kupokea usafisho wa dhambi zetu zote kwa imani?

Lakini, hatukuweza kuona kwa macho yetu Yesu akiupokea uatizo toka kwa Yohana na akiangikwa Msalabani, basi tungeliwezaje kuamini? Mungu alitupatia Neno lake; na hilo Neno lake ni Biblia.

Sasa unaweza kuufahamu ukweli kuwa dhambi zako zote zilipitishwa kwenda kwa Yesu mara moja ka kupitia ubatizo ambao Yohana alimpatia Yesu. Tunapaswa kutambua kuwa dhambi zetu zote zimekwenda kwa Yesu kwa kupitia ubatizo wake alioupokea toka kwa Yohana. Sasa imekuwaje wale wanaomfahamu na kumwamini Yesu kuwa ni Mwokozi wao wakabakia kuwa wenye dhambi? Inawezekanaje dhambi za mtu zikasafishwa mara moja ikiwa haamini kuwa dhambi zetu zilipitishwa kwenda kwa Yesu mara moja wakati alipobatizwa na Yohana Mbatizaji? Ikiwa ulikuwa hufahamu kuwa dhambi zako zilikwenda kwa Yesu kwa kuwa ulikuwa hauifahamu injili ya maji na Roho, basi ingeliwezekanaje kwa wewe kukombolewa toka katika dhambi zako?

Ikiwa haumwamini Yesu kuwa ni Mwokozi wako na ikiwa hauifahamu haki yake, basi ni hakika kuwa upendo wake hautakuwa na jambo la kukufanyia. Upendo wa Yesu na damu yake vingeliweza kuwa ni uzima kwako na kwangu kwa

sababu Yesu amezichukua dhambi zetu zote mara moja kwa kubatizwa na Yohana Mbatizaji na kwa kufa Msalabani. Ikiwa tutaifahamu na kuiamini hii haki ya Mungu, basi tunaweza kupokea usafisho wa dhambi zetu zote mara moja kwa imani. Lakini kama usingelikuwa upendo wa Yesu na kazi ya Yohana Mbatizaji, basi kusingelikuwa na njia kwa sisi tunaomwamini Mwokozi kusafishwa dhambi zetu.

Kwa kuwa watu hawafahamu kuwa Yesu alizichukua dhambi zao zote mara moja kwa kuupokea ubatizo toka kwa Yohana Mbatizaji, basi ni hakika kuwa dhambi zinabakia katika mioyo yao hata kama wanamwamini Yesu kuwa ni Mwokozi wao. Watu wa jinsi hiyo wanabakia wenye dhambi milele kwa kuwa hawafahamu maana ya ubatizo ambao Yesu aliupokea toka kwa Yohana Mbatizaji. Watu wa jinsi hiyo hawawezi kufanya lolote zaidi ya kuishi maisha ya kidini kwa kuwa bado wana dhambi ndani yao. Wanaishi siku hadi siku pasipo kuwa na tumaini ya kuingia Mbinguni, huku wakiendelea kusubiri dhambi zao zisamehewe.

Yesu alitangaza, *“Ndiye Eliya atakayekuja.”* Tunaweza kuthibitisha kwa kupitia Injili nne kuwa Yohana Mbatizaji alizihamishia dhambi zote za ulimwengu kwenda kwa Yesu. Sasa, huyo Eliya atakayekuja anayezungumzwa katika Mathayo 11:14 ni nani? Maana imeandikwa hivi, *“Na ikiwa mnataka kukubali, yeye ndiye Eliya atakayekuja.”* Huyo ni Yohana Mbatizaji. Hivyo, ni lazima tufahamu maana ya maneno haya: *“Tangu siku za Yohana Mbatizaji hata sasa ufalme wa mbinguni hupatikana kwa nguvu, nao wenye nguvu wauteka. Kwa maana manabii wote na torati walitabiri mpaka wakati wa Yohana. Na ikiwa mnataka kukubali, yeye ndiye Eliya atakayekuja”* (Mathayo 11:12-15). Yohana Mbatizaji ametabiriwa katika Agano la Kale, na kwa sababu hiyo tunaweza kufahamu kuwa alikuwa ni mtu aliyekuwa

ametumwa na Mungu. Kwa kupitia Biblia tunaweza kufahamu kuwa Yohana Mbatizaji alikuwa ni mtumishi wa Mungu aliyekuwa ametumwa na Mungu.

Tunaweza Kuifahamu Kazi ya Yesu Kiusahihi na Tunaweza Kwenda Mbinguni Pale Tu Tunapoamini Kikamilifu Katika Huduma ya Yohana Mbatizaji

Katika Biblia imeandikwa kuwa, *“Tangu siku za Yohana Mbatizaji hata sasa ufalme wa mbinguni hupatikana kwa nguvu.”* Kupatikana kwa nguvu kuna maanisha ni “matumizi ya nguvu kumdhuru mtu au kuharibu kitu.” Sasa, ni kwa nini Mungu alisema kuwa tangu siku za Yohana hata sasa Ufalme wa Mbinguni wapatikana kwa nguvu? Bila shaka jukumu la Yohana Mbatizaji lilikuwa ni la muhimu sana kiasi kuwa Biblia inaeleza kwa wazi kabisa.

Jibu ni rahisi. Kuanzia muda wa Agano la Kale hadi muda mfupi kabla ya kuja kwa Yesu ulikuwa ni kipindi cha Torati. Unabii wa kipindi cha Torati unaeleza kuwa Yesu atakuja hapa duniani hapo baadaye, ataichukua adhabu ya dhambi zote za mwanadamu mara moja, na kisha atazisafishilia mbali, na ndio maana Yesu aliweza kuyatimiza hayo mambo yote kikamilifu wakati wa Agano Jipya kwa kupitia ubatizo ambao aliupokea toka kwa Yohana Mbatizaji. Hivyo, imeandikwa kuwa yeyote anaye uchukua Ufalme wa Mbinguni kwa nguvu anastahilishwa kuingia Mbinguni, hata kama mwanzoni hakuna na sifa za kuingia Mbinguni.

Kipindi cha Torati kinachozungumzwa hapa ni Bwana ni hadi wakati wa Yohana Mbatizaji. Kipindi cha Agano Jipya kilianza wakati wa kuzaliwa kwa Yesu na ubatizo wake. Kwa

kuwa Torati inatupatia ufahamu wa dhambi, basi ndio maana tuliweza kuzifahamu dhambi zetu na kutambua kuwa sisi ni wenye dhambi kwa kupitia ile Torati ambayo Mungu aliitoa. Tulifikia hatua ya kufahamu kwa imani kuwa Yesu aliupokea ubatizo toka kwa Yohana Mbatizaji, akazichukua dhambi za ulimwengu mara moja, na kisha akaangikwa na kufa Msalabani. Hivyo, tunaweza kuingia katika lango la Mbinguni pasipo shaka kwa imani safi katika haki ya Mungu. Kwa kuwa dhambi zote zilizozungumzwa na Torati zilikwenda kwa Yesu kwa kupitia ubatizo wake alioupata toka kwa Yohana Mbatizaji, basi ndio maana maneno haya yalitimizwa: *“Kwa maana manabii wote na torati walitabiri mpaka wakati wa Yohana.”*

Yesu aliweza kuutimiza wokovu kikamilifu kwa kuzipokea dhambi zote za ulimwengu huu kwa kupitia ubatizo uliotolewa na Yohana Mbatizaji. Yesu alisema kuwa alikuwa akiitima haki ya Mungu kwa kuupokea ubatizo toka kwa Yohana. Inaweza kuelezwa kuwa injili ya maji na Roho ni utimilifu wa ahadi ya wokovu iliyoandikwa katika Agano la Kale. Watu wa Israeli katika Agano la Kale waliweka mikono yao juu ya mwanasadaka wa kuteketezwa, wakazihamishia dhambi zao kwenda kwa mwanasadaka huyo, aliimwaga damu yake na kisha damu ile ikatolewa kwa Mungu ili kupokea ondoleo la dhambi walizokuwa wamezifanya mbele za Mungu. Hivyo, kwa kuwa Yesu alizichukua dhambi za ulimwengu katika mwili wake kwa kuupokea ubatizo toka kwa Yohana Mbatizaji, basi alifanyika kuwa mpatanishi wa dhambi za ulimwengu kwa kuimwaga damu yake Msalabani.

Katika Agano la Kale, Walipaswa Kuiweka Mikono Yao Juu ya Mwanasadaka Asiye na Mawaa na Kisha Kuzihamishia Dhambi Zao Kwa Mwanasadaka Huyu ili Kuziosha Dhambi Zao

Neno ‘Kuwekea mikono’ katika Agano la Kale lina maana ya kiroho ya ‘kwenda juu yake.’ Tunaweza kufahamu kuwa kuwekea mikono kuna maana ya dhambi kwenda juu ya huyo mnyama kama inavyoelezwa katika Mambo ya Walawi 1:3: *“Matoleo yake kama ni sadaka ya kuteketezwa ya ng’ombe, atatoa ng’ombe mume mkamilifu; ataleta mlangoni pa hema ya kukutania, ili akubaliwe mbele ya BWANA.”* Hivyo, watu wa Israeli walileta sadaka asiye na mawaa mbele za Mungu, wakaiweka mikono yake juu yake, wakazihamisha dhambi zao kwenda kwa mnyama huyo na kuzisafisha dhambi zao. Hii ni kwa sababu Neno la Mungu linaeleza kuwa kufanya hivyo kuliifanya sadaka hiyo ikubaliwe mbele za Mungu. Neno ‘kukubaliwa’ lina maanisha kuwa Mungu ataipokea sadaka kwa furaha. Sadaka iliyokubaliwa na Mungu ilikuwa ni sadaka iliyokuwa imewekewa mikono katika kichwa chake. Sadaka ambayo Mungu aliipokea kwa furaha ilitoa usafisho wa dhambi kwa mtu huyo. Bada ya kumhukumu yule mwenye dhambi, Mungu aliona kwamba dhambi zake zimehamishiwa kwenda kwa mnyama wa sadaka ya kuteketezwa, akaipoke ile sadaka, na kwa furaha alizisafisha dhambi za yule mtu.

Wanadamu wote, ambao ni wana wa Adamu na Hawa ambao walikuwa wamefanya dhambi ya kwanza ni wenye dhambi tangu ile siku wanapozaliwa. Wanadamu hao hawawezi kutatua tatizo la dhambi zao kwa nguvu zao wenyewe. Hivyo, Mungu aliwapatia watu wa Israeli katika Agano la Kale kipindi cha kutoa sadaka ya upatanisho. Sadaka hizo zilikuwa ni sadaka za kuteketezwa ambazo ndizo

zingelipokea tendo la kuwekewa mikono. Hivyo Mungu aliwaambia, ‘kuiweka mikono’ juu ya kichwa cha mnyama ili kuzisafisha dhambi zao. Mungu alizungumzia hili katika Mambo ya Walawi 1:3-4. Kwa kuwa Mungu ni mtakatifu, basi *“Mshahara wa dhambi ni mauti”* (Warumi 6:23). Lakini kama watu wakifa katika dhambi, basi ni hakika kuwa watu hao wanakwenda kuzimu; lakini kwa kuwa Mungu hapendi hilo, ndio maana aliutoa utaratibu wa sadaka ya kuteketezwa wa upatanisho wa dhambi katika Agano la Kale ambapo watu walipaswa kuiweka mikono yao juu ya kichwa cha mnyama wa sadaka ya kuteketezwa. Hivyo, Mungu aliipokea damu ya mnyama wa sadaka ya kuteketezwa kama mshahara wa dhambi za watu na akawakomboza toka katika dhambi zao zote.

Hivyo ndivyo ilivyo. Tangu mwanzo wa ulimwengu, hali akidhamiria kuwafanya watu kuwa watoto wake, Mungu aliutoa utaratibu wa sadaka ya kuteketezwa wa wokovu, ambao ulijumuisha ‘kuwekea mikono’ na ‘kuimwaga damu.’ Hivyo, sadaka ya kuteketezwa ya wokovu iliyopangwa na Mungu ilipasa kwanza kuwekewa mikono ili kupokea dhambi za wenye dhambi, na kisha iliimwaga damu yake na kufa. Hiyo ni haki ya Mungu na upendo wake ili kuwaokoa wenye dhambi. Hii ni kwa sababu Mungu alifahamu tangu kabla ya uumbaji wa ulimwengu kuwa sisi wandamu tutaangukia katika hali ya dhambi kufanya maovu. Hivyo, Mungu aliandaa mapema Mwanakondoo wa Mungu ambaye atazichukua dhambi zetu zote, na akawa anatungojea. Mungu alitufanya sisi tuzaliwe tena upya kama watoto wa Mungu kwa kupitia imani yetu katika injili ya maji na Roho. Mungu alikuwa akiyafanya mapenzi yake makuu ili kutufanya sisi tuweze kuishi naye milele. Mungu hajatutupa ili tuangamie kwa mujibu wa hukumu ya dhambi; ili kutuokoa, Mungu alituambia kuzihamishia dhambi zetu zote kwa kuiweka mikono juu ya

Mwanakondoo wa Kuteketezwa wa Mungu ambaye alikuja.

Pamoja na kuwa watu wanavunja amri za Mungu na kutenda dhambi mara kwa mara, Mungu aliifungua njia ili tuweze kupokea usafisho wa dhambi zetu kwa mujibu wa dhumuni lake la uumbaji na wokovu. Mungu aliuanzisha utaratibu wa sadaka ya kuteketezwa uliotuwezesha kuzihamishia dhambi zote kwenda kwa mnyama wa sadaka ya kuteketezwa kwa kule kuwekea mikono na kwa imani. Mungu hawezi kuziacha dhambi kana kwamba hazioni, na kwa kuwa hawezi kutuacha tufe katika dhambi kwa kuwa yeye ni Mungu wa upendo, basi ndio maana anatuokoa kwa kupitia Mwanakondoo wa sadaka ya kuteketezwa kwa kutufanya tuiweke mikono yetu juu ya kichwa chake, kwa kuimwaga damu yake, na kwa kupokea usafisho wa dhambi zetu kwa imani.

Mungu alitupatia Torati ya wokovu ambayo iliikamilisha haki ya rehema ya Mungu mara moja. Hii ni injili ya maji na Roho. Mungu aliikamilisha hiyo haki na upendo kwa kutumia haki ya Mungu. Katika kipindi cha Agano la Kale, watu walizihamishia dhambi zao kwenda kwa wanyama wa sadaka za kuteketezwa, na katika kipindi cha Agano Jipya, Yesu alipokea tendo la kuhamishiwa dhambi zetu zote kwa kupitia ubatizo wake, akatuokoa, na amewafanya wote wanaomwamini kuwa watoto wa Mungu. Mungu aliianzisha ‘sheria ya kuwekea mikono’ kama njia ya kuzihamisha dhambi za watu kwenda kwa mnyama wa sadaka ya kuteketezwa, na kwa sababu hiyo damu ya huyo mwanasadaka ilipaswa kumwagwa kwa kuwa ilikuwa imezichukua dhambi za watu baada ya kuwa imewekewa mkono.

Dhambi za Watu Zimeandikwa Katika Vibao Vya Dhamiri Zao na Katika Vitabu vya Matendo

Katika maandiko imeandikwa hivi, *“Dhambi ya Yuda imeandikwa kwa kalamu ya chuma, na kwa ncha ya almasi; imechorwa katika kibao cha moyo wao, na katika pembe za madhabahu zenu,”* (Yeremia 17:1). Hapa Yuda anawawakilisha watu wote. Kwa maneno mengine, dhambi za watu zimeandikwa katika maeneo hayo mawili. Maneno ‘imechora katika kibao cha moyo yao, na katika pembe za madhabahu’ ina maanisha kuwa dhambi za kila mtu kwanza zinaandikwa katika kibao cha moyo wake na kisha katika Kitabu cha Matendo, ambacho ni Kitabu cha Hukumu (Ufunuo 20:12).

Kibao cha moyo wa mtu maana yakeni ile dhamiri yake. Dhamiri zetu zinaandika dhambi zetu kwa usahii kaisa na kwa kina *kwa kalamu ya chuma yenye ncha ya almasi*. Haijalishi kwamba tumefanya dhambi ngapi kiasi kuwa wengine hawawezi kufahamu, ukweli ni kuwa hatuwezi kukwepa kuwa wenye dhambi kwa sababu dhambi zetu zimeandikwa katika dhamiri zetu. Hivyo, wakati watu wanapofanya dhambi, mara nyingi wanaendelea kuzifikiria dhambi hizo na kuzihofia. Lakini kwa kuwa kuna tofauti kati ya watu jinsi wanavyojisikia kuwa ni wenye hati, basi baadhi ya watu wanaendelea kuishi hivyo bila aibu kana kwamba hawajafanya kitu chochote kibaya pamoja na kuwa wanatenda dhambi. Lakini watu wengine wakiziangalia kwa karibu dhamiri za watu hao, basi ni hakika kuwa kutakuwa na dhambi nyingi sana zilizoandikwa hapo. Dhamiri zao ni nzito na nia zao ni imara, kiasi kuwa wanazidharau dhamiri zao.

Lakini dhambi si inaandikwa katika kibao cha moyo tu. Pia zinaandikwa katika Kitabu cha Hukumu ambacho

kimefunguliwa wakati wote mbele za Mungu. Kama ambavyo inatakiwa kuwa na mashahidi zaidi ya wawili ili jambo lithibitike, ndio maana Mungu aliziandika dhambi za watu katika vibao vya mioyo yao na katika Kitabu cha Hukumu. Mungu alifahamu kuwa watu wataenda mbele zake na kujaribu kuzificha dhambi zao hadi mwisho na kupingana naye wakisema, “Sikufanya dhambi. Sikufanya kamwe. Hukuniona, je, uliniona? Unawezaje kusema kuwa nimefanya dhambi wakati hufahamu vizuri?” Hivyo ndio maana Mungu aliziandika dhambi hizo katika katika vibao vya mioyo yao na wakati huo huo katika Kitabu cha Hukumu.

Kwa hakika dhambi zilizoandikwa kwa kalamu ya chuma yenye ncha ya almasi zinafutwa pale mtu anapopokea ondoleo la dhambi zake zote kwa kupitia injili ya maji na Roho. Lakini wale wasioamini kuwa Yesu Kristo ni Mwokozi aukwamba Yohana Mbatizaji alikuja kwa njia ya haki basi siku moja watateseka watakapokutana na hasira ya Mungu ya kutisha kwa sababu ya dhambi zao. Watu wanaoishi chini ya laana kwa sababu ya kutopokea ondoleo dhambi zao ni hakika kuwa watakapokwenda mbele za Mungu watakwenda kuzimu kwa kuwa dhambi zao zimeandikwa katika vibao vya mioyo yao.

Kama Biblia inavyosema, “Basi ni hivyo, kila mtu miongoni mwetu atatoa habari zake mwenyewe mbele za Mungu” (Warumi 14:12), kila mmoja wetu atatoa habari zake kwa Mungu kama zilivyoandikwa katika vibao vya mioyo yetu. Unaweza kusema, “Mimi naitwa ndugu Kim toka Jamhuri ya Korea. Nilizaliwa hapa duniani na nilitenda dhambi tangu nilipozaliwa. Nilifanya dhambi nyingi sana kila siku tangu asubuhi hadi jioni kiasi kuwa siwezi kuzizungumzia dhambi hizo zote. Wakati nilipokuwa kijana sikuwa mtu mbaya sana, lakini tangu nilipokuwa na umri wa miaka 15 nilifanya dhambi kwa sana. Nilikuwa nafurahia sana kufanya dhambi lakini

nilipovuka miaka 20 na kufikia 25, basi dhambi zilianza kurundikana katika dhamiri yangu. Nilikuwa na dhambi nyingi sana kiasi kuwa sikuweza hata kuzitaja. Nilifanya dhambi sana tangu nilipozaliwa hadi nilipokufa, ni wakati nilipolala tu ndio sikufanya dhambi, nilifanya dhambi wakati wowote na nimekuja hapa nikiwa katika hali hiyo.”

Kisha Mungu atauliza, “Je, uliifahamu na kuiamini injili ya maji na Roho?” Basi hata kama mtu huyo atataka kuficha na kudanganya, basi atasema tu ukweli wake akisema, “Hapana, kwa kweli nilikuwa sina mpango kabisa na injili hiyo.” Basi hapo Mungu atawauliza mambo mengine.

“Sasa, uliwezaje kulitatua tatizo la dhambi katika moyo wako?”

“Nilijaribu kila mbinu ya kutatu tatizo la dhambi, lakini zilibakia katika moyo wangu kama zilivyo.” Kisha Mungu atasema, “Utakwenda kuzimu.”

“Ninakwenda kuzimu?”

“Ndiyo!”

“Lakini hata hivyo, Mungu, tafadhali...”

“Lakini hata hivyo nini? Yeyote aliye na dhambi ni lazima aende kuzimu. Je, sikuwapatia injili ya maji na Roho ambayo kwa hiyo mtu anaweza kupokea wokovu toka katika dhambi? Nilifanya hivyo, lakini kuwa hukuipokea, basi hata mimi siwezi kufanya jambo lolote sasa. Kwa heli na kaifurahie kuzimu!”

Ikiwa dhambi zilizoandikwa katika kibao cha moyo wa mtu hazijatoweshewa mbali wakati anapoishi hapa duniani, basi ni hakika kuwa mtu huyo hawezi kwenda Mbinguni bila kujalisha kuwa yeye ni nani. Hiyo ina maanisha kuwa kama dhambi zilizo katika kibao cha moyo wake hazijaondoka, basi mtu huyo ataenda kuzimu hata kama anamwamini Yesu kuwa ni Mwokozi wake. Lakini kuna watu wanaojaribu

kuzidanganya dhamiri zao hata pale wanapokwenda mbele za Mungu. Wanasisitiza mbele za Mungu kuwa hawana dhambi.

Tukiangalia kitabu cha Ufunuo 20:12, maandiko yanasema tunapokwenda mbele za Mungu tutakuta aina mbili za vitabu. Kimoja ni Kitabu cha Uzima na kingine ni Kitabu cha Hukumu. Vitabu vya Hukumu ni Vitabu vya Matendo. Dhambi za watu zinaandikwa moja baada ya nyingine katika Vitabu vya Matendo, na dhambi hizo zinalundikwa na kuwa kama mlima mbele ya Mungu. Lakini kwa kuwa katika Kitabu cha Uzima ni orodha tu ya majina ndiyo iliyoandikwa, basi tunaweza kusema hapo hakuna shaka. Katika Kitabu cha uzima yamo majina ya wale waliozaliwa tena upya kwa kupitia maji na Roho na waliopokea ondoleo la dhambi zao, na kwa kweli Mungu atawatunuku. Mungu anayafahamu mambo haya yote.

Mungu amemweka malaika kwa kila mtu na amewafanya malaika wafuatane na watu wao na kisha kuandika matendo yao yote kwa kina. Pia imeandikwa katika Mathayo kuwa kila mtu anaye malaika wake. Hivyo, kwa kuwa Mungu anapokea taarifa ya kila kitu kutuhusu sisi na anaona yale tunayoyatenda yeye mwenyewe, basi ni hakika kuwa hatuwezi kumdanganya Mungu. Hata kama tunataka kuzidanganya dhamiri zetu ka kusisitiza, “Sikufanya dhambi,” ukweli ni kuwa hoja chovu kama hiyo haiwezi kusaidia lolote mbele ya Vitabu vya matendo vilivyoandikwa mbele ya Mungu. Mungu aliuweka utaratibu wa sadaka ya kuteketezwa kwa ajili ya mwanadamu ili kuwafanya wapokee ondoleo la dhambi zao.

Mungu Aliutoa Utaratibu wa Sadaka ya Kuteketezwa Ambao Kwa Huo Watu Wanapokea Wokovu ili Kuzifuta Dhambi Zilizoandikwa Katika Vibao vya Mioyo yao na Katika Vitabu vya Matendo

Baada ya watu katika kipindi cha Agano la Kale kuzihamishia dhambi zao kwenda katika mnyama wa sadaka ya kuteketezwa kwa kuiweka mikono juu ya kichwa cha mnyama huyo, basi walimchinja yule mnyama na kumchoma. Watu wa Israeli walifuga kondoo na mbuzi ili kuzitumia kwa sadaka ya dhambi ili kupokea ondoleo la dhambi zao mbele za Mungu. Katika nchi yetu, watu wanafuga ng’ombe wengi sana; lakini watu wengi wanafanya hivyo kama sehemu ya kilimo, kupata fedha, na kuwatumia ng’ombe hao kama chakula. Pia mbuzi na kondoo wangeliweza kutumika pia kama chakula kwa watu wa Israeli, lakini walitumika zaidi kwa sadaka. Baada ya kutoa sadaka kulikuwa na nyama ambayo ilitengwa ambayo iliweza kuliwa.

Ikiwa mtu alitoa sadaka ya dhabihu mara moja, je, hiyo ili maanisha kuwa hatatakiwa kutoa tena sadaka? Hapana, hali haikuwa hivyo. Kwa kuwa Waisraeli watenda dhambi kila siku, basi walipaswa kutoa sadaka kila siku. Pia haikumaanisha kuwa ati kwa kuwa mtu alitoa sadaka jana, basi hataweza kufanya dhambi kesho yake. Pia haikumanisha kwamba mtu hatatenda dhambi kesho ati kwa kuwa ametoa sadaka leo. Pia haikumaanisha kuwa mtu alipokea ondoleo la dhambi milele ati kwa kuwa aliiweka mara moja mikono yake juu ya kondoo wa sadaka, kisha akamchinja, akaichukua damu yake, na kuiweka katika madhabahu ya sadaka ya kuteketezwa kama sadaka ya dhambi. Mtu angeliweza kufikiria hivi, “dhambi zote nilizozifanya leo zimekwenda kwa yule kondoo.” Wakati

anaporudi nyumbani anakutana na mtu mbaya ambaye alikopa fedha yake na hakurudisha, na mara anaanza kumshushia matusi, na kumpiga, hatimaye wanaishia kupigana. Hivyo, dhambi nyingine zinaandikwa tena katika kibao cha moyo wake.

Mtu huyo ametoka muda si mrefu kutoa sadaka ya dhabihu, lakini ikiwa dhambi imeandikwa tena katika kibao cha moyo wake, basi hawezi kufanya lolote zaidi ya kujikasirikia na kuhuzunishwa. “Ni muda mfupi tu tangu niliponunua mbuzi wa dola \$100, nikaiweka mikono yangu juu yake, nikazihamishia dhambi zangu kwake, nikaichukua dhambu yake, na nikatoa sadaka ya haki kwa kumchinja. Nilipokea ondole la dhambi zangu kwa ugumu kiasi kile, lakini sasa nimefanya dhambi tena kwa sababu ya yule mtu. Sasa sina la kufanya zaidi ya kutafuta kondoo toka katika zizi langu.” Kisha anaenda kumchukua kondoo na kumpeleka katika Hema Takatifu la Kukutania na anamuomba mmoja wa makuhani kumtolea sadaka kwa ajili yake. Katika nyakati za Agano la Kale, makuhani walikuwepo wakati wote katika lango la kuingilia Hema Takatifu la Kukutania. Hawakuwa na muda wa kupumzika. Hivyo ndivyo makuhani wa Agano la Kale walivyofanya.

“Je, siye wewe uliyekuja hapa muda mfupi uliopita?”

“Ndiyo, nilikuwa ni mimi. Lakini nimefanya dhambi tena. Nilitoa sadaka ya kuteketezwa na nilikuwa njiani kwenda nyumbani nikiwa na moyo mwepesi, lakini nilikutana na mtu ambaye alikopa fedha zangu hapo zamani kidogo lakini hakuzirejesha. Nilijaribu kujizuia, lakini yule mtu aliendelea kuniudhi. Hivyo, katika hali ya kutojitambua, nilirusha ngumi. Naye akanirushia ngumi kisha tukaendelea kupigana. Hata hivyo, nilikuwa nimepokea ondoleo la dhambi na sasa nimefanya dhambi nyingine wakati nikirudi nyumbani, hivyo

nimeleta kondoo mwingine wa dhabihu. Na kwa kweli huyu kondoo pia hana mawaa.”

“Hee, hebu jitahidi kujisimamia na uishi maisha mema. Jambo hili linakuwa gumu hata kwangu mimi. Ninafikiri nitakufa. Maana haitoshi kwa wewe kumleta kondoo huyu, na kuiweka mikono yako juu yake, na kisha kunipatia,; lakini kazi yote si inabakia kwangu mimi? Mimi, nikiwa kama kuhani wa zamu, ninapaswa kumchinja, kuiweka damu yake katika pembe za madhabu ya sadaka ya kuteketezwa, kuichuna ngozi na kisha kuigawa nyama katika vipande, na kisha kuichoma. Looh, ni kazi ngumu sana kiasi kuwa nadhani nitakufa. Ilikuwa ni kazi sana kumshughulikia yule mnyama mmoja uliyekuwa umemleta mwanzoni, lakini sasa umemleta mnyama mwingine. Kwa sababu ya watu kama ninyi hakuna hata siku moja ambapo moshi katika Hema Takatifu la Kukutania utakoma.”

“Ooh, samahani sana, Kuhani. Wakati mwingine nitakuwa makini.”

Wakati akirudi nyumbani hali akiwa na moyo mwepesi na aliyedhamiria kutofanya dhambi tena anajikuta tena akifanya dhambi nyingine. Je, sisi sio watu tunaotenda dhambi ile ile mara mbili, tatu, au hata mara kumi kwa siku moja? Basi kila wakati ilipotokea wamefanya dhambi iliwapasa kuja katika Hema Takatifu la Kukutania na kutoa sadaka za dhabihu.

“Nimerudi tena kwa aibu Kuhani wangu! Mara hii naomba ushughulikie kila kitu kana upendavyo.” Kisha atamtoa kondoo na kuondoka. Lakini kwa kuwa atakuwa amekabidhi hata kile ambacho alipaswa kukifanya kwa kuhani na akawa amemtoa kondoo na kuondoka zake, basi sadaka ya jinsi hiyo itakuwa ni batili. Ikiwa kuhani atamchinja na kumla yule kondoo, na kama atakuwa ameiweka mikono yake juu ya yule kondoo kwa ajili ya dhambi zake mwenyewe, akaichukua damu, na akaiweka katika pembe za madhabahuya sadaka ya

kuteketezwa na kuimwaga ardhini damu iliyosalia, basi ni dhambi za kuhani tu ndio zitakuwa zimeondolewa. Ikiwa mtu alitaka kutoa sadaka ambayo itaziondoa dhambi zake, basi mtu huyu atapaswa kuiweka mikono yake juu ya kichwa cha mnyama huyo wa sadaka ili kuzihamishia dhambi zake kwenda kwa mwanasadaka huyo. Baada ya hapo, dhambi zote zilizoandikwa katika Kitabu cha Matendo na katika kibao cha moyo wake zitafutwa kwa mujibu wa sheria inayosema, “*Mshahara wa dhambi ni mauti,*” kwa kumchinja kondoo, kuikinga damu yake hadi atakapokufa, kwa kuichukua dhambu na kuiweka katika pembe nne za madhabahu za sadaka ya kuteketezwa, na kwa kuimwaga damu iliyobakia ardhini.

Je, ni dhambi gani ambazo kondoo walikuwa nazo? Je, ni maadili gani ambayo kondoo wanayo katika kuifahamu dhambi? Kwa kuwa wanyama hawana nafsi, basi wao hawana dhamiri au ufahamu wa kiakili, kwa hiyo hawaifahamu Torati. Hivyo, hakuna mnyama yoyote wa sadaka ya dhabihu aliye na dhambi. Kondoo walipaswa kwa kuwa walikuwa wamezipokea dhambi za watu kwa kuwekewa mikono. Kondoo asiyejua lolote anatumiwa na Mungu kama mbadala ili kumwokoa mwanadamu; mnyama wa jinsi hiyo hana dhambi hawa haifahamu dhambi.

Watu waliotaka kupokea ondoleo la dhambi kikamilifu walipaswa kuiweka mikono yao juu ya mnyama wa sadaka ya kuteketezwa. Baada ya kuiweka mikono yao juu kichwa chake na kuzihamishia dhambi zao, basi walipaswa kumchinja huyo mnyama. Hivyo, ikiwa mtu hakuiweka mikono yake juu ya mnyama na badala yake akamkabidhi pale na kuondoka, basi sadaka hiyo haikuwa kamilifu ili kupokea ondoleo la dhambi. Ikiwa mtu alitaka kupokea ondoleo la dhambi zake, basi alipaswa kuiweka mikono yake juu ya mwanasadaka wa dhabihu asiye na mawaa na kuichukua damu yake, na kuiweka

katika pembe za madhabahu ya sadaka ya kuteketezwa, na kwa kuimwaga damu iliyosalia ardhini, na mwisho kutoa sadaka ile nyama mbele za Mungu kwa kuichoma moto. Wenye dhambi walipaswa kuiweka mikono yao juu ya kichwa cha mnyama wa sadaka ya kuteketezwa na kisha kumchinja, lakini kuhani alipaswa kufanya yaliyosalia.

Kwa kuwa watu walikuwa wakitenda dhambi mara kadhaa kwa siku moja, basi ukweli ni kuwa hawakuweza kutoa sadaka hiyo kila wakati walipotenda dhambi. Kwa kuwa mtu anaweza kuwa alitoa jana yake kondoo watatu kama sadaka na kama ilimpasa kutoa sadaka hao kila siku basi alipaswa kuwachinja wanyama 365 kwa mwaka. Ikiwa ni hivyo, ingelikuwa ni vigumu sana kwa kila mtu kuweza kufuga kondoo wa idadi hiyo. Na pia mtu huyo angelifikia hatua ya kuacha kutoa sadaka hiyo kwa sababu leo angelitoa sadaka kisha kesho yake angelitenda tena dhambi. Hivyo, angelikata tamaa na kusema, “Hata kama nitatoa sadaka leo bado nitafanya dhambi kesho” hii ni kwa sababu atafikilia katika hali ya kukata tamaa kwamba, “Mimi si mwema. Siwezi kufanya hivyo. Mimi si mwema!”

Kwa kuwa Mungu alikuwa anaufahamu udhaifu wetu vizuri, ndio maana alitoa utaratibu ambao utaziondoa dhambi za Waisraeli walizokuwa wamezifanya mwaka mzima. Ili kwamba watu wa Israeli waweze kupokea ondoleo la dhambi za mwaka mzima, basi mbuzi wawili waliandaliwa. Kuhani Mkuu, kwa niaba ya wenye dhambi wote, aliweka mikono yake juu ya kichwa cha mbuzi wa kwanza akiwa kama mwakilishi wa watu wa Israeli mbele za Mungu. Kisha yule Kuhani aliikinga damu ya mbuzi yule baada ya kumchinja. Kisha aliinyunyizia ile damu mara saba mashariki mwa Kiti cha Rehema. “Bwana Mungu! Hebu itazame damu hii.” Kisha Kuhani Mkuu alinyunyizia juu na chini ya Mabawa ya wale

malaika waliokuwa wamefunika mfuniko wa Sanduku la Agano mara saba (Mambo ya Walawi 16:15-16).

Mbuzi wawili wa sadaka ya kuteketezwa walihitajika katika sadaka ya Siku ya Upatanisho. Mbuzi mmoja alitumika katika sadaka ya dhabihu katika Hema Tatakatifu la Kukutania la Mungu. Wakati Kuhani Mkuu alipoiweka mikono yake juu ya yule mbuzi, alimchinja, na kuikinga damu yake. Kisha aliichukua damu na kuingia Patakatifu pa Patakatifu ili kuitakasa na vifaa vyake vyote. Baada ya hapo, Kuhani Mkuu alipaswa kuiweka mikono yake juu ya kichwa cha yule mbuzi aliyesalia ambaye ni mbuzi wa makosa, mbele za watu, kisha mtu aliyechaguliwa alimchukua na kumpeleka nyikani. Hivyo, yule mbuzi wa makosa aliyekuwa amezichukua dhambi za mwaka mzima za watu wa Israeli alipelekewa nyikani kusiko na maji wala nyasi, akateseka, akazungukazunguka, na hatimaye akafa kwa kiu. Hivyo, kwa kuwa sadaka hii ya kuteketezwa ilifanywa mara mbili, basi ndio maana wanyama wawili wa sadaka ya kuteketezwa walihitajika. Hiyo ilikuwa ni sadaka ya Siku ya Upatanisho.

Lakini, hata hii sadaka haikuwa kamilifu pia. Kwa kuwa walipaswa kutoa sadaka ya jinsi hiyo kila mwaka, ukweli ni kuwa ilikuwa ni sadaka iliyowakumbusha watu juu ya dhambi (Waebrania 10:3-4). Sasa, Mungu alitaka kuanzisha, sadaka ya wokovu ya milele na isiyobadilika badala ya sadaka ambazo zilipaswa kufanywa kila mwaka. Hivyo, aliahidi kujitoa yeye mwenyewe kama sadaka ya milele ambapo hakutakuwa na haja ya kutoa sadaka tena ya dhambi.

Sadaka ya Milele ya Wokovu Iliyotolewa na Mungu Ilitimizwa na Yesu kwa Kubatizwa na Yohana Mbatizaji

Mungu alikumbuka juu ya umuhimu wa Kuhani Mkuu na juu ya sadaka ya kuteketezwa ya milele kwa mujibu wa sheria ya wokovu ambayo alikua ameipanga tangu mwanzo wa kuumba kwa ulimwengu. Hiyo ilikuwa ni huduma ya Yohana Mbatizaji na ile ya Yesu. Ule ‘ubatizo’ ambao Yohana Mbatizaji alimpatia Yesu katika Mto Yordani ulikuwa ni sawa na ule utaratibu wa kuwekea mikono katika Agano la Kale. Kwa maneno mengine, Yesu, akiwa kama Mwanakondoo wa sadaka ya kuteketezwa pasipo mawaa, alikuja hapa duniani na akaupokea ubatizo toka kwa Yohana Mbatizaji, ambaye ni mwakilishi wa wanadamu. Hii ndio sababu Yesu alizipokea dhambi za ulimwengu. Yesu aliyekuwa amepitishiwa dhambi za ulimwengu, aliangikwa Msalabani na akaipokea hukumu na adhabu ya dhambi hizo. Haki ya Mungu na hukumu yake ilitimizwa hapa duniani kwa Yesu kujitoa kama sadaka.

“Tangu siku za Yohana Mbatizaji hata sasa ufalme wa mbinguni hupatikana kwa nguvu, nao wenye nguvu wauteka. Kwa maana manabii wote na torati walitabiri mpaka wakati wa Yohana. Na ikiwa mnataka kukubali, yeye ndiye Eliya atakayekuja” (Mathayo 11:12-14).

Yohana Mbatizaji hakuwa mwakilishi wa watu wa Israeli tu; yeye alikuwa ni mwakilishi wa wanadamu wote. Yeye aliitwa ili awe mkuu kati ya wote waliozaliwa na wanawake. Tunapoangalia Mathayo 11:11, Yesu alimwonyesha Yohana Mbatizaji na akasema, *“Amini, nawaambieni, hajondokea mtu katika wazao wa wanawake aliye mkuu kuliko Yohana Mbatizaji; walakini aliye mdogo katika ufalme wa mbinguni ni mkuu kuliko yeye.”* Pia alisema kuwa tangu siku za Yohana

Mbatizaji Ufalme wa Mbinguni wapatikana kwa nguvu.

Agano la Kale lilidumu hadi wakati wa Yohana Mbatizaji kwa kuwa alikuwa ni Kuhani Mkuu wa mwisho wa Agano la Kale. Kipindi cha Agano Jipya kinaanzia wakati Yesu Kristo alipozaliwa. Agano Jipya lilianza wakati Yohana Mbatizaji alipokuwa amesimama katika mstari unaogawa kati ya Agano la Kale na Agano Jipya na kuzipitisha dhambi kwenda kwa Yesu kwa kumbatiza. Kwa kuwa Yohana Mbatizaji alimbatiza Yesu na akazihamishia dhambi zote kwenda kwa Yesu, basi ndio maana ilisemekana kuwa Ufalme wa Mbinguni wapatikana kwa nguvu tangu siku za Yohana Mbatizaji. Kwa kuwa Yohana Mbatizaji alikuwa amembatiza Yesu na kuzihamishia dhambi za ulimwengu kwake, ndio maana aliweza kushuhudia, *“Tazama! Mwanakondoo wa Mungu aichukuaye dhambi za ulimwengu!”* Kwa kuwa tangu siku za Yohana Mbatizaji Ufalme wa Mbinguni wapatikana kwa nguvu, basi ndio maana kuanzia wakati huo kipindi cha Agano Jipya kilianza.

Tunapoangalia Mathayo 3:13-15, maandiko yanasema, *“Wakati huo Yesu akaja kutoka Galilaya mpaka Yordani kwa Yohana ili abatizwe. Lakini Yohana alitaka kumzuia, akisema, ‘Mimi nahitaji kubatizwa na wewe, nawe waja wangu?’ Yesu akajibu akamwambia, kubali hivi sasa; kwa kuwa ndivyo itupasavyo kuitimiza haki yote. Basi akamkubali.”* Hivyo, hebu tufikirie mara ya pili. Yesu alibatizwa na Yohana Mbatizaji. Alibatizwa wapi? Alibatizwa katika Mto Yordani. Kwa nini alibatizwa? Alibatizwa ili kuitimiza haki yote. Kama maneno haya yanavyosema, *“Kwa sababu Yohana alikuja kwenu kwa njia ya haki,”* ndio maana alimbatiza Yesu na Yesu akaupokea ubatizo toka kwa Yohana. Yesu alibatizwa ili ‘kuitimiza haki yote.’ Kubatizwa kwa Yesu katika Mto Yordani kulikuwa na lengo la Yesu ‘kuitimiza haki yote.’

Watu wa kipindi cha Agano la Kale waliingia katika nchi ya Kanaani kwa kuuvuka Mto Yordani. Nchi ya Kanaani maana yake ni Nchi ya Ahadi, ambayo ni Mbinguni. Pia Mto Yordani unamaanisha kuwa ni ‘mto wa mauti,’ na hiyo ina maanisha kuwa walikuwa wakivuka Mto Yordani ili kuonana na Mungu aliyekuwa katika Nchi ya Ahadi ya Kanaani, ambayo ni Mbinguni. Hivyo, Yesu alibatizwa na Yohana Mbatizaji katika Mto Yordani ili kuzimaliza dhambi zote za mauti.

“Tangu siku za Yohana Mbatizaji hata sasa ufalme wa mbinguni wapatikana kwa nguvu.” Yohana Mbatizaji alianza huduma yake wakati Yesu alikuwa akaribia kuianza huduma yake ya wazi. Kitu cha kwanza ambacho Yesu alikifanya katika maisha yake ili kuziondoa dhambi za wanadamu ilikuwa ni kubatizwa na Yohana Mbatizaji. Yesu akibatizwa na Yohana Mbatizaji alikuwa akipokea uhamisho wa dhambi zote za mwanadamu ikiwemo dhambi zako na zangu. Yesu alizipokea dhambi zote za ulimwengu huu mara moja na kwa wote kwa kubatizwa katika mfano wa kuwekewa mikono kwa mujibu wa utaratibu wa sadaka ya kuteketezwa wa Agano la Kale. Ni nani aliyembatiza Yesu? Ni Yohana Mbatizaji, mwakilishi wa wanadamu na mkuu kati ya wote waliozaliwa na wanawake.

Yohana Mbatizaji alikuwa ni mkuu kati ya wote waliozaliwa na wanawake. Wakati Yohana Mbatizaji alipokuwa na miaka thelathini hapa duniani, Yesu pia alikuwa na miaka thelathini. Kwa kuwa Yesu alizaliwa miezi sita baada ya Yohana Mbatizaji, basi ni hakika kuwa kimwili alikuwa nyuma ya Yohana, lakini Yesu na Yohana Mbatizaji walikutana kama Mwanakondoo wa Mungu na mwakilishi wa wanadamu.

Yesu aliyamarisha maisha yake binafsi na akaanza huduma ya wazi alipokuwa na miaka thelathini. Yesu alianza

kazi ya kuwaokoa wanadamu wote toka katika dhambi kwa kubatizwa. Ni nani ambaye Yesu alimtafuta ili aweze kubatizwa? Yesu alikwenda kwa Yohana Mbatizaji aliyekuwa akihubiri katika Mto Yordani huku akisema, “Tubuni, enyi wazao wa nyoka! Rudini, msafishwe kwa maji, na kisha mmwamini Mwokozi atakayekuja!” Mwishowe, Yesu alikiinamisha kichwa chake kwa Yohana Mbatizaji.

“Nibatize, kwa kuwa ndivyo itupasavyo kuitimiza haki yote. Wewe ni mwakilishi wa wanadamu, hivyo ni muhimu kuzihamishia dhambi zote za watu kuja kwangu kwa kupitia ubatizo. Nitazisafisha dhambi zote za watu mara utakapokuwa umezihamishia kwangu. Nitawafanya watu watakaoniamini mimi kupokea wokovu kwa kuhamishiwa dhambi zote za watu na kwa kufa Msalabani. Huu ni upendo na wokovu wa Mungu. Mungu Baba alinituma hapa duniani ili kuzichukua dhambi zote za watu na kuipokea hukumu ya dhambi badala yao. Hivyo, ni lazima unibatize.”

Hivyo, Yesu alibatizwa na Yohana Mbatizaji na akapokea uhamishio wa dhambi zote za ulimwengu. Neno “ubatizo” maana yake ni ‘kusafishwa.’ Pia ubatizo una maanisha ni ‘kuzika,’ ‘kuzipitisha dhambi,’ na ‘kuzihamishia.’ Vivyo hivyo, kule kuwekewa mikono katika Agano la Kale kuna maanisha ni ‘kuhamishia,’ ‘dhambi kwenda juu ya,’ na ‘kuzika.’ Agano la Kale lilisema kuwa dhambi zitaenda juu ya mnyama ikiwa wataiweka mikono yao juu ya sadaka ya kuteketezwa. Hivyo, kwa furaha Mungu aliipokea damu ya sadaka hiyo. Mungu alisema kuwa ataipokea sadaka ya kuteketezwa, hivyo sadaka ya kuteketezwa iliyotolewa kwa kuwekea mikono na kwa damu vitamfanya Mungu afurahi.

Mungu alimtuma Yesu kwa kuwa anatupeda kama ilivyoandikwa, *“Kwa maana jinsi hii Mungu aliupenda ulimwengu hata akamtoa mwanae mpendwa ili kila*

amwaminiye asipotee bali awe na uzima wa milele” (Yohana 3:16). Hii ni kwa sababu Mungu hakuweza kuwafanya watu wenye dhambi ili kuwa watu wake. Hivyo Mungu alizihamishia dhambi zote za wanadamu kwenda kwa Yesu. Mungu alimtuma Yesu na akamfanya azichukue dhambi zote za ulimwengu ili atufanye sisi kuwa watu wasio na dhambi. Hivyo tunaweza kuwa wana wa Mungu tusio na dhambi kwa sababu dhambi zetu zote zimekwenda kwa Yesu wakati alipoupokea ubatizo toka kwa Yohana Mbatizaji. Mungu aliwafanya wanadamu wote kuwa hawana dhambi kwa kupitia imani zao kwa sadaka ya Yesu ya milele. Huo ni upendo wa Mungu, utakatifu, na haki. Hivyo basi, Yesu aliifanya kazi ya kukubatzwa.

Yesu alikwenda kwa Yohana Mbatizaji wakati alipokuwa akiwabatiza watu katika Mto Yordani.

“Kubali hivi sasa, kwa kuwa ndivyo itupasavyo kuitimiza haki yote. Nibatize.” (Mathayo 3:15).

“Ninawezaje kukubatiza wewe? Pamoja na kuwa mimi ni mkuu kuliko wote waliozaliwa na wanawake na kwamba Mungu amenipa jukumu hili, Wewe ni mkuu kuliko mimi. Wewe ni Mwana wa Mungu, na ni Muumbaji wangu. Sasa, inawezekanaje mimi kukubatiza wewe?”

Kisha Yesu akamjibu, “Kubali hivi sasa, kwa kuwa ndivyo itupasavyo kuitimiza haki yote. Maana inatupasa kuuondoa uovu na dhambi za watu wote kwa mimi kukubatzwa na kwa wewe kunibatiza mimi.”

Kule kusema, “kuwa kuwa ndivyo itupasavyo kuitimiza haki yote” maana yake ni kwamba Yesu atazipokea dhambi zote za mwanadamu katika mwili wake kwa kukubatzwa na Yohana Mbatizaji. Yohana Mbatizaji alikuwa ni mwakilishi wa wanadamu na mtu aliyeyatimiza majukumu ya Kuhani Mkuu wa wanadamu wote. Kama Kuhani Mkuu wa Agano la Kale,

alimbatiza Yesu ili kuzihamishia dhambi za ulimwengu kwenda kwa Yesu. Yohana Mbatizaji alikuwa ni mtu pekee aliyekuwa na sifa ya kumbatiza Yesu, Mwanakondoo wa Mungu aliyekuja kuziondoa dhambi zote za ulimwengu. Kwa kuzingatia mazingira yote ya Agano la Kale, Yesu alikuwa ni Mwanakondoo wa Mungu aliyekuwa sadaka ya upatanisho, na Yohana Mbatizaji alikuwa ni Kuhani Mkuu. Hivyo, Yesu alisema, “Wewe ni mtu utakayezihamisha dhambi zoe za watu kuja kwangu. Nipatie ubatizo.”

Yohana Mbatizaji alimkatalia Yesu aliposema hivyo, lakini Yesu alimwamuru, “Fanya hivyo! Kwa kuwa ndivyo itupasavyo kuitimiza haki yote. Ninakuamuru. Nibatize. Zihamishie dhambi za mwanadamu kuja kwangu kwa kunibatiza kwa ubatizo wa kuwekewa mikono. Kwa kuupokea ubatizo wa kuwekewa mikono toka kwako, nitapokea uhamisho wa dhambi zote za mwanadamu na kisha nitazisafisha dhambi hizo zote kikamilifu. Kazi ya haki zaidi ni kuzipanda dhambi zote katika mwili wangu kwa mimi kubatizwa na wewe. Ninapaswa kupokea adhabu ya dhambi kwa niaba ya wanadamu wote kwa sababu ya hizo dhambi zilizopandwa kwangu. Huu ni upendo wa Mungu na wokovu.”

Yesu alimwamuru Yohana Mbatizaji kumheshimu. Naye Yohana Mbatizaji akambatiza. Yesu alisema, “*Kubali hivi sasa. Kwa kuwa ndivyo itupasavyo kuitimiza haki yote*” (*Mathayo 3:15*). Hapa, “haki yote” kwa Kiyunani ni ‘πάσαν δικαιοσύνην’ (*pasan dikaiosunen*), maana yake ni hali ya haki zaidi ambayo haina dosari.

Ili Kuzisafisha Dhambi Zetu Zote, ni Lazima Tuyaamini Matendo ya Haki Yaliyofanywa na Yesu

Sisi ni kama viwanda vinavyozalisha dhambi tangu tunapozaliwa. Hii ni kwa sababu tunarithi dhambi za wazazi wetu tangu tulipokuwa katika matumbo ya mama zetu. Tunazaliwa katika ulimwengu huu tukiwa tumeirithi dhambi ya Adamu na Hawa, na sisi ni waasili na wazalishaji wa dhambi ambao tunafanya aina nyingi ya dhambi binafsi hadi tutakapokufa. Sisi ni wazalishaji wa dhambi ‘tangu tunapozaliwa hadi kaburini.’

Sasa ni nani huyo anayewaokoa viumbe wenye dhambi na kuwafanya kuwa wenye haki? Ni Yesu, Mwana wa Mungu, aliyebatizwa na Yohana Mbatizaji, akaimwaga damu yake, na akafa. Bwana wetu alisema kuwa ilikuwa ni njia sahihi ya wokovu na ya haki kwa Yeye kubatizwa na kuziondoa dhambi zote za wanadamu mara moja na kwa wote. Yohana alizihamisha dhambi zote za mwanadamu kwenda kwa Yesu, kisha Yesu alizipokea dhambi hizo katika mwili wake kwa kupitia ubatizo wake. Yesu alisema kuwa ilikuwa ni njia inayofaa zaidi.

Ni lazima tuamini kile ambacho alikisema. Pamoja na hilo, ni lazima tuamini katika matendo ya haki ambayo ameyafaya. Ndio maana maandiko yanasema, Yohana alikuja katika njia ya haki. Yohana alieneza Ukweli ulio sahihi.

Sisi ni wajinga ambao tunafanya dhambi hadi siku tutakapokufa. Hata hivyo, dhambi zetu zote zilikwenda kwa Yesu kupitia ubatizo ambao Yohana Mbatizaji alimbatiza Yesu katika Mto Yordani, ambao ni mto wa mauti. Kwa kupitia njia hii ya kuwekea mikono, Yesu aliitimiza haki yote ya Mungu kwa kubatizwa. Kabla ya wewe na mimi hatujazaliwa hapa

duniani, Bwana wetu alikuja hapa ulimwenguni akaukamilisha wokovu wetu.

Kadri ulimwengu huu unavyozidi kuwepo, watu walio katika sura na mfano wa Mungu wanazaliwa na kufa, na wanazaliwa na kufa tena. Watu wote wanapokuwa hai wanatenda dhambi na hatimaye wanakufa. Hali hii itaendelea kutoka hadi mwisho wa ulimwengu. Yesu alikuja hapa duniani katika mwaka 1 B.K ili kuwaokoa wanadamu wote wenye dhambi toka katika dhambi zao. Alibatizwa na Yohana ili kukuokoa wewe na mimi toka katika dhambi. Yesu alibatizwa na akaitimiza haki yote ili kutuokoa sisi sote toka katika dhambi. Yesu aliitimiza haki yote, ambayo ni ondoleo la dhambi, kwa kupitia ubatizo wake. Bwana wetu Yesu Kristo alizichukua dhambi zako zote na zangu kwa kupitia ubatizo. Wakati Yesu alipobatizwa, sauti ya Mungu, ambaye alikuwa amependezwa, ilisikika toka Mbinguni ikisema, *“Huyu ni mwanangu, mpendwa wangu, ninayependezwa naye.”* Mungu alikuwa akisema, “Yesu ni Mwanangu mpendwa. Mwanangu atawafanya ninyi kuwa msio na dhambi kwa kuzichukua dhambi zote za mwanadamu kwa kupitia ubatizo wake.” Kwa asili sisi tulikuwa ni watu ambao tungekwenda kuzimu kwa sababu ya dhambi zetu, lakini kwa kuwa tumefanyika kuwa watu tunairithi Mbingu kwa imani, basi tumefanyika kiroho kuwa wenye nguvu tunaoamini katika kazi ambazo Yesu na Yohana Mbatizaji walizifanya.

Kama Yesu Alivyotoa Bure, Ninaamini Utapokea Bure

Siku moja nilikuwa nikimiliki saa ya watoto ambayo ni aghali sana. Nilitaka kumpatia mtoto kama zawadi, kisha

mambo yakabadilika, watotao watatu walipita mbele yangu. Nikawaita wale watoto watatu.

“Hee, nyie watoto njooni mara moja.”

“Sawa ndugu?”

“Nina saa na nitataka kumpatia mmoja kati yenu. Ni nani anayehitaji?” Niliifikiri wote wataiomba, lakini katika hali ya kushangaza, wote watatu walisita. Kisha mtoto wa kwanza akasema.

“Kwa kweli huwezi kuitoa hiyo saa. Usidanganye; hata hivyo mimi siihitaji.” Kisha akawa anajisema kichinichini. “Hakuna kitu cha bure. Yule mtu ni mwongo.”

Kisha nikaishikilia ile saa nikimwonyeshea mtoto wa pili. Alisita lakini aliipokea. Ilionekana kama anayefikiria kwa muda, kisha akaongea akionekana kuwa na mashaka.

“Ninafikiri utainyang’anya, si ndiyo? Au utamwambia kila mtu kwamba nimeiiiba, si ndiyo? Siwezi kufanya hivyo. Kuchukua kitu cha mtu bure ni hatari. Siwezi kuichukua. Siihitaji.”

Niliwaona watoto hawa ambao kwa hiari yao hawakuipokea zawadi wakati nilipokuwa nataka kuwapatia, kisha nikarudisha mfukoni saa yangu nikiwa na moyo wenye uchungu hali nikishangaa ikiwa ninapaswa kuulaumu ulimwengu uliowafanya kuwa hivyo. Kisha, yule mtoto wa tatu akasema.

“Tafadhali, nipatie mimi.” Nilifanya haraka nikaichukua ile saa na kumpatia.

“Asante sana ndugu. Lakini huwezi kukirudisha kile ambacho umekitoa. Ikiwa utafanya hivyo, wanasema kuwa utaota pembe katika kichwa chako.”

Yule mtoto aliijaribisha ile saa akaivaa katika mkono wake wa kushoto na akaipenda. Basi kwa mara ya kwenza moyo wangu ulifurahi sana kwa sababu ya kile alichokifanya

yule mtoto wa tatu. Alikuwa makini sana kuniadini wakati nilipomwambia kuwa nitampatia saa ile bure, akaipokea na kushukuru, na akawa anaivaa hapa na pale. Moyo mnyoofu wa kumwamini Bwana ni kama moyo wa yule mtoto wa tatu. Kwenda Mbinguni ni kuadini kile ambacho Bwana amekifanya kwa ajili yetu na kukipokea kwa shukrani; ni hakika kuwa tunaingia Mbinguni kwa aina hiyo ya imani. Wanachopaswa kukifanya watu wote wanaoumiliki Ufalme wa Mbinguni kwa imani ni kuifurahia na kuishukuru neema ya Mungu.

Watu Wanaoliamini Neno la Mungu Katika Mioyo Yao Ni Wenye Nguvu Wanaouteka Ufalme wa Mbinguni Kwa Nguvu

Imani ya watu wanaoingia katika Ufalme wa Mbinguni kwa nguvu ni ya wale walio na imani katika wokovu ambao Mungu ametupatia. Hii ni imani katika Ukweli wa kiroho wa wokovu. Kaka na akina dada, mnalikumbuka Neno katika Warumi linalosema, *“Maana wote wamefanya dhambi na kupungukiwa na utukufu wa Mungu”* Hakuna anayeweza kuupokea wokovu toka katika dhambi kwa kupitia matendo yake mema. Hakuna hata mmoja anayeweza hata kukaribia Mbinguni kwa kutegemea tabia yake au uwezo wake binafsi. Watu wote ni wenye dhambi bila kujalisha kuwa ametenda dhambi nyingi au chache. Haijalishi kuwa matendo yao ni mazuri kiasi gani, ukweli ni kuwa hawezi kuilipa gharama ya dhambi, na hawawezi kwenda Mbinguni kwa kutegemea matendo yao mema. Sasa, ni nani hapa duniani anayekwenda Mbinguni?

Kama vile Biblia inavyosema, “Nao wenye nguvu

wauteka,” wale wanaoamini kuwa Bwana ameziondoa dhambi zetu zote kwa kupitia injili ya maji na Roho wanaweza kuuteka na kuumiliki Ufalme wa Mbinguni kwa imani. Watu waliopokea wokovu toka katika dhambi kwa imani katika injili ya maji na Roho wanaweza kuingia katika Ufalme wa Mbinguni. “Bwana! I ninaamini kuwa Yesu alikuja hapa duniani ili kutuokoa sisi wenye dhambi, alipokea tendo la kuwekea mikono toka kwa Yohana Mbatizaji ili kuzichukua dhambi zetu zote mara moja na kwa wote. Ulikuwa hapa duniani na ukafanya hivyo; kwa nini nisikuamini? Bwana, ninaamini. Ninashukuru kwa neema ya wokovu ambayo kwa hiyo umeziondoa dhambi zangu zote.” Mungu anapendezwa sana na anawafurahia wale wanaoteka Ufalme wa Mbinguni kwa shukrani katika imani kama hivi.

Biblia ambalo ni Neno la Mungu, na si uongo na ni Ukweli mkubwa. Biblia hii haijabadilishwa na imeendelea kurithishwa tangu mwanzo wa ulimwengu hata sasa. Biblia ni Neno la Mungu. Sasa, tunaweza kuamini nini ikiwa hatuliamini Neno la Mungu? Katika Neno la Mungu imeandikwa wazi kuwa Yesu aliitimiza haki yote wakati alipobatizwa. Watu wataenda kuzimu kwa kuwa wana dhambi. Lakini, Biblia inasema kuwa Yesu amezichukua dhambi za watu wote kwa kubatizwa na Yohana Mbatizaji. Biblia tangu mwanzo hadi mwisho inaeleza kuwa Yesu amewafanya watu kuwa asio na dhambi kwa ubatizo wake.

Baada ya Yesu kuzipokea dhambi za ulimwengu kwa kubatizwa, Yesu aliimwaga damu yake Msalabani. Kitendo cha Yesu kuwekewa mikono, kuzamishwa ndani ya maji, na kisha kuibuka toka katika maji kuna maanisha ni tendo la kuzipokea dhambi zote za mwanadamu, kufa Msalabani, na kisha kufufuka tena toka kwa wafu. Yesu mwenyewe alizichukua dhambi zetu zote kwa kupitia ubatizo wake, baada ya hapo

aliangikiwa Msalabani na akafa, kisha akafufuka baada ya siku tatu. Sasa amekieti mkono wa kuume wa Mungu Baba katika kiti cha enzi cha Mungu na analitoa neno la uthibitisho kuwa “Hauna dhambi” kwa watu wote wanaomwamini Yesu Kristo kuwa ni Mwokozi. Kitendo cha Yesu kuja hapa duniani na kutufanya sisi kuwa tusio na dhambi ni kitendo cha haki ya Mungu. Ni wokovu wa Mungu. Mnapaswa kuuamini ukweli huu katika mioyo yenu.

Injili ya maji na Roho ni Ukweli ambao ni lazima uwe katika mioyo yenu. Ni lazima muamini katika mioyo yenu katika Neno ambalo mmelisikia hadi sasa. Ni lazima muuteka Ufalme wa Mbinguni kwa nguvu kwa kupitia imani katika injili ya maji na Roho. Wewe na mimi ni watu ambao tumeuteka Ufalme wa Mbinguni kwa imani katika injili ya maji na Roho. Ni wale tu wanaoamini katika injili ya maji na Roho katika mioyo yao na waliopokea kwa kweli ondoleo la dhambi zao ndio wanaoweza kwenda katika Ufalme wa Mbinguni. Dhambi zenu zote zilikwenda kwa Yesu Kristo, na aliipoka adhabu na hukumu ya hiyo dhambi zote kwa niaba yenu. Kisha Yesu alifufuka siku ya tatu, na akaketi mkono wa kuume wa Mungu katika kiti cha enzi, na ameketi pale akiingojea Siku ya Hukumu. Yesu yupo hai.

Bwana alikuja hapa duniani katika mwili wa mwanadamu, alibatizwa, akafa Msalabani, na siku ya tatu akafufuka. Baada ya kufufuka aliushuhudia Ukweli kwa siku 40, na pamoja na kuwa aliishi kwa miaka 33 katika ulimwengu huu, sasa anaketi mkono wa kuume wa Mungu Baba milele. Yesu anamwambia kila mtu anayeamini katika moyo wake kwa mujibu wa Neno la wokovu, “Hiyo ni sahihi! Hiyo ni sahihi. Wewe ni mmoja wa watu wangu. Ingia katika Ufalme wa Mbinguni.”

Akina Kaka na akina dada! Dhambi zako zote na zangu zilikwenda kwa Yesu kwa kupitia ubatizo wake. Ndio maana

Mungu akasema, tangu siku za Yohana Mbatizaji, Ufalme wa Mbinguni wapatikana kwa nguvu. Alisema kuwa wenye nguvu wauteka. Yesu haulizi kwamba ni kwa nini wauteka kwa nguvu; badala yake ameacha ili uchukuliwe kwa nguvu. Ni kitu gani wanachokichukua kwa nguvu? Watu wanafanywa wenye haki kwa imani na kuuteka Ufalme wa Mbinguni kwa nguvu inayotoka katika ile imani. Hii ina maanisha kuwa watu hao wanaurithi Ufalme wa Mbinguni kwa imani. Hii ndiyo imani sahihi.

Hata kama mtu anafanya utawa ili kujiweka mbali na dhambi, akijaribu kutofanya dhambi, au akijaribu kulundika mambo mema ili aweze kwenda katika Ufalme wa Mbinguni, ukweli utabakia kuwa kufanya hivyo ni unafiki mtupu. Hakuna mwanadamu anayeweza kufanya hivyo, haijalishi kuwa mtu huyo ni nani kwa sababu mwandamu ni wa mwili. Ukweli ni kuwa mambo yataenda vibaya hivi punde hata kama tunajaribu kwa nguvu zetu kufanya matendo ya haki hii ni kwa sababu wewe na mimi tuna miili dhaifu. Miili yetu inatamani kula mara tunapokiona kitu chenye radha nzuri; inataka kuwa mizuri hata kama ni mizuri tayari, na inapenda kupata zaidi kuliko wengine. Kama vile mwili usivyo na furaha, ukweli ni kuwa miili yenu haina ukomo wa choyo na tamaa. Inawezekanaje basi sisi tulio wa jinsi hiyo kuishi pasipo kutenda dhambi? Haiwezekani. Hivyo, ni lazima tufanyike wenye haki kwa imani, si kwa tabia zetu njema. Ni lazima tufanyike watoto wa Mungu kwa imani, tupate uzima wa milele kwa imani, na kisha tuingie katika Ufalme wa Mbinguni kwa imani.

Nimezihamishia Dhambi Zangu Zote Kwenda Kwa Yesu na Nimefanyika Kuwa Mmoja wa Wenye Haki Kwa Kuamini Injili ya Maji na Roho

Watu wanafanywa wenye haki katika mioyo yao kwa kuamini kama Biblia inavyosema, *“Kwa maana kwa moyo mtu huamini hata kupata haki, na kwa kinywa hukiri hata kupata wokovu”* (Warumi 10:10). Kaka na akina dada, je, mnaamini kweli katika injili ya maji na Roho katika mioyo yenu? Je, mnaamini kuwa dhambi zenu zote zilikwenda kwa Yesu? Ikiwa ni hivyo, ninyi ni wenye haki. Hamna dhambi. Hamuwezi kuwa na dhambi. Kwa kuwa Yesu alikuja hapa duniani na akazichukulia mbali dhambi zenu zote, maovu, makosa, na mapungufu mara moja kwa kubatizwa, basi ni hakika kuwa hamna dhambi.

Kama vile Eliya alivyokuwa mwakilishi kati ya watumishi wa Mungu katika Agano la Kale ambaye aliwawakilisha watu wote katika ulimwengu huu akiwa kama mtumishi wa Mungu, basi mwakilishi wa wanadamu wote kwa ujumla ni nani? Ni Yohana Mbatizaji. Miaka 2000 iliyopita, Yohana Mbatizaji alimbatiza Yesu badala yako na badala yangu na akazihamishia dhambi zetu zote kwenda kwa Yesu. Dhambi zote za mababu zako waliotangulia, watoto wako, na wajukuu wako zilikwenda kwa Yesu wakati huo. Wazazi wako pia ni watu wa kidunia kama ulivyo wewe. Kila mtu ambaye atazaliwa hapo baadaye pia anahesabiwa kuwa ni mtu wa ulimwengu. Yohana Mbatizaji alitangaza hivi, *“Tazama! Mwanakondoo wa Mungu aichukuaye dhambi ya ulimwengu!”* Kifungu hiki kina maanisha kuwa Yesu amekwisha zichukua dhambi zote za watu wa ulimwengu huu, yaani dhambi za baadaye, za sasa, na za wakati uliopita kwa kupitia ubatizo wake.

Sawa, hebu tuseme kuwa ulikuwa na dhambi ya asili

tangu ulipokuwa katika tumbo la mama yako, tangu ulipozaliwa, na ukaendelea kutenda dhambi hadi ulipokuwa na miaka kumi. Je, dhambi hizo zote zilikwenda kwa Yesu au la? Ukweli ni kuwa zilikwenda kwa Yesu. Ukweli ni kuwa si tu dhambi ulizozifanya hadi ulipokuwa na miaka kumi ndizo zilizokwenda kwa Yesu bali ni pamoja na dhambi zote ambazo utazifanya katika maisha yako yote. Kwa kuwa dhambi zote za ulimwengu zilikwenda kwa Yesu kama hivyo, basi ni wazi kuwa hauna dhambi. Hasa kama unaamini katika injili ya maji na Roho.

Katika Yohana 1:29, kuna ushuhuda unaomshuhudia Yesu kwa kusema, *“Tazama! Mwanakondoo wa Mungu aichukuaye dhambi ya ulimwengu!”* Yohana Mbatizaji alishuhudia hivi siku ya pili yake mara baada ya kuwa amembatiza Yesu. Kama ushuhuda huu ulivyo, Yesu alizipokea dhambi zote za ulimwengu kwa kupitia ubatizo wake, akazibeba dhambi hizo zote hadi Msalabani, na akafa. Dhambi ulizonazo tangu wakati ulipokuwa katika tumbo la mama yako na dhambi unazozifanya hadi siku utakapokufa zinajumuishwa zote katika dhambi ya ulimwengu. Dhambi unazozifanya hali ukifahamu na pasipo kufahamu kwa sababu hujakomaa ni dhambi za ulimwengu kwa kuwa unazifanya dhambi hizo ukiwa unaishi ulimwenguni. Dhambi zote ni dhambi za ulimwengu: yaani zile zinazofanywa pasipo kufahamu, zinazifanywa kwa kufahamu, zinazofanywa kisiri, na zinazofanywa hadharani. Dhambi zote za jinsi hiyo zilikwenda kwa Yesu. Dhambi zote tulizozifanya hadi tulipokuwa na miaka 20, 30, 40 na dhambi zote ambazo tutazifanya hadi tutakapo kufa zilipitishwa kwenda kwa Yesu. Dhambi hizo zote zilikwenda kwa Yesu.

Ni lazima tufahamu na kuamini kwa mioyo yetu yote katika injili ya maji na Roho inayoziondoa dhambi zetu zote na kutufanya tumiliki Ufalme wa Mbinguni. Bila kujalisha jinsia

na umri, kila mtu anapaswa kuufahamu ukweli huu na kuutunza katika moyo wake. Ni kweli, mimi pia, ninaamini katika Ukweli huu katika moyo wangu. Yesu amezitoweshea mbali dhambi zetu zote kwa kubatizwa na Yohana Mbatizaji na kwa kuimwaga damu yake na kufa Msalabani. Ni lazima tufahamu kuwa hakuna njia nyingine ya kupokea ondoleo la dhambi zetu zaidi ya injili ya maji na Roho. Ninashukuru sana kwamba Yesu pekee alizichukulia mbali dhambi za ulimwengu.

Hebu tuseme kuwa tulifanya dhambi tangu tulipokuwa na mwaka mmoja hadi tulipofikisha miaka 30. Ukweli umri huu ni wa utu uzima katika maisha yetu. Wakati ambapo maisha yanakuwa juu, na wakati ambapo tunajaribiwa sana kufanya dhambi kwa wingi. Utu uzima wa maisha ni utu uzima wa kufanya dhambi. Ukweli ni kuwa dhambi zote tulizozifanya katika utu uzima, na dhambi zote ambazo tutazifanya hadi tutakapokufa, pamoja na dhambi za wazazi wetu zilipitishwa kwenda kwa Yesu. Pia dhambi za Adamu na Hawa zilikwenda kwa Yesu, na dhambi zote ambazo wanadamu watazifanya zilikwisha kwenda kwa Yesu. Zilikwenda kwa Bwana wetu Yesu Kristo kwa kuwa na imani juu yake.

Siwezi kusema kuwa ni lini au ni siku gani Yesu atakuja, lakini ni wazi kuwa mwisho wa ulimwengu huu unakaribia. Siku ile atakapokuja, mwanamke fulani atamzaa mtoto. Ni hakika kuwa Yesu amekwisha ichukua hata ile dhambi ya mtoto ambaye atazaliwa siku hiyo atakapokuja. Kwa kuwa Yesu amezichukua dhambi hizo, basi mtu yeyote anaweza kupokea ondoleo la dhambi zake kwa imani kwa kupitia injili ya maji na Roho. Hivyo, kila mtu ni lazima apokee ondoleo la dhambi kwa kuufahamu na kuuamini Ukweli huu.

Biblia inasema, *“Kwa maana kwa moyo mtu huamini hata kupata haki, na kwa kinywa hukiri hata kupata wokovu”* (Warumi 10:10). Wewe ni mwenye haki. Tukitazama kwa

mtazamo wa kiimani, watu wote wa ulimwengu huu hawana dhambi. Kwa upande wa Mungu, dhambi zao zimekwisha ondolewa. Lakini watu wanaendelea kuwa na dhambi katika mioyo yao kwa sababu ya kutokuamini hivyo. Biblia inasema, *“Kwa maana jinsi hii Mungu aliupenda ulimwengu, hata akamtoa Mwanawe pekee, ili kila mtu amwaminiye asipotee, bali awe na uzima wa milele.”* (Yohana 3:16). Mungu aliziondoa dhambi za ulimwengu ili watu waweze kupata uzima wa milele kwa sababu anawapenda watu wake. Mungu amewaokoa watu wote kiasi kwamba asiwepo hata mtu mmoja ambaye atakutana na hukumu ya adhabu. Lakini kuna watu wengi sana ambao hawalifahamu jambo hili. Kuna Wakristo wengi leo hii ambao hawafahamu jinsi injili ya maji na Roho ilivyo. Hivyo basi, bado kuna wenye dhambi wengi kila siku.

“Kwa maana manabii wote na torati walitabiri mpaka wakati wa Yohana. Na ikiwa mnataka kukubali, yeye ndiye Eliya atakayekuja.” (Mathayo 11:13-14). Sasa ni lazima muielekeza mioyo yenu katika ukweli kuwa Yohana Mbatizaji ni Eliya atakayekuja, na kisha muamini hivyo. Yohana Mbatizaji ni mwakilishi wa wanadamu wote, mkuu kati ya wote waliozaliwa na wanawake, na mtumishi wa Mungu ambaye ni Eliya atakeykuja. Kwa kuwa Yohana Mbatizaji, ambaye ni mwakilishi wa wanadamu, alimbatiza Yesu na kuzihamishia dhambi zote za ulimwengu huu kwenda kwa Yesu, basi kuanzia wakati huo watu wote wanaweza kupokea ondoleo la dhambi zao. Yesu Mwokozi wangu alibatizwa, akazipokea dhambi zangu zote, akaipokea adhabu kwa sababu ya dhambi hizo na akafa Msalabani. Alifufuka siku ya tatu toka mauti, na sasa yupo hai akiyasikiliza maombi yangu. Yesu aliziondoa dhambi zangu zote. Alizichukulia mbali dhambi zote. Alinifanya kuwa mtu nisiye na dhambi. Pamoja na kuwa mimi si mwaminifu na ninaendelea kufanya dhambi hadi

nitakapokufa, Yesu amenifanya kuwa mtu nisiye na dhambi.

Imani yangu hii ni imani halisi. Hii ni kwa sababu watu wanaouamini ukweli huu katika mioyo yao wanapokea wokovu. Na Mungu amekwisha utimiza wokovu wetu. Hii ni ahadi ya Mungu na ni wokovu wake. Yeyote anayeliamini Neno hili katika moyo wake anafanyika kuwa mmoja wa wenye haki na anakuwa na nguvu ya kufanyika mwana wa Mungu. Hivyo, natumaini mnaamini hivi katika mioyo yenu. Ninatumaini kuwa mtauteka Ufalme wa Mbinguni kwa imani na kufanyika wana wa Mungu kwa imani.

Mungu alisema kuwa mtu hawezi kuwa mwenye haki kwa kuishi maisha ya wema. Badala yake, Mungu alisema hivi, *“kwa sababu wote wamefanya dhambi, na kupungukiwa na utukufu wa Mungu; wanahesabiwa haki bure kwa neema yake, kwa njia ya ukombozi ulio katika Kristo Yesu”* (Warumi 3:23-24). Sasa, wewe na mimi tumefanyika tusio na dhambi kwa kupitia wokovu wa Bwana wetu Yesu Kristo. Dhambi zako na zangu zimeondolewa kwa imani kwa kazi ambayo Bwana ameifanya. Ninaamini katika moyo wangu kuwa dhambi zangu na dhambi za ulimwengu zilikwenda kwa Yesu wakati alipobatizwa na Yohana Mbatizaji. Je, unaamini hivyo kwa moyo wako wote? Kulikuwa na dhambi ambazo ni nyekundu kama damu na nyeusi kuliko wino katika mioyo yenu. Dhambi hizo zilikwenda kwa Yesu wakati alipobatizwa na Yohana Mbatizaji. Yesu alizichukua dhambi zote ambazo wewe, mimi, na watu wote katika ulimwengu huu watazifanya katika maisha yao yote, na aliiondoa adhabu ya kutupwa kuzimu kwa kupigiliwa misumari na kufa Msalabani.

Sisi tulikuwa na dhambi katika mioyo yetu, lakini dhambi hizo zote zilihamishwa kwenda katika kichwa cha Yesu kwa kupitia mikono ya Yohana Mbatizaji katika ubatizo ambao Yohana Mbatizaji alimbatiza Yesu. Sasa, dhambi zetu ziko

wapi sasa? Zipo katika kichwa cha Yesu. Kabla Yesu hajabatizwa na Yohana Mbatizaji, dhambi zilikuwemo katika mioyo yenu na katika moyo wangu. Lakini dhambi zote za ulimwengu zilikwenda kwa Yesu kwa kupitia mikono ya Yohana Mbatizaji wakati alipoiweka mikono yake juuya kichwa cha Yesu. Hivyo, dhambi zako si zako bali zipo kwa Yesu.

Kaka zangu na akina dada, Yesu aliyekuwa hana dhambi, alizichukua dhambi zako zote na zangu, alizibeba dhambi hizo hadi Msalabani, akaimwaga damu yake na kufa. Ili kutuokoa, mtu ambaye hajawahi kutenda dhambi alibatizwa na kuzipokea dhambi za ulimwengu. Yesu aliipokea adahbu, mateso, na kusulubiwa hadi kifo ili kulipa gharama ya dhambi hizo. Kwa kuwa alikuwa amezichukua dhambi zetu zote kwa kubatizwa, basi ndio maana ilimpasa kusulubiwa Msalabani, na kuimwaga damu yake na kufa. Yesu hakuzuia kuutoa uhai wake ili kuokoa uhai wetu. Na hii inaonyesha jinsi alivyotupenda. Yesu aliweza kuimwaga damu yake Msalabani kwa kuwa alikuwa amepokea uhamisho wa dhambi zako na zangu kwa kupitia ubatizo, na alikufa kwa sababu ya hiyo.

“Kwa maana mshahara wa dhambi ni mauti; bali karama ya Mungu ni uzima wa milele katika Kristo Yesu Bwana wetu.” (Warumi 6:23). Hii ina maanisha kuwa tuliweza kupata uzima wa milele kwa neema ya Bwana, ya kuupokea mshahara wa dhambi ambao ni mauti kwa niaba yetu. Hii iliwezekana kwa sababu ya ubatizo wa Yohana Mbatizaji. Yesu aliweza kusema “imekwisha” (Yohana 19:30), kwa kuwa alikuwa ameichukua shutuma ya dhambi zote kwa kupitia ubatizo wake na akaitimiza haki yote.

Yesu alifufuka toka kaburini baada ya siku tatu tangu alipokufa. Aliamka toka kwa wafu. Yesu aliyekuwa amefufuka aliishuhudia kwa nguvu kazi ya injili aliyokuwa ameifanya

kwa siku 40. Kisha alipaa kwenda Mbinguni mbele ya macho ya watu wengi. Hali akipaa, Bwana aliahidi kuwa atarudi hapa duniani, alisema, “Kama mnavyoniona nikienda mbinguni basi vivyo hivyo nitarudi.”

Bwana wetu anawaokoa watu wanaoamini katika mioyo yao kuwa tangu siku za Yohana Mbatizaji Ufalme wa Mbinguni wapatikana kwa nguvu. Anawaruhusu kupokea wokovu kwa imani katika mioyo yao na si vinginevyo. Unatarajia vipi kupokea ondoleo la dhambi zako? Unaweza kuupata kwa kuishi maisha ya wema? Hapana, hauwezi. Haijalishi ni mambo mangapi mema utakuwa umeyafanya, ukweli ni kuwa huwezi kuiondoa hata dhambi yako moja. Huwezi kufanya hivyo kwa tendo lolote la wema.

Kama vile msemu wa Kikorea unavyosema, “Hakuna mtoto mwenye nguvu wakati mtu anapokuwau na ugonjwa sugu.” Haijalishi ni watu kiasi gani wanatambua kuwa mtu fulani ni mwema, ukweli ni kuwa kama ataendelea kupata maumivu yasiyozuilika kwa muda mrefu hatimaye atakata tamaa na kuionyesha asili yake ya dhambi. Hata kama mtu ataficha asili yake halisi, na akajivika hali yake ya nje kwa utakatifu, ni wazi kuwa mambo yakizidi kuwa magumu, mwanadamu ataionyesha hali yake ya asili. Haka kama una jambo moja ambalo ni jema, ninaamini kuwa husahau kwamba una maovu mengi pia. Hivyo, hupaswi kuwa na aibu kwa sababu ya hali yako ya dhambi. Hivyo ndivyo mwanadamu alivyo.

Yesu alibatizwa na Yohana Mbatizaji ana akaziiondoa dhambi zako dhambi zangu, na za wanadamu wote. Ikiwa mtu haamini kuwa Yohana Mbatizaji alimbatiza Yesu, basi mtu huyo atambue kuwa anaamini bure hata kama anamwamini Yesu. Habari za ubatizo wa Yesu zimeandika katika Injili zote Nne. Ukweli huu ni wa muhimu sana, na ni lazima tuufahamu.

Kaka na dada zangu, ninaamini kuwa mtaishi kwa kuamini katika mioyo yenu kwa mujibu wa kile kilichoandikwa katika Neno. Ili Ufalme wa Mbinguni uweze kuwa wako, basi unapaswa kuuamini upendo wa Yesu ambao uliziondoa dhambi zote za moyo wako kwa ubatizo wake, Msalaba, na ufufuo. Hauna dhambi kwa sababu Yesu Mwokozi alizisafisha kwa majji na damu. Ninatumaini kuwa utauamini ukweli huu katika moyo wako. Watu wanauamini ukweli huu wapo huru toka katika dhambi zao zote na wamepokea wokovu. Ukweli huu ni Ukweli wa ondoleo la dhambi zote lililozungumzwa kwa kupitia utaratibu wa sadaka ya kuteketezwa wa Hema Takatifu la Kukutania.

Ninamshukuru Mungu aliyetuokoa sisi tuliokuwa na dhambi nyingi. ☒

MAHUBIRI

12

Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Tumwamini Yesu Tukiwa na Ufahamu wa Yohana Mbatizaji

< Luka 1:1-17 >

“Kwa kuwa watu wengi wametia mikono kutunga kwa taratibu habari za mambo yale yaliyotimizwa katikati yetu, kama walivyotuhadithia wale waliokuwa mashahidi wenye kuyaona, na watumishi wa lile neno tokea mwanzo, nimeona vema mimi nami, kwa kuwa nimejitafutia usahihi wa mambo hayo yote tangu mwanzo, kukuandikia kwa taratibu, Theofilo mtukufu, upate kujua hakika ya mambo yale uliyofundishwa. Zamani za Herode, mfalme wa Uyahudi, palikuwa na kuhani mmoja, jina lake Zakaria, wa zamu ya Abiya, na mkewe alikuwa mmojawapo wa uzao wa Haruni, jina lake Elisabeti. Na wote wawili walikuwa wenye haki mbele za Mungu, wakiendelea katika amri zote za Bwana na maagizo yake bila lawama. Nao walikuwa hawana mtoto, maana Elisabeti alikuwa tasa, na wote wawili ni wazee sana. Basi ikawa, alipokuwa akifanya kazi ya ukuhani katika taratibu ya zamu yake mbele za Mungu, kama ilivyokuwa desturi ya ukuhani, kura ilimwangukia kuingia katika hekalu la Bwana ili kufukiza uvumba. Na makutano yote ya watu walikuwa wakisali nje saa ya kufukiza uvumba. Akatokewa na malaika wa Bwana, amesimama upande wa kuume wa madhabahu ya kufukizia. Zakaria alipomwona alifadhaika, hofu ikamwingia. Lakini yule malaika akamwambia, Usiogope,

Zakaria, maana dua yako imesikiwa, na mkeo Elisabeti atakuzalia mtoto mwanamume, na jina lake utamwita Yohana. Nawe utakuwa na furaha na shangwe, na watu wengi watakufurahia kuzaliwa kwake. Kwa sababu atakuwa mkuu mbele za Bwana; hatakunywa divai wala kileo; naye atajazwa Roho Mtakatifu hata tangu tumboni mwa mamaye. Na wengi katika Waisraeli atawarejeza kwa Bwana Mungu wao. Naye atatangulia mbele zake katika roho ya Eliya, na nguvu zake, ili kuigeuza mioyo ya baba iwaelekee watoto, na kuwatilia waasi akili za wenye haki, na kumwekea Bwana tayari watu waliotengenezwa.”

Ninashukuru Kuwa Mungu Ametupatia Chakula Kingi cha Kiroho

Nilipita hapa na pale kukunua ili kukunua mashine ya kudurufu na nikaona watu wengi walikuwa wametingwa wakijaribu kutafuta kitu kitakacho waridhisha. Walikuwa ni watu maskini kiroho pamoja na kuwa walikuwa wakiishi katika wakati huu ambapo ulimwengu huu umejaa vitu na utajiri. Walionekana kama vile watu wanaozunguka jangwani wakitafuta njia ya kuwawezesha kupata bilauri ya maji kwa sababu ya kiu kali. Kwa kweli kimtazamo walikuwa ni watu matajiri, wa kimwili, na wa kidunia, lakini kwa kweli nilipoziangalia nafsi zao nilihisi wakionekana maskini na waliotengwa. Kwa kuwatazama kwa macho yangu, walikuwa ni watu waliokuwa wakipigana na kifo kwa sababu walikuwa wamepigwa na umaskini na njaa katika roho zao; walikuwa ni watu waliokuwa wakifa kwa sababu ya njaa kali ya kiroho.

Baada ya kuwaona, ndipo nikafikia hatua ya kuitambua maana ya Neno la Mungu, *“Mtu hataishi kwa mkate tu, bali*

kwa kila neno litokalo katika kinywa cha Mungu.” Wakati Yesu alipokuwa akijaribiwa baada ya kufunga na kuomba kwa siku 40, kitu cha kwanza ambacho Shetani alitumia kumjaribu ilikuwa ni chakula. Shetani, Ibilisi, alileta jiwe mbele ya uwepo wa Mungu na akamwambia, “Ikiwa ndiwe Mwana wa Mungu, amuru kwamba mawe haya yawe mikate.” Wakati Shetani alipomjaribu Yesu kwa namna hiyo, Yesu alijibu, *“Imeandikwa, ‘Mtu hataishi kwa mkate tu, bali kwa kila neno litokalo katika kinywa cha Mungu,’”* na kwa sababu hiyo alimtupilia mbali Shetani. Yesu alikuwa akisema kuwa hakuna mtu anayeweza kuishi kwa mkate tu, na kwamba watu wote ni lazima waishi kwa Neno linalotoka katika kinywa cha Mungu. Watu wanahitaji kula mkate wa kimwili, lakini kila mtu ni lazima ale Neno la Mungu ambalo ni mkate wa kiroho, kisha ale na mkate wa kimwili ili kufurahia maisha halisi.

Ni lazima tukumbuke kuwa tunaweza kuishi kwa kweli ikiwa tu tunalila Neno lote la Mungu na kisha kumshukuru Mungu kwamba Mungu Baba ametupatia mkate wa kila siku wa kuula katika ulimwengu huu. Tunapaswa kumshukuru Mungu Baba kwa kiasi gani kwa kutupatia Neno lake ili tulile kiroho kwa imani? Hata hivyo, sijui kama unafahamu jinsi Neno la Mungu lilivyo la thamani kwako. Tunahitaji kufahamu kuwa kuna watu wengi sana ambao hawawezi kulila Neno la Mungu pamoja na kuwa wanapenda kufanya hivyo. Ni lazima tufikirie kwamba sisi ni watu tuliobarikiwa mbele ya uwepo wa Mungu hasa tunapowaona watu wanaoshindwa kukila chakula hiki cha kiroho. Ni lazima tushukuru kwa ajili ya Neno la Mungu. Tunaweza kulila Neno la Bwana kwa wingi kwa imani katika injili ya maji na Roho, lakini Wakristo wengi bado hawawezi kulila Neno la Mungu kwa imani pamoja na kuwa wanapenda kulila.

Bwana alisema kuwa mtu hataishi kwa mkate tu, bali kwa

kila neno litokalo katika kinywa cha Mungu. Kuna baadhi ya watu wanaoishi katika ulimwengu huu pasipo kufahamu kuwa kuna hili Neno la Ukweli wakati kitu ambacho kila mtu anahitaji ni Neno la Mungu. Ninapofikiia jinsi watu wengi wanavyozunguka hapa na pale pasipo weza kulila Neno la Mungu, pamoja na kuwa wanafahamu kuwa kuna Neno la Ukweli, basi hapo ndipo ninapotambua kuwa sisi ni watu tuliobarikiwa sana na Mungu.

Ndipo ninatambua tena jinsi ambavyo waamini katika Kanisa la Mungu walivyobarikiwa, yaani akina kaka na akika dada katika Kanisa letu. Lakini kadri tunavyoyahisi mambo hayo, basi ndivyo sisi waamini tunaishi katika Kanisa la Mungu tunavyopaswa kujiangalia tena na tena ikiwa tuna shukrani kwa sababu ya ukweli huu, na ikiwa tunalila kwa kweli Neno la Mungu, na ikiwa tumejawa na shukrani. Ninasema kuwa nilifikia hatua ya kuwaza katika moyo wangu kwamba ninapaswa kuifundisha thamani hii kwa watu Kanisani kwa kuwa pengine kuna baadhi ya watakatifu ambao hawafahamu kuwa mambo haya yote kama vile kuliitia jina la Yehova Kanisani, kuliitia jina la Bwana Yesu, kuimba sifa kwa kazi ambazo Mungu amezifanya, kufanya maombi kwa Mungu, kusoma na kusikiliza Neno na kushirikiana katika faragha ya kiroho ni mambo yenye neema ya thamani ya Mungu. Huifahamu jinsi neema hii ya thamani ya Mungu ya kulisikia Neno ilivyo. Mimi ninatambua jinsi ilivyo ya thamani kiasi kuwa niliweza kujiangalia Neno la Mungu na kulihubiri kwenu kama hivi na kusikia toka kwenu, na kisha kuwa na faragha pamoja na watakatifu wa Mungu wetu.

Mtu hataishi kwa mkate tu, bali kwa kila neno litokalo katika kinywa cha Mungu. Kisha, je unajisikia kuwa na shukrani na kufikiri kuwa ni thamani kwamba tunaishi kwa kulila Neno la Mungu kwa namna hii? Kwa kweli Neno la

Mungu ni la thamani sana. Neno la Mungu lipo katika kiwango tofauti kabisa hasa unapolinganisha na yale maneno ambayo sisi viumbe tunayaongea. Maandiko ni kumbukumbu ya Neno lote linalotoka katika kinywa cha Mungu, na kwa sababu hiyo tunaishi kwa Neno la Mungu kwa imani. Sisi tunaoini injili ya maji na Roho kwa kweli ni lazima tule vitu vya duniani kwa kuwa tuna miili. Lakini, wakati huo huo, ni lazima tulile Neno la Mungu wakati watu wa kawaida wakila vitu vya duniani pekee. Pia ni lazima tuvile vitu vya Mbinguni kwa sababu tunazo roho. Ninamshukuru Mungu kwa kutupatia baraka ya jinsi hiyo kwetu sisi sote tunaoini injili ya maji na Roho.

“Mimi Pia, Baada ya Kupata Ufahamu Sahihi Tangu Pale Mwanzo”

Luka ni mwandishi wa Injili ya Luka na alikuwa ni daktari. Huyu ndugu Luka aliandika Injili ya Luka na kitabu cha Matendo ya Mitume wakati akiifanyia uinjilisti injili ya Bwana pamoja na Mtume Paulo. Kwa asili hapo kwanza Injili ya Luka na kitabu cha Matendo ya Mitume vilikuwa ni kitabu kimoja. Kulikuwa na mtu aliyekuwa akiitwa Theofilo ambaye anaonekana hapa, na hatujui zaidi kuwa huyu Theofilo kwa sasa ni nani. Tunapoangalia katika kitabu cha Matendo ya Mitume sura ya 1 aya ya 1, kinaanza kwa kusema hivi, *“Kitabu kile cha kwanza nalikiandika, Theofilo, katika habari ya mambo yote aliyoanza Yesu kuyafanya na kufundisha.”* Kisha kinaendelea, *“Kwa kuwa watu wengi wametia mikono kutunga kwa taratibu habari za mambo yale yaliyotimizwa katikati yetu, kama walivyotuhadithia wale waliokuwa mashahidi wenye kuyaona, na watumishi wa lile neno tokea mwanzo, nimeona vema mimi nami, kwa kuwa nimejitafutia usahihi wa mambo*

hayo yote tangu mwanzo, kukuandikia kwa taratibu, Theofilo mtukufu, upate kujua hakika ya mambo yale uliyofundishwa.”

Hivyo, tunaweza kuona kwa kupitia kifungu hiki kuwa Matendo ya Mitume ilikuwa ni injili ambayo Luka aliandika kwa mtu aliyeitwa Theofilo. Bila shaka Theofilo alikuwa ni mtu aliyekuwa katika nafasi ya juu kwa kuwa aliitwa “Theofilo Mtukufu,” na inaonekana kuwa alikuwa amemwamini Yesu kuwa ni Mwokozi pia. Na tunapoendelea kusoma inaeleza kuwa, *“Kwa kuwa watu wengi wametia mikono kutunga kwa taratibu habari za mambo yale yaliyotimizwa katikati yetu, kama walivyotuhadithia wale waliokuwa mashahidi wenye kuyaona, na watumishi wa lile neno tokea mwanzo”* (Luka 1:1-2). Yesu alikuwa na wanafunzi kumi na mbili na walikuwa ni watu waliopata uzoefu, waliosikia, na waliomwona Yesu Kristo kwa macho ya kimwili na yale ya kiroho. Waliwashirikisha wengine Neno la Mungu walilokuwa wamelisikia. Waliwashirikisha wengine kikamilifu kwa mujibu wa yale waliyoyaona na kulikuwa na wafanyakazi wengi waliochukua kalamu na kuandika habari hizo zote kwa ukweli. Huyu mwanafunzi wa Yesu anayeitwa Luka pia alifikiri kuwa itakuwa ni vizuri kumwandikia mtukufu Theofilo kuhusu Yesu tangu mwanzo kabisa, hali akisema kuwa hata yeye aliyaona haya yote tangu mwanzo kabisa kwa udani. Luka anaeleza kuwa alikuwa akifanya hivi ili kumfanya mtukufu Teofiko kufahamu kwa uthabiti na usahihi yale ambayo alikuwa amefundishwa.

Luka, mmoja kati ya wanafunzi wa Yesu Kristo, alianza pia kuandika kuhusu Yesu Kristo. Kwa wakati ule kulikuwa na watu walioeneza uvumi kuwa watu waliomwamini Yesu Kristo walikuwa wakinywa damu. Walikuwa wakisema kuwa watu waliomwamini Yesu ni lazima wawe wanywa damu kwa kuwa walieleza kuwa walikuwa wakiishi kwa kuinywa damu. Luka

aliandika maneno ya kukanusha ili kufuta uvumi kama ule ambao haukuwa na maana. Luka alikuwa akisea, “Kwa kweli Wakristo hawanywi damu. Wanachofanya ni kuikumbuka damu ya Yesu Kristo aliyoiwaga hapa duniani kwa kutumia divai.”

Kwa hiyo, ilipotokea mtu akauchafua Ukweli kuhusu Yesu Kristo kwa kuandika maovu, na wakati kulipokuwapo na maandiko ya watu waovu yaliyokuwa yameandikwa ili kuwadhuru Wakristo wa Kanisa la Kwanza, Luka aliwaandikia watu walioamwamini Mungu kikamilifu neno la kuukana uongo huo. Luka alithibitisha kuwa madai ya uongo yaliyokuwa yametolewa hayakuwa ya kweli kisha akatuma maelezo ya kweli kwenda kwa watu waliokuwa wakiwachafua watoto wa Yesu Kristo na watu maarufu katika ngazi za juu. Luka alifanya hivi ili kuwalinda watu watu waliokuwa katika ngazi za juu za kiserikali kutosoma maneno yaliyokuwa yameandikwa na wale waongo ili wasije wakayaamini kisha wakawatesa wana wa imani. Watu wengi wanaweza kuwa na dhana na mawazo potofu. Kulikuwa na watu wakati huo ambao waliamini juu ya huo uvumi wa uongo usio na maana, neno la uovu ambalo lilikuwa likitapakaa wakati huo ni kwamba watu waliokuwa wakimwamini Yesu Kristo waliishi kwa kunywa damu za watu. Hivyo, waeneza uvumi wa uongo walikuwa wakidai kuwa Wakristo wote wauawe. Kuna msemu wa zamani unaosema kuwa kalamu ina nguvu kuliko upanga. Hivyo, watu walikuwa wakimwamini Yesu walikana shutuma hizo kwa neno. Kwa kawaida, watu wanaamini kitabu chochote hasa pale wanapokisoma. Na hii ndio sababu Luka aliandika Kitabu hiki kwenda kwa ofisa wa juu aliyetitwa Theofilo.

Kama nilivyokwisha kusema hapo kwanza, mtu aliyetitwa “mtukufu Theofilo” anaonekana alikuwa ni mtu aliyemwamini Yesu Kristo. Pengine hii ndio sababu Luka, mwanafunzi wa

Yesu Kristo, alifikiri kuwa itakuwa ni vizuri ikiwa ataandika barua ya kina kuhusu Yesu Kristo tangu mwanzo kabisa na kwa kuzingatia vitu vya msingi kama alivyofahamu. Hii ilikuwa ni kuthibitisha yale ambayo mtukufu Teofiko alikuwa amejifunza. Mtukufu Theofilo alikuwa amejifunza Ukweli na aliuamini. Hivyo, Luka aliandika barua hii kwa sababu alifikiri itakuwa vizuri ikiwa atamwandikia Theofilo kuhusu Yesu Kristo kwa kina zaidi. Barua hiyo si nyingine bali ni hii Injili ya Luka.

Yohana Mbatizaji Aliyezaliwa Toka Katika Ukoo wa Haruni

Kwa kawaida wanamwita Yohana aliyembatiza Yesu kama Yohana Mbatizaji ili kumtofautisha na Yohana aliyekuwa mwanafunzi wa Yesu. Hebu tusome Neno toka katika Injili ya Luka sura ya 1 aya ya 5 hadi 7. Inasema, *“Zamani za Herode, mfalme wa Uyahudi, palikuwa na kuhani mmoja, jina lake Zakaria, wa zamu ya Abiya, na mkewe alikuwa mmojawapo wa uzao wa Haruni, jina lake Elisabeti. Na wote wawili walikuwa wenye haki mbele za Mungu, wakiendelea katika amri zote za Bwana na maagizo yake bila lawama. Nao walikuwa hawana mtoto, maana Elisabeti alikuwa tasa, na wote wawili ni wazee sana.”* (Luka 1:5-7).

Hii ni habari toka kwa Mfalme Herode wa Israeli. Luka anaandika habari za msingi kuhusu kuzaliwa kwa Yohana Mbatizaji kwa kina tangu mwanzo. Kulikuwa na kuhani toka katika zamu ya Abiya na jina lake alikuwa akiitwa Zakaria na mke wake akiitwa Elisabeti. Andiko linasema, *“Na wote wawili walikuwa wenye haki mbele za Mungu, wakiendelea katika amri zote za Bwana na maagizo yake bila lawama.”*

Zamu ya Abiya inatoka katika ukoo wa Haruni Kuhani Mkuu. Hebu tuangalie juu ya habari za ukoo wa Yohana Mbatizaji. Zamu za ukuhani za ukoo wa Haruni zimeorodheshwa katika 1 Mambo ya Nyakati sura ya 24. Hebu tuangalie pamoja.

Andiko linasema, *“Na zamu za wana wa Haruni ni hizi. Wana wa Haruni; Nadabu, na Abihu, na Eleazari, na Ithamari. Lakini hao Nadabu na Abihu walikufa kabla ya baba yao, wala hawakuwa na watoto; kwa hiyo Eleazari na Ithamari wakafanya ukuhani”* (1 Mambo ya Nyakati 24:1-2). Imeandikwa kuwa Haruni aliwazaa watoto wanne. Lakini inaelezwa kuwa Nadab aliyekuwa mtoto mkubwa wa kiume wa Haruni na Abihu walikufa wakati wakitoa sadaka ya kuteketezwa isivyo na kwamba waliokuwa wamebakia walikuwa ni Eleazar na Ithamari. Hao waliupokea ukuhani na wakafanya kazi ya kutoa sadaka ya kuteketezwa kwa Mungu.

Waliifanya kazi hii na baada ya hapo yakaonyeshwa majina 24 ya wajukuu wa Haruni kuanzia ile aya ya 6: *“Naye Shemaya, mwana wa Nethaneli, mwandishi, aliyekuwa wa Walawi, akawaandika mbele ya mfalme, na mbele ya wakuu, na Sadoki kuhani, na Ahimeleki, mwana wa Abiathari, na wakuu wa mbari za baba za makuhani, na za Walawi; ikatwaliwa ya Eleazari mbari moja ya baba na moja ikatwaliwa ya Ithamari. Kura ya wanza ikamtokea Yehoiaribu, na ya pili Yedaya; na ya tatu Harimu, ya nne Seorimu; ya tano Malkia, ya sita Miyamini; ya saba Hakosi, ya nane Abiya; ya kenda Yeshua, ya kumi Shekania; na kumi na moja Eliasibu, ya kumi na mbili Yakimu; ya kumi na tatu Hupa, ya kumi na nne Yeshebeabu; ya kumi na tano Bilga, ya kumi na sita Imeri; ya kumi na saba Heziri, ya kumi na nane Hapisesi; ya kumi na kenda Pethahia, ya ishirini Ezekieli; ya ishirini na moja Yakini, ya ishirini na mbili Gamuli; ya ishirini na tatu Delaya, ya ishirini na nne Maazia. Huu ndio usimamizi wao katika*

huduma yao, waingie nyumbani mwa BWANA kwa kadiri ya agizo lao, kwa mkono wa Haruni baba yao, kama BWANA, Mungu wa Israeli, alivyomwamuru.” (1 Mambo ya Nyakati 24:6-19).

Mfalme Daudi alikuwa amepanga Utaratibu wa Ukuhani wa Walawi kwa sababu wazao wa Haruni walikuwa wameongezeka sana. Walipangwa katika zamu 24 kulingana na familia za wajukuu 24 wa Haruni. Mmoja wa kuhani toka zamu ya Abiya wakati wa Mfalme Herode wa Israeli katika wakati wa Agano Jipya alikuwa akiitwa Zakaria. Zakaria alikuwa ni wa ukoo wa Haruni Kuhani Mkuu. Mfalme Daudi aliifanya kila zamu itumikie majukumu ya Hema Takatifu la Kukutania kwa muda wa siku 15, na zamu ya Abiya ilitokea kuwa ya 8 katika mpangilio wa zamu.

Yohana Mbatizaji anaonekana katika Injili ya Luka, na kifungu cha leo cha Maandiko kinatueleza kuhusu ukoo wa Yohana Mbatizaji tangu mwanzo. Nilishasema pale awali kuwa Luka aliona itakuwa ni vema kutuma barua itakayoelezea kwa kina juu ya asili ya injili kwenda kwa Theofilo. Hivyo, Luka alionyesha kwa wazi kabisa juu ya ukoo wa Yohana Mbatizaji kwa kueleza kwamba kulikuwa na kuhani mmoja aliyeitwa Zakaria wa zamu ya Abiya na kwamba mke wake alikuwa ni wa ukoo wa Haruni, na jina lake aliitwa Elizabeti. Pia inaelezwa zaidi kuwa Elizabeti alitoka katika ukoo wa Haruni. Hii ina maanisha kuwa alichaguliwa toka katika ukoo wa Haruni.

Akatokea Zakaria na mke wake Elizabeti: Zakaria alikuwa ni kuhani toka zamu ya Abiya, aliyeuwa mjukuu wa Kuhani Mkuu Haruni. Pia Elizabeti alikuwa ni kutoka ukoo wa Haruni. Maandiko yanasema kuwa wote wawili walikuwa ni watu wenye haki mbele ya Mungu. Na kwamba walikuwa ni wenye haki waliotembea pasipo lawama kuhusiana amri na maagizo

ya Bwana. Watu hawa walimwamini Mungu Yehova kwa ukweli na kwa usahihi na waliitumikia na kuifuata kwa mioyo yao yote Torati ambayo Mungu alikuwa ameianzisha kwa ajili yao katika Agano la Kale. Agano la Kale linasema kuwa watu wa Mungu walipaswa kutoa sadaka ya upatanisho kwa ajili ya dhambi za mwaka mzima kwa kumchinja mbuzi, na wao waliifuata Sheria hii bila lawama.

Maandiko yanaeleza, “Hakuna mwenye haki hata mmoja” (Warumi 3:10). Maandiko yanaeleza kuwa hakuna mwenye haki hata mmoja isipokuwa tu kwa mtu aliyepokea ondoleo la dhambi kwa kumwamini Yesu ndani ya sheria ya uzima. Lakini watu hawa wawili waliitwa wenye haki pamoja na haya yote. Hii ina maanisha kuwa hata wakati wa Agano la Kale, watu hawa wawili waliamini kuwa Masihi atakayekuja kama Mwanakondoo wa sadaka ya kuteketezwa kama Mungu alivyoahidi atawapatia ondoleo la dhambi kwa kuzichukua dhambi katika mwili wake na kwa kufa kwa haki. Hivyo ndivyo walivyoweza kuwa wenye haki mbele za Mungu.

Kifungu cha leo cha Maandiko kinaeleza kuwa walikuwa ni wenye haki, “wakitembea katika amri na maagizo yote bila lawama.” Walikuwa ni wenye haki katika mwenenedo wao halisi, na si katika maneno yao tu. Maandiko yanasema, “*Nao walikuwa hawana mtoto, maana Elisabeti alikuwa tasa, na wote wawili ni wazee sana. Basi ikawa, alipokuwa akifanya kazi ya ukuhani katika taratibu ya zamu yake mbele za Mungu, kama ilivyokuwa desturi ya ukuhani, kura ilimwangukia kuingia katika hekalu la Bwana ili kufukiza uvumba. Na makutano yote ya watu walikuwa wakisali nje saa ya kufukiza uvumba. Akatokewa na malaika wa Bwana, amesimama upande wa kuume wa madhabahu ya kufukizia. Zakaria alipomwona alifadhaika, hofu ikamwingia. Lakini yule malaika akamwambia, Usiogope, Zakaria, maana dua yako imesikiwa,*

na mkeo Elisabeti atakuzalia mtoto mwanamume, na jina lake utamwita Yohana. Nawe utakuwa na furaha na shangwe, na watu wengi watakufurahia kuzaliwa kwake.” (Luka 1:7-14).

Kama unavyoweza kuona, wanandoa hawa wazee hawakuwa na mtoto. Zakaria alipokuwa akienda katika Hekalu la Mungu ili kuyafanya majukumu yake kama kuhani kwa mujibu mpangilio wa zamu, na alipokuwa akitoa sadaka, malaika akamtokea Zakaria wakati alipokuwa akifukiza uvumba. Bila shaka Zakaria alimwomba Mungu kutokana na tatizo lake binafsi, na kwa kweli aliwaombea watu alipokuwa akiomba mbele za uwepo wa Mungu. Je, wewe na mimi hatuombi hivi? Lakini Maandiko yanaandika kuwa malaika alimtokea wakati huo na akamwambia, “*Usiogope, Zakaria, maana dua yako imesikiwa, na mkeo Elisabeti atakuzalia mtoto mwanamume, na jina lake utamwita Yohana. Nawe utakuwa na furaha na shangwe, na watu wengi watakufurahia kuzaliwa kwake. Kwa sababu atakuwa mkuu mbele za Bwana; hatakunywa divai wala kileo; naye atajazwa Roho Mtakatifu hata tangu tumboni mwa mamaye. Na wengi katika Waisraeli atawarejeza kwa Bwana Mungu wao. Naye atatangulia mbele zake katika roho ya Eliya, na nguvu zake, ili kuigeuza mioyo ya baba iwaelekee watoto, na kuwatilia waasi akili za wenye haki, na kumwekea Bwana tayari watu waliotengenezwa.” (Luka 1:13-17).*

Malaika alimwambia Zakaria kuwa Mungu atampatia mtoto Elizabeti, lakini Zakaria hakuiamini habari hii. Mungu alimfanya Zakaria kuwa bubu ili kuthibitisha hili kwa kuwa Zakaria aliwaza kwa kutumia ufahamu wa kibinadamu na hakuliamini Neno la Mungu. Hivyo, Zakaria akawa bubu hadi wakati mtoto alipozaliwa. Mdomo wake uliachiliwa uongee wakati Yohana alipozaliwa tu.

Malaika alisema kwamba Mungu atampatia Zakaria na

Elizabethi na kwamba jina lake ataitwa Yohana. Pia malaika alimwambia Zakaria kuwa moyo wake utafurahi na kushangilia, na kwamba watu wengi pia wafurahia na kushangilia kuzaliwa kwa mtoto huyo. Imeandikwa kuwa Yohana atakuwa mkuu mbele ya uwepo wa Bwana na kwamba atajazwa na Roho Mtakatifu tangu katika tumbo la mama yake na kwamba atawageuza watu wa Israeli kumgeukia Mungu. Pia inaelezwa kuwa atamtangulia Bwana akiwa na roho na nguvu za Eliya na kuigeuza mioyo ya baba iwaelekee watoto na wakaidi kuwa wenye hekima.

Maandko yanaeleza kuwa Mungu alimpa Yohana roho na nguvu za Nabii Eliya. Nabii mwakilishi katika Agano la Kale anatajwa kuwa ni Eliya, na Agano Jipya linasema kuwa Yohana Mbatizaji ni kama Eliya. Wakati waandishi waliposema kuwa imempasa Eliya kuja kwanza kabla ya masihi, Yesu alisema, *“Eliya amekwisha kuja, wasimtambue, lakini wakamtenda yote waliyotaka”* (Mathayo 17:12).

Wakati Yesu aliposema kuwa Eliya amekwisha kuja, alimaanisha kuwa Yohana Mbatizaji alizaliwa katika ulimwengu huu akiwa na roho ya Eliya. Lakini hii roho ya Eliya ina maanisha nini hapa? Ikiwa tutaifahamu jinsi roho ya Eliya ilivyo, basi hapo tunaweza kuona kwa nini Yohana Mbatizaji alikuwa ni mwakilishi wa wanadamu aliyekuja kuiandaa njia ya Bwana. Musa ni mwakilishi wa Torati katika Agano la Kale na mwakilishi wa manabii wote ni Eliya. Lakini mwakilishi wa wanadamu wote ni Yohana Mbatizaji aliyekuwa na roho ya Eliya.

Tunaweza kuona ni kwa nini Maandiko yanasema kuwa Yohana alikuja katika roho ya Eliya pale tutakapojifunza kuhusu Eliya nabii katika wakati wa Agano la Kale. Eliya alikuwa ni mtumishi wa Mungu na nabii toka Gileadi katika ufalme wa kaskazini wa Israeli. Wakati huo Israeli ilikuwa

imegawanyika katika ufalme wa kaskazini na ufalme wa kusini, Mfalme Ahabu alitawala ufalme wa Israeli wa kaskazini. Lakini Mfalme Ahabu alimleta mke wa wamataifa kuwa mkewe pamoja na kuwa yeye alikuwa ni Mwisraeli aliyepaswa kumhofia na kumcha Mungu. Mkewe Yezebeli alileta miungu ya Baali katika ikulu ya Ahabu ili iabudiwe kama mungu, na Waisraeli wakaikubali na kuanza kumwabudu Baali ambaye malkia wao Yezebeli alikuwa akimwabudu.

Baali maana yake ni ‘bwana’ pia neno hili linaweza kutafsiriwa kama ‘mmiliki.’ Kwa kawaida huyu mungu wa kiume aliabudiwa katika nchi ya Kanaani kwa wakati huo. Waliamini kwamba Baali alikuwa ni mungu aliyefanya ardhi kuwa na rutuba na yenye uzao na aliyekuwa anaifanya mifugo istawi na kuongezeka. Kwa upande mwingine, mungu huyu alijulikana kama mungu wa mafanikio. Sisi pia tuna miungu inayoweza kufananishwa na Baali katika nchi yetu. Tunaweza kuona sura au picha za miungu kama Baali katika maeneo ya kijamii ya kuzikia, na watu wa Korea wameweka picha hizo pasipo kufahamu asili yake.

Baali alikuwa ni mungu aliyesimamia uzalishaji wa ardhi na kustawi kwa mifugo, na Baali ndiye mungu aliyeabudiwa zaidi miongoni mwa wakulima. Na miungu ya jinsi hiyo inayosimamia uzalishaji mashambani na mifugo imeenea ulimwenguni kote. Kwa asili mungu huyu alikuwa ni mungu wa wamataifa, na hakuwa mungu wa watu wa Israeli. Wamataifa walimleta huyu mungu Baali kisha wakafanya sura inayofanana naye, wakaiabudu, kisha wakaomba baraka na mafanikio katika kila kitu. Waliomba hivi, “Tafadhali naomba unipe watoto. Tafadhali naomba uyafanye mazao yangu yawe mengi.”

Kwa namna yoyote ile, Yezebeli, malkia wa Mfalme Ahabu, alileta miungu ya jinsi hiyo katika nchi ya Israeli. Mara

ya kwanza Yezebeli alimwambudu Baali na watumishi wake wa kike. Kwa kweli nguvu ya malkia ni kubwa sana kuliko unavyofikiri. Kuna msemu unaosema hivi, “Ni wanaume ndio wanaousukuma ulimwengu; lakini ni wanawake ndio wanaowasukuma wanaume hao.” Ikiwa mwanaume ni kichwa, basi mwanamke lazima atakuwa ni shingo. Kichwa kinazunguka upande huu na upande ule wakati shingo inazunguka upande huu na ule. Ikiwa shingo haitaki kuzunguka, basi kichwa hakiwezi kufanya lolote zaidi ya kutulia hata kama kinataka kuzunguka. Vivyo hivyo, mwanaume atafuata na kwenda kule ambako wanawake wanakwenda. Kwa hiyo, Malkia Yezebeli alimtawala Mfalme Ahabu kwa mapenzi yake binafsi. Hatimaye nini kilitokea? Nchi yote ya Israeli ikawa inamwabudu Baali. Israeli ikawa ni nchi inayoabudu mungu Baali, mungu wa wamataifa, na ikawa si nchi inayomwabudu Mungu Yehova.

Nabii wakati wa Mfalme Ahabu alikuwa ni Eliya. Musa nabii wa kwanza aliipokea Torati aliyopewa na Mungu katika Mlima Sinai na akaitangaza kwa watu wa Israeli. Aliichonga Torati katika mbao za mawe na akaziweka katika Sanduku la Agano na akawafundisha Waisraeli jinsi Torati ya Mungu ilivyokuwa. Eliya alikuwa ni nabii aliyeishi wakati wa Mfalme Ahabu muda mrefu baada ya Musa. Wakati Yezebeli na watu wa Israeli walipokuwa wakimwabudu Baali, Eliya aliiona hali hii na akayatangaza mapenzi ya Mungu kwa nguvu zake zote ana akashindana nao, akisema, “Hapana, Baali si Mungu. Baali anayemaanishwa kama ‘bwana’ ni miungu na si Mungu wa kweli. Kumwabudu Baali ni dhambi kubwa mbele ya Yehova.”

Lakini Yezebeli na na watu wa Israeli waliendela kufanya dhambi na kumwita mungu Baali. Lakini, Eliya angeliweza kushindana na maelfu hao. Eliya aliisikia sauti ya Mungu kwa siri na akatabiri. Alikwenda kwa watu kama nabii akawakemea

na kuwashauri. Lakini hatimaye Eliya ilimbidi asimame kinyume na manabii 850 wa Baali na Ashera ili kumthibitisha Mungu wa kweli wa Israeli wakati walipokuwa hawaliheshimu Neno la Mungu kwa kusema kuwa ilikuwa ni sauti ya mtu mmoja mhafidhina. Eliya alisema, “Yehova ni Mungu wa kweli. Sasa hebu tuone nani ni Mungu wa kweli,” hivyo akasimama kinyume na manabii hao, yaani manabii 850 kwa 1.

Eliya aliwaambia manabii wa uongo kuwa, *“Ndipo Eliya akawaambia watu, Mimi nimesalia, mimi peke yangu, nabii wa BWANA; lakini manabii wa Baali ni watu mia nne na hamsini. Kwa hiyo na watutolee ngo’ombe wawili; wao na wajichagulie ng’ombe mmoja, wakamkatekate na kumweka juu ya kuni, wasitie mto chini; nami nitamtengeneza huyo ngombe wa pili, na kumweka juu ya kuni, wala sitatia moto chini. Nanyi ombeni kwa jina la mungu wenu, nami nitaomba kwa jila BWANA; na Mungu yule ajibuye kwa moto, na awe ndiye Mungu. Watu wote wakajibu wakasema, Maneno haya ni mazuri.” (1 Wafalme 18:22-24).* Pia aliwaambia manabii wa Baali, *“Jichagulieni ng’ombe mmoja, mkamtengeneze kwanza; maana ninyi ndio wengi; msitie moto chini.”*

Hivyo basi, manabii wa Baali walianza kwanza kumwandaa huyo ng’ombe wa sadaka na wakalia moja kwa moja “Baali, Ooh, Bwana wetu Baali.” Walipoona kuwa hakuna dalili zozote walijikatakata huku wakimuita Baali. Lakini hakukuwa na dalili ya Baali kujibu pamoja na kuwa walilia kwa sauti hadi jioni. Maji yalikuwepo pale na yule ng’ombe dume aliyekuwa amechinjwa kama sadaka alikuwa yupo pale hajaguswa. Eliya aliona haya yote na akawaambia, “Iteni kwa sauti, kwa kuwa yeye ni mungu; pengine amelala na ni lazima aamshwe.” Hivyo walijikata na kutembea kulizunguka shimo na wakalia kwa sauti bila msaada.

Kisha Eliya akawaambia watu wote, “Nikaribieni mimi.”

Akaitengeneza madhabahu ya BWANA iliyokuwa imevunjwa kwa mawe kumi na mbili, kisha akafanya mfereji kuizunguka madhabahu. Kisha akaweka kuni kwa kuzipanga, akamchinja yule ng'ombe vipande vipande, kisha akamweka juu ya kuni, na akasema, “Jazeni mapipa manne maji, kisha yamwageni juu ya sadaka ya kuteketezwa na kuni.” Hivyo maji yakamiminika kuizunguka madhabahu; pia akaujaza maji ule mfereji.

Kisha Eliya akaomba, “Unisikie, Ee BWANA, unisikie, ili watu hawa wajue ya kuwa wewe, BWANA, ndiwe Mungu, na ya kuwa wewe umewageuza moyo wakurudie.” Kisha moto wa BWANA ukashuka toka mbinguni ukayaunguza yale maji yaliyokuwa katika ule mfereji wakati akiomba. Kisha ule moto ukaitekeza ile sadaka ya kuteketezwa pamoja na kuni na mawe ya ile madhabahu huku Waisraeli wote wakiangalia. Ni hadi pale Eliya alipoionyesha kazi ya Mungu kwa namna hii, ndipo watu wa Israeli walipotambua kuwa, “Yehova ni Mungu wa kweli anayetufanya sisi tufanikiwe na watoto wetu, na anayevifanya vyote vifanikiwe. Mungu ni Mungu wa kweli pekee.” Mioyo ya watu wa Israeli ilitubu na ikaurudi mbele ya uwepo wa Mungu.

Maandiko yanaelezea hilo katika Injili ya Luka sura ya 1 aya ya 16-17, kwamba, *“Na wengi katika Waisraeli atawarejeza kwa Bwana Mungu wao. Naye atatangulia mbele zake katika roho ya Eliya, na nguvu zake, ili kuigeuza mioyo ya baba iwaelekee watoto, na kuwatilia waasi akili za wenye haki, na kumwekea Bwana tayari watu waliotengenezwa.”* Ni nani aliyewaongoza watu wa Israeli kwa nguvu mbele ya uwepo wa Mungu? Kwa kweli Isaya na Ezeieli walikuwa ni manabii wakuu, lakini nabii aliyewaongoza watu hawa kwa nguvu alikuwa ni Eliya.

Ni Eliya ndiye aliyewatilia waasi akili za wenye haki, akawaongoza Waisraeli kuyafahamu mapenzi ya Mungu, na

akawafundisha kufahamu jinsi mapenzi ya Mungu yalivyo. Maandiko yanasema kuwa Yohana Mbatizaji, ambaye ni mkuu kati ya wanadamu wote, ambaye ni mkuu kati ya wote waliozaliwa na wanawake, ndiye atakayeifanya kazi hii na sio miungu fulani. Hii ndio sababu Luka mwanafunzi wa Yesu Kristo amezungumzia juu ya kuzaliwa kwa Yohana Mbatizaji kwa umuhimu na akaeleza kuwa Yohana Mbatizaji alizaliwa akiwa na roho ya Eliya.

Tunapoiangalia Injili ya Mathayo sura ya 11, inasema kuwa Yohana Mbatizaji ni mkuu miongoni mwa waliozaliwa na wanawake. Hebu tusome toka katika Injili ya Mathayo sura ya 11 aya ya 10 hadi 14. Inaeleza, *“Huyu ndiye aliyeandikiwa haya, Tazama, Mimi namtuma mjumbe wangu mbele ya uso wako, atakayeitengeneza njia yako mbele yako. Amin, nawaambieni, hajaondokea mtu katika wazao wa wanawake aliye mkuu kuliko Yohana Mbatizaji; walakini aliye mdogo katika ufalme wa mbinguni ni mkuu kuliko yeye. Tangu siku za Yohana Mbatizaji hata sasa ufalme wa mbinguni hupatikana kwa nguvu, nao wenye nguvu wauteka. Kwa maana manabii wote na torati walitabiri mpaka wakati wa Yohana. Na ikiwa mnataka kukubali, yeye ndiye Eliya atakayekuja.”*

Mungu aliahidi katika Kitabu cha Malaki katika Agano la Kale kuwa atamtuma mtu kama Eliya (Malaki 4:5). Mungu alisema kuwa atamtuma mtu ambaye atawaongoza watu wengi kumwendea Mungu kisha Mungu akalitimiza Neno hili la ahadi. Huyu mtu ambaye Mungu alimwahidi ni Yohana Mbatizaji. Bwana alisema, *“Na ikiwa mnataka kukubali, yeye ndiye Eliya atakayekuja”* (Mathayo 11:14). Watu wengi katika Agano la Kale walimsubiria sana Eliya atakayekuja. Kadri walivyokuwa wakimngojea Masihi, pia walikuwa wakimngojea Eliya atakayewaongoza kwenda kwa Masihi. Kisha Yohana Mbatizaji alizaliwa mwanzon kabisa mwa

kipindi cha Agano Jipya. Yohana Mbatizaji alizaliwa hapa ulimwenguni katika roho ya Eliya, na Bwana alimwandaa Yohana Mbatizaji kwa ajili ya wenye dhambi ili aweze kuwarudisha wengi kwenda kwa Mungu, na hivyo kuwakomboa toka katika hali ya dhambi ya kumwabudu Baali ambaye ni mungu wa uongo.

Hii ndio sababu Luka, mwanafunzi wa Yesu Kristo, aliiandika injili kwa kina toka katika asili yake. Pamoja na kuwa kwa sasa tunaifahamu vizuri huduma ya Yohana Mbatizaji kwa sababu tumeisikia na kuiamini injili ya maji na Roho, ukweli ni kuwa kuna watu wengi sana ambao bado hawamfahamu vizuri Yohana Mbatizaji na yale ambayo ameyafanya. Hata baadhi ya waamini wa Kikristo hawafahamu kuhusu Yohana Mbatizaji ambaye ameandikwa kwa namna ya umaana sana katika Maandiko. Watu hawafahamu pamoja na kuwa wanaisoma Injili ya Luka, Injili ya Mathayo, Injili ya Marko, na Injili ya Yohana, ilhali Yohana Mbatizaji ameandikwa kwa umuhimu sana katika Maandiko. Pamoja na kuwa Maandiko yanamzungumzia Yohana Mbatizaji kwa umuhimu mkubwa, ukweli ni kuwa bado watu wanamwalia Yohana kwa jicho la dharau, huku wakifikiri, “Yohana Mbatizaji ni mmoja tu wa manabii na watumishi wa Mungu.” Wanasema chochote kile kinachotoka katika mawazo yao pasipo jitihada za kumfahamu Yohana Mbatizaji kiusahihi.

Hata viongozi wa Wakristo wa leo wanazungumza mambo kama hayo. Huyu Baali ni nani? Baali anawakilisha mungu wa uongo wa ulimwengu huu wa sasa. Lakini Mungu Yehova ndiye aliyeko na aliyekuwako. Mungu alisema, “*Mimi niko ambaye niko*” (Kutoka 3:14). Huyu Mungu hakuumbwa. Lakini Baali ni nadharia ya kufikirika iliyumbwa kutokana na mawazo ya wanadamu. Wanadamu wanazifanya nadharia hizo kuwa ni kitu chao cha kuabudu ili kupata mafanikio. Nadharia

hizo zimeundwa toka katika viumbe vilivyoumbwa na Mungu, na vitu hivyo ni miungu. Na nadharia hizo ndio dini za ulimwengu.

Mungu wetu ni nani? Mungu Yehova, ni Mungu tunayemwamini, Mungu aliyeuumba ulimwengu kama inavyoelezwa katika Maandiko, Mungu wa Utatu anayeishi kwa mapenzi na nguvu zake. Kwa lunga nyingine, Yesu Kristo ni muumbaji wetu. Lakini kuna watu wengi katika ulimwengu huu ambao bado wanamwamini Baali. Watu wengi katika ulimwengu huu, bila kujalisha kuwa ni Wakristo au la, wanatengeneza miungu yao kutokana na fikra zao na wanaiamini miungu hiyo kwa fikra zao. Pia hali kama hiyo ilijitokeza wakati wa Yesu alipozaliwa, na kile ambacho Yohana Mbatizaji alikifanya ni kuifanya kazi ya nabii ambayo iliwafanya watu wamfahamu Mungu wa kweli. Yohana Mbatizaji alikuja katika roho ya Eliya na aliwafanya watu wamtambue Mungu wa kweli, na akawageuza watu wengi kwa kuwapa mioyo ya wenye akili.

Ni nani aliye Mungu wa kweli, mwenye uungu wa kweli? Je, Mungu aliyetuokoa toka katika dhambi ni Mungu wa kweli, au ni mungu ambaye hawezi kumwokoa hata mtu mmoja toka katika dhambi ndiye Mungu wa kweli? Ukweli ni kuwa mungu ambaye hawezi kuokoa hawezi kamwe kuwa Mungu wetu. Pamoja na hayo, kuna Wakristo wengi ambao wanamwita Baali kuwa ni mungu wao, pamoja na kuwa wanaliitia jina la Mungu Yehova kwa midomo yao. Baadhi ya watu wanaelezea kuwa kumwamini Baali ni kutengeneza aina fulani ya sura na kisha kuiabudu. Lakini ukweli ni kuwa Baali anaweza kuwa ni sura au shughuli yoyote. Pia Baali anaweza kuwa ni dhehebu au dini yoyote. Hii ina maanisha kuwa hata kule kuunda dhehebu fulani katika Ukristo kunaweza kuwa ni sawa na Baali kwa wafuasi wa dhehebu hilo.

Yohana Mbatizaji aliyembatiza Yesu Kristo alishuhudia kwa wazi kuhusu Yesu Kristo kwa watu wa ulimwenguni. Yohana Mbatizaji alishuhudia kwa wazi kuwa Yesu Kristo ni Mwokozi wetu. Yohana Mbatizaji alishuhudia kw wazi jinsi Bwana alivyozechukua dhambi zetu zote katika mwili wake kwa ajili yetu.

Yesu Kristo tunayemwamini ni Mungu wa kweli. Je, ulimwengu unaweza kutufanya sisi tufanikiwe? Inaonekana kana kwamba ulimwengu unaweza kutufanya tufanikiwe, lakini ukweli sio huo. Ni Mungu tu ndiye anayeweza kutufanya tufanikiwe. Ni Mungu tu ndiye anayeweza kutufanya tuwe na furaha, tubarikiwe, na kutufanya tufanikiwe. Mungu Yehova ndiye anayetuongoza katika maisha yaliyobarikiwa na anatufanya tuishi kwa furaha ya kweli; hakuna miungu yeyote inayoweza kufanya hayo. Mungu tunayemwamini ni Yesu Kristo. Yeye ni Mwokozi wetu.

Tunapoangalia, kuna waamini wengi wa Kikristo katika nyaka hizi. Lakini haja yao haiko kwa Mungu, bali haja zao zipo kwa baadhi ya watu, kwa baadhi ya madhehebu, na kwa baadhi ya asasi, pamoja na kuwa wanamwamini Yesu Kristo. Wanafikiri kuwa wanaweza kubarikiwa ikiwa wataabudu hivyo na kwamba watafanikiwa sana ikiwa watashikilia hivyo. Nikizungumza kiroho, kufanya hivyo ni sawa kabisa na kuaubudu miungu na kuabudu roho chafu.

Mioyo yao ipo katika biashara, ipo katika madhehebu yao, na hata kwa baadhi ya watu pamoja na kuwa wanatamka kwa midomo yao, “Bwana, Bwana.” Nilisema kuwa neno baali lina maanisha ‘bwana.’ Wao husema, “Bwana, Bwana,” kwa viumbe, badala ya kumwita Mungu kuwa ni Bwana, pia wanatafuta baraka toka kwa viumbe ambavyo Mungu aliviumba. Lakini Baali, ambaye ametengenezwa na mwanadamu, anaweza kwa kweli kuwafanya Waisraeli

kubarikiwa? Je, ni kweli kuwa Baali aliufanya ulimwengu huu kubarikiwa? Bali hakuweza kumfanya mtu yeyote kubarikiwa. Baali asingeliweza kuufanya ulimwengu huu kubarikiwa. Baali alijifanya kuwa anawasaidia watu na badala yake aliwanyonya na kuwafanya waangukie kuzimu, hakuweza kuwafanya watu waliomwabudu yeye kuwa na furaha hadi mwisho. Pamoja na kuwa inaonekana kana kwamba Baali anawabariki, ukweli ni kuwa hatimaye anawaongoza kwenda katika moto wa kuzimu. Miongoni mwa waamini wa Kikristo wa leo, basi wale ambao hawajapokea ondoleo la dhambi wanaye Baali kuwa ni bwana wao pamoja na kuwa wanajifanya kumuita “Bwana, Bwana.”

Kama nilivyosema kuwa neno Baali lina maanisha kuwa ni ‘mzigo.’ Basi ni kweli kuwa neno hilo lina maanisha kitu kilekile kwa kuwa kuna moyo wa udanganyifu ndani ya mioyo ya waamini wa Kikristo. Ninasema kuwa Wakristo siku hizi wana mioyo ya kuvihisia vitu, wakipima na kuchunguza jinsi vitu katika ulimwengu huu vinavyoweza kuwatumikia, au jinsi madhehebu yanavyoweza kuwatumikia, nakadhalika, wanafanya hivyo badala ya kuwa na imani ya kweli kwa Mungu anayewabariki. Mungu ndiye Bwana wetu na ni Mungu tu ndiye anayeweza kutupatia baraka za mbinguni. Ni Mungu Yehova tu ndiye anayeweza kutubariki. Ni Mungu Yehova tu ndiye anayeweza kufanya haya. Je, unaamini, Mungu ndiye Bwana wetu pekee.

Ni Kitu Gani Ambacho Yohana Mbatizaji Alifanya Katika Ulimwengu Huu.

Kazi ya Yohana Mbatizaji alikuwa akiwashuhudia watu wote kuwa Yesu Kristo tu ndiye Mwokozi wetu na akawafanya watu wafahamu jinsi Yesu alivyoziondolea mbali dhambi za

ulimwengu. Yohana Mbatizaji jinsi Yesu Kristo alivyozechukua dhambi zetu, na jinsi tunavyopaswa kumwamini Yesu Kristo ili kufanyika watoto wa Mungu, na jinsi tunavyopaswa kuamini ili kupokea baraka za mbinguni.

Miongoni mwa wale wanaosema wanamwamini Yesu, ukweli ni kuwa kuna watu ambapo wanamwabudu Baali. Wale Wakristo wasio na Roho Mtakatifu katika mioyo yao ndio hao wanaomwambudu huyu mungu Baali. Watu wote ambao hawajapokea ondoleo la dhambi ndio wale ambao wanamwabudu Baali. Watu wote ambao badohawajapokea ondoleo la dhambi ndio wale ambao bado wanamwabudu Baali. Wanamwita “Bwana, Bwana,” lakini hawajali kile ambacho Bwana anakisema. Wao wanaomba tu kwa Mungu wakiwa na moyo jasiri hali wakiomba baraka na hawapendi kusikia kitu chochote toka kwa Mungu.

Mungu ni mwenye hekima anayetueleza mambo yote kupitia Neno na jinsi tunavyoweza kupokea baraka, na juu ya kipi ni sahihi na kipi ni kibaya. Yeye pia ni Mungu aliye hai. Anatuongoza kwa Neno lake hatua kwa hatua na anawapatia waasi akili ya wenye haki, na anawapatia upendo wa kibaba kwa watoto wanaoamini. Mungu wetu yupo hai na anatuongoza katika njia ya haki na anazungumza nasi kupitia Kanisa na kwa kupitia watangulizi katika imani.

Lakini watu wanafikiri kuwa mungu asiye wa kweli Baali, au utajiri wa maliunaweza kuwapatia furaha. Lakini ukweli ni kuwa Baali hawezi kuwapatia watu furaha. Wakati ambapo Waisraeli wote walipomgeukia Baali na kumwabudu, Nabii Eliya alithibitisha kuwa nani ni Mungu wa kweli na akawageuza waasi kuwa wenye akili za wenye haki. Ni nani aliyekuwa kiongozi mkuu kama huyu? Alikuwa ni Eliya atakayekuja na ambaye si mwingine bali ni Yohana Mbatizaji. Maandiko yanasema kuwa Yohana Mbatizaji atawaongoza

watu wote kwenda kwa Yesu Kristo na kwamba watu wote watakuja kumwabudu Yesu Kristo kwa kupitia ushuhuda wake. Biblia inasema kuhusu hili. Haikutakuwa sentensi kali ikiwa nitasema kuwa wokovu wako utakuwa mbali sana ikiwa utakuwa haufahamu vizuri yale ambayo Yohana Mbatizaji ameyafanya. Watu wanaokwenda huku na huko wakisema fulani na fulani ni wazushi na kwamba ni watu wasiolipokea Neno la Mungu kwa kuwa ni wenye kujivuna, hali wakiwa hawafahamu lolote kuhusu Ukweli, basi ni hakika kuwa watu wa jinsi hiyo hawawezi kupokea ondoleo la dhambi.

Yohana Mbatizaji alikuwa ni mtu aliyekuwa kama Eliya. Bila shaka umeona jinsi Luka alivyoongea kwa kina kuhusu Yohana Mbatizaji toka katika chanzo chake, si ndivyo? Luka alithibitisha kuwa yeye aliyezaliwa akiwa na nguvu na roho ya Eliya ni Yohana Mbatizaji. Maandiko yanathibitisha kwa kina kuhusu Yohana Mbatizaji katika maeneo mbalimbali tena na tena. Je, unaamini kuwa Yohana Mbatizaji ndiye Eliya? Kifungu cha Maandiko ya leo kinaeleza, *“Naye [Yohana Mbatizaji] atatangulia mbele zake katika roho ya Eliya, ‘na nguvu zake, ili kuigeuza mioyo ya baba iwaelekee watoto,’ na kuwatilia waasi akili za wenye haki, na kumwekea Bwana tayari watu waliotengenezwa.”* Yohana Mbatizaji alimshuhudia Yesu Kristo kwa ulimwengu. Aliwashuhudia watu kuwa Yesu Kristo ni Mungu wa Kweli, na akawafanya watu wamgeukie Bwana. Aliwafanya watu wengi kupokea baraka za kweli.

Yohana Mbatizaji aliiandaa huduma yake kwa watu waliokuwa wakiamini katika haki ya Mungu, na akafanya kazi ya kuwarudisha katika ulimwengu wa wenye haki. Yohana aliishi nyikani, alivaa singa za ngamia, na chakula chake kilikuwa na nzige na asali ya mwitu. Yohana Mbatizaji aliwaamsha watu waliokuwa wakitamani kumwishia Mungu na

kuishi bila lawama, na akawafanya wamwishie Mungu, na aliwaongoza watu wengi kwenda kwa Kristo. Yohana alimshuhudia Yesu hadi mwisho. Sio tu kwamba aliwafanya watu kupokea ondoleo la dhambi, bali aliwafanya pia wana wa imani kuwa na imani sahihi katika mioyo yao kwa Mungu. Kwa kupitia maisha yake, Yohana Mbatizaji alituonyesha njia sahihi ya kumwendea Mungu ilivyo. Kwa kweli alikuwa ni mtu asiye na lawama. Maandika yanaeleza kuwa Yohana Mbatizaji aliishi katika nyika. Yohana Mbatizaji hakuishi katika ulimwengu. Ni jambo lisilo na maana ikiwa tunafikiri kuwa tunaweza kumtumikiai Mungu hali tukiwa tunajichanganya na ulimwengu huu katika fikra zetu. Pia haileti maana kuvitazama vitu vya ulimwenguni kwa kina na kuvikubali huku tukisema kwa midomo yetu kuwa tunamwamini Mungu. Kule kusema kuwa Yohana Mbatizaji alikula asali na nzige wa mwitu kuna maanisha kuwa alikula kile ambacho Bwana alimpatia. Hii ina maanisha kuwa yeye alimtegemea Mungu alipokuwa akiishi katika ulimwengu huu.

Yohana Mbatizaji ni mfano wa watumishi wa Mungu. Pamoja na kuwa tuna mapungufu, basi ni lazima tujitoe kwa Mungu na kuishi kwa ajili yake, na pia ni lazima tumshuhudie Yesu Kristo katika maisha yetu yote. Ni lazima tuishi maisha yanayoweza kuwageuza waasi, yaani watu walioanguka katika dhambi, ili kuwaleta katika akili za wenye haki. Ni lazima tuishi maisha ambayo yanamdhahirisha Bwana, yaani maisha ya kuwafanya watu wapokee baraka. Luka pia alikuwa akizungumzia ukweli huu.

Kwa kupitia Neno, tumeweza kumchunguza Yohana Mbatizaji kuwa ni nani, ambaye ni Eliya atakayekuja. Yohana Mbatizaji ni nani? Yeye ni Eliya wa Agano la Kale. Nani ni mwakilishi wa Waisraeli? Musa aliipokea Torati ya Mungu na akaitoa hiyo Torati kwa Waisraeli, lakini mwakilishi wa kweli

wa Waisraeli ni Eliya. Katika Agano la Kale, Eliya aliishi akimshuhudia Mungu na kuwarudisha Waisraeli kwa Mungu, kisha akaenda kwa Mungu akipanda gari la farasi wa moto.

Yohana Mbatizaji ni Eliya Atakayekuja na Mwakilishi wa Wanadamu Wote

Ukiachilia mbali kuwa Yohana Mbatizaji anatoka katika ukoo gani na katika zamu gani, ukweli ni kuwa bado tunaweza kuona kitu kimoja kwa wazi kabisa pale tunapoangalia juu ya kuzaliwa kwa Yohana Mbatizaji. Ukweli huo ni kuwa Yohana Mbatizaji ni mtu ambaye Mungu alimtuma. Wazazi wake walikuwa ni wazee mno kuweza kuzaa watoto. Hivyo, ni wazi kuwa hakuzaliwa kwa kupitia utaratibu wa kawaida wa kibinadamu au kupitia nguvu za kibinadamu. Kwa hakika ilikuwa haiwezekani tangu mwanzo. Hivyo, Biblia inaeleza wazi kuwa, *“Palitokea mtu, ametumwa kutoka kwa Mungu, jina lake Yohana” (Yohana 1:6)*. Yohana Mbatizaji alizaliwa kwa kupitia majaliwa maalum ya Mungu, na kupitia kazi, nguvu, na mamlaka ya Mungu. Imeandikwa kuwa watu wengi watakurahia kuzaliwa kwake, na sio tu wazazi wake. Kuzaliwa kwa Yohana Mbatizaji ni baraka na furaha kwetu sisi pia. Ikiwa Yohana Mbatizaji asingelizaliwa hapa ulimwenguni, basi ukweli ni kuwa ingelikuwa vigumu kwetu kumwamini Yesu na kwa sababu hiyo tungelidhihakiwa na Ibilisi.

Tumefikia hatua ya kumfahamu Yesu Kristo. Ikiwa tungelimfahamu Yesu Kristo na kutomfahamu Yohana Mbatizaji na huduma yake, basi ni hakika kuwa Ibilisi ataturaribu kuangukia tena katika dhambi, na tungelikuwa wenye haki leo na kisha wenye dhambi kesho. Tunaweza kufikiri kuwa tunaweza kwenda mbinguni ikiwa tutakufa

katika siku yenye bahati wakati imani yetu ni imara, na kwamba tunaweza kwenda kuzimu ikiwa tutakufa katika siku isiyo na bahati wakati imani yetu ni dhaifu. Ni kweli kuwa imani ya jinsi hiyo si sahihi. Kwa hiyo, hatuwezi kupokea ondoleo kamili la dhambi ikiwa hatuzifahamu kiusahihi huduma ambazo Yohana Mbatizaji alizitimiza. Uthibitisho binafsi wa ondoleo la dhambi si sahihi mbele ya uwepo wa Bwana.

Ni lazima tuyafahamu majukumu ambayo Yohana Mbatizaji aliyatimiza. Na hii ndio sababu Maandiko yanaeleza mambo haya kwa kina katika asili yake. Je, unafahamu jinsi habari za Yohana Mbatizaji ambazo Luka ameziandika kwa kina zilivyo za muhimu? Luka aliandika ukweli wa kihistoria kwa uangalifu mkubwa kwa kuwa habari hii ilikuwa ni ya muhimu sana. Tunapoangalia katika maelezo haya ya kihistoria tunaweza kufahamu ni lini Mfalme Herode alitawala. Habari hizi zinaeleza kwa usahihi juu ya kabla na baada ya kuja kwa Yesu Kristo.

Wakati ule kuhani Zakaria alipokuwa akifukiza uvumba, basi ndipo malaika alipomtokea na akamwambia kuwa Bwana atampatia mtoto na kwamba mtoto huyo ataitwa Yohana. Malaika aliyasema haya kabla Yohana hajatungwa mimba. Malaika alimbariki na akamwambia Yohana atawaleta watu wengi kwenye akili za wenye haki. Sasa, huyu Yohana Mbatizaji ni Nani? Maandiko yanaeleza kuwa Yohana ndiye aliyekuja katika roho ya Eliya na kwamba yeye ndiye Eliya atakayekuja. Hivyo basi, watu wengi watamwamini Yesu Kristo kwa kupitia Yohana Mbatizaji ambaye ni mwakilishi wa wanadamu wote na Kuhani Mkuu, na kufahamu kuwa amezihamishia dhambi zote za ulimwengu kwenda kwa Yesu Kristo aliyekuja kama Mwanakondoo wa sadaka ya kuteketezwa. Yohana Mbatizaji alishuhudia kuwa Yesu Kristo

ni Mwokozi wetu sote.

Vitu vyote tulivyokuwa tunaviamini vilikuwa ni bure hasa pale tulipokuwa hatuifahamu huduma ya Yohana Mbatizaji na haki ya Yesu. Tulisema tu kwamba tunaamini toka katika misimamo yetu, lakini hatukuwa na ushahidi kwamba Mungu ametuokoa toka katika dhambi za ulimwengu. Lakini baada ya kuifahamu huduma ya Yohana Mbatizaji, hapo ndipo tuliweza kutambua kuwa hatupaswi kumng'ang'ania Bwana kwa kutegemea misimamo yetu, na badala yake tunapaswa kuamini kuwa Yesu Kristo ametuokoa kwa kupitia injili ya maji na Roho. Kuwamini kwa namna hii ndio imani sahihi. Tuliposema kuwa tunamwamini Mungu pasipo kumfahamu Yohana Mbatizaji, basi ni hakika kuwa tulikuwa hatumwamini Bwana kwa mujibu wa Neno lake, na badala yake tulikuwa tunamwamini kwa mujibu wa misimamo yetu ya kibinadamu. Nini kinatokea pale tunapomwamini Yesu toka katika misimamo yetu binafsi? Ni hakika kuwa imani yetu inaanguka, hasa pale inapokuwa dhaifu na hivyo hatimaye tutakwenda kuzimu. Hali ya kufanya dhambi kila siku na kufanya sala za toba kila siku kama Wakristo wengi wanavyofanya ni hakika kuwa kufanya hivyo si imani sahihi. Pia kule kusema, “Ninakuamini Wewe” toka katika msimamo binafsi na kuushikilia ni imani isiyo ya kweli. Imani inayoshikilia katika msimamo binafsi inaanguka kirahisi wakati ninapokuwa dhaifu.

Lakini ikiwa tunaifahamu huduma ya Yohana Mbatizaji kwa usahihi, basi hapo tunaweza kufahamu jinsi Yesu alivyozichukulia mbali dhambi zetu zote na pia tutafahamu jinsi alivyomshuhudia Yesu Kristo. Pia Yohana Mbatizaji alisema Yesu ni Mwanakondoo wa Mungu azichukuaye dhambi za ulimwengu na akatufahamisha kuwa hatuna dhambi yoyote kwa sababu ya Yesu. Bwana na Yohana Mbatizaji waliamua kutuchukua na kutupeleka Mbinguni kwa kupitia

huduma zao zenye ushirikiano. Hivyo, hatuna la kufanya zaidi ya kwenda Mbinguni hata kama hatutaki kwa sababu walifanya kazi kwa juhudi sana katika kukamilisha hilo. Yesu alituokoa kwa kuitimiza yaki ya Mungu kwa kupitia Ubatizo wake. Hivyo tumepokea wokovu kwa jinsi hiyo.

Mungu aliamua kutuokoa toka katika dhambi za ulimwengu na akalitimiza hili kwa kupitia maji, damu na Roho Mtakatifu (1 Yohana 5:4-7). Bwana alilishuhudia hili kwa kupitia Yohana Mbatizaji. Kwa nini Yohana Mbatizaji alizaliwa? Yohana Mbatizaji alizaliwa hapa ulimwenguni ili kumshuhudia Yesu Kristo, ili kuwafanya watu wawe wenye haki, kuithibitisha kazi aliyoifanya Yesu Kristo, kuonyesha kuwa Yesu ni Mungu wa kweli, kushuhudia kuwa Yesu ni Mungu wa kweli aliyeumba ulimwengu, na kwamba Yeye ni Bwana aliyewaokoa wanadamu wote. Ni Yesu ndiye aliyezetoweshea mbali dhambi za wanadamu wote kikamilifu na ndiye aliyewaumba. Yohana Mbatizaji alikuja hapa ulimwenguni ili kuushuhudia ukweli huu wote.


Kwa kweli ninamshukuru Bwana aliyekuja kwetu kwa kupitia injili ya maji na Roho. Ninafikiria yale ambayo tutapaswa kuyafanya wakati tunaendelea kuishi huko mbeleni. Ni lazima tuwarudishe watu wengi kuja katika akili za wenye haki, na kuishi maisha yanayomshuhudia Yesu Kristo, na kisha kushuhudia kwamba Yesu ni Mungu wa kweli na kwamba ndiye pekee aliyezibeba dhambi zote za ulimwengu. Biblia inatueleza haya.

Ninawataka ninyi nyote kuishi maisha ya ushuhuda kama Yohana Mbatizaji. Kwa kweli ninataka ninyi nyote mpokee baraka kwa msaada wa Mungu na kisha muendeleo kuishi maisha yenu mkiwa wahubiri maisha yenu yote. ☒


PAKUA

Vitabu na vitabu vya sauti vya Mchungaji Paul C. Jong kwenye simu yako mahiri, kompyuta kibao au PC kwenye wavuti yetu. Unaweza kusoma na kusikiliza mahali popote, hata wakati hauna muunganisho wa mtandao.

 www.bjnewlife.org



Ukurasa wa nyumbani



vitabu

vya

Vitabu pepe





REV. PAUL. C. JONG

Mwandishi amekuwa akihubiri injili ya maji na Roho kwa nafsi zilizopotea katika ulimwengu huu kwa takribani miongo miwili hadi sasa.

Kama mwanzilishi wa Huduma ya Utume wa Maisha Mapya (The New Life Mission), kwa sasa anawaelekeza na kuwatia moyo wanafunzi wengi wa Yesu katika shule ya kimissionari ya Utume wa Maisha Mapya (The New Life Mission School).

Baada ya kuanzisha makanisa ya kimissionari katika maeneo mbalimbali duniani, kwa sasa anaieneza injili kupitia kazi zake za kiuandishi.

Kwa sasa vitabu vyake vimekuwa vikitafsiriwa na vinasomwa katika zaidi ya lugha kuu 96 ulimwenguni.

Este ministerio y su conocimiento es obligatorio



¿Por casualidad piensan que no importa que se necesite el ministerio de Juan el Bautista o no se necesite? Deben creer según la Palabra de Dios escrita. Debemos entender y creer en el ministerio de Juan el Bautista dentro del contexto del ministerio de Jesucristo. Juan el Bautista es en el Nuevo Testamento el profeta Elías, que según el Libro de Malaquías 4, versículos 4-5, se dijo que sería enviado al mundo. Como el profeta Elías que había de venir, Juan el Bautista nació 6 meses antes que Jesús y fue quien pasó los pecados del mundo a Jesús al bautizarle en el río Jordán cuando tenía 30 años. Así debemos convertirnos en verdaderos recipientes de las bendiciones de Dios al conocer el ministerio de Juan el Bautista y aceptar el ministerio de Jesucristo.

- Paul C. Jong -